

## 傷寒論集成目錄

首卷	張仲景自序	附序目	一
卷一	太陽上篇	.....	一
卷二	太陽中篇	自首條至發汗後 水藥不得入口條	五三
卷三	太陽中篇	自梔子豉湯 條至中篇尾	一〇三
卷四	太陽下篇	自首條至甘 草瀉心湯條	一六一
卷五	太陽下篇	自赤石脂湯條 至下篇尾	一九七
卷六	陽明篇	自首條至陽明 病發潮熱條	二二三
卷七	陽明篇	自陽明病發下 利條至少陽篇尾	二四九
卷八	太陰篇	自首條至 少陰篇尾	二七一
卷九	厥陰篇	.....	三〇一
卷十	霍亂篇	自首條至差 後勞復篇尾	三一九

# 傷寒論集成卷一

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

## 辨太陽病脈證并治上第一

〔一〕太陽之爲病脈浮。頭項強痛而惡寒。

喻昌曰。先挈太陽病之總脈總證。統中風傷寒爲言也。

內藤希哲曰。此以後稱太陽病者。指此脈此證。一一見者而言。非單指脈證悉具者而言也。

張璐曰。脈浮者。邪氣併於肌表也。

程應旂曰。太陽經之見證。莫確於頭痛惡寒。故首揭之。

吳人駒曰。頭爲三陽之通位。項爲太陽之專位。有所障礙。不得如常之柔和。是爲強痛。

成無已曰。惡寒者。齋齋然增寒也。雖不當風。而自然寒矣。惡風者。見風至則惡矣。得以居密室之內。幃帳之中。則坦然自舒也。

方有執曰。項。頸後也。惡寒者。該風而言也。

正珍曰。太陽指表而言。蓋傷寒以大經言之。古來醫家相傳之說。不可遽易者也。夫人之常情。每信於其所習見。而疑於其所未嘗習見者。故仲景氏亦不得已。而襲其舊名。實則非經絡之謂也。借此配表裏脈證已。故論中無一及經絡者。可見此書以六經立名。猶數家者施以甲乙爲記號。註家不察。解以素靈經絡之說。可謂不解事矣。大氏外邪之中人。其始浮在肌表。謂之太陽病。最淺且輕。所以居三陽之首也。脈浮邪氣在表之診。千金方曰。凡脈浮之與沉。以判其病在陰陽表裏也。頭項強痛。謂頭痛項強。此蓋文之一

體。猶稱車馬羸敗。

後漢書羊續傳

耳目聾瞶。

晉書山濤傳

也。故瓜蒂散條云。病如桂枝證。

頭不痛。項不強。是也。太陽病。有傷寒。有中風。此條統而論之。故惟云脈浮。而未分其緊與緩也。其所謂惡寒。亦兼惡風言之。惡風輕。惡寒重。舍輕取重。所謂舉大而小從者也。其唯稱惡寒。而不言發熱者。以太陽傷寒之初證。有或已發熱。或未發熱之異也。後凡稱太陽病者。皆指斯條之脈證而言。譬如太陽與陽明合病者。必自下利。葛根湯主之。若但見自下利三字。以爲葛根湯證。則與彼太陽少陽合病。自下利者。與黃芩湯條。其亦奚擇焉。讀者莫草草看過。

(二) 太陽病。發熱汗出。惡風。脈緩者。名爲中風。

王肯堂曰。太陽病。上條所揭云云者。是也。後皆倣此。

汪琥曰。脈緩當作浮緩看。

中西惟忠曰。惡寒發熱。惡寒之中且發熱。發熱之中且惡寒也。

張志聰曰。汗出而毛腠虛。故惡風。

方有執曰。中當也。

喻昌曰。中字與傷字無別。即謂傷風亦可。

正珍曰。此條承首條論太陽病表虛中風之脈證也。其不言脈浮頭項

強痛者。承首條略之也。汗出惡風。對下條傷寒無汗惡寒言之。名爲二

字。示其本只一氣。非他邪也。品字漢字注云。水經曰。漢水出嶺西都氏道縣城家山。東至武都。始爲漢水。蓋漢水發源時。不名漢而名漢。其

後又不止名漢。而更名滄浪。以水所經歷。謂之地得名。謂之爲者。明其只此一統非他水也。

〔傷寒中風辨〕太陽病有傷寒有中風。其脈其證判然各異。治亦不同。不可不辯也。先輩諸公皆謂風爲陽邪。寒爲陰邪。風邪傷衛。謂之中風。寒邪傷營。謂之傷寒。雖然風之與寒均是一氣。合而不離者也。故冬月雖寒無風。則溫。夏時雖熱有風。則涼。此風送寒來。寒隨風入。故也是以寒之傷人。不能無風。而風之傷人。亦不能無寒。豈有風唯傷衛而不傷營。寒唯傷營而不傷衛之理乎。况營衛等事。本仲景之所不言乎。其妄不辨而明矣。夫風寒均是一氣。至其感人。或爲中風。或爲傷寒者。何也。



蓋以人之體氣素有虛實之異其所受之邪每從其虛實而化其從虛而化者謂之中風其從實而化者謂之傷寒所以名之傷寒中風者以其惡寒惡風之異也雖然惡風者不得不惡寒惡寒者不得不惡風是必然之勢也但無汗者之惡風不如汗者之惡風有汗者之惡寒不如無汗者之惡寒此中風傷寒之辨也雖大段若斯然徧考諸論中傷寒亦謂之中風中風亦謂之傷寒如太陽中風脈浮緊傷寒脈浮自汗出傷寒脈浮緩傷寒汗出而渴傷寒中風五六日不可枚舉由是觀之太陽病特表出斯二證者本唯爲分桂枝麻黃兩證之設已故傷寒中風四字有指麻黃桂枝證言之者有通稱外邪之證者固不可一概而看要顧其脈證如何而已其題書曰傷寒論亦此義也豈特指麻黃湯證言之已乎近閱中西惟史名數解曰傷寒中風惟是輕重之別已謂其重者爲寒謂其輕者爲風寒曰傷風曰中亦唯輕重之別已正珍謂傷寒中風宜以虛實言之不可以輕重言矣傷寒亦有輕重中風亦有輕重豈徒謂傷寒輕者爲中風謂中風重者爲傷寒而可乎傷寒輕者麻黃湯主之重者大青龍湯主之傷寒既然中風豈獨得不然乎以意推之所謂太陽病頭痛發熱汗出惡風者是中風之輕者雖初服桂枝湯反煩不解者先刺風池風府却與桂枝湯者是中風之重者已故其

證雖輕傷寒自傷寒。其證雖重中風自中風。決不可以輕重言矣。故論曰。桂枝本爲解肌。若其人脈浮緊發熱汗不出者不可與也。豈非虛實迥異乎。

〔三〕太陽病。或已發熱。或未發熱。必惡寒。體痛嘔逆。脈陰陽俱緊者。名爲傷寒。成本篇作日。非。

方有執曰。或者未定之辭。必者。定然之謂。曰或曰必者。言發熱早晚不一。而惡寒則定然即見也。

金鑑曰。胃中之氣被寒外束。不能發越。故嘔逆也。

劉棟曰。惡寒惡風之深劇者也。身體痛者。惡寒之甚也。嘔逆乾嘔之甚者也。

正珍曰。此亦承首條論太陽病表實傷寒之脈證也。故亦不及脈浮頭項強痛也。陰陽俱三字。王叔和所攙入。宜刪。名爲二字。諸註本多作名曰。非也。今據玉函宋板爲正矣。嘔實少陽正證。其在太陽。是兼證已甚。根加半夏湯條可參考。方有執云。嘔吐也。逆。俗謂惡心。錢潢云。嘔逆。氣逆而嘔也。瀨穆云。嘔。嘔吐也。逆。逆上也。惟忠云。嘔逆者。欲嘔而其氣衝於上者也。予謂諸說俱未是。按嘔逆與吐逆同。逆亦嘔已如下利疼痛之類。可以見矣。緊。品字義曰。急也。通引大急者亦謂之緊。語云。大絃急者小絃絕。言緊之大過也。正珍曰。緊乃緩之反。所謂數急者是也。脈經諸書多與致對說。

非也。

〔附錄〕原夫脈之動於周身也。唯是一血氣之所貫。是以人迎氣口太衝跌陽。靡適不齊。一豈復有陰陽尺寸之可分別者哉。故其分陰陽論尺寸者。皆未知脈之所以爲脈者耳。故論中言脈者。百五十許條。未嘗分陰陽尺寸也。可見其間稱陰陽尺寸者。皆是王叔和所攙。決非仲景氏之本色也。惟忠云。審仲景氏所論。其惟曰脈浮脈沈者之最多。而其逮陰陽寸關尺者之最少也。若必以陰陽寸關尺爲不可不候者。則其惟曰脈浮脈沈而不指其所候之在何處也。何其粗且略耶。觀乎其惟曰脈浮脈沈者最多。且不指其所候之在何處。則其所候之處。必當在寸口也。而未必若後世三指取三部。惟其候之也。潛心於茲。無敢失之輕易矣。惟忠此言。真可謂診家確論矣。

〔附錄〕門人某問曰。據先生之說。凡邪氣之犯人。其人表裏俱實。則發爲三陽證。表裏俱虛。則發爲三陰證。而其於三陽之初也。表虛而裏實。則發爲太陽中風。表裏俱實。則發爲太陽傷寒。雖然業既實矣。邪將何緣得犯入庫。余曰。實如吾子之言。但邪之襲人。必且俟夫腠理空疏之時。然後敢入焉。故雖虛人。當其腠理敏密。則邪氣不能得而犯焉。雖實人。當其腠理空疏。則邪氣肆然而入焉。故不問其人之虛弱與實強。苟

方其勞動飢餓入房出浴之際。而腠理適不密。則邪氣乘其一時之虛而入焉。此所以無虛實皆能致病者也。問者唯唯而退。因錄問答之言以附於此云。

〔四〕傷寒一日。太陽受之。脈若靜者。爲不傳。頗欲吐。若躁煩。脈數急者。爲傳也。

〔五〕傷寒二三日。陽明少陽證不見者。爲不傳也。

劉棟曰。右二條。後人之言也。

惟忠曰。凡疾痰之於淺深緩急也。莫不脈證之盡焉。然又日之多少。或爲之轉機。則日數何不舉也。所以繫之以日數也。雖則繫之以日數乎。亦惟概舉以爲法焉爾。乃其不曰一日二日三日。而曰一二日二三日者。如曰者。豈非概舉乎。又有不曰一二日二三日。而曰一日二日三日者。如曰一日太陽受之云云。二三日陽明少陽證不見云云。發於陽者七日愈。發於陰者六日愈云云。是也。雖均之以日數乎。與其取之於概。曰一二日二三日。自不同也。乃必之于此。曰一日二日三日者。蓋取諸素問也。素問之於說。一日太陽受之。經各一日。至厥陰凡六日。此不取之於概。而必于此者也。必于此者。推之於理者也。推之於理者。施于事必差。仲景氏之於論。皆施于事者也。奈何從夫理之爲。而今及于此者。蓋後人

謬窺仲景氏所論之似乎素問之說。取以自補者。遂傳于今耶。亦不可不擇矣。故今以乎概者爲正。如其必于此者。則舍旃。

〔六〕太陽病。發熱而渴。不惡寒者。爲溫病。若發汗。已身灼熱者。名風溫。風溫爲病。脈陰陽俱浮。自汗出。身重。多眠睡。鼻息必鼾。語言難出。若被下者。小便不利。直視。失溲。若被火者。微發黃色。劇則如驚癇。時瘈瘲。若火熏之。一逆尙引日。再逆促命期。按爲溫病二字。當作名爲溫病四字。做上一二條例。

此條論太陽病表虛表實之外。別有一種溫病者。使之不混也。但其若發汗以下。王叔和所加。較之傷寒例。其廣自彰彰矣。况其曰灼熱。曰陰陽俱浮。曰一逆尙引日。曰再逆促命期。皆非仲景氏之辭氣乎。按素問熱論云。凡病傷寒而成溫者。先夏至日者爲病溫。後夏至日者爲病暑。暑當與汗皆出。勿止。皆。備也。勿。無也。雖論亦有與汗皆出語。病源候論引此作與及後皆亡。孟子引之。汗備出。又詩周頌。降福孔皆。晉書作降福孔備。傷寒時日易變。手皆作備。是皆可備也。又陰陽應象大論云。冬傷於寒。春必病溫。靈樞論疾診

尺篇云。冬傷於寒。春生瘧熱。瘧之爲言單也。但熱而無惡寒之謂。而可見也。其他論溫病者。猶且數篇。皆寒毒留連於內。至於春溫之時。發動作病者也。故名曰溫病。蓋得之漸漬於個陰恒寒之中。而不自覺其被襲者也。非一朝一夕之故也。故其發也。亦復有漸矣。非夫傷寒中風得諸一時之虛者之比也。是以唯熱而不惡寒。又所以稱瘧熱也。今仲景氏冠之以太陽

病者。一以其發動之初言之。一以其頭項強痛言之。病源侯論云。冬時嚴寒。人有觸冒之。寒氣入肌。肉。至春得發氣而發。則頭痛壯熱。謂之溫病。以別夫陽明病之必自惡寒發熱而來者也。第此

病多在荆室蓬戶之人。而不在重貂累蓐之門也。此所以都下甚稀而村鄙多有之也。往歲房州一漁師彌五左衛門者。來寓都下。時同友人賞花於東廠山。飲酒三四盞。歸後忽爾發熱。頭痛岑岑。大渴大煩。殆如陽明之證。延余請治。余乃問曰。有惡寒乎。其人曰。惟是發熱與渴已。無有一毫惡寒也。就切其脈。洪大而數。蒸蒸汗出。因合大劑白虎加人參湯以與之。數日。徐徐復故。是乃冬傷於寒。至春成溫者也。嘗觀內藤希哲解惑論云。夫中邪之大者。莫不即病焉。若其邪小者。留而不去。則不過成疔成積。豈有寒毒纔藏于肌膚。至春夏爲夫溫暑之六病乎哉。但冬不藏精者。精氣虛微。至春夏不勝時令之氣。感而爲溫熱病耳。蓋取諸錢潢之說矣。錢潢源流集云。溫者。天時溫暖之邪氣也。感之即爲溫病。非謂冬不藏精也。此以寒字爲人之腎也。新說雖出。程應旼。實至於錢潢而成矣。其略曰。寒乃北方寒水。在人則爲兩腎。果然則春傷於風。以爲不藏魂乎。夏傷於暑。以爲不藏神乎。妄執大焉。雖然時令傷風寒之病。未初有不由表而入者。豈復有不由惡風寒而發者邪。仲景氏於中風傷寒之二證。必稱惡風惡寒者。以爲何如乎。近又觀中西惟忠辨溫病云。嗚呼。此何以知其不即病。而至春至夏而變乎。倘能知焉乎。不若速施之治。而不使其寒毒之藏肌膚也。

又何俟其至春至夏而變乎。孰謂素難之不妄虐。以余觀之。惟忠之妄。甚於希哲。何者。希哲之言。本出錢潢吐唾之餘。固不足以掛諸牙頰。惟忠則以拔羣之才。刻意仲景氏之書。自以爲千載一人。視天下醫者。猶螻蟻然。然而其言狂妄若斯。可不辨乎。夫古昔聖人之所以知夫春溫夏熱。皆出一寒毒者。蓋本諸貴賤異等。苦樂殊業之源。仰觀俯察。然后知之。豈其人自知之謂乎哉。假令有明者能知之者。將何術可以療諸未發乎。顯然太陽淺證。猶尙有失之治。以至少陽陽明而斃者。而矧沈潛伏匿之邪。其孰能謀之於未發乎。惟忠之妄。豈不甚於希哲耶。且夫邪氣之潛而不見者。世固甚多。若夫痘瘡之發於胎毒。風火傷。楊梅毒之再發者。此皆伏邪在身。而不自知覺者也。他如史傳所記扁鵲之於桓侯。倉公之於齊丞相舍人奴。華佗於嚴昕。亦皆預知之數日數月前者也。又古有行漸毒之術者。人雖服其藥。當時不覺其遭害。至經數月之久。其毒忽發。發則死矣。又如水銀輕粉之類。雖稱多毒乎。其發也。亦必在數日之後也。由此推之。寒毒之留連於人身。至春夏而發者。亦何疑之有。余嘗於十餘載前。著溫病考一編。備言其義。丙辰之春。祝融奪稿。今不復存矣。因聊舉其大義。以俟知音。雖然。仲景氏逝矣。孰知余言之不狂。

〔七〕病有發熱惡寒者。發於陽也。無熱惡寒者。發於陰也。發於陽七日愈。發於陰六日愈。以陽數七。陰數六故也。

此條三陰三陽大綱領。寒熱虛實之原本。不可不明也。但其發於陽七日愈以下。王叔和所補。今不取也。按玉函經以此一節爲太陽篇開卷第一章。可謂仲景氏真面目也。後人不知。妄次之溫病章後。遂遺全編大法。不復明於世。悲哉。夫外邪之岐而爲寒熱兩途者。固非邪氣有二也。皆由其人虛實而已。所謂陰陽二字。指其人固有寒熱虛實之殊而言。太陽少陽陽明皆屬實熱。少陰太陰厥陰皆屬虛寒。可以見矣。其發於陽之始。謂之太陽。發於陰之始。謂之少陰。太陽終乎陽明。少陰終乎厥陰。少陽與太陰。皆其間證而已。此章就其病發之始而言。所以稱發也。先輩諸醫。不通此義。妄分風寒於二邪。以發於陽者爲中風。以發於陰者爲傷寒。指陰陽以爲風寒。指無熱以爲未發熱。方有執喻昌諸君形及金匱皆爾。雖然風寒本一邪氣。非岐而有二也。營衛亦是仲景氏之所不取焉。且無熱之與未發熱。文義大異。豈可混同乎。其說至此而窮矣。又有纔知其發於陽發於陰之爲陰證陽證。而未盡其本義者。訓夫陰陽二字。以爲陰經陽經者。程應旌張景岳志遺錢潢及高壽養皆言義方諸人皆爾。此雖似舉其一隅。然而經絡之說。亦是仲景氏所不據。論中無一及此者。其說亦至此而窮矣。又有發熱惡寒



爲三陽總證。無熱惡寒爲三陰總證。陰陽爲表裏者。

劉棟樵志二  
子皆爾。

然奈彼

陽明之純於裏。與少陰之專於表何。又奈陽明之唯有熱而無惡寒何。其說亦至此而窮矣。又按成無已訓陰陽爲寒熱。似則似矣。雖然寒之與熱。皆起自虛實。是虛實本而寒熱末也。成氏徒語寒熱。而不言虛實。要亦不知寒熱之所以爲寒熱者也。且其訓發爲傷。吾未知何所攷據。又觀全書所引戴元禮說。既以陰陽爲經之陰陽。又指以爲邪之陰陽。然就一字立二義。亦古之所無。况其說皆是仲景氏所不取者乎。其說亦至此而窮矣。嗚呼。自後漢迄今千有五百載。了無一人能得本旨者。是皆未曾熟讀詳玩故而已。嗚呼。醫苟不知陰陽之所以爲陰陽。則仲景氏之旨不可得而窺焉。傷寒之病。不可得而療焉。其所關係。蓋非細故也。學者察諸。○外臺祕要曰。夫病發熱而惡寒者。發於陽。無熱而惡寒者。發於陰。發於陽者。可攻其外。發於陰者。宜溫其內。發外以桂枝。溫裏宜四逆。正珍曰。外臺所載雖不知據何書。幸足以窺仲景氏之微意矣。因記備參考。

〔八〕太陽病。頭痛至七日以上自愈者。以行其經盡故也。若欲作再經者。鍼足陽明。使經不傳則愈。

〔九〕太陽病。欲解時。從巳至未上。

〔十〕風家表解而不了了者，十二日愈。

劉棟曰：右三條後人之所記也。

〔十一〕病人身大熱，反欲得近衣者，熱在皮膚，寒在骨髓也；身大寒，反不欲近衣者，寒在皮膚，熱在骨髓也。上近字依成  
本讀之。

成無已曰：皮膚言淺，骨髓言深，皮膚言外，骨髓言內，身熱欲得衣者，表熱裏寒也；身寒不欲衣者，表寒裏熱也。

正珍曰：表熱裏寒，通脈四逆湯之證也；表寒裏熱，白虎湯之證也。厥陰篇曰：下

利清穀。裏寒外熱，二云云者。通脈四逆湯主之。又曰：陽寒厥而脈者。白虎湯主之。按大寒大熱之大，當爲太音讀，猶言甚。

非大小之大也。論中有微熱微惡寒，而無小熱小惡寒者，可以見矣。身大熱者，謂皮膚之表有翕翕之熱，上言身下言皮膚，其義不待解而了了。餘義見乾薑附子湯條，再按此條不似仲景氏辭氣，疑是古語。仲景氏採以錄之耳。通於文辭者，自能辨之。又按張璐以此二證爲太陽表病，近衣爲虛弱素寒人之病，不近衣爲壯盛素熱人之病，且云：若以皮膚爲表，骨髓爲裏，則麻黃湯證、骨節疼痛，其可名爲有表有裏之證耶？張璐此說甚非也。表證豈有不惡寒者乎？又按志聰以太陽與少陰言之，亦非也。

〔十二〕太陽中風，陽浮而陰弱，陽浮者熱自發，陰弱者汗自出，啻啻惡寒。

漸漸惡風。翕翕發熱。鼻鳴乾嘔者。桂枝湯主之。

此條王叔和攬入之文。非仲景氏語也。先輩諸醫。皆不知其所以然。奉爲金科玉條。抑何不達於辭義之甚。蓋仲景有仲景之辭義。叔和有叔和之辭義。其辭其義。斷然不同。若彼辨脈平脈及傷寒例。人皆能知其爲叔和。苟能知其爲叔和。則此條之非仲景氏言。亦不俟辨而得矣。

〔十二〕太陽病。頭痛發熱。汗出惡風者。桂枝湯主之。者字據成本補之。

方有執曰。主。主當也。言以是爲主當。而損益則存乎人。蓋脈證無有不相兼而見者。所以經但活潑潑不欲人拘執之意也。

正珍曰。此太陽中風之正證。表虛者也。其不言脈浮緩者。承上省之也。表虛非麻黃湯大發汗之所宜。故主以桂枝湯。溫而散之也。

桂枝湯方

桂枝二兩  
去皮

芍藥二兩

甘草二兩  
炙

生薑三兩  
切

大棗十二  
枚擘

右五味。咬咀三味。以水七升。微火煮取三升。去滓。適寒溫。服一升。服已須臾。歔熱稀粥一升餘。以助藥力。溫覆令一時許。遍身漰熱。微似有汗者。益佳。不可令如水流離。病必不除。若一服汗出病差。停後服。不必盡劑。若不汗。更服。依前法。又不汗。後服小促其間。半日許。令三服盡。若病重者。一日一夜服。周時觀之。服一劑盡。病證猶在者。更作服。若汗不出。乃服至二三

劑。禁生冷粘滑肉麵五辛酒酪臭惡等物。

或本脫三味二字。當補之。據作偽。小促下有使字非。不出下有者字是。全書通身

作通身非。後服下有當字是。玉函千金翼與無禁生冷云云十五字是。

金鑑曰。名曰桂枝湯者。君以桂枝也。

劉掾曰。桂枝湯本大表解肌之方。而非發汗之方。故汗出者主之。然以有其證可發汗者之故。當時乃有溫服桂枝湯一升餘。服已須臾。歔熱稀粥一升餘。以助藥力。溫覆令一時許。遍身絪絪似有汗者。益佳云云。至麻黃湯。本是太陽發汗之方。故曰不須歔粥也。是桂枝湯麻黃湯可發汗之分別也。且用桂枝湯發汗者。必有法。初一日用之而不解。二日用之而不解。三日又用之而尚不解者。不可與桂枝湯也。是本論之語。而太陽中風傷寒。無汗有汗治法之辨也。

正珍曰。古今釋方意者。率皆考之本草。而推物物之性味。主張空理。牽強爲說。雖然本草之爲書。漢書藝文志不載。仲景氏序論亦無之。及焉由是觀之。其不傳也久矣。

香川文仲行於晉言。後漢書。神農本草經。時始出。疑是葛洪所作也。名醫。錄。亦相繼出。若非葛洪。應是成於陶弘

景。且讀抱朴子。事向仙術。以玄仙爲其道。終身長生強壯之妄說。宛然同一口氣。必是葛洪所託。後也。苟此書在漢以前。則張機傷寒論自序中。必當言載焉。今觀羣胎諸藥錄。而無神農本經名。則知張機以前無此書。決然而明矣。在張機以後。則葛洪乃其人。此亦斷然而可知矣。正珍曰。太仲所說未的確。余別有考。

若其傳於今者。出於梁陶弘景所註。其後于東漢也。無慮五百餘載。此豈仲景氏之所據以制方者哉。故仲景之書。或可以正本草也。本草之書。不可以極仲景氏

之蘊也。無已則通考全論以窺其端倪乎。是余之所以不釋方意也云。又按金鑑及錢潢刪去去皮二字。其說曰。桂味皆在皮。若曰去皮。則木心有何氣味乎。不可入藥。殊不知所謂去皮者。惟是去甲錯無味之粗皮之謂也。

右桂枝湯方。本在前條之後。今移於此焉。服法中。若病重者。一日一夜服。周時觀之。十三字。蓋叔和註文誤入正文者也。觀傷寒例可見矣。醫藥攻病。各有所主。專精一隅。故藥術稱方。按咬咀二字。始見靈樞壽夭剛柔篇。張介賓曰。咬咀。古人以口嚼藥碎如豆粒而用之。後世雖用刀切。而猶稱咬咀者。其義本此。品字箋云。咬。齧。咀。味也。今醫家呼飲片爲咬咀者。上古無有刀劑。但以口齒咬而斷之。咀而味之。遂定其佐使君臣溫涼寒熱也。

本草綱目序例云。恭曰。咬咀。商量斟酌之也。宗奭曰。咬咀。有含味之意。如人以口齒咀嚼。雖破而不塵。古方多言咬咀。此義也。杲曰。咬咀。古製也。古無鐵刀。以口咬細。令如麻豆煎之。今人以刀剉細爾。以上諸說皆非也。蓋咬咀者。謂製藥爲飲片。蓋古人製藥。不用刀切。唯於臼中搗碎。令之如口齒咬細。而后用之。是以謂之咬咀。梁陶弘景名醫別錄云。凡湯酒膏藥舊方皆云咬咀者。謂秤畢搗之如大豆。又使吹去細末是也。



晉以來其法漸入中國。若夫禮記所謂醴酪鹽酪之酪皆指酢醢言之。非乳漿也。詳見字典等書。

〔微似有汗解〕桂枝麻黃葛根青龍諸湯。鈞是太陽病發汗之劑。凡行斯諸劑者。宜溫覆以發其汗也。然嘗觀桂枝湯服法曰。溫覆令一時許。遍身熱。微似有汗者益佳。其於麻黃葛根青龍三方。皆言覆取微似汗。似訓爲有。非真之謂也。若然則此等諸方。殆不可以發汗言之。乃其於桂枝證。言當以汗解。或言可發汗。於大青龍證。言發之。皆非可疑乎。麻黃葛根青龍三證。俱是表實無汗之病。雖與以大劑。雖覆以厚被。其汗不易出。出亦非一身熱。手足俱周。則邪氣不肯解圍矣。今乃取僅似汗而止。惡保無發汗不徹。轉屬陽明之虞乎。益可疑也。古今解傷寒論者。無慮數十家。未見一人容疑其間。或却稱似字爲有味。愈益可疑也。一日適讀詩之小雅斯干篇云。似續妣祖。毛傳云。似。嗣也。又周頌良耜篇云。以似以續。續古之人。毛傳云。嗣前歲。續往事也。孔疏云。似則爲嗣。嗣續一義。乃知似字。不獨訓有。又訓爲嗣爲續矣。由茲攷之。所謂微似有汗者。卽微微似續有汗之謂。而非其狀似有汗之謂也。仍又考白通加豬膽湯條。有脈暴出者死。微續者生之文。孔疏所謂嗣續一義。或言微似。或言微續。果是同義。對暴出爲言。又考痙濕喝篇云。若治風濕。

者發其汗。但微微似欲汗出者。風濕俱去也。欲乃續字誤寫。觀桂枝麻黃各半湯條。清便欲自可之欲。辨不可發汗病篇。及脈經并作續字。可見矣。夫若斯。則微微似有汗者。微微似續有汗之謂。明白精確。不可易也。如其所謂覆取微似汗。蓋省略溫覆令一時許云云十數言。爲一小句者。非復可疑矣。蓋傷寒一書。本是周漢古名醫遺文。仲景氏述以傳之。參以其所親驗已。故於其姓字下。亦唯書述。而不言著。文獻備考所載。可以徵矣。故自非博乎古。精乎文。焉能暢然洞見其蘊。而無遺憾乎。乃世之憤憤者。一經未通。妄意作解。何其不自揣之甚。

〔十四〕太陽病。項背強。凡凡反汗出惡風者。桂枝加葛根湯主之。按程應

凡凡。非也。注曰。項背強凡凡。五字連讀。凡凡上牛身成硬直之象。

成無已曰。凡音殊。凡引頸之兒。凡短羽鳥也。短羽之鳥。不能飛騰。動則先伸引其頸爾。項背強者。動亦如之。非若凡按之凡而偃屈也。

程林金匱直解曰。按說文。凡字無鉤挑。有鉤挑者。乃凡案之凡字也。凡乃鳥之短羽。象小鳥毛羽未盛之形。飛凡凡也。故凡字從凡。蓋形容其頸項強急之意。

金鑑曰。太陽病。項背強。凡凡。無汗惡風者。實邪也。反汗出惡風者。虛邪也。宜桂枝加葛根湯。



劉棟曰。此條雖爲太陽中風之淺證。加之項背強。凡凡之證。則其病深一等也。廼桂枝加葛根湯主之。凡太陽病。項背強者。法當無汗。此葛根湯之主也。而反汗出者。桂枝湯之主也。今更加葛根而治其項背強者。欲令學者定其部位。而不誤其治也。故用反字。以分之也。又曰。桂枝湯之部位。而項背強者。桂枝加葛根湯也。麻黃湯之部位。而項背強者。葛根湯也。何以知之。以汗之有無知之也。不可不詳矣。

正珍曰。凡凡當作凡凡字之誤也。王肯堂反以凡凡爲非。引詩豳風赤舄凡凡。註絢兒之文解之。考之字彙。絢音集。屢頭繩履飾也。與拘強之義不合。名醫類案羅謙甫曰。凡凡者。如凡人疾屈而強也。謝復古謂病人羸弱。憑凡而起。誤也。項背強凡凡五字連讀。程應旂說得之。按方。程喻諸人。見項背強凡凡者。乃以爲太陽陽明合病。蓋因葛根湯條有合病之文。而誤已。殊不知。項強固是太陽中一證。而及背者。特加一等之重者矣。

桂枝加葛根湯方

葛根 二兩

麻黃 二兩

去節

芍藥 二兩

生薑 三兩

切

甘草 二兩

大棗 十二枚

擘

桂枝 二兩

去皮

右七味。以水一升。先煮麻黃葛根。減一升。去上沫。內諸藥。煮取三升。去滓。

溫服一升。覆取微似汗。不須啜粥。餘如桂枝法。將息及禁忌。

若藥二兩。可發汗。作三兩是。

桂枝二兩。玉函全書集註。作三兩。亦是。

林億曰。謹按仲景本論。太陽中風自汗。用桂枝。傷寒無汗。用麻黃。今證

云汗出也。恐是桂枝中。但加葛根耳。

或無已說亦同。

速水知高曰。此方也。桂枝湯中。唯加葛根一味者。亦當啜粥。以助藥力。若其有麻黃。且曰不須啜粥者。此由後人以葛根湯方。誤爲桂枝加葛根湯故也已。

正珍曰。將息二字。古人缺註。按將。乃闕黨童子將命之將。訓以爲行。

征。今予以爾有業。事將天罰。注曰。將。行也。息止也。凡服藥之法。病差則不終一劑止之。不愈

則服至二三劑。此所謂將息也。按玉函。桂枝加葛根湯方。無麻黃三兩。去節六字。右七味。作右六味。又先煮麻黃。無麻黃二字。又無將息及禁忌五字。實此仲景氏之本色。宜從。但其作芍藥二兩。乃傳寫之誤。而言不須啜粥。乃後世攙入已。俱當改之。

〔十五〕太陽病。下之後。其氣上衝者。可與桂枝湯。方用前法。若不上衝者。不得與之。

方用前法四字。玉函千金並無之。得。或本作可。皆是。

錢潢曰。太陽中風。外證未解之時。而誤下之。則胃氣虛損。邪氣乘之。當內陷而爲痞爲結。下陷而成協熱下利矣。以下後而其氣上衝。則知外

邪未陷。胸未痞結。當仍從外解。可與桂枝湯。不須加減。悉照前方服法可也。若其氣不上衝者。恐下後邪或內入。胃氣已傷。將有逆變。尚未可知。桂枝湯不可與也。姑待其變。然後隨證治之可耳。

正珍曰。上衝者。指頭項強痛言之。

成無已曰。頭痛。謂邪氣外在經絡上攻於頭所致也。

太陽下篇曰。病

如桂枝證。頭不痛。項不強。云云者。瓜蒂散主之。可以見所謂上衝。果是頭項強痛之謂矣。凡論中言發汗後吐後下後者。皆其病證悉解。而止餘一證已。今下後而其氣仍上衝者。蓋表邪未全解。故與桂枝湯。以驅餘邪也。下篇又曰。太陽病。脈浮而動數。醫反下之。動數變遲。陽氣內陷。心下因鞭。則爲結胸。此條上衝二字。蓋對彼內陷言之。

或問曰。苓桂朮甘湯證云。氣上衝胸。桂枝加桂湯證云。氣上衝心。合而考之。上衝。卽氣衝心胸之謂也。余曰。必不然也。瓜蒂散條云。氣上衝咽。喉金匱附方。茯苓甘草五味薑辛湯條云。胃熱上衝薰其面。皆非衝心之謂。況此章惟云上衝。而不言上衝於何地。則其爲頭項強痛無疑矣。〔十六〕太陽病。三日已發汗。若吐。若下。若溫鍼。仍不解者。此爲壞病。桂枝不中與之也。觀其脈證。知犯何逆。隨證治之。

玉函不中與之。作不復中與也。成本無之字。

劉棟曰。三日已發汗者。初日行發汗之法。次日又行之。三日又行之也。溫鍼者。用溫鍼熨之也。中風傷寒兼中寒者。非溫鍼不能發汗。是古之

法也。

程林金匱直解曰。燒鍼即素問燔鍼焮鍼。川蜀謂之煨鍼。用以行痺潰癰。而味者以治傷寒熱病。即非也。

方有執曰。壞言歷遍諸治。而猶不愈。則反覆雜治之餘。血氣已憊。壞難。以正名。名也。中去聲。不中。猶言不當。

張志聰曰。太陽病。至三日而已發汗。則肌表之邪已去。假令裏證未除。若吐之。若下之。若溫鍼。裏證仍不解者。此爲壞病。夫自敗曰壞。言裏氣自虛而自敗也。

王肯堂曰。按逆者。謂不當汗而汗。不當下而下。或汗下過甚。皆不順於理。故云逆也。隨證治之者。如後云汗後病不解。及發汗若下之。病仍不解。某湯主之之類。是也。隨證治之一句。語活而義廣。王韓諸家。以壞病別作一證。而以羊肉湯主之。誤矣。

程應旂曰。如汗後亡陽動經。渴躁譫語。下後虛煩。結胸痞氣。吐後內煩。腹脹滿。溫鍼後。吐衄驚狂之類。紛紜錯出者。俱是爲前治所壞。顏穆曰。吐下溫鍼。非悉皆經之。故曰若也。

正珍曰。溫鍼發汗之法。不可得而考。本草綱目所載火鍼術。蓋後世俗法也已。按少陽篇云。若已吐下發汗溫鍼譫語。柴胡證罷。此爲壞病。知

犯何逆以法治之。由此考之。所謂不解者。指病不解而言。非言太陽表證之不解也。蓋桂枝證已變而不復六經正證者也。壞者。自敗之義。言歷誤治。而正證自壞也。縱爲醫所誤。其證不壞者。仍當行桂枝也。成無已。程應旂。錢潢諸人。皆讀壞爲怪。以爲被醫壞之義。非也。果爾則太陽病因誤治而變少陽陽明者。亦不謂壞病不可也。又按桂枝柴胡等方。非仲景氏所制。蓋周漢古方。而世之所徧知。故單稱桂枝柴胡。而不必及湯字也。

〔十七〕桂枝本爲解肌。若其人脈浮緊。發熱汗不出者。不可與之也。常須識此勿令誤也。千金翼玉函。並桂枝下。有傷字。成本無之字。

說文曰。肌肉也。人身四支附骨者。皆曰肌。

程應旂曰。其云解肌者。猶言救肌也。救其肌而風圍自解。

正珍按。桂枝爲攻表劑。程氏謂

救肌。非也。

成無已曰。脈浮發熱汗出惡風者。中風也。可與桂枝湯解肌。脈浮緊發熱不汗出者。傷寒也。可與麻黃湯。常須識此勿妄治也。

方有執曰。識與誌同。記也。言當常常用心以記其事。勿忘勿怠。而不可便有一忽之失誤。

程應旂曰。識。卽默而識之。識。有念茲在茲之意。

賴穆曰：常疑當字誤。

正珍曰：此說是也。按通明著蜜煎條曰：當須自飲大便。厥陰篇瓜蒂散條曰：當須吐之。可以徵矣。

正珍曰：解肌者，解散肌表邪氣之謂。與發表不同。陶弘景名醫別錄注麻黃曰：解肌及葛洪肘後方治天行二方。一曰麻黃解肌湯。一曰葛根解肌湯。皆視與攻表同。俱失之。抑何不知仲景氏之甚也。

〔十八〕若酒客病，不可與桂枝湯。得之則嘔，以酒客不喜甘故也。

成本之作傷。

〔十九〕喘家作桂枝湯，加厚朴杏子佳。

桂枝加厚朴杏子湯方。出太陽中篇。千金翼。喘家下。有有汗二字。

〔二十〕凡服桂枝湯吐者，其後必吐膿血也。

錢潢曰：其後必吐膿血，乃未至而逆料之詞也。此以不受桂枝而知之，非誤用桂枝而致之也。

方有執曰：佳一本作仁。

錢潢曰：前人有用佳爲仁字之說者非也。

惟忠曰：大抵酒客如此，而未必然也。且方其有桂枝之證也，何避之亦桂枝湯之例也。

正珍曰：右三章宜合爲一條，而以凡服桂枝湯章置之條首。不爾則酒客喘家二章皆屬突出。言太陽中風之證，其服桂枝湯吐而不受者，蓋胸中有癰膿之人，知其後必吐膿血也。若夫平素好飲之客，雖有中風之證，不可執桂枝之成法與之，宜減去甘棗二物以投之，否則亦吐而不受，以酒客本惡甘味也。若夫平素有喘之人，亦不可執桂枝之成法

投之。宜加厚杏二物兼制其喘氣矣。按程應龍指吐膿血以爲治傷寒以中風之方之所致。非也。金鑑云。酒客病。謂過飲而病也。亦非也。不可從矣。又按喘家之家。與瘡家汗家虛家。皆就其人之平素爲言。魏荔彤謂。素有喘證。謂之喘家。是也。

〔附考〕按嘔之與吐。元自不同。所謂吐者。有爲而自口內唾棄之之名。如詩大雅柔則茹之。剛則吐之。左傳僖公五年。明德以薦馨香。神其吐之乎。禮記玉藻。父命呼唯而不諾。食在口則吐之。史記魯世家。周公一飯三吐哺類。可見也。所謂嘔者。有物從腹內翻出之名。如左傳哀公二年。簡子伏殺嘔血鼓音不衰。漢書嚴助傳。夏月暑時。歐泄霍亂之疾類。可見也。說文曰。嘔。或作嘔。廣韻曰。嘔與嘔同。故嘔之與吐。猶下之與自下之異。嘔是病證。

而吐則非病證也。

又按嘔吐二字。因自然使然之分而判。自然者謂之嘔。使然者謂之吐。此古之義也。

後世醫家。不學無

術。妄謂物出無聲。謂之吐。聲物並出。謂之嘔。

金鑑雖然業既有物而翻出。

豈有不爲聲者乎。或謂嘔者。有聲無物。吐者。吐出食物也。

張介賓景果如

此說。則嘔與乾嘔。奚以辨之。要之皆不熟讀古書之故。已古義若斯。然至於仲景氏論中。則既概而混用焉。如腹滿而吐嘔吐而下利。是也。由此觀之。嘔吐之字。失古義也久矣。雖然唯謂汗吐下。而不謂汗嘔下。古義猶存耳。再按說文歐字註曰。吐也。或作嘔。漢書西域傳曰。身熱無色。

頭痛嘔吐由是考之。混嘔吐爲一。蓋漢人通爾。不特仲景氏而已。又按方有執註葛根加半夏湯曰。嘔大吐也。不知如柴胡桂枝湯微嘔。亦訓爲微大吐乎。哄堂哄堂。

〔二十一〕太陽病發汗遂漏不止其人惡風小便難四肢微急難以屈伸者桂枝加附子湯主之。

金鑑曰。太陽中風本當解肌。若大發其汗如水流漓。因而遂漏不止其人必淩理大開。表陽不固。故惡風也。液傷於內。膀胱津少。故小便難也。醫學入門曰。小便難者出不快也。

成無已曰。四肢微急難以屈伸者亡陽而脫液也。針經曰。靈樞經液脫者骨屬屈伸不利。與桂枝加附子湯以溫經復陽。

正珍曰。此辨太陽病中風證。誤用麻黃輩發之。不啻不解。反致陽虛者也。按惡風是中風固有之證。今復稱之者。以漏汗不止之故。所惡益甚也。蓋所謂壞病中之一而已。又按本條桂枝加附子湯治太陽病發汗遂漏不止云云者之方也。千金以此療產後風虛汗出不止小便難四肢微急難以屈伸者。金匱附子粳米湯治腹中寒氣雷鳴切痛。胸脇逆滿嘔吐者之方也。千金以此療霍亂四逆吐少嘔多者可謂能活用古方者也。世人不察妄謂傷寒論徒可以論傷寒某方徒可以療某病悲



哉。仲景氏不言乎。雖未能盡愈諸病。庶可以見病知源。吁。醫苟達此。則一方或可療數病。如孫氏者。可謂幾矣。

桂枝加附子湯方

桂枝三兩 去皮

芍藥三兩

甘草三兩 炙

生薑三兩 切

大棗十二枚 擘

附子一枚 炮去 皮破八片

右六味。以水七升。煮取三升。去滓。溫服一升。本云。桂枝湯。今加附子。將息如前法。正珍按。甘草三兩。當作甘草二兩。

錢潢曰。此方於桂枝湯全方內。加附子者。故多一加字。傷寒入九日。風濕相搏。條下之。桂枝附子湯。芍藥已去。非桂枝全湯。乃別是一方。故無加字。

正珍曰。本云。玉函作本方。宜從焉。所以示桂枝湯之爲古方也。亦所以示桂枝加附子湯之自我作之也。下皆倣之。將息二字解。詳于桂枝加葛根湯條。按全書於桂枝加附子湯後。載朮附湯方。突然相拙。元與本經毫無關涉。宜從宋板成本刪焉。

二十一。太陽病。下之後。脈促胸滿者。桂枝去芍藥湯主之。若微惡寒者。桂枝去芍藥加附子湯主之。題字。依成本。玉函。補之。

此亦辨太陽中風誤下之後。諸證自解。而其脈反促。更生胸滿一證者。

也。促者數也。攷之韻會字典諸書。促之與數俱趨玉切。迫也。速也。義亦無與數殊矣。錢潢云。促者非脈來數。時一止復來之促。卽急促。亦可謂之促也。見葛根黃連黃芩湯註。友人多紀簡云。近閱後漢荀悅申鑒俗嫌篇曰。夫善養性者無常術。得其和而已矣。隣臍二寸。謂之關。關者。所以關藏呼吸之氣。以稟授四氣也。故氣長者。以關息。氣短者。其息稍升。其脈稍促。其神稍越。由此考之。促數通用無疑也。若數中一止之脈。不可稱稍促也。○再按促雖與數音義無異。不可概爲一脈。猶浮與沉。動與搖。自有分別也。韻會小補促字注云。迫也。速也。短也。感也。又局促蹙小貌。由此考之。促卽數小之脈。與下後兼虛之病相符焉。雖然訓以爲細數。亦非是也。又按此條與葛根黃芩黃連湯條。其脈皆促。俱係太陽下後之病。論中言促脈者。凡四條。考之宋板注。每條皆云。一作縱。又一異也。又按辨脈法中。以促爲數脈之時一止者。非也。促豈有止之義乎。滿去聲。與閏同。考證見下。蓋下之之後。諸證已解。則脈亦當復平。今乃反促而胸滿。仍知表分餘熱未解。延及胸膈而致之。故仍以桂枝主之。惟芍藥非胸悶所宜。故去之。小柴胡湯。麻黃湯。柴胡加龍骨牡蠣湯。猪膚湯。柴胡加芒消湯。瓜蒂散諸方。皆有胸滿而無芍藥。非其所宜可知矣。成無已曰。芍藥益陰。陽虛者非所宜。故去之。果爾。桂枝加附子湯證。

陽虛尤甚。而何不去芍藥乎。可謂妄解矣。若兼微惡寒者。乃陽亡于外。而不能護表之候。非表不解之發熱惡寒也。故加附子以復其陽也。又按此條唯見胸滿一證。而不兼他證。其爲輕淺可知矣。故唯以桂枝解餘熱。而胸滿不攻而自退也。劉棟謂胸滿虛氣上衝之甚也。去芍藥專桂枝之力也。曩者余得此說。以爲信然。今而知其言之非也。胸中慍悶。豈上衝之所致乎哉。又見會氏說。見集以微惡寒爲脈微而身寒。不知論中稱微惡寒者。太陽下篇曰。心煩背微惡寒者。白虎加入參湯主之。陽明篇曰。汗出多微惡寒者。表未解也。可發汗。宜桂枝湯。皆以爲脈微而惡寒乎。大可咲矣。又按金鑑云。微惡寒。當是汗出微惡寒。若無汗出二字。乃表未解。無取乎加附子也。殊不知此方爲下後表證悉解。唯脈促胸滿。而微惡寒者設之。而非爲表邪未解之發熱惡寒者設也。又按桂枝新加證者。汗後仍有身痛之陽證。而脈則變之陰位爲沈遲者也。如本節所論。則下後雖復無見陽證。脈則猶屬陽位者也。桂枝去芍藥湯方

桂枝三兩 去皮

甘草二兩 炙

生薑三兩 切

大棗十二枚 擘

右四味。以水七升。煮取三升。去滓。溫服一升。本云。桂枝湯。今去芍藥。將息如前法。

此方本在前文桂枝去芍藥湯主之句後。今依成本移之於此。

桂枝去芍藥加附子湯方

桂枝三兩 去皮

甘草二兩 炙

生薑三兩 切

大棗十二枚 擘

附子一枚 炮 去皮 破八片

右五味以水七升。煮取三升。去滓。溫服一升。本云。桂枝湯。今去芍藥加附子。將息如前法。

〔附考〕謹考仲景氏全論。有胸脇苦滿。胸滿脇痛。並小柴胡湯條及支滿。金匱卷五 水腫篇

逆滿。六十七條 又金匱 附子梗米湯條欬滿。金匱卷五 咳嗽篇 三十四條煩滿。金匱卷五 痰飲篇 三十四條喘滿。陽明篇 二百二十八條諸語。

先輩諸家并未之有辨也。蓋與脹滿腹滿同看。夫滿者。虛之反也。老子曰 虛者實之。潘岳注曰。必有實形之可診。然後敢言之。所謂按之心下滿痛者。此

為實也。宜大柴胡湯。金匱 心下痞 按之濡者。大黃黃連瀉心湯主之。一百六十三條

結胸熱實。脈沉而緊。心下痛。按之石硬者。大陷胸湯主之。一百四十三條皆可見

也。雖然胸脇之為地。心肺內守。肋骨外護。豈有滿不滿之可診哉。況至

於煩滿喘滿諸語。遂不可讀。又况其於胸脇言滿。但稱苦滿支滿煩

滿。而一無稱硬滿脹滿堅滿大滿者乎。造語之有異。既已如此。因攷漢

書石顯傳曰。顯與妻子徙歸故郡。憂滿不食。道病死。師古注曰。滿讀曰

懣。音悶。又王莽傳曰。莽憂懣不能食。置飲酒啗饅。又許皇后傳曰。淳于

衍取附子。并合大醫大丸。以飲皇后。有頃曰。我頭岑岑也。藥中得無有

毒。對曰。無有。遂加煩懣。師古註曰。懣音滿。又音悶。劉向說苑善說篇

曰。歡忻憤滿。以送之。魏志華佗傳曰。廣陵太守陳登。胸中煩懣。病源候論卷三十。引養生方云。憤滿傷神。避暑錄話曰。余少時苦上氣。每作輒不能臥。一日疾作。喘懣頃刻不度起。韵會小補。悶字註曰。增韵。煩懣。心鬱也。或作懣。亦作滿。正字通。滿字註曰。又正韵。音悶。與悶通。合而考之。滿即懣。懣即悶。同音通用。可見也。知通考全論。無有一悶字。則滿之爲懣。愈益無疑矣。若其所謂胸滿脇痛。便是胸脇苦懣。互字言之。猶神閑意定。郭象莊注心煩意亂。楚辭卜居篇亦與此同法。惟自成無已以還。世爲之解者。徒隨文爲說。而不復察義之當否何如。概與脹滿腹滿同看。不亦疏乎。不亦疏乎。

二二三 太陽病。得之八九日。如瘧狀。發熱惡寒。熱多寒少。其人不嘔。清便欲自可。一日二三度發。脈微緩者。爲欲愈也。脈微而惡寒者。此陰陽俱虛。不可更發汗。更下。更吐也。面色反有熱色者。未欲解也。以其不能得小汗出身必瘳。宜桂枝麻黃各半湯。此字下。張經有爲字。是。當補。

成無已曰。如瘧。發作有時也。正珍曰。如瘧狀者。以伏作有時言。熱亦雖伏作有時。無惡寒爲異也。太陽下篇。婦人中風條曰。發作有時如瘧狀。可以徵矣。

惟忠曰。一日二三度發者。發熱之中且惡寒。熱多而寒少。其發作也。日至二三度。而與往來寒熱頗異。故論曰。如瘧狀。此以其二三度發作言。

之又曰。其人不嘔。此以其異於往來寒熱言之也。

劉棟曰。自以至必瘥十一字。語意不通。故刪之。

正珍曰。一日二三度發六字。當移熱多寒少句下。傳寫之誤也。此條挈太陽病得之八九日九字。爲綱。係以欲愈者與陰陽俱虛者與未欲解者之三證。以辨其治法也。不嘔者。示裏無邪熱之辭。如乾薑附子湯。桂枝附子湯二條。并云不嘔不渴。亦復然。清便者。通洩大便之謂。清與圜古字通用。或無已曰。清。圜也。見太陽中篇。清血注。其以通泄曰清。猶視曰目。聞曰耳。取曰手。

飲酒於人曰觴。古文多有矣。說文。圜字註曰。清也。周禮玉府。裏器注曰。清器。虎子之屬。清器。謂糞器。虎子謂裏器。虎子見西京雜記。又漢書張敖傳註曰。獸子裏器。所以溲便也。正字通。圜字注云。

圜別名。說文。圜。清也。徐曰。圜。古謂之清者。以其不潔。當常清除之也。本作清。俗加口作圜。韻會小補。引釋名曰。行清。卽糞槽也。品字箋曰。行圜。受糞函也。合而考之。清圜通用者久矣。按太陽中篇云。傷寒醫下之。續得下利。清穀不止。身疼痛者。急當救裏。後身疼痛。清便自調者。急當救表。救裏宜四逆湯。救表宜桂枝湯。所謂清便自調。對上文下利清穀言之。言彼下利清穀得四逆湯。而自然復常也。方有執妄謂。清便自調。言小便清而大便秘也。藤布哲註此條。亦依有執之說。果爾。如夫清穀清血。亦判爲二證乎。又按錢潢金鑑。俱釋清便以爲小便清。不知清穀清

血清膿血亦以爲清濁之清乎。可謂不通之解矣。欲自可三字辨不可發汗病篇。作續自可。脈經亦然。宜從焉。太陽中瀉。續自微汗出。太陰瀉。續自便利。金匱風水條。續自汗出。無大熱者。

越婢湯主之。

可者。許可也。清便續自可者。其大便自初至今。不澀不硬。無復有可言之事也。言太陽病傷寒之證。得之八九日間。若發汗。若下。若吐而病仍不解。如瘧狀。發熱惡寒。熱多寒少。一日二三發。其人不嘔。大便無可言之事。脈之浮緊。變爲微緩者。成無已曰。脈微緩者。是邪氣微緩也。是餘邪稍衰。而無入

裏之勢。欲自解者也。桂枝麻黃各半湯。微微發之可也。此證以桂枝則寬。以麻黃則猛。俱未得其宜。故合二方之半。以取其不寬不猛也。何以知其經發汗若下若吐也。以下文不可更發汗更下更吐之文知之也。字典。更字注曰。玉篇。復也。增韻。再也。又何以其爲傷寒之證也。以其用麻黃與無汗知

之也。若又無以上諸證。唯脈微細而惡寒者。此雖經發汗或吐或下。而其邪則解矣。表裏之氣。皆爲之虧乏者也。所謂陰陽指表裏而言。太陽中下之後。復發汗。必振寒。脈微細。所以然者。以內外俱虛故也。成無已云。陽。表也。陰。裏也。

輕者可與芍藥甘草附子湯。重者不可與乾薑附子湯也。

不可更發汗吐下也。若又其人面有熱色者。雖

陰陽俱虛。然其表邪猶留。而未欲解也。宜行桂枝加附子等方。且解且扶。其宜桂枝麻黃各半湯八字。宜在爲欲愈也之下。而在於此者。乃仲景氏一文。文法。論中每每有之。第四十一條。第四十六條。第六十七條皆然。不可不知也。程林金

匱直解。大黃牡丹湯條云。大黃牡丹湯當在有血之下。以古人爲文法所拘。故綴於條末。傷寒論中多有之。是也。再按宜者。適理之詞。但以宜字冠方名上。可謂奇法也。若以常法言之。則當云某湯宜某證。所謂青州宜稻。雍州宜黍稷。左傳成二年注文。是也。今此云某證宜某湯。猶言稻宜青州。黍稷宜雍州。豈非奇法乎。詩小雅小宛篇云。哀我填寡。宜岸宜獄。禮內則云。牛宜稌。羊宜黍。唐李鼎祚。群經音義。曰。月曰。醉花宜。稷。許雪宜夜。亦此是法。仲景氏文法。蓋有所本也。言某證宜用某湯也。

### 桂枝麻黃各半湯方

桂枝一兩十六銖去皮 芍藥

生薑切

甘草炙

麻黃各一兩去節

大棗四枚

杏仁

二十四枚湯浸去皮尖及兩仁者四字。後人之所加。宜刪去。

右七味。以水五升。先煮麻黃一二沸。去上沫。內諸藥。煮取一升八合。去滓。溫服六合。本云。桂枝湯三合。麻黃湯三合。併爲六合。頓服。將息如上法。成本

照本云以下二十三字。當補之。杏仁二十四枚。成本。全書。作二十四箇是。

林億曰。今以算法約之。二湯各取三分之一。非各半也。宜云合半湯。

惟忠曰。後之合方者。鑑觴于此也耶。

正珍曰。此方本作桂枝麻黃二湯。湯成後各取其三合。合而用之。此半桂枝。而半麻黃也。所以名曰各半也。億等固執二湯分量。而不知煎法。



中自有明文之存。斤斤求合其數。遂致此鑿說耳。若其各取三分之一。不過小其劑以省無用之費而已。

〔二十四〕太陽病。初服桂枝湯。反煩不解者。先刺風池。風府。却與桂枝湯則愈。

金鑑曰。太陽病。服桂枝湯。外證不解者。可更作服。今初服不惟不解。而反加煩。是表邪太盛。若遽與桂枝。恐更生煩熱。故宜先行刺法。疏其在經邪熱。然後却與桂枝。發其肌腠。風邪俾內外調和。自然汗出而解矣。素問骨空論曰。風從外入。令人振寒。汗出頭痛。身重惡寒。治在風府。大風頸項痛。刺風府。風府在上椎。

甲乙經曰。風池。在項上入髮際一寸。大筋宛宛中。風府。在顛顛後髮際陷者中。風池。足少陽膽經穴。風府。督脈穴。

惟忠曰。煩但訓熱者。未盡其義也。蓋不可情狀。而因悶擾撓。謂之煩也。正珍按。煩但訓熱。成無已說也。增韻訓煩為悶。煩得之矣。

正珍曰。刺法蓋取諸素問也。序論所謂。揆用素問九卷等者。是也。風池。風府二穴。並非太陽經孔穴。而取之太陽病。可見仲景氏之立六經。固不拘經脈矣。按方有執以煩為服桂枝湯不如法之所致。喻昌亦然。雖然經文中未見有違法之意。可謂妄矣。又按。程應旂謂。此其人原有宿

風加以新風合之者也。桂枝湯不唯不拔出新風而所伏宿風反因辛熱之藥而擾動故煩耳。先刺風池風府拔出宿風使新風無所合却與桂枝湯則愈矣。噫果若斯則初不服桂枝湯可也服之始知其有宿風愚之至也。

〔二十五〕服桂枝湯大汗出脈洪大者與桂枝湯如前法若形如瘧一日再發者汗出必解宜桂枝二麻黃一湯。如瘧成本作似瘧宜從而改。

劉棟曰若其證日再發如瘧狀者一等深也服桂枝二麻黃一湯發其汗則愈也是乃各半湯之淺證也其形雖如瘧唯日再發者其淺證可知也。

惟忠曰再發同一日二三發而稍輕故不至二三而再再也者不過一二之辭二三日驗再次之辭也二三之所以爲重也。

張璐曰詳此方藥品與各半不殊惟銖分稍異而證治所分可見仲景於差多差少之間分毫不苟也。

正珍曰此條服桂枝湯以下十八字蓋後條之文錯亂而入者衍文可刪矣若形以下宜接前條則愈句下以爲一條也論中洪大之脈無與桂枝之例也又按烏壽以如前法三字爲風池風府刺法非也。

桂枝二麻黃一湯方

桂枝

一兩十七銖去皮

芍藥

一兩六銖

麻黃

十六銖去節

生薑

一兩六銖切

杏仁

十六個去皮尖

甘草

一兩二銖炙

大棗

五枚

右七味以水五升先煮麻黃一二沸去上沫內諸藥煮取二升去滓溫服

一升日再服本云桂枝湯二分麻黃湯一分合爲二升分再服今合爲一

方將息如前法成本脫本云以下二十九字當補之林億等云今以昇法約之桂枝湯取十二分之二麻黃湯取九分之二

〔二十六〕服桂枝湯大汗出後大煩渴不解脈洪大者白虎加人參湯主

之千金方脈經并作白虎湯非

成無已曰大汗出脈洪大而不渴邪氣猶在表也可更與桂枝湯若大

汗出脈洪大而煩渴不解者表裏有熱不可更與桂枝湯可與白虎加

人參湯生津止渴和表散熱

金鑑曰大煩渴脈洪大者是邪已入陽明津液爲大汗所傷故也

劉棟曰此條承上條以明治例也下篇傷寒脈浮發熱無汗其表不解

者不可與白虎湯之條與此條意義相抗衡

正珍曰此症其所以異乎猪苓五苓者以脈之洪大與小便快利也煩

渴謂渴之甚也煩字有主用有兼用如煩心煩胸煩內煩微煩皆主煩

言之若夫煩躁煩渴煩疼煩熱煩驚煩滿皆不以煩爲主蓋所兼及之

客證已判爲二證非也故煩字在句首者皆帶說之詞而輕其在句尾

者皆主用之證而重。如安樂苦痛憂患恐懼可見矣。史記倉公傳生子不生男。緩急無可使者。又袁盎傳。緩急人所有。今公常從數騎。一旦有緩急。寧足恃乎。柳子厚與韓愈論史書。司馬遷觸天子喜怒。是其意唯在急與怒。而不在緩與喜。亦帶說之詞已。諸煩字在句首者。可例而知也。

# 白虎加入參湯方

知母

六兩

石膏

一斤

甘草

二兩

粳米

六合

人參

三兩

右五味。以水一斗。煮米熟湯成。去滓。溫服一升。日三服。

按此煎法甚粗。不合他方之精。似有闕文。因考外臺祕要。作右五味切。以水一斗二升。煮米熟內藥。煮取六升。去滓。分服一升。日三服。再按綿古所通用者。蠶綿也。後世有木草二綿。俱不可裹物入湯也。諸家無其辨可疑。因按梔子豉湯條。香豉四合綿裹。金匱梔子豉湯條。作絹裹。且本草綱目。石膏條。時珍曰。古方惟打碎如豆大。絹包入湯煮之。是以觀之。綿裹之爲絹裹也。可以相證矣。又按外臺作石膏一升非也。蓋斤升字形甚似。所以致傳寫之誤也。

〔二十七〕太陽病發熱惡寒。熱多寒少。脈微弱者。此無陽也。不可發汗。宜桂枝二越婢一湯。發。全當作更。玉函不可發汗。作不可復發其汗。

無陽當作亡陽。亡字讀爲武夫切。則通有無之無。此所以致斯誤也。太

陽中篇五十八條亡津液。玉函作無津液可見矣。亡失也。楚人亡弓之亡是也。非滅亡也。如亡血亡津液皆爾。大青龍湯方後云。汗多亡陽。救逆湯條云。醫以火迫劫之。亡陽必驚狂。第二百二十一條云。發汗多。若重發汗者。亡其陽。本篇甘草乾薑湯條。亦有復其陽之文。皆可以爲明徵矣。張璐以無陽爲無津液之通稱。非也。方有執金鑑劉棟惟忠皆認爲無表證之義。亦非也。夫所謂陽者。指元氣言之。人之所藉而運用營爲者。表裏上下左右前後。其活潑溫暖。咸是一元氣之發也。人苟無此氣。則死矣。猶天之有太陽而四時行焉。百物生焉。體中之物。莫貴焉。故謂之陽也。非指表指熱之陽也。故論中唯有亡陽。而無亡陰。素問所謂陽氣若天與日。失其所則折壽不彰者。便是也。後世注家。乃有汗多亡陽。下多亡陰之說。雖然。如桂枝去芍藥加附子湯證。下後微惡寒者。其可謂之亡陰乎。不深考而已。惟過汗。則多亡表中之陽。過吐下。則多亡裏中之陽。汗吐下俱過。則併亡表裏之陽。若夫所謂陰陽俱虛者。乃表裏之陽俱亡。所以危急也。豈惟誤治爲然乎。乃至自吐自利。嘔血下血。亦皆有亡陽之患。可不懼乎。按桂枝麻黃各半湯條云。太陽病。得之八九日。如瘧狀。發熱惡寒。熱多寒少。其人不嘔。清便續自可。一日二三度發。脈微緩者。爲欲愈也。大青龍湯條云。太陽中風。脈浮緊。發熱惡寒。身

疼痛不汗出而煩躁者。大青龍湯主之。若脈微弱。汗出惡風者。不可服之。今合二條考之。此條熱多汗少句下。當有一日二三度發。脈浮緊者。更可發汗也。若之十六字也。一說云。宜桂枝二越婢一湯八字。宜移之。熱多寒少句下而看。非有脫簡。文法乃爾。余謂此誠然。然而詳考全論。凡若此之處。必有分界之可察存焉。桂枝麻黃各半湯條。以也字分之。小青龍湯條。以服湯字分之。麻黃湯條。以服藥字分之。茯苓桂枝白朮甘草湯條。以脈沈緊分之。皆是也。今此條絕無分界之可察。則其爲闕文無疑矣。言太陽病。傷寒之證。醫雖發之。猶尙不解。發熱惡寒。熱多寒少。一日二三度發。其脈浮緊者。是餘邪猶盛而未欲解者也。桂枝二越婢一湯。更發之可也。何以知其前已行發汗也。以下文亡陽二字知之也。若又有以上病證。而其脈反微弱者。是其人資質虛弱。爲過汗所誤。而陽爲之亡者也。表邪雖未解。不可發汗也。宜與桂枝加附子輩。且解且扶焉。其宜桂枝二越婢一湯八字。綴之條末者。與桂枝麻黃各半湯之例同焉。蓋桂枝二麻黃一湯者。其證輕矣。桂枝二越婢一湯者。其證重矣。桂枝麻黃各半湯者。其證在輕重之間也。又按金鑑云。脈微弱無太陽表證。然既有無汗熱多寒少之表證。麻黃桂枝石膏之藥。終不可無。吳人駒云。微乃微甚之微。非幽微之微。但不過強耳。希哲云。顧內熱

熾盛。燥耗津液者。亦有見微弱脈。然而平素虛弱無陽之所致。非大青龍湯之可妄用。但宜用桂枝二越婢一湯。輕解其邪熱也。更改也。不可更發汗者。言不可用他藥發汗也。噫。諸子何其窮之甚。

桂枝二越婢一湯方

桂枝

去皮

芍藥

麻黃

甘草

各十八銖炙

大棗

四枚擘

生薑

一兩二銖切

石膏

二十四銖碎綿裹

右七味。以水五升。煮麻黃一二沸。去上沫。內諸藥。煮取一升。去滓。溫服一升。本云。當裁爲越婢湯。桂枝湯合之。飲一升。今合爲一方。桂枝湯二分。越婢湯一分。本云二字。玉函或本全書。俱作本方。是。五升下。玉函有先字。成本作生薑一兩三銖。非。又七味下。有改咀二字。亦非。又水五升。作五升水。亦非。合之二字。作合一字。亦非。桂枝湯二分。越婢湯一分。作桂枝二。越婢一。亦非。

按越婢湯方。見金匱要略。林億等云。今以算法約之。桂枝湯取四分之一。越婢湯取八分之一。

〔越婢說〕金匱要略有越婢湯。本論亦有桂枝二越婢一湯。越婢二字。古來無明解。成無已曰。謂之越婢者。以發越脾氣。通行津液。外臺方。一名越脾。卽此義也。吳人駒曰。越婢者。發越之力。如婢子之職。挾小其制。不似大青龍之張大也。方有執曰。越。踰也。過也。婢。女子之卑者也。女子。陰也。卑少也。程應旂曰。越婢一中之石膏。不過取其陰涼之性。女奴畜

之非如大青龍湯之可以匹主也。驅遣唯吾。而左右供職。故曰越婢也。喻昌曰。越婢者。石膏之辛涼也。胃得之則熱化津生。以此兼解其寒。柔緩之性。比女婢。猶爲過之。可用之無恐矣。五子者所言。辨則辨矣。無乃過鑿乎。以予觀之。以其方本得於越國之婢。從而爲名耳。豈有深理邪。白居易詩曰。越婢脂肉滑。奚僮眉眼明。又有漢婢燕婢語。並見唐人詩中。又按國語曰。厲王得衛巫。註曰。衛巫。衛國之巫也。可知越婢。卽越國之婢矣。余既著此說。後得傷寒淵源集續之。越婢之解。暗符余說。然按曰。仲景嘗以此方。療越人之婢。故名。杜撰亦甚哉。

〔二十人〕服桂枝湯。或下之。仍頭項強痛。翕翕發熱。無汗。心下滿微痛。小便不利者。桂枝去桂加茯苓白朮湯主之。滿下。玉函有而字。是。全書。桂枝下。有湯字。非。

成無已曰。頭項強痛。翕翕發熱。雖經汗下。爲邪氣仍在表也。心下滿微痛。小便不利者。則欲成結胸。今外證未罷。無汗。小便不利。則心下滿微痛。爲停飲也。與桂枝湯以解外。加茯苓白朮。利小便行留飲。正珍曰。此証不知其所見之本。猶未去桂枝。

宮義方曰。此章飲家也。茯苓桂枝白朮甘草湯。可參考。按五苓散之心下痞。亦同一根原。

家君語予曰。凡論中揭一物。以名於方者。皆一方主將。猶天之有日。國之有君。不可一日無者也。故柴胡。葛根。麻黃。黃連。附子。黃芩。吳茱萸。白頭翁。諸方。俱未有去其主者。今此條獨云去桂。豈是仲景氏之真哉。况



仍有頭項強痛發熱無汗證乎。決是後人舛誤所致。家君斯言甚快。足以破千古瞶瞶矣。禽禽字。見韓詩外傳。及後漢書翟酺傳。佩文韻府云。禽盛也。成無已云。禽禽者。熇熇然而熱也。若合羽所覆。言熱在表也。按此證本非中風桂枝之證。蓋傷寒麻黃之證兼停飲者也。稱仍無汗者。可見矣。而今不取麻黃。反用桂枝者。何也。心下滿微痛。小便不利。固雖白朮茯苓所得而主。若奪力於發表。則不能專其宣導之功也。

正珍再按。金鑑云。去桂。當是去芍藥。旁引曲喻。以桂枝去芍藥加附子湯之胸滿。雖然。胸悶與心下滿。豈可同日而語哉。喻昌云。去桂枝者。以已誤。不可復用也。殊不知桂枝之法。有一服不解。而至三服一劑不解。而至二三劑者矣。又觀王肯堂說云。此非桂枝證。乃屬飲家。故去桂枝。加茯苓白朮。喻以十棗湯頭痛。然而既曰服桂枝湯。又曰。仍頭項強痛。此以仍字。應桂枝者。瞭然也。若不則何必取之桂枝乎。直用五苓散。茯苓桂枝白朮甘草湯類可也。已。又觀希哲註曰。此是脾胃素弱人。感外邪之證。妄建脾胃弱者。不宜桂枝之說。強合去桂之義。殊不知數下之後。脾胃受傷而利下不止者。猶且用桂枝人參湯。莫所疑憚。噫。彼何讀書之粗且略耶。又錢潢云。治之以桂枝去桂加茯苓白朮湯。未詳其義。恐是後人傳寫之誤。未可知也。錢氏此說。大勝諸家強辨爲說也。方

有執云。朮上不當有白字。是書編始于叔和。叔和有脈經。脈經朮上皆無白字。足可徵也。然則白爲後人所加明甚。以予觀之。有執斯說。亦未足信也。按古昔惟一朮。以其白者爲佳。故冠曰白。潛確居類書。九十七卷。范子曰。朮出三輔。黃白色者善。明黯者不足用也。猶棗之必以大稱焉。今觀華船齋來之物。果然。後人不知。遂以一類別種之。草名之赤朮。蒼朮。以對白朮。朮分赤白。自梁陶弘景始也。可謂不解事矣。有執亦不知脈經爲後人僞撰。引以議之。豈果可信乎。予嘗著脈經辨。以發其奸。今搜得其稿於巾衍。因附以曉世之眩脈經者云。

〔附錄脈經辨〕脈經十卷。西晉太醫令王叔和所著。其書亡矣。今之所傳。蓋唐季人。將其散軼之餘。敷演成編者。決非王叔和真本也。何以證之。林億等進呈脈經劄子曰。大抵世之傳授不一。有以隋巢元方時行病源爲第一卷者。徵一也。七言詩。雖創柏梁。序然而季唐以前人。未多作焉。僅僅乎若晨星。觀文選所收。可見矣。如其歌行律絕。則唐之所始制。又如其爲之韵語。以便講習。愈益較者焉耳。脈經乃以二十四脈。奇經八脈。十六怪脈。觀形察色等。爲七言歌括。西晉時寧有之邪。是雖或非其真。然其原本。晚出蕪雜。有招之混攪矣。徵二也。按晉統正張所收之本。欠旺圖歌括。蓋吳越學亦知其非。而涂之乎。非宋板之舊也。今世所傳傷寒論。便叔和撰次之本。而其辨脈平脈二

篇及傷寒例皆不與六經本論相悞其出叔和之手人所共知也。脈經乃舉平脈法文題曰張仲景論脈是不啻不知仲景氏亦不知叔和者之爲昭然明矣。徵三也。其他猶可議可疑者不遑枚舉。此知今之所傳蓋唐季人將其散軼之餘數演成編者決非叔和真本也。雖然其書去古未甚遠間亦有益於參考者學者擇而采之亦何妨之有。昔人止辨脈訣之爲僞撰而不知脈經亦不免僞撰也因摘其尤者以發其奸予豈好辨哉予豈好辨哉庚子巳日書於杏花園

桂枝去桂加茯苓白朮湯方

芍藥

三兩

甘草

二兩

生薑

切

白朮

茯苓

各三兩

大棗

十二枚

右六味以水八升煮取三升去滓溫服一升小便利則愈本云桂枝湯今去桂枝加茯苓白朮

〔二十九〕傷寒脈浮自汗出小便數心煩微惡寒脚攣急反與桂枝欲攻其表此誤也得之便厥咽中乾煩躁吐逆者作甘草乾薑湯與之以復其陽若厥愈足溫者更作芍藥甘草湯與之其脚即伸若胃氣不和譫語者少與調胃承氣湯若重發汗復加燒鍼者四逆湯主之

成本。桂枝下。有湯字。煩躁之誤。成本全書。并

作燥。非。

金鑑曰微惡寒者表陽虛不能禦也

方有執曰厥謂四肢冷也

程應旂曰得之便厥者真寒也咽中乾煩躁者假熱也

正珍曰傷寒二字泛稱疫而言非太陽傷寒也脈浮自汗出小便數心煩微惡寒脚攣急卽少陰病而大青龍條所謂若脈微弱汗出惡風之大同小異者故脈唯言浮之似表而不言其爲緊爲緩證唯言微惡寒之似表而不言發熱頭痛當知其汗出惡寒者乃與附子瀉心之惡寒汗出者同爲陽虛之病故此證雖有脈浮惡寒之似表者決不可攻表唯宜與薑附扶陽劑以溫之也今乃錯認其似表者以發之故有厥冷咽乾煩躁吐逆之變因作乾姜附子湯以復其陽氣若其不用四逆吳茱萸類者何桂枝之發徒伐表氣而裏氣受敗不深雖有吐逆未及下利清穀之甚故也耳舊本作甘草乾薑湯大非也甘草乾薑湯治肺痿多涎唾者之方安能挽回陽氣將盡者乎若胃氣不和以下至四逆湯主之蓋他條錯亂而入者刪之可也何以知之以上文序證至脚攣急止而不及胃氣不和等事已按此證始則心煩後則煩躁其爲主證可知矣且嘔家不欲甜其非四逆所宜亦可知矣雖然此證而兼下利清穀必溫以四逆可也不可復泥嘔矣又按心煩微惡寒與白虎加人參

湯似矣。而脈之虛實。口之和不和。大不同矣。再按論中以承氣命者四方。而調胃承氣專爲吐下後胃中不和者設。所以名調胃也。若其用諸發汗後。若不吐不下心煩者。殊是權用。而非主用也。故曰。先此時。自極吐下者。與調胃承氣湯。若不爾者。不可與。又曰。大便秘結而反下利。脈調和者。知醫以丸藥下之。非其治也。調胃承氣湯主之。並出太陽中篇調胃之義。可以見矣。況方中有甘草和緩之品。而其服之。亦不至五合一升之多。唯少少溫服之。則其專爲吐下後胃氣不和者設。而非先攻下之劑也。彰彰乎明矣。今此條言胃氣不和譌語者。必是吐下後之證已。甘草乾薑湯。芍藥甘草湯。俱仲景氏所始製。故各置作字。以分桂枝之古方也。

甘草乾薑湯方

甘草

四兩

乾薑

二兩

右二味。以水三升。煮取一升五合。去滓。分溫再服。

甘草四兩。玉函作二兩。非。二味下。有咬咀二字。亦非。

或本全書。二味作咬咀。非。或本乾薑二兩下。有炮字。當從前補矣。

芍藥甘草湯方

白芍藥

甘草

各四兩

右二味。以水三升。煮取一升五合。去滓。分溫再服。

或本全書。二味下。有咬咀二字。再服下。有之字。非。

香川太冲藥選曰。芍藥甘草湯方中。創加白字。論中止此一項。他所皆

無予以爲此後人之所加也。何者。既書芍藥甘草湯而不書白芍藥甘草湯。惟藥名添白字。則爲一剩字也。甚明矣。正珍曰。玉函無白字。

調胃承氣湯方

大黃

四兩去皮  
清酒洗

甘草

二兩

芒消

半升

右三味。以水三升。煮取一升。去滓。內芒消。更上火。微煮令沸。少少溫服之。  
玉函或本全書。三味下。有咬咀二字。非。芒消半升。成本作半斤。千金翼作半兩。按大承氣。猶不用半升。宜以半兩爲是。外臺祕要。作甘草三兩。

戶田齋。非藥選云。難曰。古法藥用上行以酒。下行以鹽。緩寒亦以酒炒。不可謂無其理也。齋答曰。予屢試之。未嘗見其効已。且夫酒鹽固不敵於本味十分之一也。况炒過之本味。添味俱減乎。又且中世以上。未有用酒醋。人溺。鹽水。姜汁。暨塗酥。塗蜜。土炒。麸炒等制法也。王叔和撰次金匱玉函經。方藥炮制曰。半夏以湯洗十數度。令水清滑盡。洗不熟有毒也。附子大黃之類。或炮。或生。皆去黑皮。厚朴卽斜削。如脯法。下可見耳。其調胃承氣湯。抵當湯下。有大黃酒浸酒洗之事者。乃後人之加也。明矣。

成無已曰。承。順也。邪氣入於胃也。胃中氣鬱滯。糟粕祕結。壅而爲實。是正氣不得舒順也。以湯蕩滌。使塞者利。而閉者通。正氣得以舒順。是以承氣名之。

正珍曰。承氣湯四方。以大承氣爲主。成無已所解甚是也。後世諸家亦皆遵奉之。無敢問言者。雖然古今字書韻書並未見以承訓順者。於是乎信且疑者數年。庚子夏日。適繙詩之大雅抑篇則云。繩繩子孫。萬民靡不承。鄭玄箋云。言承順也。孔穎達云。天下之衆民。無有不承順而奉行之。乃曩者所疑。渙然冰釋。怡然理順。又嘗考宋書樂志。漢宗廟樂。食舉十三曲。其第十二曰承元氣。豈非承氣之名之所職由者邪。又按周易云。至哉坤元。萬物資生。乃順承天。禮記樂記曰。理發於外。而民莫不承順。史記秦始皇紀云。宇縣之中。承順聖意。晉書陳騫傳云。時牽弘爲揚州刺史。不承順騫命。合而考之。承順連用。承亦有順義者。自彰彰矣。

四逆湯方

甘草二兩

乾薑一兩

附子一枚生用去  
皮破八片

右三味。以水三升。煮取一升二合。去滓。分溫再服。強人可大附子一枚。乾薑二兩。甘草二兩。千金鑿亂竊。作一兩。三味下。成本全書。并有咬咀二字。非。

錢潢曰。四逆湯者。所以治四支厥逆。而名之也。

惟忠曰。大附子一枚。乾薑三兩。卽通脈四逆湯也。

正珍曰。強人以下十二字。叔和所攙。當刪之。否則與通脈四逆湯無差別也。又按本草載宋雷斅說云。附子一個。重一兩者。卽是氣全。乃知古

人所用之附子。大抵以一兩准一枚。梁陶弘景曰。附子烏頭若干枚者。去皮畢。以半兩准一枚。蓋以皮肉各得半兩而已。

〔三十一〕問曰。證象陽。且按法治之。而增劇。厥逆。咽中乾。兩脛拘急。而譏語。師曰。言夜半手足當溫。兩腳當伸。後如師言。何以知此。答曰。寸口脈而大。浮爲風。大爲虛。風則生微熱。虛則兩脛攣病。形象桂枝。因加附子參。其間增桂。令汗出。附子溫經。亡陽故也。厥逆。咽中乾。煩躁。陽明內結。譏語。煩亂。更飲甘草乾薑湯。夜半陽氣還。兩足當熱。脛尚微拘急。重與芍藥甘草湯。爾乃脛伸。以承氣湯微瀉。則止其譏語。故知病可愈。

劉棟曰。上條之注文。後人之言也。

惟忠曰。此疑非仲景之言也。或後人追論之言。謬入本文也。大氏以問答者皆然。不可從矣。

正珍曰。凡論中。設問答而言之者。皆叔和所附託。非仲景氏之言。何以知之。以其言繁衍叢勝。而與本論所說。大相乖戾也。爾按金匱產後門。有陽旦湯。卽桂枝湯也。千金陽旦湯。亦桂枝湯也。特外臺引古今錄驗。陽旦湯。桂枝湯中加黃芩二兩者。非是。成無已曰。陽旦。卽桂枝別名。亦可以證矣。





# 傷寒論集成卷二

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

## 辨太陽病脈證并治中第二

〔三十一〕太陽病。項背強几几。無汗惡風者。葛根湯主之。者字。生可發汗。及至國外。補之。

成無已曰。太陽病。項背強几几。汗出惡風者。中風表虛也。項背強几几。

無汗惡風者。中風表實也。正珍曰。中風表實。宜作傷寒表實。成無已。探拘惡風二字。非也。表虛宜解肌。表實

宜發汗。是以葛根湯發之也。

方有執曰。惡風。乃惡寒之互文。風寒皆通惡。而不偏有無也。

喻昌曰。設以麻黃本湯。加葛根大發其汗。將無項背強几几者。變爲經

脈振搖動惕乎。此仲景之所爲精義入神也。

劉棟曰。麻黃湯之部位。而項背強者。葛根湯主之。桂枝湯之部位。而項

背強者。桂枝加葛根湯主之。不須啜粥者。以葛根湯發汗之劑。而爲麻

黃湯部位之方故也。

正珍曰。此條乃太陽傷寒。而項背強者。比麻黃證一等深者也。方有執喻昌之徒。皆以爲太陽陽明合病之初證。蓋坐誤讀下條之文故已。錢潢云。葛根湯。卽麻黃湯加入葛根也。不喘。故去杏仁。方有執同又云。本當名之曰麻黃加葛根湯。芍藥後人誤入。殊不知葛根湯。用以治此證。乃古來相傳之定方。而非仲景氏所自制者也。序論所謂。勤求古訓。博采衆方者。可以見矣。且彼徒知芍藥之非麻黃湯中品味。而不及棗薑二種。可不謂疎邪。

葛根湯方

葛根 四兩

麻黃 三兩 去節

桂枝 三兩 去皮

生薑 三兩 切

甘草 二兩 炙

芍藥 二兩

大棗 十二兩 擘

右七味。以水一斗。先煮麻黃葛根。減二升。去白沫。內諸藥。煮取三升。去滓。溫服一升。覆取微似汗。餘如桂枝法。將息及禁忌。諸湯皆倣此。麻黃三兩。芍藥二兩。金匱作三兩。成本全書。俱脫桂枝之枝字。當補之。大棗十二兩。成本全書俱作十二枚。是。七味下。成本全書俱有咬咀二字。非。成本似并下。有不須咬咀四字。無諸湯皆倣此五字。○正珍曰。白沫當作上沫。從前後諸例。餘如桂枝法以下。後人攪入。宜刪。觀葛根加半夏湯條可見矣。

〔三十二〕太陽與陽明合病者。必自下利。葛根湯主之。

金鑑曰。太陽與陽明合病者。無太陽之發熱惡寒無汗。與陽明之煩熱不得眠等證。同時均病。

劉棟曰。太陽者。脈浮發熱頭痛項背強也。陽明者。不惡寒反惡熱。諸語大便不通也。

正珍曰。此章有誤字。有錯置。有衍文。當作太陽與陽明合病而下利者。

葛根湯主之。

張經。作太陽與陽明合病。而自利不嘔者。太陽下篇曰。太陽少陽併病。而反下之。成結胸。

蓋自字與而字。檢

之韵鏡。四聲雖殊。音則相近。

自者。去聲。四實韵。而者。平聲。四支韵。俱屬開轉。

故傳寫者。不覺

致此誤耳。少陰篇。真武湯條。自下利之自字。玉函千金翼。俱作而字。可

徵矣。蓋古昔唯有五音之別。而四聲呼法。未正也。如而之爲爾。爾之爲

汝。汝之爲若。可見矣。所謂太陽。承前條葛根湯證言之。

太陽病。項背強。凡幾。無汗惡風者。

是也。陽明指其所交見。陽明輕證。一二而言也。若其下利與嘔。殊是所兼

客證。猶小青龍小柴胡等湯下。有或以下諸兼證也。非合病中必有之

正證也。自成無已以降。皆謂爲合病中正證。非也。按論中。冠合病併病

者。才數條矣。其不冠合病併病。而實爲合病併病者。反居多。何也。蓋彼

舉合併名目。以略合併病證。此舉合併病證。以略合併名目。互略之而

已。

(三十三) 太陽與陽明合病。不下利但嘔者。葛根加半夏湯主之。

嘔是所兼之輕證。故於本方中。但加半夏也。若是陽明內熱之嘔。豈一半夏之所能止乎。按以上二證。雖見陽明證。仍誘諸發汗者。以表未解。

裏未實也。

〔附錄合併病諸說〕成無已曰。傷寒有合病。有併病。本太陽病不解。併於陽明者。謂之併病。二經俱受邪相合病者。謂之合病。合病者。邪氣甚也。正珍按。合併解。持成無已推志二說。尤爲妥貼。其他諸說。皆難信從矣。

方有執曰。合。見答切。合之爲言。相配偶也。輕重齊多少等。謂之合。併。猶合也。彼此相兼合。而有輕重多寡之不同。謂之併。

程應虎曰。合病者。太陽之惡寒發熱等證。與陽明之喘滿胸滿等證。同時均發。無有先後也。表邪去尙未盡。裏邪乘其未去而已來。兩邪相持而前後互見。是曰併病。縱使表少裏多。終是帶表之陽明也。

喻昌曰。合病者。兩經之證。各見一半。如日月之合朔。如王者之合圭璧界限中分。不偏多偏少之謂也。併病者。兩經之證。連串爲一。如貫索然。卽兼併之義也。併則不論多寡。

錢潢曰。合病者。兩經三經。一時並受。見證齊發。無先後之不齊。故謂之合。併病者。此經傳入彼經。遂至兩經俱病。謂之併者。併及他經亦病。故謂之併。金鑑曰。傷寒有六經之證。有六經之脈。證脈井然不雜。則可直指爲某經之病。若兩經三經。陰陽混淆。不可以一經名者。或一經未罷。又傳一經。二經之證同病不歸併一經者。則名曰合病。或二經三經同

病。其後歸併一經自病者。則名曰併病。論中所著合病併病。雖單舉陽經。未及陰經。然陽經既有合病併病。則陰經亦必有之。可知矣。如太陽病脈反沈。少陰病反發熱。是少陰太陽合病也。陽明病脈遲。太陰病大實痛。是太陰陽明合病也。少陽病脈細而厥。厥陰病嘔而發熱。是厥陰少陽合病也。是雖無合病之名。而確有合病之實。且三陽皆有發熱證。三陰皆有利證。如發熱而下利。是陰陽合病也。陰陽合病。若陽盛者屬陽經。則下利爲實熱。卽論中所謂太陽陽明。陽明少陽。太陽少陽合病者。是也。陰盛者屬陰經。則下利爲虛寒。卽論中所謂少陰下利反發熱不死。少陰下利清穀裏寒外熱。不惡寒而面赤者。是也。蓋陽與陽合。不合於陰。爲三陽合病。則不下利而自汗出。乃白虎湯證也。陰與陰合。不合於陽。爲三陰合病。則不發熱而吐利厥逆。乃四逆湯證也。誠以人之藏府互根。陰陽相合。三陽既有合併之病。則三陰亦有合併之病。不待言矣。

張介賓景岳全書曰。併病與合病不同。合病者。彼此齊病也。併病者。一經先病。然後漸及他經。而皆病也。

劉棟曰。凡合病併病之別。謂緩急之分也。於太陽陽明。爲合病。於太陽少陽。爲併病。併病者。從中風來。合病者。從傷寒來。

惟忠曰。合也者。謂在其始而既已。太陽陽明及少陽之脈證之相交見者也。併也者。謂未離於太陽之脈證。荐及于陽明少陽者也。之二者之於輕重緩急也。合病爲最重最急矣。併病之於合病。雖若稍輕稍緩乎。不若太陽之最輕最緩也。故併病亦不爲不重且急矣。以其荐及于陽明少陽也。合病之所以最重最急者。以其始而既已交于陽明少陽也。又曰。夫既三陽有合併之名。則三陰亦不得言無焉。惟不設其名耳。設其名者。以治法之有先後也。不設其名者。以治法之一於救裏而無有先後也。故仲景氏之設名也。莫不關於治法焉。

正珍按。病源候論卷七曰。有太陽少陰併病。脈數緊而下之。緊反入裏。則作否之文。人或由此。有陽與陽相病。爲合。陰與陽相病。爲併之說。殊不知此是引傷寒論中太陽少陽併病之文者。傳寫訛陽作陰。豈足舉以爲徵乎。可嘆殊甚。約會小補。併字注曰。兼也。合也。或作并。品字義。并字注曰。及也。合也。兼也。賈誼通義論。并吞八荒。世說政事篇。續晉陽秋曰。江左造創豪族并兼。

葛根加半夏湯方

葛根 四兩

麻黃 三兩

甘草 二兩

芍藥 二兩

桂枝 二兩

生薑 二兩

半夏 半升

大棗 十二枚

右八味。以水一斗。先煮葛根麻黃。減二升。去白沫。內諸藥。煮取三升。去滓。

溫服一升。覆取微似汗。生薑二兩當作三兩。葛根湯方。及可發汗。成本全書。皆作三兩。可發汗。牛夏半升。成本全書。俱作半斤。非。

〔三十四〕太陽病。桂枝證。醫反下之。利遂不止。脈促者。表未解也。喘而汗出者。葛根黃芩黃連湯主之。

太陽病。桂枝證。醫反下之。續得下利。其脈緩者。變爲數。此爲表不解。而裏更虛也。謂之協熱利。桂枝人參湯證也。夫因下之。而遂利不止。爲脾胃虛寒所致。其脈當遲。今乃促急。故爲表分餘熱未解也。若下之之後。不復下利。喘而汗出。無表證者。此爲餘熱內攻上焦所致。與麻黃杏仁甘草石膏湯證略同。但彼汗出而喘。此因喘而汗出。彼以汗爲主。此以喘爲主。所以治法有異也。雖則有異。其爲上焦之熱。乃一也。故并用寒藥。以清解上焦也。又按。汗出一證。有屬表者。有屬裏者。此條雖首稱桂枝證。今唯言汗出。而不及其他表證。可見此汗。非表不解之汗。而實爲因喘之汗矣。乃知此證者。桂枝證下之後。餘熱攻胸中之候也。註家不察。併下利脈促表未解。以爲一病而說之。非也。豈有表未解之病。舍桂枝而用芩連之理乎。果其言之是乎。則喘而汗出一句。當在利遂不止句下也。胡以也字別之乎。又胡特下一者字乎。據文釋義。其判爲二證者。瞭然也。論中往往有此文法。不可不察也。按方有執喻昌張璐諸人。皆以此條爲太陽兼陽明之病。蓋爲葛根湯治太陽陽明合病之文。



所誤也。再按。下後表未解。而微喘者。乃四十三條。桂枝加厚朴杏子湯之所主也。

葛根黃芩黃連湯方

葛根

半斤

甘草

二兩

黃芩

三兩

黃連

三兩

右四味。以水八升。先煮葛根。減二升。內諸藥。煮取二升。去滓。分溫再服。日。記者。脫甘草二字。成本全書。作黃芩二兩。玉函同宋板。

〔三十五〕太陽病。頭痛發熱。身疼腰痛。骨節疼痛。惡風無汗而喘者。麻黃湯主之。

方有執曰。身疼腰痛。骨節疼痛。卽上條之體痛。而詳言之也。上條言必惡寒。而此言惡風者。乃更互言之。喻昌曰。蓋惡風。未有不惡寒者。

烏壽曰。惡風者。寒亦惡之。所以傷寒亦互云惡風。後人謂傷寒惡寒不惡風。中風惡風不惡寒。誤矣。

劉棟曰。傷寒與中風。以脈與汗爲分別也。此條爲太陽傷寒之淺證也。正珍曰。此太陽傷寒之正證表實者也。不言脈浮緊者。以上篇悉之也。身體骨節疼痛。陰陽俱有之證。其無發熱頭痛。而脈沈微者。是爲陰證。附子湯真武湯等之所主也。喘。是表熱延及所致之客證。非主證也。但

以此證多兼之故及此已故雖無喘者既已有主證則可與之矣不可泥喘之有無也又按無汗二字必置之喘者上蓋承前條喘而汗出句以示其差別也

### 麻黃湯方

麻黃三兩 去節

桂枝二兩 去皮

甘草一兩 炙

杏仁七十顆 去皮尖

右四味以水五升先煮麻黃減二升去上沫內諸藥煮取一升半去滓溫服八合覆取微似汗不須啜粥餘如桂枝法將息。正版本桂枝作三兩非。杏仁七十顆成本全書作七十箇是。金鑑曰此爲純陽之劑過於發汗如單刀直入之將用之若當一戰成功不當則不戢而召禍故可一而不可再如汗後不解便當以桂枝代之此方爲仲景開表逐邪發汗第一峻藥也又曰麻黃湯之峻與不峻在溫覆與不溫覆也

島壽曰徐春甫云凡煎藥者必以主治爲君先煎一二沸後入諸藥壽按未必盡然凡用麻黃先煮之去上沫者沫令人煩也不以君臣然也陶弘景曰沫令人煩根節能止汗此所以先煮去沫也

方有執曰麻黃有專攻之能故不須啜粥之助

內藤希哲曰其人脾胃素強不須借補力故不啜粥。正珍曰此說非也。

〔附考〕按疼痛二字古今字書並未有辨其差異者從來註家亦皆無

及之。蓋疼之與痛也。義訓雖同。自不無輕重緩急之分也。凡二字同訓而連用者。靡不皆然也。如彼忿懣恐懼類。若謂忿即懣。恐即懼可乎。曩余讀虞德升品字箋得其說。因書備參看。

品字箋。恐字註曰。案大學。忿懣恐懼。好樂憂患。八字入義。竝由淺入深。論語好之者。不如樂之者。孟子終身之憂。一朝之患。是也。舊註恐字即懣。懣字即忿。未確。又痛字註曰。疼痛。痛之淺者。爲疼。疼之甚者。爲痛。

〔三十一〕太陽與陽明合病。喘而胸滿者。不可下。宜麻黃湯。成本作宜麻黃湯。主之。非也。云宜。云主之。自有分別。不可偶言也。成本往往偶言者。全係後人妄添。宋板則一無混言者。可謂古矣。

二百四十二條曰。陽明病。脈浮無汗而喘者。發汗則愈。宜麻黃湯。

惟忠曰。此雖其邪之實于胃。先誘諸其表於發汗。然後下之者也。

正珍曰。太陽者。承前章麻黃湯證言之。與葛根湯合病條同矣。陽明者。指其所交見。陽明輕證一二而言也。喘而胸滿。殊是兼證耳。不必拘其有無而可也。滿與懣同。悶也。說已見上。此條惟言胸滿。不言胸脇苦滿。明其未至於柴胡證也。再按。喘而胸滿。因喘而胸滿也。與喘而汗出同。故重在喘而不在胸滿也。

〔三十七〕太陽病。十日以去。脈浮細而嗜臥者。外已解也。設胸滿脇痛者。與小柴胡湯。脈但浮者。與麻黃湯。玉函脈字上。有其字。是。難治傳。以去。作已去。○正字。以字註曰。又無已同。畢也。止也。

史記世家。以服爲臣。據史記。趙世家無此文。趙世家曰。以服爲臣。乃知趙。是趙字之誤。又漢書張良傳曰。殷事以畢。亦與已通用也。○字典。設字注曰。又假借之辭。戰國策。今先王設誘不官注。設者。虛假之辭。趙世家曰。設猶若。

方有執曰。脈浮細而嗜臥者。大邪已退。血氣乍虛。而肢體倦怠也。

正珍曰。是提太陽病十日以去七字。以辨其已解者。與傳及於少陽者也。言太陽病十日以上。發汗後。脈浮細而嗜臥。他無所苦者。此外邪已解。不須藥而可也。設胸滿脇痛者。則知邪氣不解。傳及於少陽也。非前條喘而胸滿之比也。故與小柴胡湯和之。脈但浮云云八字。恐是後人所加。否則必有闕文。何者。仲景氏之立論。必參合脈證。而后敢言其方。今此文惟云脈。而不云證。若非有闕文。則後人之言已。故今刪之。按少陰篇曰。少陰之爲病。脈微細。但欲寐也。與此條稍似。而大異也。彼在於病發之始而言。此在於十日以後而言。彼脈微細。而此浮細。彼欲寐。而此嗜臥。自有差別。不可混也。又按方有執云。胸滿脇痛。則少陽未除。金鑑亦同。不知十日以去。脈未浮細之前。少陽證安在。而曰未除邪。再按宋板此條後。載小柴胡湯方。今依成本刪之。其方見後第九十八條。〔三十八〕太陽中風。脈浮緊。發熱惡寒。身疼痛。不汗出而煩躁者。大青龍湯主之。若脈微弱。汗出惡風者。不可服之。服之則厥逆筋惕肉瞤。此爲逆也。千金。太陽中風。作中風傷寒。身字下有體字。玉函脈經。煩躁下。有煩躁二字。成本全書。脫不可服之之字。

程應旂曰。此湯非爲煩躁設。爲不汗出之煩躁設。若脈微弱。汗出惡風者。雖有煩躁證。乃少陰亡陽之象。全非汗不出而鬱蒸者比也。

惟忠曰。爲逆也下。條辨。尙論編。後條辨。續論。皆有以真武湯救之六字。此必後人之補入也。

正珍曰。中風當作傷寒。此太陽表實。兼挾陽明內熱之候。非麻黃湯所能發。故與大青龍湯。以峻發之矣。若其脈微弱。汗出惡風者。雖有發熱煩躁身痛。乃少陰亡陽之證。與通脈四逆湯之裏寒外熱。吳茱萸湯之煩躁。附子湯之身痛。同類。並見少陰篇是皆真寒假熱之病。而非大青龍湯所

主也。若誤與之。則必見四肢厥逆。筋惕肉瞤等危候。是之謂逆治也。當此之時。惟真武湯。可以僥倖萬一而已矣。從來註家。皆謂是中風見寒脈。風寒兩傷營衛者也。殊不知冒首中風二字。卽傷寒二字之誤。有後章可徵矣。字典。謂字注曰。說文目動也。黃帝素問。肉瞤瘛。動也。風邪曰。瘛。瘛曰瘛。手足瘛。即筋惕肉瞤也。再按。麻黃證曰。無

汗。大青龍證曰。不汗出。猶太陽病曰。或未發熱。少陰病曰。無熱惡寒。造語既畢。義亦不同。不可不詳也。蓋無汗。對有汗而言之。不汗出。對無汗而言之。言其人不啻無汗。雖服麻黃以發之。尙猶不得汗也。但雖與之麻黃。不能有汗而煩躁者。乃始可與大青龍湯已。若其不云汗不出。而云不汗出者。所主在煩躁二字。而汗之不肯出。落第二義也。若夫桂枝

湯方後，汗不出，三字主汗而言之。本論屬辭之法，一字不苟如是。

# 大青龍湯方

麻黃 六兩 去節

桂枝 二兩 去皮

甘草 二兩 炙

杏仁 四十枚 去皮尖

生薑 三兩 切

大棗 十枚 擘

石膏 如雞子 大碎

右七味，以水九升，先煮麻黃，減二升，去上沫，內諸藥，煮取三升，去滓，溫服一升，取微似汗，汗出多者，溫粉撲之。一服汗者，停後服。若復服，汗多亡陽，遂虛，惡風煩躁不得眠也。杏仁，四十枚，成本。全書作四十個是。大棗，十枚。金匱，成本，作十二枚是。成本全書無若復服三字亦是。機字成本作粉。

按大青龍湯，乃越婢湯加桂枝杏仁，減大棗者。麻黃甘草生薑三味，分量無異，由是推之，所謂石膏鷄子大，乃亦半斤已。溫粉者，熬溫之米粉也。同溫鍼溫湯之溫，劉熙釋名云，粉，分也。研米使分散也。字彙粉字注曰，米細末，說文，傳面者，古傳面亦用米粉，是也。按後漢書，華佗傳曰，體有不快，起作一禽之戲，怡而汗出，因以著粉，義與本論同。再按，成無已明理論，載外臺辟溫粉方，以爲溫粉，非也。辟溫粉，乃辟溫疫之粉，非止汗之設也。無已引而混之，可謂鹵莽矣。茲錄外臺明理二方，以發其隱矣。外臺祕要辟溫粉方，川芎 蒼朮 白芷 藁本 零陵香 各等分 右五味，搗篩爲散，和米粉，粉身。若欲多時，加藥增粉用之。

明理論溫粉方

白朮

藁本

川芎

白芷

各等分

右搗末，爲細末。

每末一兩。入米粉三兩。和令勻。粉撲周身止汗。無藥本亦得。

香川太冲。行余醫言。論本事。三因。明理諸書。所載溫粉方曰。按張機元無溫粉方。唯用白米粉。溫而撲之耳。後雖立溫粉方。如許叔微。陳言。成無已。而皆俱和米粉用之。米粉居四之三。安在芎芷藁朮之四味乎。又按。若其所謂煩躁不得眠者。乃乾薑附子湯證。不復真武湯證也。

〔附錄〕門人某問曰。先生言。青龍以麻黃之青命焉。果然則麻黃湯。何無青龍之稱乎。余曰。其方不出一人之手也。仲景氏不云乎。勤求古訓。博采衆方。可見其所載諸方。多出於衆家之秘。而非仲景氏一人之所自制。故其立名不一。規爾。

〔三十九〕傷寒脈浮緩。身不疼但重。乍有輕時。無少陰證者。大青龍湯發之。

金鑑曰。乍有輕時。謂身重而有時輕也。若但欲寐。身重無輕時。是少陰證也。

傷寒發秘曰。前條乃傷寒之脈。而其證劇者。此則中風之脈。而其證劇者也。與之大青龍者。舍脈而取證也。內經云。九候雖全。形肉脫者。死之類。是亦舍脈而取證也。

賴穆曰。此章大青龍湯。張氏醫通。續論後條辨。作小青龍湯。謂古本然。予

未見其古本。疑據身重之文而改之乎。程應旂曰。余幼讀古本。實是小青龍湯。觀其中脈證。確非大青龍湯病。

正珍曰。此條承前章論其有異證者。故唯言其異者。而不言同者。雖則不言乎。其發熱惡寒。不汗出而煩躁者。含畜其中。古文之簡。乃爾。少陰證者。前所謂脈微弱。汗出惡風是也。按。真武湯。四肢沉重疼痛。桂枝附子湯。身體疼煩。不能自轉側。柴胡加龍骨牡蠣湯。一身盡重。不可轉側者。皆此身重也。不可不辨也。

〔四十〕傷寒表不解。心下有水氣。乾嘔發熱而欬。或渴。或利。或噎。或小便不利。少腹滿。或喘者。小青龍湯主之。

百十一條。

千金不解作未解。宜從而改之。玉函湯上。有微字。少腹之少作小。是也。詳見傷寒考。及後一條。

烏壽曰。千金以此論方。爲發汗後證是也。汪昂曰。仲景書中。凡有裏證兼表證者。則以表未解二字該之。

正珍按。烏氏。依千金。以爲發汗後證。可謂事見矣。自此以後數章。皆論汗下後。邪氣未解之

也。

方有執曰。水氣。謂飲也。

王肯堂曰。水留於胃。故乾嘔而噎。水射肺。故喘咳。水停心下。故渴。水入腸間。故利。水畜下焦。故小便不利。小腹滿。與小青龍湯發汗散水氣。又曰。小青龍湯證。與小柴胡證相似有不同者。小青龍湯無往來寒熱胸脇滿硬痛之證。但有乾嘔發熱而欬。此則爲表不解。水停心下也。雖有或爲之證。與小柴胡相似。終無半表半裏之證爲異耳。

證治準繩



惟忠曰。乾嘔。欬。渴。噎。喘。皆心下有水氣之狀也。其云或者。謂有兼證如此者。又否者。亦皆主之也。加減法。後人補入。不足據矣。它如小柴胡。真武。理中。及四逆散。通脈四逆等加減法。亦皆同。

金鑑曰。太陽停飲有二。一中風有汗爲表虛。五苓散證也。一傷寒無汗爲表實。小青龍湯證也。

正珍曰。傷寒表未解者。謂已經發汗。而脈浮緊頭痛。發熱惡寒之證仍在也。心下有水氣者。謂飲物之停畜胃中。非痰也。乾嘔及欬。皆水氣之所發也。然水之爲病不一。故舉或以下諸證。以盡其變也。或者未定之謂。言兼證如是者與否者。皆用小青龍湯主之也。後加減法。後人誤看或字而所妄加者。不可從矣。錢潢業已辨其非。惟忠從而和之。可謂定論矣。錢潢曰。詳推後加減法。凡原文中每具諸或有之證者。皆有之。愚竊疑之以理。恐未必皆出于仲景。

又按。噎當作噫。噫與噎。因字形相似。傳寫譌爲噎也。生薑瀉心湯條曰。乾噫食臭。脇下有水氣。可見噫亦水氣所致。程應旂本改噎作噫。

小青龍湯方

麻黃去節

芍藥

細辛

乾薑

甘草炙

桂枝各三兩  
去皮

五味子半升

半夏半升  
洗

右八味。以水一斗。先煮麻黃。減二升。去上沫。內諸藥。煮取三升。去滓。溫服。

一升。若渴。去半夏加栝樓根三兩。若微利。去麻黃加葶花。如一雞子。熬令赤色。若噎者。去麻黃加附子一枚炮。若小便不利少腹滿者。去麻黃加茯苓四兩。若喘。去麻黃加杏仁半升去皮尖。且葶花不治利。麻黃主喘。今此語反之。疑非仲景意。

〔四十一〕傷寒心下有水氣。欬而微喘。發熱不渴。服湯已渴者。此寒去欲解也。小青龍湯主之。

劉棟曰。此條承上條以明治例也。凡傷寒心下有水飲之人。欬而微喘。發熱而不渴者。小青龍湯主之。服湯已後發渴者。勿與白虎湯等以治其渴。此邪去欲解也。此條與下服柴胡湯已者相反可考。

發秘曰。傷寒者。指麻黃湯證言也。

賴穆曰。服湯之湯者。指小青龍湯。此書文法也。

惟忠曰。服湯以下。當屬主之之下看之。文法亦有如此者。湯即小青龍也。

正珍曰。按成無已云。不渴者。表證未罷。余謂不然也。蓋此條不渴二字。對下文渴字言之。非辨熱之淺深也。其服湯已渴者。此寒去欲解故也。勿治之。俟津液回。其渴自止也。寒即所謂水氣。指心下停飲而言。理中丸條。胃上有寒。四逆湯條。膈下有寒。飲等皆爾。雖然論中寒字。又有以

痰而言者。如瓜蒂散條。胸有寒。卽是也。蓋飲與痰。但非溫養人身之物也。品字箋。寒字注曰。事之棄而不舉。亦可曰寒。左傳哀十二年。若可尋也。亦可寒也。是也。一說以寒爲表邪。非也。喻昌謂。寒去欲解。仍用小青龍湯。與上篇脈見單浮用桂枝湯。中篇脈見單浮用麻黃湯同意。此止殊不知小青龍湯主之六字。原當移不渴之下而觀之。所謂服湯之湯。亦指爲何等湯歟。真堪捧腹也。又按。張璐。志聰。錢潢。金鑑。並云。小青龍湯主之六字。當在發熱不渴之下。傳寫之誤也。不知仲景氏書。要在俾學者默思也。彼徒但隨文解之。而不識微意之所存。侮弄原文。以欺來學。僭哉。妄哉。妄哉。僭哉。

〔四十二〕太陽病。外證未解。脈浮弱者。當以汗解。宜桂枝湯。  
方有執曰。外證未解。謂頭痛項強。惡寒等證猶在也。

錢潢曰。外證卽前發熱汗出。頭項強痛。惡寒等證也。

正珍曰。此亦論太陽病發汗後。當解而不解者也。故不言不解。而言未解。所以示其經發汗也。浮弱。乃浮緩也。對浮緊言之。宋板此條後。重出桂枝湯方。今依成本刪之。凡宋板重出之方。今皆依成本省之云。

〔四十三〕太陽病。下之。微喘者。表未解故也。桂枝加厚朴杏子湯主之。  
張志聰曰。燕氏曰。此與喘家作桂枝湯。加厚朴杏子。同一義也。

惟忠曰。此桂枝湯之證。猶未已。而加微喘者也。

正珍曰。按太陽病。桂枝證。雖醫反下之。其證不變。唯加微喘者。因表邪未解。而邪熱延及上焦也。凡書汗後吐後下後者。皆以前證悉去而言之。此條不言後字者。前證不去也。又按葛根黃芩黃連湯。治太陽病桂枝證。醫反下之之後。喘而汗出。無表證者。麻黃杏仁甘草石膏湯。治太陽病。桂枝證。發汗後。汗出而喘。無表證者。今此條之證。雖既經誤下。其表猶未解。故以桂枝解外。加杏仁厚朴。以治其微喘也。

桂枝加厚朴杏子湯方

桂枝

三兩 去皮

甘草

二兩 炙

生薑

三兩 切

芍藥

三兩

大棗

十二枚 擘

厚朴

三兩 炙 去皮

杏仁

五十枚 去皮尖

右七味。以水七升。微火煮。取三升。去滓。溫服一升。覆取微似汗。

成本。杏子湯之子。作仁。

五十枚。作五十箇。

〔四十四〕太陽病。外證未解者。不可下也。下之爲逆。欲解外者。宜桂枝湯。

上者字。依成本全書補之。桂枝湯下。成本全書。並有主之二字。非也。

金鑑曰。凡表證未解。無論已汗未汗。雖有可下之證。而非在急下之例者。均不可下。

王肯堂曰。但有一毫頭痛惡寒。卽爲表證未解。不可下。

錢潢曰。夫太陽中風。其頭痛項強。發熱惡寒。自汗等表證未除。理宜汗解。慎不可下。下之則於理爲不順。於法爲逆。逆則變生。而邪氣乘虛內陷。結胸痞鞭下利。喘汗脈促胸滿等證作矣。故必先解外邪。欲解外者。宜以桂枝湯主之。無他法也。

汪琥曰。逆者。爲病在外。而反攻其內。於治法爲不順也。

正珍曰。此亦已經發汗。而表猶未解者也。桂枝湯方後曰。服一劑盡病證猶在者。更作服。若汗不出者。乃服至二三劑。是所以更行桂枝也。

〔四十五〕太陽病。先發汗不解。而復下之。脈浮者不愈。浮爲在外。而反下之。故令不愈。今脈浮故在外。當須解外則愈。宜桂枝湯。

傷寒三註曰。此條雖汗下兩誤。桂枝證仍在。不爲壞病。

劉棟曰。此條承上條。而後人之所記也。

正珍曰。劉說甚是。決非仲景氏之言也。晰於文辭者。自能辨之。

〔四十六〕太陽病。脈浮緊。無汗發熱。身疼痛。八九日不解。表證仍在。此當發其汗。服藥已微除。其人發煩目瞑。劇者必衄。衄乃解。所以然者。陽氣重故也。麻黃湯主之。

成無已曰。脈浮緊發熱。身疼痛。太陽傷寒也。雖至八九日。而表證仍在。當發其汗。

賴穆曰。服藥已者。服麻黃湯已也。此自此書文法也。服湯已渴者。此寒去欲解也。小青龍湯主之之類是也。

正珍曰。微除二字。文義不穩。予嘗作未除解之。爾後沈思數回。猶未安帖。一日偶讀朝鮮本。三綱行實者有須字。誤作微字者。乃知微除。卽須與之誤矣。桂枝湯方後曰。服已須臾。歔熱稀粥一升余。以助藥力。與此條服藥已語。正相吻合。因以爲定說。按文蛤散條。彌更益煩。考之玉函。乃亦須臾益煩之誤。由此考之。須字一訛爲彌。彌字再訛爲微。須彌由形而訛。彌微由音而訛也。又按除與臾。古音相同。因致轉訛。字典臾字注曰。正韻。雲居切。音余。又除字注曰。集韻。牟諸切。音餘。詩小雅疏云。爾雅除作余。字雖異。音實同也。先輩諸子不知此誤。皆解爲小除之義。然小之與微。其義不同。故有小安小可之語。無微安微可之文。若其所謂微煩。微喘。微瘡。微惡寒。皆對顯而言。不與小同也。且此證致衄。乃麻黃之力也。豈有汗後藥力已盡。病證小除之後。更發煩致衄之理乎。所以然以下九字。叔和註文。凡論中云。所以然者多爾。四十九條。六十條。七十五條。九十五條。一百三十一條。再按。方有執。喻昌諸人。俱未知服藥二字。指下文麻黃湯而言。妄謂雖得衄解。仍用麻黃湯。以發其未盡之沈滯。殊不知其所謂發煩以下。乃麻黃湯之瞑眩矣。劉棟又謂。服藥者。服麻黃湯也。雖服湯微除。而

其人發煩躁目瞑甚者必爲鼻血也。仍麻黃湯主之。此止夫麻黃湯者發表峻劑豈可重用之於得衄解之後乎。劉棟又云。瞑。瞑眩之瞑也。果然則宜言其人發瞑而煩不宜言發煩目瞑也。又按張璐張志聰張兼善金鑑皆云麻黃湯主之五字當在當發其汗句下傳寫之誤也可謂昧乎文法矣。呂覽曰。瞑者目無由接。晉書山濤傳曰。臣耳目聾。不能自顧。康熙字典。瞑字注曰。音頤。集韻。目不明也。

〔四十七〕太陽病脈浮緊發熱身無汗自衄者愈。

成無已曰衄則熱隨血散故云自衄者愈。

方有執曰汗本血之液北人謂衄爲紅汗達此義也。

島壽曰衄而頭痛微止者自愈之衄也世謂之衄汗衄而病證依然者

不愈之衄也可發其汗麻黃湯主之。

希哲曰諸本身字下無疼字蓋脫落也今補之。

正珍曰希哲補疼字是也若無疼字則與但頭汗出證奚擇焉友人點

田翼云和蘭之俗凡傷寒熱甚者刺絡取血其熱乃解若其自衄者謂

之天然刺絡也景岳全書卷二十曰今西北人凡病傷寒熱入血分而

不解者悉刺兩手肘中出血謂之打寒蓋寒隨血去亦卽紅汗之類也

此暗符自衄者愈之語可見天下一理萬國同情矣。

〔四十八〕二陽併病太陽初得病時發其汗汗先出不微因轉屬陽明續

自微汗出不惡寒。若太陽病證不罷者不可下。下之爲逆。如此可小發汗。設面色緣緣正赤者。陽氣怫鬱在表。當解之熏之。若發汗不徹。不足言陽氣怫鬱。不得越當汗。不汗其人躁煩。不知痛處。乍在腹中。乍在四肢。按之不可得。其人短氣但坐。以汗出不徹故也。更發汗則愈。何以知汗出不徹。以脈濇故知也。

此條屬陽明以上。陽明篇之文。續自微汗出以下。叔和敷衍之文。何以知之。以文義全同乎辨脈平脈二篇。而毫不與本論愜也。

〔四十九〕脈浮數者。法當汗出而愈。若下之。身重心悸者。不可發汗。當自汗出乃解。所以然者。尺中脈微。此裏虛。須表裏實津液自和。便自汗出愈。此條云法當。云所以然。皆叔和家言。且脈分三部。亦仲景氏之所不取。〔五十〕脈浮緊者。法當身疼痛。宜以汗解之。假令尺中遲者。不可發汗。何以知然。以榮氣不足。血少故也。

此條言法當。言假令尺中遲。言榮氣不足。皆非仲景氏辭氣。〔五十一〕脈浮者。病在表。可發汗。宜麻黃湯。

此條及次條。惟言脈以附主方。非仲景之言明矣。辨已見上。且夫脈之浮者。多雖屬表證哉。主方則隨證區別。豈一麻黃之所總邪。〔五十二〕脈浮而數者。可發汗。宜麻黃湯。



〔五十二〕病常自汗出者。此爲榮氣和。榮氣和者。外不諧以衛氣。不共榮氣諧和。故爾以榮行脈中。衛行脈外。復發其汗。榮衛和則愈。宜桂枝湯。

此條及次條。皆以榮衛言之。合于辨脈法中說。而不合於仲景全論之旨。其爲叔和明白。

〔五十四〕病人藏無他病時。發熱自汗出而不愈者。此衛氣不和也。先其時發汗則愈。宜桂枝湯。

以上七條。叔和補入之語。宜刪。

〔五十五〕傷寒脈浮緊不發汗。因致衄者。麻黃湯主之。

烏壽曰。江篁南曰。仲景言衄家不可發汗。亡血家不可發汗。而此用麻黃湯。何也。曰。久衄之家。亡血已多。故不可汗。今緣當汗。不汗。熱毒蘊結而成衄血。當分其津液乃愈。蓋發其汗。則熱越而出血自止也。

惟忠曰。不汗出與不發汗自別。此謂未與發汗之藥也。

正珍曰。此承上條。論衄而不解者。以示其治方也。

〔五十六〕傷寒不大便六七日。頭痛有熱者。與承氣湯。其小便清者。知不在裏。仍在表也。當須發汗。若頭痛者。必衄。宜桂枝湯。

外臺。小便下。有反字。千金翼。有熱下。有小便赤三

字。俱宜補。

傷寒發秘曰。傷寒不大便六七日。頭痛有熱。且小便赤者。可與承氣湯。

也。小便雖赤，惡寒猶未止者，仍未可下之。况小便未赤乎。

錢潢曰：其熱則蒸蒸之熱，或曰晡潮熱，非寒邪在表之頭痛有熱也。

方有執曰：承氣湯有四方，此不明言，要當隨證辨用耳。

正珍曰：有熱者，唯有熱而無惡寒之謂，所謂煩熱是也。若頭痛者，必衄六字，文義不貫，疑是前條註文錯亂入此，宜刪焉。言傷寒不大便六七日，頭痛煩熱，小便赤澀者，史記倉公傳曰：中雖未及潮熱譫語，手足微然熱。故小便赤也。

汗出等，然而其已轉入陽明者無疑，宜與承氣以下之。此證雖有頭痛之似表乎，然惡寒已罷，則非表證之頭痛，乃屬裏之頭痛，如十棗湯之頭痛亦然。雖然，若其小便反清白者，是熱尚在表，而未入裏之候，即有不大便煩熱等證，先宜以桂枝發之，俟其小便渾赤而後可下之也。按張志聰：惟忠之徒，以桂枝湯爲麻黃湯之誤，深拘傷寒二字，及必衄語也，不可從矣。再按：傷寒不大便六七日，頭痛有煩熱，而小便清者，此餘熱不解之候，非惡寒發熱，而脈浮緊悉具者也，故不用麻黃而用桂枝也。

〔五十七〕傷寒發汗已，解半日許，復煩脈浮數者，可更發汗，宜桂枝湯。成本

脫已字。當補之。傷字下。成本全書。并有主之二字。非。

方有執曰：傷寒發汗者，服麻黃湯以發之之謂也。類傳曰：張夫子不日用發汗何湯。然後入錢何文。得此

說。正珍曰。不然也。傷寒而用麻黃。中風而用桂枝。乃一定之常法。何疑之有。

金鑑曰。是表邪未盡。退而復集也。可更發汗。其不用麻黃湯者。以其津液前已爲發汗所傷。不堪再任麻黃。故宜桂枝更汗可也。

正珍曰。成無已。以煩訓熱。未盡其義也。蓋煩猶言悶也。悶之輕爲煩。煩之重爲悶。故言煩悶。而不言悶煩。猶言疼痛。而不言痛疼矣。更猶再。對上文發汗言之。方有執。讀爲平聲。訓爲改前法之義。非也。不知上篇各半湯條所謂更發汗。更下。更吐者。亦謂之改用他藥。以行發汗吐下而可乎。真堪一咲也。喻昌從而和之。噫。是誠何心哉。錢潢云。風寒並有之症。但以麻黃湯發汗。則榮邪去而解矣。解後半日許。復煩者。因在衛之風邪未解故也。宜桂枝湯。此止辨則辨矣。奈天下絕無此事。何者。以風寒本一氣。合而不離也。又按。方有執。喻昌。賴穆。皆以其復煩脈浮數。爲再感之病。非也。惟成無已。以爲邪未盡。金鑑從之。是也。凡論中言復利。復惡寒之類。皆非云再感也。

〔五十八〕凡病。若發汗。若吐。若下。若亡血。亡津液。陰陽自和者。必自愈。成

全書。及諸注本。皆脫亡血二字。唯宋版玉函有之。又亡津液之亡。玉函作無。非也。

魏荔彤曰。上三若字。作或字看。下一若字。作倘字看。

正珍曰。凡病二字。廣該三陽諸證言之。若亡血。亡津液六字。上文汗吐

下之所致如用麻黃湯致衄用抵當湯丸桃核承氣類以下血所謂亡血也如下條大下後復發汗致小便利所謂亡津液也一說以嘔血便血爲亡血以自汗盜汗爲亡津液非也此等惡證豈有自愈之理乎陰陽指表裏言之也言既有其病而施其治雖則或有致一時之虛者然以表裏既和之故不必俟補而其虛自復也方有執劉棟並云陰陽以脈而言非也。

〔五十九〕大下之後復發汗小便不利者亡津液故也勿治之得小便利必自愈。

金鑑曰大下之後復發其汗重亡津液小便當少以水液內竭故也勿治之言勿利其小便也須俟津液回而小便利必自愈矣。

陽明篇曰陽明病汗出多而渴者不可與猪苓湯以汗多胃中燥猪苓湯復利其小便故也宜與此條參考。

再按又宜與第七十二條參看。

正珍曰自此以下數條承上章說陰陽不和者也其得小便利四字疑是古註文或叔和語已宜刪若有此四字則必自愈三字果是何等病證乎按方有執以勿字管下六字看之其說雖是文法不穩不可從矣程應旂云得小便利而雜病皆愈此止然而此條所論止小便一證已未

嘗言及其他雜證。可謂強辨矣。又按此條及百五十四條。並是蘧伯玉之治國。以弗治爲治之意。非後世諸醫所能知也。

蘧伯玉爲相。子貢往觀之曰。何以治國。曰。

以弗治治之。

〔六十〕下之後。復發汗。必振寒。脈微細。所以然者。以內外俱虛故也。

官義方曰。內外。陰陽表裏也。可行乾薑附子湯證也。

正珍曰。所以然者四字。蓋叔和所加。凡稱所以然者。皆爾必者。十而八九然之謂也。下則虛其內。發汗則虛其外。其邪雖解乎。表裏之陽俱虛。所以振振寒慄而脈微細也。宜與薑附之劑。急補其虛也。成無已以振寒爲陽氣微。以脈微細爲陰血弱。鑿矣。惟忠云。凡曰實者。皆是邪實。藥之所治。凡曰虛者。皆是正虛。以穀肉菓菜養之。非藥之所治也。嗚呼。惟忠過矣。如此條振寒脈微細者。豈不藥而可哉。亦豈穀肉菓菜之所可得而養邪。

〔六十一〕下之後。復發汗。晝日煩躁。不得眠。夜而安靜。不嘔不渴。無表證。脈沈微。身無大熱者。乾薑附子湯主之。

成無已曰。下之虛其裏。汗之虛其表。既下又汗。則表裏俱虛。陽王於晝。陽欲復虛。不勝邪。正邪交爭。故晝日煩躁不得眠。夜陰王。陽虛不能與之爭。是夜則安靜。不嘔不渴者。裏無熱也。身無大熱者。表無熱也。又無

表證而脈沈微。知陽氣大虛。陰寒氣勝。與乾薑附子湯。退陰復陽。

發秘曰。按此證。已經汗下。而餘邪未盡。惟以其汗下。大亡其陽。故其餘邪不能肆然自擅其權。必待晝日陽旺之時。從而發動。是以晝則煩躁。夜則貼然。今治方一專扶陽。而不敢攻其邪者。正勝而邪自退者而已。

正珍曰。二說。雖未審孰否。姑書俟後考。

惟忠曰。婦人熱入血室。晝日明了。暮則譫語。與此條相反。

正珍曰。上條論汗下俱犯後之常證。此條論其有變證如此者也。其所以異於前條者。無振寒而反有煩躁。所謂真寒假熱者也。其所謂晝日煩躁。夜而安靜者。乃表裏俱虛之候。如其所以然者。則存而不論。非不論也。不可知也。不嘔不渴者。示其裏無邪熱之辭。蓋對煩躁之似裏熱而言。如桂枝附子湯條。不嘔不渴。桂枝麻黃各半湯條。不嘔。皆然。煩躁專屬陽證。而今無少陽主證之嘔。陽明主證之渴。太陽主證之身熱。而其脈沈微。其非陽證之煩躁明矣。身無大熱者。言皮膚之表無有翕翕之熱也。大音泰。詳見上篇。按本章。及麻黃杏仁甘草石膏湯條。并稱身無大熱。大陷胸湯。白虎加人參湯。並單稱無大熱。而無身字。皆承上篇身大熱文而言。故雖省身字。亦自通矣。劉棟惟忠。皆以大熱之大。訓爲大表之大。非也。大表。謂面也。凡人身之表。見於外。莫大於面。是以謂之

大表。扁鵲所謂病應見于大表是也。此承上文望色而言。如奇表。後漢李固有奇

表鼎角帝王表。劉峻。辨命論。鱗犀曰角。帝王之表。河目龜文。公侯之相。○格致

面相爲言。可以見矣。彼既誤解扁鵲傳。以爲肌表。又引而往大熱。抑何

妄之甚。假令大表爲肌表之謂。豈可特訓一大字以爲大表乎。再按此

條煩躁與扶苓四逆湯。吳某黃湯之煩躁。皆亡陽虛寒之煩躁。大青龍

湯方後所謂汗多亡陽。遂虛惡風。煩躁不得眠者。是也。與梔子豉湯之

虛煩不得眠者。不可誤混也。又按此方與四逆湯。近似而無下利厥冷

脈欲絕等證。故不用甘草。又與扶苓四逆證相似而有異也。

乾薑附子湯方

乾薑 一兩

附子 一枚生用去皮切八片

右二味。以水三升。煮取一升。去滓頓服。成本。切作破。是也。

頓服者。一次服盡之謂。字典頓字註曰。增韻。食一次也。杜甫詩。頓頓食

黃魚。世說新語。欲乞一頓食。

〔六十一〕發汗後。身疼痛。脈沈遲者。桂枝加芍藥生薑各一兩。人參三兩。新加湯主之。

成無已曰。汗後身疼痛。邪氣未盡也。脈沈遲。榮血不足也。與桂枝湯以解未盡之邪。加芍藥生薑人參。以益不足之血。

張兼善曰。凡言發汗後。以外無表證。裏無熱證。止餘身疼一事而已。

金鑑曰。發汗後。身疼痛。脈浮緊。或浮數。乃發汗未徹。表邪未盡也。仍當汗之。宜桂枝湯。今發汗後。身雖疼痛。脈見沈遲。是營衛虛寒。故宜桂枝新加湯。以溫補其營衛也。

張志聰曰。新加湯者。謂集用上古諸方。治療表裏之證。述而不作。如此湯方。則其新加者也。亦仲祖自謙之意。

劉棣曰。脈沈遲者。亡津液也。

正珍曰。發汗後。諸證皆去。但身痛未除者。是餘邪未盡之候。其脈沈遲者。過汗亡津液也。故與桂枝以解未盡之邪。增芍藥生薑。加人參以補其津液。其不用附子者。以未至筋惕肉瞤。汗出惡風之劇也。又按。如此湯及桂枝加桂湯方。經文既言其所加分量。則知仲景氏原本。本不載其方矣。後人不察。看以爲方名。遂錄其方耳。且芍藥生薑。固是桂枝湯中所存。故唯云之加。人參則原方所無。故特稱新加也。否則新加二字。終不可解矣。又按。方有執錢潢。島壽諸人。皆以身疼痛。爲汗後邪氣驟去。血氣暴虛之所致。非也。本篇傷寒醫下之。續得下利。清穀不止。身疼痛條。及厥陰篇。下利腹脹滿。身體疼痛條。可參考。再按。桂枝去芍藥證者。太陽中風。醫下之頗劇。表邪被劫。而其證伏者也。故除胸滿之外。雖



別無表裏證。脈仍不復平而促也。新加證者。太陽傷寒。醫發之太峻。血液因而頓損者也。故雖脈見沈遲。身痛仍未去也。

或問。吾子謂桂枝湯。是仲景氏以前古方。而加減則出于仲景。故特稱新加也。以予觀之。安知其併新加皆不古方邪。余曰。否。不然也。凡方名如桂枝。柴胡。理中。黃芩類。皆是古方。而其設加減者。皆出於仲景氏之新意也。故論中有桂枝證。柴胡證。及醫以理中與之。反與黃芩湯等語。而未嘗有云桂枝加減證。柴胡加減證者。又未嘗有云反與桂枝新加湯。反與柴胡加芒消湯類。由是觀之。加減諸方。皆出於仲景氏確乎信矣。

桂枝加芍藥生薑各一兩。人參三兩。新加湯方

桂枝

二兩  
去皮

芍藥

四兩

甘草

二兩  
炙

人參

三兩

大棗

十二枚

生薑

四兩

右六味。以水一斗二升。煮取三升。去滓。溫服一升。本云桂枝湯。今加芍藥生薑人參。

按玉函脈經。俱作桂枝加芍藥生薑人參湯。蓋係後人改訂。不可從矣。〔六十二〕發汗後。不可更行桂枝湯。汗出而喘。無大熱者。可與麻黃杏仁甘草石膏湯。成本全書。皆句尾有主之二字。非也。

方有執曰。更行。猶言再用。

顧穆曰。戰國策。君其行之。注。行。猶用也。○正珍曰。左傳昭十年子產曰。變焉用幣。用幣必百兩。百兩必千人。

千人至將不行。杜預注曰。行。用也。

張兼善曰。余觀仲景常言發汗後。乃表邪悉解。止餘一證而已。故言不可行桂枝湯。今汗出而喘。無大熱。乃上焦餘邪未解。當用麻黃杏仁甘草石膏湯以散之。夫桂枝加厚朴杏仁湯。乃桂枝證悉具。而加喘者用之。註。正珍曰。桂枝證悉具。言汗出而喘。以爲邪氣壅甚。非桂枝所能發散。此誤也。況身無大熱。更無他證。何故復言表邪必甚。

正珍曰。此條與葛根黃芩黃連湯。皆表邪已解。而上焦餘熱未解。內迫肺中而喘者。張兼善所解。是也。但彼下後。此汗後。彼喘而汗出。此汗出而喘。彼以喘爲主。此以汗爲主。所以治法有異也。若無汗而喘。且有大熱者。乃麻黃湯證也。無大熱者。謂表無翕翕之熱也。成無已註于乾薑附子湯下。以爲表無熱。今又註于此條。以爲表邪甚。遂失前後之照應矣。且謂此證邪氣擁甚。桂枝湯不能發散也。殊不知麻黃之所以能發汗者。唯在其輔佐之任。而不在麻黃一品之力矣。歷代諸醫皆云。麻黃發汗之藥也。此未必然也。有人於此。發熱惡寒。身疼無汗。太陽證具焉。試取麻黃一品。濃煎與之。終不能有汗焉。必也溫覆而後汗可得而言已。決不能如彼巴豆甘遂之下咽乃繼也。惟以麻黃能行陽氣通腠理。

若佐以桂枝之辛與溫覆之勢。則令夫難發之邪。能與汗偕出。麻黃之所以爲麻黃。全在於此也。故無汗者。用以發之。有汗者。用以收之。要顧其輔佐如何而已。豈在一品之力乎。金匱越婢湯。越婢加朮湯。千金西州續命湯。外臺所引刪繁治肉極方。皆有麻黃。以治自汗。且其肉極方中有言。麻黃止汗通肉。可見麻黃之性。不獨發汗。亦能收汗矣。嘗考本草有麻黃能發汗。而根節止汗說。是亦因其輔佐而然者。其實非根節有別性也。試看常山蜀漆。芫花芫根。功用不異。椒樹其實辛則樹皮亦辛。人參其根能益元氣生津液。則葉亦有益氣生津之功。唯力有強弱。功有遲速已。豈有如此霄壤之懸隔哉。若其參蘆吐人。當歸頭尾破血諸說。皆妄誕不經之談。固不足論已。又考金匱救卒死還魂湯方。用麻黃杏仁甘草三物。蓋亦取諸通陽氣。又嘗考和蘭本草。麻黃有達神經之言。而無有發汗之說。益可以徵予言之不誣云。

麻黃杏仁甘草石膏湯方

麻黃四兩  
去節

杏仁五十箇  
去皮尖

甘草二兩  
炙

石膏半斤  
碎

右四味。以水七升。先煮麻黃。減二升。去上沫。內諸藥。煮取一升。去滓。溫服一升。本云黃耳杯。先字。依成  
本補之。

本云黃耳杯五字。玉函全書俱無之。此係後人之筆。宜刪。

〔六十四〕發汗過多其人叉手自冒心。心下悸。欲得按者。桂枝甘草湯主之。字彙曰。又兩手相按也。冒。覆也。

惟忠曰。按之則如少安。故欲得按也。

正珍曰。汗後亡陽之證。種種不同者。皆由其宿昔素常。或表裏有強弱之異。或臟府有虛實之分而判。如此條所說。蓋其人中焦之陽。固有不足者。又從而大發汗。其陽愈益虛者也。悸者。心動也。後世醫家。謂之怔忡。凡人有所驚怒。則心氣爲之不寧。惕惕然而跳動。是之謂悸也。悸與脈動。其大小遲速。毫無所爽者。以心爲一身動脈之源也。雖然。此是一時驚怒之所致。驚怒止而自愈。猶樂而歌笑。哀而哭泣。非爲病證也。若其由發汗吐下。致心下悸。臍下悸者。則非心動之悸。俗呼爲動氣者。是也。蓋以其人藏氣平生不足。復爲發汗吐下所傷動。而不能鎮壓腹底潛行之大動脈也。所謂大動脈。卽心血下行之一大幹。其道在脊骨之前。藏府之後。至於下焦腎藏之下。歧而入兩腳者。是也。其詳載在友人松田翼所著解體新書中。嘗試之。平人。凡肥滿充實者。腹動極微。或不全應手矣。又如羸瘦虛弱者。腹動頗大。靡有不應者。蓋人腹之作動也。辟猶火爐之作熱乎。腹猶爐。脈猶火。臟猶灰也。灰多爐厚。則熱之見外也微矣。臟實腹厚。則動之見外也微矣。若夫一腹而動有心下臍下之

異者。亦猶一爐而熱有耳上耳下之異焉。熱之分耳上耳下也。必由灰之多少與爐之厚薄也。動之分心下臍下也。必由臟之虛實與腹之厚薄也。故同一發汗。而悸有高低之異者。以其人所虛之處本有高低之異也。大氏病人有虛熱者。每見此證。以腹氣不充而其脈憤興也。若其動脈而命之以悸者。一以其發見之殊於常而言。一以其深在臟府之底而言。不同以人迎氣口之直應於指下言之也。又有一身悉悸者。此心動之極盛者。一身流行之血。皆從而奮動也。再審解經新書。所謂大動脈。其亦必重左也。然看大病危急之人。間有動於右旁者。顯是腸胃中物。適停滯左旁。而不得運轉右旁。特空虛故也。此證多不治矣。新書曰。動脈者。從心之左方起支別則蔓延一身也。又曰。動脈者。主受血于心。而傳支別細絡。以能周流養一身。妊婦七八月以上入房者。每有斯患。余嘗見數人。皆不日而死。爲人之妻者。不可不慎也。又有水飲停畜而發心下悸者。其人必小便不利。如下篇百三十四條及小柴胡湯證。真武湯證。茯苓甘草湯證。是也。然其所以致水飲停畜者。亦必由中焦陽氣之虛而然也。但蓋水畜則胃張。胃張則壓胃背之動脈。動脈爲之激動。故亦致悸。先輩諸氏解悸字。殊未盡其義。特表而出之云。

桂枝甘草湯方

桂枝四兩 去皮 甘草二兩 炙

右二味。以水三升。煮取一升。去滓頓服。

〔六十五〕發汗後，其人臍下悸者，欲作奔豚，茯苓桂枝甘草大棗湯主之。  
奔。玉函金匱，並作賁。本草白前條，引大明，亦作賁豚。

此是下焦之陽，從來不足，而復爲發汗見傷者也。奔與賁，古字通用。考韻會小補康熙字典諸書，奔通作賁，賁亦通作賁，賁，慙也。〔下比周黃漢〕以 韓上矣，唐楊倞注曰：賁，讀爲賁，賁然也。且述其上，曰賁。由此考之，奔豚當讀曰賁豚。清王子接古方選注，作賁豚湯，其解曰：賁與賁同，俗讀奔豚是也。蓋豚者，猪之小者，其性善嘔，故有賁豚之稱也。而魚中鰕鮒，亦復善嘔之物，故又稱之河豚焉。卜子曰：猪性卑而率，寧波府志曰：河豚觸物輒嘔，腹脹如鞠，浮於水上，一名嘔魚，可見奔豚者，病名也。氣自小腹上衝心胸，若賁豚然，故以爲名。發汗過多，其人臍下悸，欲作奔豚者，較之上條爲虛悸殊甚，故於上條方內，更加茯苓大棗，煮之以甘爛水，以輯穆之。若反制之，則以愈虛愈悸也。按靈樞邪客篇，治陽盛陰虛，目不得眠，半夏湯，金匱治胃反嘔吐，大半夏湯，及此條，皆用甘爛水者，蓋取其甘淡和緩，能收輯穆之功也。爛與煉同，所謂以杓揚之是也。本草經馬先蒿，一名練，石草，一名爛石草，字典煉字注曰：又集韻，卽肝切，音彰。本作煉，或作爛。又爛字注曰：集韻與爛煉同。此止可見爛煉相同矣。謂之甘煉者，言煉之使甘也。當云煉甘，而云甘煉者，猶下才曰才下。唐書，蘇護傳曰：保衛才下，蘇循斯傳之不甚也。秦先曰先秦。漢書景十三王傳注曰：

先秦論  
言秦先

明威曰威明。

後漢書齊武王傳曰。新市平林將帥。憚伯升威明。而貪聖公權弱。

心中日中心。

之。何日忘之。亦古

書一體已爾。古今註家皆謂奔豚腎之積。用甘爛水者。取不助腎氣也。此素難五行家之說。素不足取矣。病源云。奔豚者。氣下上遊走。如豚之奔。故曰奔豚。古今註家亦皆沿此說。然不若奔讀曰憤之穩。不可從也。茯苓桂枝甘草大棗湯方。

扶苓半斤

桂枝

四兩 去皮

廿

第二章

॥

大棗十五枚

右四味以甘爛水一斗先煮茯苓減二升內諸藥煮取三升去滓溫服一升日三服。甘草二兩。成本全書作三兩。

作甘爛水法。取水一二斗。置大盆內。以杓揚之。水上有珠子五六千顆相逐。

取用之。甘瀾水。方有教。張璠。及金鑑。皆作甘瀾水。非也。

潁穆曰。甘爛水。卽勞水也。孫思邈暗解靈樞。半夏湯曰。治五勞七傷羸

弱之病。煎藥宜以陳蘆勞水。取其水不強。其火不盛也。可謂能識得古

意者。成氏曰。取不助腎氣也。非矣。

〔六十六〕發汗後。腹脹滿者。厚朴生薑甘草半夏人參湯主之。

成無已曰吐後腹滿與下後腹滿皆爲實言邪氣乘虛入裏爲實發汗

後外已解也。腹脹滿。知非裏實。由脾胃津液不足。氣滯不通。壅而爲痞。

與此湯和脾胃而降氣。

張兼善曰：凡云發汗後者，以外無表證裏無別術，止有腹滿一事而已。程應旆曰：虛氣留滯之脹滿，較實者自不堅痛。

正珍曰：陽明篇曰：吐後腹脹滿者，調胃承氣湯主之。又曰：大下後六七日不大便，煩不解，腹滿痛者，此有燥屎也，宜大承氣湯。按下後腹滿者，爲邪實，吐後腹滿者，乃藥毒遺害已，成無已概爲邪實，非矣。

厚朴生薑半夏甘草人參湯方

厚朴

半斤 炙

生薑

半斤 切

半夏

半升 洗

甘草

二兩 炙

人參

一兩

右五味以水一斗，煮取三升，去滓，溫服一升，日三服。

半夏半升，成本作半斤，非。脫甘草二兩炙之炙字，宜依

成本補入。

〔六十七〕傷寒，若吐若下後，心下逆滿，氣上衝胸，起則頭眩，脈沈緊，發汗則動經，身爲振振搖者，茯苓桂枝白朮甘草湯主之。

方有執曰：動經，傷動經脈，振振，奮動也。

動也。正珍按：本音去聲。故也。奮也。

金鑑曰：振振搖者，即戰振身搖也。

正珍曰：太陽上篇曰：心下滿微痛，小便不利者，桂枝去桂加白朮茯苓湯主之。金匱曰：夫短氣有微飲，當從小便去之。茯苓朮甘草湯主之。又曰：心下有痰飲，胸脇支滿，目眩，用苓桂朮甘草湯。合而考之，此條心下逆滿，氣上衝胸，起則頭眩，脈沈緊者，此由吐之，或下之，外入之邪雖解矣，陽



氣爲之受傷而不克運化。水漿停而爲病者也。頭眩者。頭中之陽虛也。靈樞衛氣篇曰。上虛則眩。是也。眩。謂頭旋。此證宜與茯苓桂枝白朮甘草湯以行其停水。若誤爲表邪未解。又發其汗。則經脈爲之被動。爲身搖肉瞤振振欲仆地證。乃真武湯所主也。真武湯條曰。太陽病。發熱汗出不解。心下悸。頭眩。身瞤動。振振欲墜地。故以脈沈緊三字。綴在頭眩下。所以使之不混也。此乃一書文法。宜與第二十三條。第四十一條。第四十六條參看。古今注家不察此義。皆混爲一證。不達文法故也。按逆滿與支滿苦滿。皆讀滿爲滿。不曰硬滿脹滿。而曰逆滿支滿。造語亦自有差別如此。金匱附子粳米湯條。亦有腹中寒氣。雷鳴切痛。胸脇逆滿語。其非硬滿脹滿明矣。錢潢曰。逆滿。氣逆中滿也。非也。設其言之是乎。則下文氣上衝胸。豈不一剩語乎。金鑑云。吐下則胸虛邪陷。故心下逆滿。氣上衝胸。非也。若是邪陷之滿。乃爲實滿。非大陷胸則不可得而當焉。豈此湯之所能蠲耶。又嘗見喻昌註本。於傷寒下。加若發汗三字。非也。再按。若下下。玉函有若發汗三字。喻昌或據之乎。

茯苓桂枝白朮甘草湯方

茯苓

桂枝

白朮

甘草

右四味以水六升。煮取三升。去滓。分溫三服。千金翼。作白朮一兩。甘草一兩。非。金匱。作白朮三兩。非。

〔六十人〕發汗病不解。反惡寒者。虛故也。芍藥甘草附子湯主之。

小島瑞曰：長沙所謂病解與表解，其辭自異也。金鑑混而一之，可謂粗漏也。

正珍曰：言太陽病已經發汗，病當解散復故也。若不復故反惡寒者，其人表陽素弱，汗出亡陽也。惡寒該惡風而言，與桂枝加附子湯之惡風，桂枝去芍藥加附子湯及附子瀉心湯之惡寒，皆爲表虛之候，宜與芍藥甘草附子湯以復其陽焉。病不解，不復常之謂，非謂表不解也。如後章發汗若下之，病仍不解，煩躁者，亦復爾爾。若夫表不解之煩躁，乃大青龍湯所主，豈反用茯苓四逆乎？金鑑不字爲衍，惟忠爲已字之誤，並非也。

### 芍藥甘草附子湯方

芍藥 三兩

甘草 二兩

炙

附子 一枚

破八片

右三味，以水五升，煮取一升五合，去滓，分溫三服。疑非仲景意。玉函：千金翼。作水三升。玉函無疑非仲景意五字。是。右字。成本全書并作已上。非。三服之三。成本全書。并脫之。

劉棟曰：疑非仲景意五字，當刪。

〔六十九〕發汗若下之，病仍不解，煩躁者，茯苓四逆湯主之。

金鑑曰：大青龍證，不汗出之煩躁，乃未經汗下之煩躁屬實，此條病不解之煩躁，乃汗下後之煩躁屬虛，然脈之浮緊沈微，自當別之。汪琥曰：

虛煩虛躁乃假熱之象也祇宜溫補

劉棟曰上條一等之深證也

宜義方說同

正珍曰發汗或下之之後仍不復常反生煩躁者乃亡陽假熱之煩躁與乾薑附子湯之煩躁同而比之乾薑附子湯其證稍異矣大青龍湯條所謂汗多亡陽途虛惡風煩躁者是也非實熱之煩躁也宜與茯苓四逆湯回復陽氣按乾薑附子湯條是汗下俱犯之證此則或汗或下犯其一者也觀若字可見矣成無已以汗下兩犯解之非也此蓋四逆證而兼煩躁者已何謂四逆證下利清穀若下利腹脹滿若自利不渴若大汗出腹內拘急四肢厥逆而惡寒若吐利汗出發熱惡寒四肢拘急手足厥冷若膈下有寒飲乾嘔若大汗大下利而厥冷類是也若夫言脈則或浮而遲或弱或沉或脈微欲絕類是也

茯苓四逆湯方

茯苓

四兩

人參

一兩

附子

一枚生用去皮破八片

甘草

二兩

乾薑

一兩

右五味以水五升煮取三升去滓溫服七合日二服

或本全書按茯苓四兩作六兩非二服作三服是玉函

千金翼分作茯苓四兩

按千金方婦人產後病然竹茹湯方後曰若有人參入一兩若無內扶

苓一兩半亦佳。蓋人參扶苓皆治心煩悶及心虛驚悸。安定精神。

〔七十〕發汗後惡寒者。虛故也。不惡寒但熱者。實也。當和胃氣。與調胃承

氣湯。王臣經千金翼。皆作小承氣湯是也。但熱者三字。千金翼作但惡熱者四字。後條辨。尚論辨源集。皆同。

成無已曰。汗出而惡寒者。表虛也。汗出不惡寒。但熱者。裏實也。經曰。汗

出不惡寒者。此表解裏未和。太陽下篇。十與調胃承氣湯。

程應旂曰。汗後不惡寒反惡熱。其人大便必實。由發汗後亡津液所致。

病不在營衛而在胃矣。法當和胃氣。與調胃承氣湯。又曰。實者表解裏

未和也。故曰和胃氣。同一汗後。而虛實不同者。則視其人之胃氣。素寒

素熱。而氣隨之轉也。可見治病須顧及其人之本氣為主。

劉棟曰。發汗後表解。不發熱有惡寒者。表虛也。芍藥甘草附子湯之主

也。遂漏而不止。其證輕者。桂枝加附子湯之主也。若無惡寒但有惡熱

者。此胃實也。當先與調胃承氣湯。使胃氣和矣。

正珍曰。陽明篇於小承氣湯。稱和者四條矣。此條亦既稱和胃氣。則可

見作小承氣湯者是。而作調胃承氣之非矣。又按。調胃承氣。本爲吐下

後胃氣不調者而設。此條不經吐下。胃氣無傷。甘草遂屬無用。

〔七十一〕太陽病。發汗後。大汗出。胃中乾。煩躁不得眠。欲得飲水者。少少

與飲之。令胃氣和則愈。若脈浮。小便不利。微熱。消渴者。五苓散主之。煩躁之。全

書作燥。非。五苓散主之上。  
成本全書玉函并有與字。非。

錢潢曰。此條當作兩截解。發汗後大汗出二句。乃一條誤汗之總領。

張兼善曰。煩渴用白虎宜也。其用五苓散。滲津液何哉。曰。白虎乃表證已解。邪傳裏而煩渴者。今脈尚浮。身有微熱而渴。乃表邪未全解。故用桂枝之辛。和肌表。白朮茯苓之甘淡。以潤虛燥也。

魏荔彤曰。發汗後。大汗出。所謂如水流漓也。於是胃中津液受傷而乾。因乾而燥。因燥而煩。因煩燥而不得眠。此一串而至者。惟恐人誤認爲傳裏之燥煩。而又誤下也。於是標出欲得飲水者一證。以見非傳裏之燥煩。乃亡津液之燥煩。但少少與水飲之。令其胃氣和。則可望愈。不必別生事致變矣。

惟忠曰。治渴非一。有白虎。有白虎加人參。有猪苓。有文蛤。有五苓。論其概則因小便之利不利而異已。

正珍曰。飲水二字。古人一定熟語。論語。飯疏食飲水。禮記啜菽飲水盡其歡。與本論飲水之水。皆泛稱飲物者。而非必言冷水也。若是果冷水。則不曰水。而曰冷水。文蛤散條可徵矣。可見單稱水者。非復涼冷之水也。是本篇中稱水。又稱冷水者之別也。按太陽病。發汗後。表證表脈悉除。但汗出不止。煩躁不得眠。欲得飲水者。是雖邪氣已解。汗後表不固。

津液內竭而胃中乾燥故也。非熱結在裏也。又非水飲停蓄也。故飲水以滋其胃燥則愈。若有此證。而其脈洪大。雖與水尚不愈者。乃熱結在裏之候。宜與白虎加人參湯也。若太陽病發汗不解。其脈仍浮。小便不利。微熱消渴者。此爲表未盡解。兼挾停飲。與五苓散以發未盡之表。且利其停飲。則表裏雙解而愈矣。金鑑云。倘與之飲。胃仍不和。脈浮小便不利。微熱消渴者。用五苓散。此止此渾二證而爲一。甚非也。如桃核承氣湯條中愈字。可以見矣。按先輩方有執證續及金鑑等皆謂太陽是膀胱之經。此證小便不利而渴者。是經邪傳入其腑也。遂以五苓散爲太陽經腑俱病之劑。雖然仲景氏所立六經之名。非以經脈言也。假以配表裏脈證也。已。故除五苓之證。及陽明胃實之外。少陽及三陰病。並未有云其臟腑者也。若必以經脈言之。則其云臟腑何惟太陽陽明已。而不及少陽及三陰病耶。觀其惟太陽陽明已。而不及少陽及三陰病。則其非以經脈言也明矣。再按消渴者。言其所飲之水。徒皆消盡。而渴不爲之止。愈飲愈渴也。成無已云。飲水多而小便少者。謂之消渴。此是後世醫家俗說。大非古義。若必以小便少而名焉。惟云消渴足矣。何更煩小便不利四字乎。此蓋因消渴病之飲多水少。而誤來如此。

### 五苓散方

猪苓十八銖 去皮

澤瀉一兩 六銖

白朮十八銖

茯苓十八銖

桂枝半兩 去皮

右五味。搗爲散。以白飲和。服方寸匕。日三服。多飲煖水。汗出愈。如法將息。

成本全書。無如法將息四字。澤瀉一兩六銖下。成本全書。俱有半字。非。又說桂枝之枝字。當補入之。搗爲散三字。成本玉函全書。俱作爲未二字。

王肯堂曰。五苓之中。茯苓爲主。故曰五苓散。

正珍曰。外臺祕要第四卷。五苓散方後。多飲煖水下。有以助藥力四字。

蓋與啜粥之意同矣。按上言白飲。下言煖水。此非一物也。白飲謂白米

飲也。謂之白飲者。與白粉見猪腰湯白粲漢書惠帝紀白粥見復神記同義矣。千金方。

脫肛篇。猪肝散條曰。溫清酒一升。服方寸匕。半日再。若不能酒。與清白

米飲。亦得。證類本草。滑石下。引聖惠方曰。治乳石發動。滑石半兩。細研

如粉。以水一中盞。絞如白飲。頓服之。倭名類聚鈔。第十六卷。引四時食

制經曰。春宜食漿。甘水。漿水音卽夏反。和名。豆久利。美豆。俗云。迺於毛比。冬宜食白飲。和名。古笑都。今按。漿之名也。

諸所載白飲。皆白米飲也。與本篇同。而千金翼。白飲作白水。可謂誤也。

觀白散條。可見矣。又外臺書墨丸。用巴豆方後曰。利不止者。以冷白飲

止之。亦同。梁陶弘景。名醫別錄云。方寸匕者。作匕。正方一寸。宋侯遺泉志有方寸匕圖。可

參考。抄散取不落爲度。證類本草

〔七十一〕發汗已。脈浮數。煩渴者。五苓散主之。玉函。已作後。汗下。有而字。

成無已曰。脈浮數者。表邪未盡也。

方有執曰。已言發汗畢。非謂病罷也。

正珍曰。此承上條論其有異證者也。小便不利微熱六字。含畜在中。義與第三十二條第三十九條同焉。上條脈但浮而不數。此條脈浮而數。是其異者也。其脈雖有小異。內因不殊。故均以五苓散主之。煩渴。謂渴之甚。非且煩且渴也。說見前二十六條。按成無已以煩渴爲亡津液胃燥。非也。金鑑云。脫小便不利四字。亦非也。再按。白虎加入參之煩渴。則其脈洪大。此則其脈浮數。淺深可見也。

〔七十二〕傷寒汗出而渴者。五苓散主之。不渴者。茯苓甘草湯主之。金鑑曰。傷寒發汗後。脈浮數。汗出煩渴。小便不利者。五苓散主之。今惟曰汗出者。省文也。

正珍曰。此亦承上二條。以略其脈證。特舉其所兼之異證。以示其治也。異證者。何。所謂汗出是也。言脈浮。或浮數。小便不利。微熱。汗出而渴者。五苓散主之。若此證而無渴者。其病輕一等。宜用茯苓甘草湯。其以表證未全解。故仍用桂枝以發之也。冒首傷寒二字。泛指太陽病。不必拘麻黃桂枝二湯之證也。先輩諸子。深泥傷寒二字。非也。成無已謂。渴者。邪氣漸傳裏也。亦非矣。凡病人小便不利而渴者。皆內有停水之所致。非邪熱傳裏也。



扶苓甘草湯方

扶苓 二兩

桂枝 二兩

甘草 二兩

生薑 三兩

去皮

炙

切

右四味以水四升煮取二升去滓分溫三服

玉函扶苓作三兩

〔七十四〕中風發熱六七日不解而煩以表裏證渴欲飲水水入則吐者名曰水逆五苓散主之

魏荔彤曰有表裏證裏證何即此條所謂煩渴飲水水入即吐是也表證何即前條所謂頭項強痛而惡寒發熱汗出是也於是用桂枝以驅表邪佐以朮苓澤瀉以固土逐水加以多飲煖水使汗出而表解水既不逆小便利而裏解而病有不愈者乎

正珍曰此亦承上諸條只略諸條脈證以從簡省特舉其異者以示其治也表指脈浮頭痛發熱惡寒等而言裏指渴欲飲水水入則吐及小便不利等言也言太陽病發汗汗出至六七日仍不解反加小便不利渴欲飲水水入則吐之證者此以汗後有微渴飲水過度水停不行之所致故用五苓散以發未盡之表且利其停水則愈謂之水逆者示其病因之詞義與火逆同矣註家皆謂因其吐水故名水逆果然則火逆之證爲吐火乎可謂不通矣按表裏證者以表有太陽證裏有停水或下利或嘔逆乾嘔或心下痞硬等證言之如桂枝人參湯表裏不解十

東湯表解裏未和類。可以證矣。方有執以經府言之。王肯堂以太陽陽明言之。惟忠劉棟以爲少陽柴胡證。皆非也。又按五苓散。猪苓湯。其證大同而小異。其所異者。但由挾表證與否已。故於五苓散條。則冠以太陽病。或發汗已。或傷寒。或中風等之文。且稱有表裏證。於猪苓湯條。則未嘗冠以此等文。且靡有一表字也。是以二方皆雖具小便不利。發熱消渴。脈浮之文。其辨在惡寒惡風。頭痛項強等上而判矣。不可不審也。

〔七十五〕未持脈時。病人手又自冒心。師因教試令歎。而不歎者。此必兩耳聾無聞也。所以然者。以重發汗虛。故如此。

劉棟曰。此條後人之所攙。恐是上文又手冒心之註。誤出於此也。

正珍曰。此條王叔和。敷演桂枝甘草湯條意者。辭氣與平脈法相似。決非仲景氏之言也。宜刪。

〔七十六〕發汗後。飲水多必喘。以水灌之。亦喘。

玉函。多下。有者字。

〔七十七〕發汗後。水藥不得入口爲逆。若更發汗。必吐下不止。

玉函。無若。以下九字。

劉棟曰。此二條後人之所記。恐是上文水逆之注也。

正珍曰。前條當是麻黃杏仁甘草石膏湯注。後條乃水逆注已。按逆者。謂誤治也。成無已爲吐逆之逆。非也。

1. The first part of the document discusses the importance of maintaining accurate records of all transactions and activities. It emphasizes that proper record-keeping is essential for transparency and accountability, particularly in financial matters. The text outlines various methods for organizing and storing data, including digital databases and physical filing systems. It also mentions the need for regular audits and reviews to ensure the integrity and accuracy of the records.

2. The second part of the document focuses on the role of communication in achieving organizational goals. It highlights the importance of clear and concise communication, both internally and externally. The text provides guidelines for effective communication, such as using appropriate language, being open to feedback, and ensuring that all team members are informed and aligned. It also discusses the benefits of regular communication, such as improved collaboration and faster problem-solving.

3. The third part of the document addresses the challenges of managing a large and diverse team. It acknowledges that managing a large team can be a complex task, requiring strong leadership skills and effective delegation. The text offers strategies for managing a large team, including setting clear expectations, providing ongoing support and training, and fostering a positive team culture. It also emphasizes the importance of recognizing and rewarding team members for their contributions.

4. The fourth part of the document discusses the importance of innovation and creativity in driving organizational growth. It argues that innovation is a key driver of success in a competitive market, and that organizations must encourage and support creative thinking and experimentation. The text provides examples of innovative practices and offers suggestions for how to create a culture of innovation. It also mentions the importance of staying up-to-date with the latest trends and technologies in the industry.

5. The fifth part of the document focuses on the importance of financial management and budgeting. It emphasizes that sound financial management is essential for the long-term success of any organization. The text outlines the steps for creating a budget, including identifying goals, estimating costs, and allocating resources. It also discusses the importance of monitoring and controlling expenses, and provides tips for how to optimize financial performance.

6. The sixth part of the document discusses the importance of risk management and contingency planning. It acknowledges that all organizations face risks, and that it is essential to have a plan in place to manage these risks. The text provides guidelines for identifying and assessing risks, and offers strategies for mitigating potential threats. It also mentions the importance of having a contingency plan in place to deal with unexpected events.

7. The seventh part of the document focuses on the importance of customer service and satisfaction. It argues that excellent customer service is a key differentiator for any organization, and that it can lead to increased loyalty and repeat business. The text provides guidelines for providing excellent customer service, including listening to customer feedback, resolving complaints quickly, and going above and beyond to meet customer needs. It also mentions the importance of training customer service staff and ensuring that they are equipped with the necessary skills and resources.

8. The eighth part of the document discusses the importance of social media and digital marketing. It highlights the growing importance of social media in reaching and engaging with customers, and provides guidelines for developing an effective social media strategy. The text also discusses the importance of digital marketing, including search engine optimization (SEO) and pay-per-click (PPC) advertising. It offers suggestions for how to track and measure the effectiveness of digital marketing efforts.

9. The ninth part of the document focuses on the importance of sustainability and corporate social responsibility (CSR). It argues that sustainability is no longer just a buzzword, but a key factor in the long-term success of an organization. The text provides guidelines for developing a sustainable business model, including reducing environmental impact, supporting social causes, and promoting ethical practices. It also mentions the importance of reporting on CSR efforts and engaging with stakeholders.

10. The tenth part of the document discusses the importance of leadership and management. It emphasizes that effective leadership is essential for inspiring and motivating team members, and for driving organizational success. The text provides guidelines for becoming an effective leader, including setting a vision, communicating effectively, and making sound decisions. It also mentions the importance of ongoing learning and development for leaders, and offers suggestions for how to stay motivated and inspired.

# 傷寒論集成卷三

日本 京都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

〔七十八〕發汗吐下後。虛煩不得眠。若劇者。必反覆顛倒。心中懊憹。梔子豉湯主之。若少氣者。梔子甘草豉湯主之。若嘔者。梔子生薑豉湯主之。

厥陰篇曰。下利後。更煩。按之心下濡者。爲虛煩也。宜梔子豉湯。

成無已曰。懊憹。心中鬱鬱然不舒。憤憤然無奈。比之煩悶而甚者。懊憹

也。字彙曰。懊憹音  
貝農。憂鬱意。

傷寒直格曰。懊憹者。煩心熱躁。悶亂不寧也。甚者。似中巴豆草烏頭之類毒藥之狀也。

喻昌曰。不得眠。卽臥起不安之互詞。

張志聰曰。懊憹者。煩之甚也。反覆顛倒。不得眠之甚也。

金鑑曰。未經汗吐下之煩。多屬熱。謂之熱煩。已經汗吐下之煩。多屬虛。謂之虛煩。不得眠者。煩不能臥也。汪琥曰。虛煩二字。不可作真虛看。作

汗吐下暴虛看。

王肯堂曰：懷，卽惱字。古通。

香川太冲行餘醫言曰：少氣者，言氣息微少，不足以言也。靈樞曰：少氣身潔潔也。素問曰：一呼脈一動，一吸脈一動，曰少氣。此是虛候，而與短氣不同，多在暴瀉大吐之後。

希哲曰：謂之虛煩者，以經發汗吐下，因虛致煩，而非因表實夾內熱，及胃中燥實致煩者比也。

烏壽曰：少氣，謂呼吸之氣短少也。

劉棟曰：少氣與短氣大同少異。短氣者，呼吸促迫，如欲絕也。少氣者，因上逆而呼吸微弱，如欲絕也。乃加甘草而緩其急也。

惟忠曰：呼吸如將絕，謂之少氣。氣急息迫，謂之短氣。

正珍曰：心中熱擾，謂之煩。煩甚而致反覆顛倒，謂之懊憹。本章所說其義了然。凡傷寒若發汗，若吐，若下後，諸證皆去，但胸中熱煩，不得眠者，是大邪已去，正氣暴虛，而餘熱內伏之候。故謂之虛煩。雖則曰虛，其實非爲真虛也。亦惟汗吐下後一時之虛已。故與梔子豉湯以解其餘熱。則其虛不補而自復也。如竹葉石膏湯治傷寒解後虛羸少氣，氣逆欲吐者，亦然矣。若發汗大汗出後，煩躁不得眠，欲得飲水者，乃津液內竭。

胃中乾燥之所致。少少與水以滋潤之則愈。今此證惟煩而不渴。知其非胃燥也。若汗下後煩躁不得眠。不嘔不渴無表證。其脈沈微者。便是真虛。不復一時暴虛之比。宜以乾薑附子湯。扶苓四逆湯輩急溫之。慎不可與梔子豉湯也。若其反覆顛倒。心中懊懣者。卽虛煩劇證。亦宜與梔子豉湯也。按成無已及諸註家。皆謂此因汗吐下後。邪熱乘虛客於胸中。所致非也。果然。則如彼結胸胃實類。凡汗吐下後。邪氣乘其虛。內陷而煩者。亦皆謂之虛煩乎。可謂不通之說矣。又按梔子豉湯。固非吐劑。張志聰所辨。可稱千古卓見矣。故虛煩而少氣者。加甘草以治之。虛煩而嘔者。加生薑以治之。果是吐劑乎。則其加甘草。加生薑者。遂不可解矣。再按金匱梔子大黃湯。用梔子十四枚。豉一升。大黃消石湯。用梔子十五枚。二方並不言得吐。亦是明徵矣。又按調胃承氣湯爲吐下後。胃中不和者設焉。梔子豉湯爲發汗吐下後。胸中不和者設焉。

### 梔子豉湯方

梔子

十四箇

香豉

四合

右二味。以水四升。先煮梔子。得二升半。內豉煮取一升半。去滓。分爲二服。溫進一服。得吐者止後服。二升半下。外臺有去滓二字。是也。宜補之。千金得吐二字。作安一字。

張志聰曰。舊本有一服得吐止後服七字。此因瓜蒂散中有香豉。而誤

傳於此。今爲刪正。又曰。按元人王好古曰。本草中。竝不言梔子能吐。奚仲景用爲吐藥。嗟嗟仲祖。何曾爲吐藥耶。卽六節中。並不言一吐字。如瓜蒂散證則曰。此爲胸有寒也。當吐之。况既汗吐後。焉有復吐之理。此因訛傳訛。宜爲改正。

正珍曰。豉卽黑豆所制者。解毒和胃。故瓜蒂散用之。一以緩毒。一以顧胃。梔子豉湯用之一以解前藥餘毒。一以調吐下後胃氣不和。前輩以爲吐藥。妄甚。

梔子甘草豉湯方

梔子

十四箇

甘草

二兩炙

香豉

四合綿裹

右三味。以水四升。先煮梔子甘草。取二升半。內豉煮取一升半。去滓。分二服。溫進一服。得吐者止後服。

梔子生薑豉湯方

梔子

十四箇

生薑

五兩

香豉

四合綿裹

右三味。以水四升。先煮梔子生薑。取二升半。內豉煮取一升半。去滓。分二服。溫進一服。得吐者止後服。千金外臺。得吐者三字。作安卽二字。

〔七十九〕發汗若下之。而煩熱胸中窒者。梔子豉湯主之。字彙曰。窒。音質。塞也。

此虛煩見異證者。證雖小異。其因不殊。故亦用梔子豉湯也。煩熱者。熱煩

二字。又見二百四十六條。可參考。謂熱之甚。猶煩疼煩渴之煩甚之之詞已。非謂胸煩身熱也。胸中窒者。未至心中懊憹之劇。唯上焦鬱結而不快。是也。程應旂云。

煩熱二字互言。煩在內。熱在外也。此止非也。劉棟云。此上條一等之劇也。

此止亦非也。

〔八十〕傷寒五六日大下之後。身熱不去。心中結痛者。未欲解也。梔子豉湯主之。

此亦虛煩見異證者。言傷寒五六日。醫以丸藥大下之之後。身熱不去。

心中鬱結而痛者。是正氣暴虛。餘熱未欲解也。梔子豉湯以解餘熱則愈。按凡傷寒有熱者。雖有可下證。不可以丸藥下之。宜以湯藥下之。本

篇明言。過經譫語者。以有熱也。當以湯下之。醫以丸藥下之。非其治也。

謂胃承氣湯條又曰。日晡所發潮熱。已而微利。此本柴胡證。而不得利。今反利者。

知醫以丸藥下之。非其治也。柴胡加芒消湯條又曰。醫以丸藥大下之。身熱不去。

微煩。梔子乾薑湯條合而考之。本節大下。亦爲丸藥之大下可知矣。若有可下之

證。而下之以湯藥。則亦何身熱不去之有。又按。成無已。王肯堂。程應旂

諸人。皆以本節心中結痛。與下後爲結胸者。以爲似而非之證。苦口辨

其差別。殊不知結胸之爲病。惟在心下。而不在心中。病之所位。本自不

同矣。若徒以熱之有無論之。則結胸心下硬痛。手不可近而有身熱者。



亦以梔子豉湯乎。可謂杯水救薪火矣。又按金鑑改梔子豉湯爲梔子乾薑湯亦非矣。

〔八十一〕傷寒下後。心煩腹滿。臥起不安者。梔子厚朴湯主之。此虛煩兼腹滿者。故於梔子豉湯內去香豉加厚朴枳實以主之。心煩卽虛煩臥起不安。卽不得眠也。其致腹滿者。以下後內虛氣滯不痛也。與厚朴生薑半夏甘草人參湯之腹滿同一虛脹已。是以雖滿不堅。痛此所以其不用大黃芒硝等也。成無已云。既煩且滿。則邪氣壅於胸腹之間也。非矣。邪氣實滿。豈此湯之所能治哉。

梔子厚朴湯方

梔子十四箇

厚朴四兩炙去皮

枳實四枚水浸炙令黃

右三味。以水三升半。煮取一升半。去滓。分二服。溫進一服。得吐者止後服。  
右字。成本全書。作以上二字。非。

顏穆曰。方名後人脫枳實二字。

〔八十二〕傷寒醫以丸藥大下之。身熱不去。微煩者。梔子乾薑湯主之。

按丸藥。謂大陷胸丸。三物備急類也。

王肯堂曰。丸藥。所謂神丹甘瀉也。或作巴豆。

凡傷寒熱盛

者。雖有可下證。不可以丸藥下之。何者。丸藥惟蕩滌腸胃。而不能除身熱也。今傷寒熱盛者。醫反以丸藥大下之。身熱不去。更加微煩者。內虛

而煩也。法當以梔子豉湯主之。然以其煩微而無心中結痛及懊懷等證。去香豉加乾薑一以解熱。一以復虛也。猶胸中有熱。胃中有寒者。黃連乾薑寒熱並施之意。見太陽下篇黃連湯條金鑑云。梔子乾薑湯當是梔子豉湯。斷無煩熱用乾薑之理。止非也。虛煩虛熱不用乾薑而何。

### 梔子乾薑湯方

梔子

十四箇

乾薑

二兩

右二味以水三升半。煮取一升半。去滓分二服。溫進一服。得吐者止。後服。  
〔八十二〕凡用梔子湯。病人舊微瀉者。不可與服之。

成無已曰。病人舊微瀉者。裏虛而寒在下也。雖煩則非蘊熱。故不可與梔子湯。內經曰。先泄而後生他病者。治其本。必且調之。後乃治其他病。正珍曰。凡用梔子之湯。不問梔子豉湯。梔子甘草豉湯。梔子生薑豉湯。梔子厚朴湯。梔子乾薑湯。其病人大便舊微瀉者。不可妄與之。以梔子爲寒藥。恐致胃寒下利也。瀉者。大便濡甚也。賴穆云。梔子湯當作梔子豉湯。非也。字與。瀉字註曰。音唐。薄雅。瀉。瀉也。又傳字註曰。奴教切。說文。泥也。左傳成十六年。有瀉於前。乃皆左右相遠於傳。又字林。瀉甚。曰瀉。

〔八十四〕太陽病發汗汗出不解。其人仍發熱。心下悸。頭眩。身瞤動。振振欲擗地者。真武湯主之。張經。身作目。一作作。

成無已曰。心下悸。頭眩。身瞤動。振振欲擗地者。汗出亡陽也。裏虛爲悸。

上虛爲眩。經虛爲身暈振振搖。與真武湯主之。溫經復陽。方有執曰。眩。昏暈也。暈。輒動也。振振。振作也。

喻昌曰。大青龍證中。垂戒云。若脈微弱。汗出惡風者。不可服。服之則厥逆筋惕肉瞤。正與此段互發。

金鑑曰。此示人以救逆之法也。振。聳動也。振振欲擗地者。聳動不已。不能興起。欲墮於地。陽虛氣力不能支也。

正珍曰。擗地二字。諸家紛紜。未有歸一之說。按法華經信解品云。轉更惶怖。悶絕。躓地。唐慧琳音義云。躓。脾役切。倒也。宋方回虛谷閒抄。幽州石老條云。擗地。號叫。人異而觀之。字典云。音擗。倒也。類篇。仆也。正字通云。躓與擗通。又字典擗字注云。通作躓。合而考之。躓。擗。躓三字通用。所謂擗地。卽躓地也。蓋字以音爲本。形則亞之。苟其音既同。則互相通用。不泥字義。如拒通作距。亦復爾爾。又按。脈經作仆地。字異而義同。宋板注云。擗一作僻。是亦同音通用已。方有執云。擗。拊心也。

轉邱風。席有擗。

言拊

心而無可奈何也。喻昌云。擗者。闕也。躓也。思欲闕地而避處其內也。汗多亡陽者。欲入土中避虛就實也。嗚呼。何其迂曲之甚。此條言太陽病。以麻黃青龍輩。大發其汗。其人充實者。當汗出復常也。若其人虛弱者。汗出表證罷。而病仍不解。發熱心下悸頭眩。身瞤動欲仆地。此以汗出

多而亡陽故也。雖有發熱。非表不解之發熱。乃虛火炎上之發熱。後世所謂真寒假熱者也。心下悸者。胃陽虛而水飲停畜也。頭眩者。頭中之陽虛也。靈樞衛氣篇所謂上虛則眩是也。身暈欲仆者。經中之陽虛也。茯苓桂枝白朮甘草湯條所謂發汗則動經。身爲振振動是也。此表裏上下俱虛之候具焉。故與真武湯以復其陽。以行其水也。成無已云。仍發熱。邪氣未解也。此與桂枝新加湯之身疼痛。柴胡桂枝湯之發熱微惡寒同看。以爲表邪未解也。蓋爲仍字所誤也。故亦誤解茯苓四逆湯發汗若下之病仍不解煩躁者。以爲陰陽俱虛。邪獨不解。豈邪氣未解之發熱煩躁。反劑薑附輩以溫補之乎。抱薪救火。愚哉。妄哉。方有執張璐徒皆云。此條太陽中風。誤服大青龍而致逆之救法也。雖然。古昔發汗之法。種種不同。豈獨爲大青龍而設乎。不知麻黃葛根發汗之後。而見本節證候者。別有何等救法哉。可謂拘累之甚矣。

〔八十五〕咽喉乾燥者。不可發汗。

成無已曰。津液不足也。

張志聰曰。咽喉乾燥者。心腎之精血皆虛。發汗則有上文之變證矣。上文言汗後之變證。此乃未發之先機。本論錯綜之妙。讀者以意會之。金鑑曰。咽喉乾燥。津液不足也。更發其汗。則津液益枯。故戒人雖有可

汗之證亦不可發汗也。

希哲曰：已言咽喉，則口舌在其中。

正珍曰：口舌咽喉之乾燥，有白虎加入參湯證，有大承氣湯證，有大陷胸湯證，有五苓散證，於金匱則有己椒藶黃丸證，有溫經湯證，有小建中湯證，有桔梗湯證，有白散證，但五苓散渴而口燥煩，小便不利者，微用發汗已，然不言咽喉乾燥，則其爲輕證可知矣。

〔八十六〕淋家不可發汗，發汗必便血。

按淋之爲病也，小便淋瀝，不能快利者，非癰也，其因在精道之失常也。精，卽心血之經精，道入精囊而變化者，固非他物矣。故淋家過于發汗，則精道失守，精囊曠職，遣夫動血二脈之血妄動妄行，所以溺血也。往歲東廬山寶勝院主貫純，一日忽爾發熱惡寒，周身發小瘡，五六日間瘡皆成膿，苦悶日加。又一日瘡悉黑陷，起而如廁，溺鮮血者二升許，病人視而大驚，精神益衰，短氣煩躁，口不能言。市醫某術盡技窮，迺告急於予。予未至之間，復溺鮮血者兩三行。余往而診之，脈微欲絕，冷汗津津然而出，又溺血者三升餘。試染厚白紙視之，紅與猩猩鬚一般。余曰：此瘡氣內攻，陽氣暴亡之候也，決不能回生。遂辭而歸。翌日終死云。嗚呼！古聖垂訓，語無虛發，雖一言一字，無非精微之蘊，後人乃輒概以謂

論說無益於治術抑何不思之甚蓋臟腑經脈說上自素問靈樞下訖  
明清諸家率皆以臆度之飾以陰陽五行之理強立之論辨滔滔者天  
下皆是未嘗有一人驗諸解剖之實者也故其所說臟腑形狀脈絡纏  
繞皆是暗中摸索不啻漆桶掃帚焉甚哉昔人之欺後世也余嘗閱和  
蘭解體書二三本其所圖說皆出于解剖之實者與今日所驗亦皆吻  
合。衛田翼所譯解體新書即此物也。今據其說考之精道乃動血二脈  
之支別。起於腎臟下行入于精囊動血二脈乃一身來往之血道矣精道則當交接之  
時受彼動血二脈之血傳到精囊始化成精而瀉出者也非腎臟所藏  
物也。淋家過于發汗致使血者其理於是乎明矣。成無已程知徒皆云  
膀胱裏熱則淋更發其汗則膀胱愈燥而小便血矣。此止雖然膀胱之爲  
府惟是貯小便之地猶胃之容受水穀然胃中熱燥未見瀉血者膀胱  
熱燥豈亦有瀉血之理乎一說以便血爲血淋非也若然則肛門下血  
者亦直爲膿血痢乎可謂妄矣。發熱曰淋家謂平時患淋之人○淋移曰便平聲○漫也  
〔附考〕門人某問曰。瀉血證仲景氏不言治方處之奈何曰均是一亡  
陽之證宜以亡陽處之。當療一壯夫卒爾瀉血者作附子理中加柏夫  
藍湯飲之數日徐徐而瘳矣。

〔八十七〕瘡家雖身疼痛不可發汗汗出則痊。成本全書汗出作瘳  
汗玉面瘳作瘳是

錢潢曰。瘡家。非謂疥癬之疾也。蓋指大膿。大血。癰疽。潰瘍。楊梅結毒。臈瘡。痘疹。馬刀。俠癭之屬也。身疼痛。傷寒之表證也。言瘡家氣虛血少。營衛衰薄。雖或有傷寒身體疼痛等表證。亦慎不可輕發其汗。若誤發其汗。則變逆而爲瘡矣。瘡者。卽所謂身熱足寒。頸項強急惡寒。時頭熱。面赤目脈赤。獨頭面搖。卒口噤。背反張者。是也。故於瘡證中有云。太陽病。發汗太多。因致瘡也。豈有所謂重感寒濕。外風襲虛之說哉。

成無已曰。瘡。當作瘡。傳寫之誤也。瘡者。惡也。非強也。方有執曰。瘡。廣韻。風強病。俗謂打寒噤。是也。

香川太冲行餘醫言曰。瘡。巨郢切。擊。上聲。從來諸方書。多誤寫瘡。大謬之甚。按說文云。瘡。彊急也。而無瘡字。瘡字彙。充智切。惡也。與瘡義會不相涉。又按。正字通。瘡。俗作瘡。六書故曰。醫書云。瘡亦作瘡。考之說文。合之以聲。瘡乃瘡之譌。當定爲瘡。蓋莖。經。頸。勁。經。徑。輕。並皆省書。或至或至。與至字。甚相似。全是傳寫之誤。彰彰可見矣。省文之害至如此也。正珍曰。按金匱直解。引郭白雲曰。瘡。是病名。如中風傷寒之類也。瘡。是病證。如結胸否氣之類也。瘡爲輕。瘡爲重。瘡而又瘡者。爲尤重。此。嗚呼。何爲其說之曖昧模糊。如此之甚乎。可謂盲聾之甚者也。欲廣異聞。故并及焉。又按。成無已以身疼痛。爲瘡之疼痛。非也。

〔八十八〕衄家不可發汗。汗出必額上陷。脈急緊。直視不能瞬。不得眠。字  
曰。衄。音。縣。說文。目。搖也。史記項羽紀。項梁胸脅曰。可  
行矣。註。謂動目。私視之也。又音。瞬。目。自動也。與瞬通。

韓氏曰。此人素有衄血證。非傷寒後如前條之衄也。故不可發汗。

錢潢曰。衄。鼻出血也。額上。非即額也。額骨堅硬。豈得即陷。蓋額以上之

額門也。正珍曰。外臺。作額上。張。急而緊。無陷  
字。額似發帖。錢潢所云。恐未必是也。

正珍曰。平素善衄之人。頭中之陽。已屬不足。故發其汗。則頭中之陽大  
虛。生變逆如是矣。乾薑附子湯輩。可以僥倖萬一也。成無已云。瞬。合目  
也。不知何據。恐是任筆杜撰者而已。錢潢云。所謂衄家者。即論中所云。  
發煩目瞑。必衄。及傷寒脈浮緊。不發汗。因致衄者。脈浮緊。發熱無汗。自  
衄者。愈也。亦非矣。不可從也。金鑑云。衄家者。該吐血而言也。亦非矣。

〔八十九〕亡血家。不可發汗。發汗則寒慄而振。

成無已曰。針經曰。奪血者無汗。奪汗者無血。亡血發汗。則陰陽俱虛。故  
寒慄而振搖。正珍曰。成氏所引針經  
文。出靈樞營衛生會篇。

金鑑曰。凡失血之後。血氣未復。爲亡血虛家。皆不可發汗也。若再發汗  
則陽氣衰微。力不能支。故身寒慄。振振聳動所必然也。

王三陽曰。血家汗家。俱指本人平時舊病言之。

正珍曰。亡血家者。如嘔血下血。崩漏產後。金瘡破傷類是也。亡者。失也。



非滅也。寒慄而振，乃乾薑附子湯之證。

〔九十一〕汗家重發汗，必恍惚心亂，小便已陰疼，與禹餘糧丸。

宋板注曰：方本闕。

魏荔彤曰：禹餘糧丸方闕，愚臆度之，卽赤石脂禹餘糧湯耳。意在收瀉小便，以養心氣，氣足而血生矣。且有鎮安心神之義也。是否質之高明，如理中湯可以製丸也。

金鑑曰：汗家，謂平素好汗出之人也。

錢潢曰：恍惚者，心神搖蕩而不能自持，心亂者，神虛意亂而不得自主也。

顏樛曰：恍惚，不分明也。

官義方曰：可行桂枝加附子湯。

正珍曰：錢潢云：汗家，傷寒家已經發汗，及自汗盜汗者，皆是也。非也。

〔九十二〕病人有寒，復發汗，胃中冷，必吐衄。宋板注曰：一作逆。

方有執曰：復，反也。言誤也。

金鑑曰：胃寒復汗，陽氣愈微，胃中冷甚，衄不能安，故必吐衄也。宜理中

湯送烏梅丸可也。全書：引活人曰：先服理中丸，次服烏梅丸。

烏梅丸曰：凡蟲避寒就溫，冬蟄夏出，胃中冷，衄不得安，欲走上焦陽分，從

胃脘出口也。

希哲曰：病人有寒者，言有虛寒，而外見表證也。

宮義方曰：有寒，謂胃中虛冷，理中或附子理中湯證也。

正珍曰：有寒，謂腸胃虛寒。太陰篇所謂自利不渴者，屬太陰，以其藏有寒故也。當溫之。宜服四逆輩，是也。復，芳六反。與覆古字通用。反也。詩大雅曰：人有土田，女反有之。人有民人，女覆奪之。又曰：匪用其良，覆俾我悖。註曰：覆，反也。字典曰：復，又與覆通。正字通曰：反復音義通。癸辛雜識新集云：復字有三音。房六切者，復歸之復也。字書訓以往來，是也。扶富切者，又復也。字書訓以又是也。芳六切與復同音者，覆之復也。易乾象：反復道也。釋文：芳六反。本亦作覆，是也。合而考之，復覆通用明矣。言病人素有虛寒證，反發其汗，則陽氣愈微，胃中冷甚，而虵不能安，故必吐虵也。友人栗山獻臣曰：嘗解剖刑人數人矣，腸胃之間，皆有虵蟲存焉。意者，虵之於腸胃，蓋亦相扶以消化穀食者已，非無用之長物也。人門小兒死後，腸胃中常有此物。予聞而疑之久矣。頃者偶檢太平御覽，援東方朔神異經云：南方有肝蟪，可以節虵蟲。虵蟲狀如蚓，消穀蟲也。多則傷人，少則穀不消。是甘蔗能滅多益少，凡蔗亦然。予雖未信然否，書以廣異聞。按：神異經謂甘蔗，蓋指其生草言之。乃蔗漿，是也。古人所用皆然。若夫煎煉成沙糖者，多食生蟲。豈有滅蟲之功乎。況其法初于唐太宗時，而唐以前則世未曾有此物乎。又按：甘蔗，出名醫別錄。藥

書。郊祀歌所謂。泰寧極樂。折朝。乃是燕樂。詳見本草綱目。

喻昌云。寒亦痰也。惟忠云有寒。謂胸中有停

飲也。此與瓜蒂散條。胸有寒之寒同看。不知有寒飲之人。何害禁汗也。汗之之後。亦何故吐蚘也。金鑑云。復發汗者。謂汗而復汗也。非也。

〔九十二〕本發汗而復下之。此爲逆也。若先發汗。治不爲逆。本先下之而反汗之。爲逆。若先下之。治不爲逆。

成無已曰。病在表者。汗之爲宜。下之爲逆。病在裏者。下之爲宜。汗之爲逆。

方有執曰。復與覆同。古字通用。復亦反也。猶言誤也。與下文反汗之反同意。

金鑑曰。本應先汗而反下之。此爲逆也。若先汗而後下。治不爲逆也。若裏急於表。本應先下而反汗之。此爲逆也。若先下而後汗。治不爲逆也。汪琥曰。治傷寒之法。表證急者。即宜汗。裏證急者。即宜下。不可拘拘於先汗而後下也。汗下得宜。治不爲逆。

惟忠曰。雖不及吐自在其中也。本發之間。脫先字。

〔九十三〕傷寒醫下之。續得下利。清穀不止。身疼痛者。急當救裏。後身疼痛。清便自調者。急當救表。救裏宜四逆湯。救表宜桂枝湯。

金鑑曰。傷寒醫不分表裏寒熱虛實。而誤下之。續得下利。清穀不止者。

寒其裏也。雖有通身疼痛之表未除。但下利清穀不止。裏寒已盛。法當急救其裏。俟便利自調。仍身疼痛不止者。再救其表可也。救裏宜四逆湯。溫中勝寒。救表宜桂枝湯。調營和衛也。

顧穆曰。清者。反語。不淨之處。卽廁也。穀食不化之謂。自調言如常調和也。

惟忠曰。大氏雖有裏證。而表未和。則先表而後裏也。此則反之。下利清穀。比之他證則急矣。故以先救裏爲法也。例云。下利清穀。不可攻表。汗出必脹滿。

正珍曰。太陽上篇。二十九條曰。反與桂枝欲攻其表。此誤也。厥陰篇。三百八十一條曰。攻表宜桂枝湯。合而考之。本節救表之救字。乃攻字誤寫。宜改正。按此證重於協熱利一等矣。彼惟下利。而此則加以清穀。彼則桂枝人參湯。以雙解表裏。此則急用四逆。偏救其裏。輕重緩急。自有其分矣。清。圓也。詳見前第二十三條。方有執。解清便自調。以爲小便清而大便調。錢潢解清穀。以爲清水完穀。並非也。

〔九十四〕病發熱頭痛。脈反沉。若不差。身體疼痛。當救其裏。宜四逆湯。金鑑曰。身體疼痛之下。當有下利清穀四字。方合當溫其裏之文。觀太陰篇。云傷寒醫下之。續得下利。清穀不止。身疼痛者。急當救裏。宜四逆

湯。此雖未下。但脈反沉。可知裏寒。必是脫簡。

又曰。是太陽表證。而得少陰裏脈也。宜以麻黃附子細辛湯發之。若不差。下利清穀。即有身體疼痛之表未解。不可更汗。當溫其裏。宜四逆湯。方有執曰。此憑脈。不憑證之大旨。

宮義方曰。少陰病。脈沉者。急溫之也。

正珍曰。此是表實裏虛之合病。屬麻黃附子細辛湯證也。非發汗後身疼痛。脈沈遲之證也。劉棟以爲新加湯證非矣。不差者。既已服藥而無効之辭。外證未解。噫氣不除。皆爾矣。下一百三條云。先與小建中湯。不差者。小柴胡湯主之。亦同一義例矣。

〔九十五〕太陽病。先下而不愈。因復發汗。以此表裏俱虛。其人因致冒。冒家汗出自愈。所以然者。汗出表和故也。裏未和。然後復下之。

〔九十六〕太陽病未解。脈陰陽俱停。一作尺者。必先振慄。汗出而解。但陽脈微

者。先汗出而解。但陰脈微。一作尺者。下之而解。若欲下之。宜調胃承氣湯。

〔九十七〕太陽病。發熱汗出者。此爲營弱衛強。故使汗出。欲救邪風者。宜

桂枝湯。

右三條並王叔和所攙入。非仲景氏言也。凡稱所以然者。蓋叔和家言矣。且脈之分陰陽。及調胃承氣湯。本非下劑。而稱欲下之。仲景未嘗語

營衛而稱營弱衛強者皆足以發其奸况文采辭氣本自不同乎

〔九十八〕傷寒五六日中風往來寒熱胸脇苦滿嘔嘔不欲飲食心煩喜嘔或胸中煩而不嘔或渴或腹中痛或脇下痞硬或心下悸小便不利或不渴身有微熱或欬者小柴胡湯主之

小柴胡湯上。成本全書。有與字。非也。

成無已曰病有在表者有在裏者有在表裏之間者此邪氣在表裏之間謂之半表半裏邪氣在表者必潰形以爲汗邪氣在裏者必蕩滌以取利其於不外不內半表半裏是當和解則可也小柴胡和解表裏之劑

錢潢曰往來寒熱者或作或止或早或晏非若瘧之休作有時也

惟忠曰往來寒熱者寒止即熱熱止復寒互而發者也而其自熱而之寒也非無間也惟是爲間而復繼發之如初所以名曰往來寒熱也

烏壽曰半表半裏者不表不裏正在表裏之中間也然一身但表裏別非復有表裏中間之地故取表分近裏之半與裏分近表之半以定地位又有表裏俱見者不與此同夫表裏俱見者有頭痛寒熱之表證而復有口舌乾燥腹滿等之裏證也非若所謂半表半裏寒熱往來胸脇苦滿等證也後學不察誤者亦多特表而出之

正珍曰傷寒五六日中風宜從全書及張志聰集註改作傷寒中風五

六日論曰。傷寒中風。有柴胡證。但見一證便是。不必悉具。又甘草瀉心湯條曰。傷寒中風。醫反下之。是也。言其病或自麻黃證而來。或自桂枝證而來。謂不拘其始也。劉棟云。傷寒五六日。中風八九日。必有小柴胡證。鑿矣。滿與懣古字通用。悶也。說見前第二十二條。悶而加苦字。甚之之詞。猶苦病。苦痛。苦患。苦勞之苦。又考小補注曰。苦。集韻。困也。可見苦滿。便是困悶矣。嘿嘿。又作默默。佩文韻府云。默。莫北切。反靜也。又作嘿。漢書匡衡傳云。默默不自安。柳宗元詩云。嘿嘿含悲辛。成無已云。默默靜也。喻昌云。默默。即昏昏之意。非靜默也。喜字去聲。與懣通。喜嘔者。謂數嘔吐也。按。喜善好三字。皆有轉用訓數者。左傳襄公二十八年云。慶氏之馬善驚。正義云。善驚。謂數驚也。古人有此語。今人謂數驚爲好驚。亦善之意也。漢書溝洫志云。岸善崩。師古注云。言懣崩也。字典喜字注云。又許記切。與懣同。好也。又懣字注云。好也。又省作喜。合而考之。喜善好三字。皆宜訓數也。又按。正字通。善字注。引詩鄘風女子善懷。箋云。善猶多也。字典亦同焉。然而不如訓數之的當也。程應旂云。嘔則木火兩舒。故喜之也。張志聰亦云。嘔則逆氣少疎。故喜也。是讀喜爲喜悅之喜。不知抵當湯條所謂其人喜忘者。亦讀爲喜悅之喜乎。不覺歎飯滿案矣。心下悸。玉函作心中悸。非也。此章實是少陽病正證。宜在少陽篇首。

也。古經殘缺，叔和信手而編次之，故錯亂若斯也。自此以下，柴胡諸證亦皆然也。所謂少陽病者，蓋太陽病一變而未至于陽明之甚者，實爲太陽陽明間證也。太陽屬表，陽明屬裏，而少陽居表裏之間，故亦謂之半表半裏證也。表則頭項強痛，發熱惡寒；裏則腹滿便結，潮熱譫語。今只見往來寒熱，胸脇苦悶，默默不欲飲食，心煩喜嘔者，知邪氣已去表而未結于裏，正在乎表裏之間矣。表則發之，裏則下之。今在表裏之間，故不肯發，亦不肯下，惟與小柴胡湯以和解之也。若其或以下數證，便是所兼之客證，不問其兼與不兼，皆在一小柴胡所得而主也。蓋人之爲體，有虛有實，有老有少，有有宿疾者，有無宿疾者，故邪氣之所留雖同也。至於其所兼者，則不能齊，是以有兼證若此者也。古今註家皆以苦滿之滿，讀爲虛滿之滿，非也。胸肋堅剛，豈有滿不滿之可診者哉？成無已云：邪在表則能食，邪在裏則不能食，不欲食者，未至於必不能食，故亦爲在表裏之間也。詳則詳矣。然少陽篇明言：本太陽病不解，轉入少陽者，脇下硬滿，乾嘔不能食，由是觀之，不欲食與不能食，辭雖不同，實則一證之輕重已別爲二證鑿矣。

### 小柴胡湯方

柴胡 半斤

黃芩 三兩

人參 三兩

半夏 半升



甘草

生薑

各三兩切

大棗

十二枚

右七味以水一斗二升煮取六升去滓再煎取三升溫服一升日三服

大

十二枚。全書作十三枚。非。集註千金翼亦爾。

若胸中煩而不嘔者去半夏人參加栝樓實一枚若

渴去半夏加入參合前成四兩半栝樓根四兩若腹中痛者去黃芩加芍

藥三兩若脇下痞鞭去大棗加牡蠣四兩若心下悸小便不利者去黃芩

加茯苓四兩若不渴外有微熱者去人參加桂枝三兩溫覆微汗愈若欬

者去人參大棗生薑加五味子半升乾薑二兩

王好古此事難知小柴胡湯下云忌發汗忌利小便忌利大便故名三

禁湯

李時珍本草此胡條曰此是古柴字古本張仲景傷寒論尚作此字也

錢潢曰柴胡而有大小之分者非柴胡有大小之異也蓋以其用之輕

重力之大小而言也

羅氏本草選曰。味者。以粗大者。爲大柴胡。細者。名小柴胡。不知仲景大小柴胡。乃偏名也。

清王子接古方選注曰小柴胡湯去渣再煎恐剛柔不相濟有礙於和

也

正珍曰加減法後人因或字所加說見小青龍湯條下再煎說已見傷

寒考中按外臺引古今錄驗黃龍湯即小柴胡湯又引崔氏作小前胡

湯方用前胡論與方大同小異

〔附錄〕張介賓景岳全書傷寒無補法辨末載徐東臯說曰漢張仲景著傷寒論專以外傷爲法其中顧盼脾胃元氣之秘世醫鮮有知之者觀其少陽證小柴胡湯用人參則防邪氣之入三陰或恐脾胃稍虛邪乘而入必用人參甘草固脾胃以克中氣是外傷未嘗不內因也卽如理中湯附子湯黃連湯炙甘草湯吳茱萸湯茯苓四逆湯桂枝人參湯人參白虎湯陽毒升麻湯大建中湯等湯未嘗不用參朮以治內傷可見仲景公之立方神化莫測或者謂外傷是其所長而內傷非所知也此誠不知公者也何今世之醫不識元氣之旨惟見王綸雜著戒用人參之謬說執泥不移樂用苦寒攻病之標致誤蒼生死於非命抑何限耶。

〔九十九〕血弱氣盡腠理開邪氣因入與正氣相搏結於脇下正邪分爭往來寒熱休作有時嘿嘿不欲飲食藏府相連其痛必下邪高痛下故使嘔也小柴胡湯主之

劉棟曰此條後人所記上條注文也

〔一百〕服柴胡湯已渴者屬陽明也以法治之

也字依成本全書補之

方有執曰已畢也

錢潢曰此邪自少陽入陽明也服柴胡湯者邪在少陽也

鄭重光曰。少陽陽明之病機。在嘔渴中分。渴則轉屬陽明。嘔則仍在少陽。如嘔多雖有陽明證。不可攻之。因病未離少陽也。服柴胡湯。渴當止。若服柴胡湯已。加渴者。是熱入胃府。耗津消水。此屬陽明胃病也。

正珍曰。前條辨太陽之一轉而爲少陽。此條乃辨少陽之一轉而爲陽明。可見六經次序。陽明在少陽前者。雖循素問之舊。然實則不然矣。按以法治之語。亦見陽明五苓散條。及少陽篇內。論中治渴方。種種不同。宜求其全證以與主方。而其屬陽明者。專在白虎加人參湯也。若其頭汗出身無汗。小便不利而渴者。此爲陽明發黃之機。乃茵陳蒿湯證也。可見以法治之一語。自有深意存焉。成無已云。服小柴胡湯。表邪已而渴。裏邪傳於陽明也。此止此訓已爲瘥。非矣。

〔百一〕得病六七日。脈遲浮弱。惡風寒。手足溫。醫二三下之。不能食。而脇下滿痛。面目及身黃。頸項強。小便黃者。與柴胡湯後必下重。本渴飲水而嘔者。柴胡湯不中與也。食穀者噦。

劉棟曰。此下傷寒四五日條之注文。後人所攙。誤出于此也。

〔百二〕傷寒四五日。身熱惡風。頸項強。脇下滿。手足溫而渴者。小柴胡湯主之。

成無已曰。身熱惡風。頸項強者。表未解也。脇下滿而渴者。裏未和也。

張志聰曰。陸氏曰。手足溫者。手足熱也。乃病人自覺其熱。非按而得之也。不然。何以本論既云身熱。而復云手足溫。有謂身發熱而手足溫和者。非也。凡靈素中言溫者。皆謂熱也。非謂不熱也。

正珍曰。太陽病。以三日爲期。今乃四五日。爲少陽病可知矣。蓋此條證。自太陽葛根證轉來者。故仍身熱惡風。而頸項強也。脇下滿。手足溫而渴者。少陽所兼之證。柴胡本條中所謂或脇下痞鞭。或身有微熱。或渴是也。雖無往來寒熱。胸脇苦滿。默默不欲飲食。心煩喜嘔等正證。然以其轉入少陽部位。故用柴胡治之也。少陽篇曰。本太陽病不解。轉入少陽者。脇下脹滿。乾嘔不能食。往來寒熱。脈沉弦者。

與小柴胡湯。

若其仍有表證。而不用柴胡桂枝湯者。以少陽證較重。而太陽證不盛也。按身熱二字。人或疑其非表證。然上篇已以身大熱爲熱在皮膚。身字蓋指皮膚而言者明矣。況乾薑附子湯條。上云身無大熱。而下云無表證乎。梔子豉湯條所謂身熱不去亦爾。大氏身字。以表言之。如身黃。身疼。身涼。可以見矣。喻昌張璐並云。頸項強。太陽兼陽明證也。蓋因葛根湯條。有太陽陽明合病之語而誤焉而已。再按。手足溫一證。又見陽明篇。梔子豉湯條。成無已定爲少陽一證。以予觀之。未必然也。先輩注家。亦有以手足溫爲太陰一證者。蓋爲太陰篇。叔和補入之文所誤也。馬壽曰。邪中太陰。則手足自溫。蓋太陰在三陰之表。去陽經尚近也。又按。外臺所載之方。雖名小柴胡湯。觀

其藥品則柴胡桂枝乾薑湯也。

〔百三〕傷寒陽脈沉陰脈弦法當腹中急痛者先與小建中湯不差者小

柴胡湯主之。

上者字。依成本全書補之。小柴胡湯上。成本全書。有與字。非也。

發秘曰。傷寒無嘔而腹中急痛甚者宜先與小建中湯以緩其急矣。傷寒有嘔而腹痛微者宜小柴胡湯。故曰嘔家不可用建中湯是也。先字有試意。權用之義也。

正珍曰。陽脈以下入字。叔和所攙。何者。脈分陰陽。非仲景氏所拘。法當二字。亦是叔和家言。仲景氏之所不言也。若是仲景氏之語。則下文痛者之者字。當在陰脈弦句下而始成其義。否則不成語矣。按傷寒二字。承前條亦指少陽病也。急痛者。拘急而痛也。其證多屬虛寒。如金匱所載。虛勞裏急。腹中痛。主小建中湯。可見矣。故先與小建中湯。以補其虛而緩其急也。若服之腹痛自若者。乃外邪將入于少陽之所致。非裏虛也。乃少陽中兼證已。故與小柴胡湯則差焉。希哲云。不差二字。言傷寒之不差。非言腹痛之不差。見名醫方考等書。此止果爾。則大柴胡條先與小柴胡湯者。對何等證候而言耶。可謂妄矣。又按陶華書中有云。傷寒腹中痛甚。將涼水一盞與病人飲之。其痛稍可者屬熱。當用涼藥清之。清之不已。急用寒藥下之。若飲水愈加作痛。屬寒。當用溫藥和之。和之

不已急用熱藥救之。吁賴一杯水以辨其寒熱以斷其攻救。不亦殆乎。蓋仲景氏之先與建中。不差而與柴胡。謹之至也。

### 小建中湯方

桂枝二兩 去皮

甘草二兩 炙

大棗十二枚 擘

芍藥六兩

生薑三兩 切

膠飴一升

右六味。以水七升。煮取三升。去滓內飴。更上微火消解。溫服一升。日三服。  
玉函成本全書。作甘草二兩。非。七升下外。盡有先字。煮下有五味二字。是。微火消解四字。作火微令消解五字。非。內飴二字。玉函成本全書。并作內膠飴二字。是千金翼外。盡。與宋板同。

成無已曰。以此湯。溫建中。藏是以建中名焉。

清王子接古方選註曰。建中者。建中氣也。

正珍曰。中字。與理中之中同焉。謂腹中腸胃所在也。建。建立也。言此湯能建立中氣也。金鑑云。是方也。即桂枝湯。倍芍藥加膠飴也。名曰小建中湯者。謂小小建立中氣也。此止予謂小字。對大建中湯命之。與小柴胡小承氣小青龍小半夏之小同矣。金鑑所說大非古義。按建中字。雖出尙書。其義不同。莫傳會焉。  
尙書曰。王惠昭大德。建中于民。又唐德宗年號。

〔百四〕嘔家不可用建中湯。以甜故也。

此條與酒客不可與桂枝湯同意。若強與之。愈益使人嘔也。雖然。如大建中方。則主嘔與之。以其有蜀椒乾薑也。若能知此意。加減以投。則亦

何害之有。豈惟一小建中爲然乎。諸方皆爾。按諸本附小建中湯方後爲一章。今別爲二條。

〔百五〕傷寒中風。有柴胡證。但見一證便是。不必悉具。

劉棟曰。凡柴胡湯正證中。往來寒熱。一證也。胸脇苦滿。一證也。默默不欲飲食。一證也。心煩喜嘔。一證也。病人於此四證中。但見一證者。當服柴胡湯也。不必須其他悉具矣。

正珍曰。劉棟此解。於柴胡正證中定焉。可謂的確矣。徵之論中。用柴胡諸證。有但認胸滿脇痛而施者。有但認胸脇滿不去而施者。有但認脇下鞭滿。不大便而嘔而施者。有但認嘔而發熱而施者。有但認寒熱如瘧而施者。可以見其說之正矣。成無已錢潢諸人。皆以其所兼之客證言之。胸中煩而不嘔。爲一證。渴爲一證。腹中痛。爲一證。脇下痞鞭。爲一證。心下悸。小便不利。爲一證。不渴。身有微熱。爲一證。欬爲一證。非也。程應旂於少陽篇首。口苦咽乾目眩中求焉。亦非也。此等證候。諸經通有焉。豈足但就一證。以定少陽柴胡部位。惟前一百三條。有認腹中急痛一證。用柴胡者。然先與小建中而不差。然後用柴胡。其不爲柴胡正證可知矣。按所謂傷寒中風。蓋指太陽之傷寒中風言之。凡論中傷寒中風兼舉者皆然。本節所云。柴胡一證。亦宜就太陽病上求焉。若病勢

已深之後。又或帶三陰虛寒候者。縱有似柴胡證者。不可妄與柴胡。況於大柴胡乎。庸醫不察。往往失策矣。要之不熟讀傷寒論故已。

〔百六〕凡柴胡湯病證而下之。若柴胡證不罷者。復與柴胡湯。必蒸蒸而振。却復發熱汗出而解。或本全書。無却復之復字。後百五十條。亦無復字。却。或本作卻。

金鑑曰。凡柴胡湯病證。不與柴胡湯而反下之。不變他病。柴胡證仍在者。可復與柴胡湯。則解。但以誤下。其證必虛。故解必蒸蒸而熱。振振而寒。邪正交爭。然後汗出而解也。

方有執曰。蒸蒸而振。作戰汗也。必如此而後解者。以下後裏虛故也。

劉棟曰。凡大小柴胡二湯。雖異其方。而其證同。只有輕重之分而已。如大小承氣二湯。亦同于此。

正珍曰。蒸蒸。內熱貌。蒸蒸而振者。其內如蒸而外則振寒也。凡病人已經數日之後。藥能中其膏肓。則間有振寒發熱而解者。豈唯下後爲然乎。亦豈唯一柴胡湯爲然乎。又按本節宜與後一百八條通考矣。

〔百七〕傷寒二三日。心中悸而煩者。小建中湯主之。外臺。作湯。寒一二日。

金鑑曰。傷寒二三日。未經汗下。卽心悸而煩。必其人中氣素虛。雖有表證。亦不可汗之。

錢潢曰。心中。心胸之間。非必心藏之中也。悸。虛病也。



顏穆曰。今世素有積氣之人。多見此證。

劉棟曰。胸脇苦滿。心煩而嘔者。小柴胡之主也。心中悸而煩。無嘔者。小建中之主也。

百八十六條曰。傷寒脈結代。心動悸。炙甘草湯主之。

正珍曰。此條亦承柴胡本條發之。曰悸。曰煩。雖似柴胡證。別無一少陽正證。則知其非少陽病也。況二三日。亦未至柴胡部位日數乎。其爲中虛感邪之證明矣。故小建中湯。溫而散之也。若有嘔者。乃少陽病。可與柴胡也。

〔百八〕太陽病。經過十餘日。反二三下之。後四五日。柴胡證仍在者。先與小柴胡湯。嘔不止。心下急。鬱鬱微煩者。爲未解也。與大柴胡湯下之。則愈。  
小柴胡湯之湯字。依成本補之。成  
本脫大柴胡湯之湯字。當補之。

程應龍曰。太陽病。經過十餘日。邪不入裏。知此際已具有柴胡證矣。觀下文柴胡證仍在字可見。醫乃二三下之。此之謂反。

發秘曰。嘔不止三字。可見未與小柴胡之前。既已有嘔矣。

林瀾曰。嘔不止。則半表半裏證猶在。然心下急鬱鬱微煩。必有燥屎也。非下除之不可。故以大柴胡兼而行之。

希哲曰。過經者。言太陽表證罷也。非謂十二日以後也。

劉棟曰：鬱鬱，默默之劇也。

正珍曰：過經者，邪氣過去，經脈之表。

經脈之表者，謂動血二脈之支。則其延包裏於周身之表者也。

而既轉入

平少陽，或陽明之辭，故於少陽及陽明，每每稱焉。蓋表解之謂也。過者，字典云：越也，超也。又曰：經過之過，平聲。超過之過，去聲。按韻會，平聲歌韵，收過字。由此攷之，經過之過，如字讀之，超過之過，發爲去聲也。經者，經脈之經，與茯苓桂枝白朮甘草湯條，發汗則動經，及太陽下篇，經脈動惕，久而爲痿之經同焉，皆指表之辭，對臟腑之裏爲言也。本篇調胃承氣湯條曰：過經譫語者，以有熱也。當以湯下之。陽明篇，大承氣湯條曰：過經乃下之。此皆於陽明稱之也。若夫本節過經二字，殊指少陽證言之。觀下文柴胡證仍在之文，可見矣。成無已解過經二字云：日數過多，累經攻下。本節又云：傷寒十二日，再傳經盡，謂之過經。謂胃承氣又云：過太陽經，無表證。陽明篇汗出，韓語條註文可見其唯隨文爲解，而不之深考，遂致此矛盾矣。方有執云：過經與壞同。其他諸家所解，大氏以再傳經十二日行盡而後尙猶不解者，爲過經，皆非古義也。及乎劉棟解出，則曰：過經，經過也。然而倒經過，爲過經。又復古之所未有，義亦難通矣。按柴胡證者，泛指柴胡部位證言，不可以小柴胡必之。言太陽病已轉入少陽十餘日，法當與小柴胡以和解之，而反二三下之，後經四五日，少陽柴胡

證仍在者。當先與小柴胡湯。如或不愈。其嘔不止。心下急結。鬱鬱微煩者。是爲邪氣已犯陽明。必有燥屎也。故與大柴胡湯。以下之。則愈。蓋少陽陽明併病者也。再按。心下急。謂心下痞硬。百十一條云。少腹急結者。宜桃核承氣湯。百三十一條云。少腹硬滿。抵當湯主之。百七十四條云。心下痞硬。嘔吐而下利者。大柴胡湯主之。合而考之。急與痞硬。同是一證。但急與急結。以病者所自覺而言。痞硬硬滿。以醫者所診得言之。略寓其輕重已。

大柴胡湯方

柴胡 半斤

黃芩 三兩

芍藥 三兩

半夏 半升

生薑 五兩

枳實 四枚

大棗 十二枚

右七味。以水一斗二升。煮取六升。去滓再煎。溫服一升。日三服。一方加大黃二兩。若不加。恐不爲大柴胡湯。全帶。有大黃二兩四字。是。七味。當作八味。玉函作生薑三兩。再煎下。有取三升三字。并是。按。

玉函金匱。及肘後所載方。皆有大黃二兩。宜從而爲正。

外臺引崔氏大前胡湯。品味與大柴胡同。但柴胡作前胡。

許叔微曰。大柴胡湯。一方無大黃。一方有大黃。此方用大黃者。以大黃有蕩滌蘊熱之功。爲傷寒中要藥。王叔和云。若不大黃。恐不名大柴胡湯。且經文明言下之則愈。若無大黃。將何以下心下之急乎。應從叔

和爲是。

〔百九〕傷寒十三日不解。胸脇滿而嘔。日晡所發潮熱。已而微利。此本柴胡證。下之而不得利。今反利者。知醫以丸藥下之。此非其治也。潮熱者。實也。先宜服小柴胡湯以解外。後以柴胡加芒硝湯主之。

下文下之語。說重已。而不得利。宋板。作以不得利。今依成本改之。成本全書。并脫此非之此字。

玉函經。并無已字。是下之二字衍文。蓋

成無已曰。潮熱者。若潮水之潮。其來不失其時也。一日一發。指時而發者。謂之潮熱。若日三五發者。即是發熱。非潮熱也。

惟忠曰。潮熱者。熱之發也。必有時矣。猶潮汐之來去以時也。所以名曰潮也。且其於常也。必身熱。當其發也。必惡熱。所以使人煩躁也。不但於日晡所。或於午未申之間。亦可以名矣。若必於日晡所而名矣。惟曰潮熱足矣。復何煩日晡所字乎。

正珍曰。先宜以下十二字。後人攙入之文。宜刪去之。何者。以柴胡非解外之藥也。十三日當作十餘日。蓋餘字省文。作余。余訛爲三已。

約會小治日。餘題

作余。周禮委人。凡其聚聚以寺頒賜。注。余書爲餘。又三字注曰。三。集韻。作或。

猶瘕省作瘕。訛爲瘕。屎通作矢。訛

爲失類。後人不察。妄意傳會過經之說。殊不知論中言十餘日者。數條其稱十三日者。僅不過二條。其誤可見矣。日晡所發潮熱者。謂申時前後發熱也。所字屬日晡。大陷胸湯條。日晡所。小有潮熱語。可以見矣。所

猶言前後也。尚書云：多歷年所。史記東方朔傳云：率取婦一歲所者，即棄去，更取婦。漢書原涉傳云：涉居谷口，半歲所，自剋去官，禮記檀弓註云：高四尺所。疏云：所是不定之名，是也。滿讀曰懣，悶也。言傷寒十餘日不解，胸脇苦悶而嘔，且日晡所發潮熱者，是少陽病之帶陽明者，乃大柴胡之所主也。於法當不下利，今反利者，知先此時，醫以丸藥迅下之，非其治也。迅下則水雖去，而燥屎不去，故凡內有燥屎而發身熱者，非湯藥下之則不解。今反下之用丸藥，所以其熱不解，徒動臟腑而致微利也。恐醫以下後之利，爲虛寒自利之病，故復指之曰：潮熱者，實也是示其可再以湯潤下之也。此證不用大柴胡者，因其先經丸藥攻下，而續自微利也。故唯加芒消潤燥以取利，是又下中兼和之意也。按陽明篇云：陽明病發潮熱，大便溏，小便自可，胸脇滿不去者，小柴胡湯主之。其證全與本條同，但一則由攻下而致微利，一則不由攻下而自溏，故芒消猶有所畏。況大黃乎？是以雖有潮熱，不敢以攻之也。

柴胡加芒消湯方

柴胡

二兩十

黃芩

一兩

人參

一兩

甘草

一兩

生薑

一兩

半夏

二十餘本

大棗

四枚

芒消

六兩

右八味以水四升，煮取二升，去滓，內芒消，更煮微沸，分溫再服，不解更作。

玉函作半  
夏五枚

按清王子接古方選注云。張錫駒云。應以大柴胡加芒消。其理亦通。姑誌之。劉棟云。大柴胡湯方中。加芒消。以燥其燥屎。得快利而愈也。惟忠云。柴胡加芒消湯。疑大柴胡加芒消也。凡特云柴胡湯者。必大柴胡湯也。此既有小柴胡。而特云柴胡。故曰必大柴胡加芒消也。果如三子者言。則柴胡桂枝湯。柴胡加龍骨牡蠣湯。柴胡去半夏加栝樓湯。皆謂之大柴胡所加去乎。再按此方本當於小柴胡湯方內。加芒硝大雨也。今此條所載分量。小柴胡三分之一減其劑者。疑非仲景氏意。宜以全書所載爲正矣。

〔百十〕傷寒十三日不解。過經譫語者。以有熱也。當以湯下之。若小便利者。大便當鞭。而反下利。脈調和者。知醫以丸藥下之。非其治也。若自下利者。脈當微厥。今反和者。此爲內實也。調胃承氣湯主之。不解二字。後成本全書補之。十三日。當作十日。見上。

三百八十二條。下利欲飲水者。以有熱故也。亦以內有熱邪而言。成無已曰。譫語者。陽明胃熱也。當以諸承氣下之。

發秘曰。前條是少陽壞病。本節是陽明壞病也。  
正珍曰。微厥當作微結。因聲近而譌。發與結。俱入聲。牙音消行字。結者。脈之名。卽脈動

之忽有斷絕者。謂之結者。以如一直線中。忽有交結之處也。炙甘草湯條。結代之結。抵當湯條。沈結之結。皆同焉。微結者。謂微弱而結代也。成無已。程應旂。劉棟。惟忠諸人。皆以爲脈微而厥冷。非也。果然。宜云當脈微而厥。不可云脈當微厥也。錢潢云。微厥者。忽見微細也。然訓厥爲細。不知何所攷據。想亦任筆杜撰而已。豈足論乎。辨不可下。蕭曰。厥者。脈來大。漸漸小。更來漸漸。本此。此條蓋深於前條一等者。言傷寒十餘日不解。表證已罷而譫語者。此以內有熱邪也。法當以大小承氣湯下之。若小便利者。大便當鞭而反下利。其脈調和者。知醫以巴豆甘遂等丸藥下之。續自下利矣。此非其治也。若又不因丸藥攻下。而自利者。乃內虛有寒之所致。其脈當微結。四逆真武等。所得而主也。今反調和者。此非虛寒。便爲內實有熱也。雖有下利。乃熱藥餘毒之利已。宜和胃氣。調胃承氣湯主之。按調和二字。一以脈證不相乖言之。一對微結言之。其實當沈而數滑也。非平人無病之調和也。又見後二百二十一條。

〔百十一〕太陽病不解。熱結膀胱。其人如狂。血自下。下者愈。其外不解者。尙未可攻。當先解其外。外解已。但少腹急結者。乃可攻之。宜桃核承氣湯。少。玉函作小。是也。

方有執曰。急結者。有形之血蓄積也。又曰。鞭滿。即急結。抵當湯條註。

程應旆曰。此條不及小便者。以有血自下三字也。然小腹急結處。包小便自利句。

錢潢曰。謂之如狂者。狂而未甚之詞。其語言動靜。或是或非。猶未至於棄衣而走。登高而歌。踰垣上屋。妄言罵詈不避親疎之甚也。

發秘曰。不言血室而言膀胱。其專爲男子設明矣。

正珍曰。下者愈三字。脈經作下之則愈四字。宜從而改。否則下文尙未可攻一句。無所照應也。少腹之少。玉函及程應旆本。作小。是也。蓋臍上

曰大腹。臍下曰小腹。素問藏氣法時論。有明文可徵矣。又考釋名云。自

臍以下曰水腹。今本。作小腹。非也。格致鏡原。引釋名。作水腹。水均所聚也。又曰。少腹少小也。比

於臍以上爲小也。此止由是觀之。小訛爲少。其來久矣。又劉完素傷寒直

格云。臍上爲腹。腹下爲小腹。小腹兩旁。謂之少腹。可謂鑿矣。熱結膀胱

者。邪氣鬱結於下焦膀胱部分之謂。下文所謂小腹急結。便其外候已

非直指膀胱一府言之也。抵當湯證所謂其人發狂者。以熱在下焦。小

腹當鞭滿。下血乃愈者。可以相徵也。言太陽病。數日不解。小腹急結。即

儲其人如狂。自下血者。此爲邪氣結下焦膀胱地位也。結乃鬱之甚者。

邪氣鬱於頭中。則致頭痛項強。血鬱於胸中。則致胸悶心煩嘔吐。結

於胃中。則大便不通。穢氣上而乘心。令人如狂。今邪結於下焦。而血氣



不行。停而爲瘀。是以瘀氣上而乘心。令人如狂。雖則如狂。其血自下。而小腹不急結者。不須藥而愈。以血下則邪熱隨血而解也。如太陽病。脈浮緊。發熱身無汗。自衄者愈。及婦人傷寒。經水適來。讖語如見鬼狀者。無犯胃氣。及上二焦。必自愈。皆是也。今此證雖其血自下。然急結不散。故非下之則不愈。猶少陰篇所載。飲食入口則吐。心下溫溫欲吐復不能吐者。非吐之則不愈。自利清水。色純青。心下必痛。口乾燥者。非下之則不愈。故曰下之則愈。雖然。其人外證不解。猶有惡寒頭痛脈浮等候者。不可妄下之。若然者。當先與桂枝湯。以解其外。外解已而但熱結膀胱之證不去者。乃始可攻之。若外未解而下之。必變作壞病。如結胸痞。嘔挾熱利。諸證是也。按此條。上文言熱結膀胱。而不言小腹急結。下文言小腹急結。而不言熱結膀胱。本論錯綜之妙如是。再按。註家自成無已以下。皆云太陽病熱結膀胱者。此邪自經而入府也。不知厥陰病。冷結在膀胱者。彼以爲何如乎。若強以經府論之。則其所下血亦當自溺道出焉。然未見有傷寒熱結。而血出自溺道者。錢潢業既有此論。宜參考。

## 桃核承氣湯方

桃仁五十箇  
去皮尖大黃四兩桂枝二兩  
去皮甘草二兩  
炙芒消二兩

右五味。以水七升。煮取二升半。去滓。內芒消。更上火微沸。下火先食。溫服五合。日三服。當微利。

正珍曰。此方也。即調胃承氣湯。加桃核桂枝者。桃核。即桃仁。非不用仁。而用核也。千金芒消湯方中云。李核仁二十一枚。亦非以核爲言也。夫粟者。米之未脫甲者。固非可食之物。而古有食粟之語。是非不食米而食粟。可以徵矣。但其所以加桂枝之意。不可得而詳也。茲錄諸說。以俟後考。

成無已曰。下焦畜血。散以桂枝辛熱之氣。

王肯堂曰。當是桂。非桂枝也。蓋桂枝輕揚治上。桂厚重治下。成氏隨文順釋。未足據。

張志聰曰。配甘草桂枝。資中焦之精。

魏荔彤曰。桃核承氣中。復兼桂枝。猶恐裏邪未全盡。而表邪亦未全盡也。

方有執曰。桂枝。解外也。

程應龍曰。兼桂枝者。以太陽隨經之熱。原從表分傳入。非桂枝不解耳。

喻昌曰。桂枝。分解外邪。正恐少有未解。其血得以留戀不下乎。

錢潢曰。桂之爲用。通血脈。消瘀血。尤其所長也。

希哲曰。吳山甫曰。桂枝辛物也。能利血而行滯也。

按以上諸說。要之不過行瘀解外之二塗也。果桂之行瘀乎。則抵當湯丸專主瘀血。而不用之者。何也。果取解外之義乎。則奈經文外解已三字何。又如金匱所載桂枝茯苓丸。則雖專主瘀血乎。其方蓋出後人附入。何者。其所謂婦人宿有癥病。數十字。文之與義。皆不似仲景氏法。且其以煉蜜和丸。食前服一丸者。亦是非全論義例乎。遂乃洗心滌慮。沈默涵泳。再三易稿。纔得其緒端。蓋此條爲發汗後外解已。而如狂之證不止。小腹急結者設之。夫既發之汗。又從而下之。不能無亡陽之虞。故加桂枝以護其陽也。抵當二方則否。所以不用桂枝也。如桂枝甘草湯。茯苓桂枝甘草大棗湯。茯苓桂枝白朮甘草湯。救逆湯類。亦皆爲其發汗過多。中下焦之陽。爲之亡故也。非因其表未解也。雖然。仲景氏之方。去今久遠。義理最奧。增減甚謹。吾安知其果然否乎。聊識以告同志云爾。

特農本經曰。病在胸膈已上者。先食後服藥。病在心腹已下者。先服藥而後食。

素問病能論曰。岐伯曰。病名酒風。治之。以澤瀉朮各三分。麴蘗五分。合以三指撮爲後飯。注曰。先服藥而後容飯也。

正珍曰。先食二字。後人攙入。宜刪之。

〔百十二〕傷寒八九日下之。胸滿煩驚。小便不利。讖語。一身盡重不可轉

側者。胡柴加龍骨牡蠣湯主之。下之下。外。有後字。

錢潢曰。因誤下之後。使太陽之經邪傳至少陽而入裏也。少陽篇云。少陽中風。胸中滿而煩。及胸中煩而不嘔。或心煩喜嘔。或小便不利者。是也。

劉棟曰。此方有疑惑者二。傷寒八九日。風濕相搏。身體疼煩。不能自轉側。不嘔不渴。脈浮虛而澀者。桂枝附子湯之主也。三陽合病。腹滿身重。難以轉側。讖語遺尿者。白虎湯之主也。但身體痛與不痛。胸滿與腹滿。遺尿與不利。有嘔與無嘔。有渴與無渴。此其異而已。正珍曰。桂枝附子湯。以身體疼煩為主。白虎湯。以煩渴為主。柴胡加龍骨牡蠣湯。以胸滿煩驚為主。其身重不可轉側。三證俱同焉。

正珍曰。下條云。太陽傷寒者。加溫針必驚也。又云。傷寒脈浮。醫以火迫劫之。亡陽必驚狂。臥起不安者。桂枝去芍藥加蜀漆牡蠣龍骨救逆湯主之。又云。火逆下之。因燒針煩躁者。桂枝甘草龍骨牡蠣湯主之。合而攷之。此條有煩驚而用龍骨牡蠣者。亦必火逆一證。不則何以發煩驚。亦何以用龍骨牡蠣邪。因詳文義。八九日下之之間。必有關文。今竊以意補之如左。

傷寒八九日下之後。復以火迫劫之。胸滿煩驚。小便不利。讞語。一身盡重。不可轉側者。柴胡加龍骨牡蠣湯主之。嘗考素問玉機真藏論。火攻之術。本爲寒痺不仁等而設。不可以施諸傷寒實熱者也。今傷寒柴胡證。醫反下之。又以火強發其汗。遂致胸滿煩驚。小便不利。讞語身重之變證者。蓋火氣乘其虛以上衝。心氣爲之不鎮故也。故主小柴胡。加龍骨牡蠣。以鎮壓之也。胸滿讀曰胸滿。說見上篇。煩驚之煩。與煩渴煩疼之煩同。甚之之詞。非驚外別有心煩也。如煩勞煩苦。可以見矣。詳見上篇。惟忠分爲二證。非也。再按此條。蓋柴胡證被火邪而發。煩驚讞語身重者。究竟火毒陷脈乘心。以發癰證也。故以柴胡治本證。加龍骨牡蠣。以治所挾之癰也。但古昔以癰爲小兒病名。而不稱之大人。故本論無癰名也。叔和論溫病火逆證曰。若被火者。微則發黃色。劇則如驚癰。時瘕瘕。云如而不云發。亦復以古昔大人不稱癰也。蓋癰者。心疾也。驚與讞語。皆心氣失常之病。隋書許智藏傳曰。秦王後有疾云云。智藏診脈曰。疾已入心。卽當發癰。不可救也。凡病人外無風寒之象。內無痞滿便秘之證。卒然見煩驚讞語瘕瘕。煩躁悶亂不安之證者。皆癰也。婦人妊娠五六月。小兒痘瘡初熱。間往往有此證。謹勿認讞語如狂證。爲陽明內實病。處下劑。

柴胡加龍骨牡蠣湯方

柴胡 四兩

龍骨

黃芩

生薑 切

鉛丹

人參

桂枝 去皮

茯苓 各一兩半

半夏 二合半洗

大黃 二兩

牡蠣 一兩半熬

大棗 六枚

右十二味。以水八升。煮取四升。內大黃。切如碁子。更煮一兩沸。去滓。溫服一升。本云柴胡湯。今加龍骨等。

按方名曰柴胡加龍骨牡蠣湯。則宜於小柴胡湯方中加二物也。不則加字失義。今此方有鉛丹桂枝茯苓大黃四味者。非仲景氏本色也。方後先煮諸藥。後內大黃。及切如碁子文。在煎法中者。論中無再見。倍知其不爲真方矣。外臺此方引千金翼。而不引傷寒論。亦可以證矣。劉棟云。大柴胡方中加二品也。非也。說見前柴胡加芒消湯條。

〔百十三〕傷寒腹滿。譫語。寸口脈浮而緊。此肝乘脾也。名曰縱刺期門。

〔百十四〕傷寒發熱。齎齎惡寒。大渴欲飲水。其腹必滿。自汗出。小便利。其病欲解。此肝乘肺也。名曰橫刺期門。

〔百十五〕太陽病二日反躁。凡熨其背而大汗出。大熱入胃。胃中水竭。躁煩。必發譫語。十餘日振慄自下利者。此爲欲解也。故其汗從腰以下不得汗。欲小便不得。反嘔欲失溲。足下惡風。大便鞭。小便當數。而反不數及不

多。大便已。頭卓然而痛。其人足心必熱。穀氣下流故也。

〔百十六〕太陽病中風。以火劫發汗。邪風被火熱。血氣流溢。失其常度。兩陽相熏灼。其身發黃。陽盛則欲衄陰虛小便難。陰陽俱虛竭。身體則枯燥。但頭汗出。刺頸而還。腹滿微喘。口乾咽爛。或不大便。久則譫語。甚者至噦。手足躁擾。捻衣摸床。小便利者。其人可治。

劉棟曰。右四條。後人之所記也。

〔百十七〕傷寒脈浮。醫以火迫劫之。亡陽必驚狂。臥起不安者。桂枝去芍藥加蜀漆牡蠣龍骨救逆湯主之。

金鑑曰。傷寒脈浮。醫不用麻桂之藥。而以火劫取汗。汗過亡陽。故見驚狂起臥不安之證。

正珍曰。以火迫劫之者。謂以溫針強發其汗也。下文太陽傷寒者。加溫針必驚。是也。却與脅古字通用。迫劫。即迫脅也。漢書吳王濞傳云。迫劫萬民。伐殺無罪。後漢書鄭康成傳云。靈帝末。黨禁解。大將軍何進。聞而辟之。州郡以進權威。不敢違意。遂迫脅康成。不得已而詣之。字典云。迫脅。以威力恐人也。是也。又按。臥起成本作起臥。諸註本皆從之。非也。古人唯有臥起之語。未見有起臥之文也。梔子厚朴湯條云。臥起不安。漢書蘇武傳云。杖漢節牧羊。臥起操持節旄盡落。又金日磾傳云。日磾兩

子。賞建俱侍中。與昭帝略同年。共臥起。黃庭堅詩云。臥起一牀書。是也。此條臥起不安。乃前條胸滿之外候。救逆二字。後人所加。宜刪。按前條論柴胡證而被火攻者。本節論桂枝證而被火攻者也。前言八九日。此言脈浮。其義可見矣。驚狂臥起不安。乃火攻發汗過多。遂亡其陽。火熱乘虛陷脈中。上而乘心。心氣爲之不鎮也。故於桂枝方內。去芍藥。加蜀漆。牡蠣龍骨。以鎮其躁擾也。成無已云。芍藥益陰。非亡陽所宜。誤矣。再按。此證雖云亡陽。然而未至汗出惡寒四肢厥冷之甚。故無取乎薑附劑也。金鑑云。不用附子四逆輩者。以其爲火劫亡陽也。非矣。

桂枝去芍藥加蜀漆牡蠣龍骨救逆湯方

桂枝

三兩 去皮

甘草

二兩 炙

生薑

三兩 切

大棗

十二枚 擘

牡蠣

五兩 熬

蜀漆

三兩 洗 去腥

龍骨

四兩

右七味。以水一斗二升。先煮蜀漆。減二升。內諸藥。煮取三升。去滓。溫服一升。本云桂枝湯。今去芍藥。加蜀漆牡蠣龍骨。右七味。成本全書作爲末。非。又脫本云以下十六字。

〔百十八〕形作傷寒。其脈不弦緊而弱。弱者必渴。被火必譫語。弱者發熱。脈浮解之。當汗出愈。

〔百十九〕太陽病以火熏之。不得汗。其人必躁。到經不解。必清血。名爲火邪。



〔百二十一〕脈浮熱甚而反灸之。此爲實實以虛治。因火而動。必咽燥吐血。〔百二十二〕微數之脈。慎不可灸。因火爲邪。則爲煩逆。追虛逐實。血散脈中。火氣雖微。內攻有力。焦骨傷筋。血難復也。

〔百二十三〕脈浮宜以汗解。用火灸之。邪無從出。因火而盛。病從腰以下必重而痺。名火逆也。

〔百二十四〕欲自解者。必當先煩。煩乃有汗而解。何以知之。脈浮。故知汗出解。

劉棟曰。右六條。後人之所記也。

〔百二十四〕燒鍼令其汗。鍼處被寒。核起而赤者。必發奔豚。氣從少腹上衝心者。灸其核上各一壯。與桂枝加桂湯。更加桂二兩也。玉函金匱。奔豚作責。脈。成本說也。

金鑑曰。燒鍼。卽溫鍼也。燒鍼取汗。亦是汗法。但鍼處宜當避寒。若不謹慎。外被寒襲。火鬱脈中。血不流行。必結腫核赤起矣。

錢潢曰。燒鍼者。燒熱其鍼而取汗也。玉機真藏論曰。風寒客於人。使人毫毛畢直。皮膚閉而爲熱。當是之時。可汗而發也。或痺不仁。腫痛。可湯熨及火灸刺而去之。觀此。則風寒本當以汗解。而漫以燒鍼取汗。雖或不至於因火爲邪。而鍼處孔穴不閉。已被寒邪所侵矣。劉棟曰。凡冬日中於寒邪者。行燒鍼之法。以發其汗也。

前論曰。發汗後。其人臍下悸者。欲作奔豚。扶苓桂枝甘草大棗湯主之。  
正珍曰。奔與憤古字通用。詳見前六十五條。少當作小。說見前一百十  
一條。責豚。病名也。氣字屬下。按燒鍼取汗。其術極暴。若其人虛弱者。爲  
之必亡陽而發奔豚也。否則何以至於其鍼處被寒核起而赤耶。其暴  
可知也。今其人既已亡陽而不取薑附者。以未見筋惕肉瞤。汗出惡風。  
厥逆煩躁等危候也。故與之桂枝加桂湯。以下衝氣也。蓋奔豚。虛悸之  
甚者耳。其灸核上者。以溫散寒邪也。正字通曰。醫用艾灸一灼。謂之一壯。陸佃  
曰。以壯人爲法。老幼羸弱。量力減之。

### 桂枝加桂湯方

桂枝五兩  
去皮

芍藥三兩

生薑三兩  
切

甘草二兩  
炙

大棗十二  
枚

右五味。以水七升。煮取三升。去滓。溫服一升。本云桂枝湯。今加桂滿五兩。  
所以加桂者。以能泄奔豚氣也。

按此方。及桂枝新加湯。經文既言其所加之分量。則仲景氏原本。不載  
其方可知矣。後人不識。看以爲方名。從而附載其方已。又按。方有執云。  
所加者桂也。非枝也。果爾。唯當稱加。不可云更加也。

〔百一十五〕火逆下之。因燒鍼煩躁者。桂枝甘草龍骨牡蠣湯主之。

下之二字。莫所主當。必是衍文。宜刪。按古昔火攻之術。種種不同。有艾  
火。有溫鍼。有燒瓦。即前百十五條。玉函。作燒瓦。其背者。是也。此語出於叔和書。  
其術蓋自古有之。經類本草。謂之溫石。又謂燒燔。便是也耳。

火逆之證。於是多端矣。逆謂誤治也。劉棟註爲火劫之上逆。非也。本節所說。比之救逆湯證。一等輕者也。然而煩躁。乃狂驚之漸。亦爲火熱內攻之候。故亦以桂枝甘草龍骨牡蠣四物。以救其逆也。桂枝甘草湯條云。發汗過多。其人又手自冒心。心下悸。欲得按者。桂枝甘草湯主之。由此考之。此條亦爲發汗過多之證明矣。又按。魏荔彤謂火逆一句。下之。一句。因燒鍼一句。誤治之故有三。而煩躁之變證既一則。惟立一法以救三誤。不必更問其致誤何由矣。此止吁。果如斯。所謂知犯何逆。隨證治之。亦以爲無用之言乎。妄甚矣。

桂枝甘草龍骨牡蠣湯方

桂枝

一兩  
去皮

甘草

二兩  
炙

牡蠣

二兩  
熬

龍骨

二兩

右四味。以水五升。煮取二升半。去滓。溫服八合。日三服。

〔百一十六〕太陽傷寒者。加溫鍼必驚也。

此條火逆總綱。本當在于柴胡加龍骨牡蠣湯前也。所謂太陽傷寒者。卽是麻黃湯所主。若誤加溫鍼。則火熱入脈中。上而乘心。心氣爲之不鎮。令人驚狂也。金鑑云。太陽傷寒。加溫鍼必驚者。謂病傷寒之人。卒然加以溫鍼。其心畏而必驚也。非溫鍼之後必生驚病也。此止果爾。救逆湯驚狂。亦以爲卒然加溫鍼之驚乎。可謂大謬矣。張志聰云。施氏曰。溫者。

熱也。溫鍼者，即燔鍼、淬鍼之類也。燒鍼者，既鍼而以艾火灼之也。皆爲火攻之義。山邊篤雅傷寒箋注亦從之。余謂燒鍼即溫鍼，非有二法也。猶火食又言熟食已，別而爲二物，非也。

〔百二十七〕太陽病，當惡寒發熱，今自汗出，反不惡寒發熱，關上脈細數者，以醫吐之過也。一二日吐之者，腹中飢，口不能食。三四日吐之者，不喜糜粥，欲食冷食，朝食暮吐，以醫吐之所致也。此爲小逆。

劉棟曰：後人所僞也。

正珍曰：此次條註文錯亂出於此者已宜刪。

〔百二十八〕太陽病吐之，但太陽病當惡寒，今反不惡寒，不欲近衣，此爲吐之內煩也。

方有執曰：不惡寒不欲近衣，雖不顯熱而熱在內也。故曰內煩。

金鑑曰：太陽病吐之，表解者當不惡寒，裏解者亦不惡寒。今反不惡寒，不欲近衣者，是惡熱也。此由吐之後，表解裏不解，內生煩熱也。蓋無汗煩熱，熱在表，大青龍湯證也。有汗煩熱，熱在裏，白虎湯證也。吐下後，心中懊憹，無汗煩熱，大便秘結，熱猶在內，梔子豉湯證也。有汗煩熱，大便秘結，熱悉入府，調胃承氣湯證也。今因吐後，內生煩熱，是爲氣液已傷之虛煩，非未經汗下之實煩也。以上之法，皆不可施，惟宜用竹葉石膏。

傷於益氣生津中。清熱寧煩可也。

正珍曰。太陽病吐之句下。似有關文。

〔百二十一〕病人脈數。數爲熱。當消穀。引食而反吐者。此以發汗令陽氣微隔。氣虛脈乃數也。數爲客熱。不能消穀。以胃中虛冷故吐也。

劉棟曰。此條後人之所記也。

正珍曰。數爲熱。及令陽氣微等語。自有辨脈平脈法中辭氣。

〔百二十二〕太陽病。過經十餘日。心下溫溫欲吐而胸中痛。大便反澀。腹微滿。鬱鬱微煩。先此時自極吐下者。與調胃承氣湯。若不爾者。不可與。但欲嘔。胸中痛微澀者。此非柴胡湯證。以嘔故知極吐下也。成本。無樂胡傷之傷字。

方有執曰。不爾。言未極吐下也。

錢潢曰。此辨症似少陽。而實非柴胡證也。

希哲曰。此證欲吐而胸中痛。鬱鬱微煩者。似于大柴胡湯證之嘔不止。心下急。鬱鬱微煩。而心下溫溫。大便澀不同。又欲吐而胸中痛。大便澀。腹微滿者。似于汗出不解。心下痞鞭。嘔吐而下利。而心下溫溫。鬱鬱微煩不同。故再辨之也。欲吐而胸中痛者。言欲吐時痛而常不痛也。發秘曰。極吐下而後澀者。假澀也。屬一時暴虛。藥毒盡而自痊。若不因吐下而澀者。真澀也。雖梔子豉湯輩。業在所禁也。何況承氣乎。

正珍曰。溫溫讀曰愠愠。考徵見下。自當作而。因聲近而譌。蓋自者。去聲。四寘韻而者。平聲。四支韻。其韻雖異。音則相近。前第三十二葛根湯條。而下利誤作自下利者。亦爲之故也。又少陰篇真武湯條。自下利之自字。玉函千金異。俱誤作而字。可謂明徵矣。以嘔當作以瀉。應上文反瀉語也。過經謂表解也。言太陽病。表證已罷十餘日。心下溫溫欲吐而胸中痛。大便不瀉者。此爲邪傳少陽。小柴胡湯證也。今其人大便當不瀉而反瀉。鬱鬱微煩者。知醫先此時而極吐下。

字貞。極字註云。極。盡也。易繫辭。極其數。定天下之象。

極吐下者。必用瓜蒂巴豆類。故傷動腸胃。以致下利也。然是藥毒未解之下利。非虛寒下利。又非太陽病。外證未除而數下之。遂致虛寒之利也。故與調胃承氣湯。以和其胃則愈。若不爾者。謂不因極吐下。而有此證。則虛寒之瀉。虛寒之腹滿。虛寒之煩也。雖有似柴胡證者。非實熱也。其脈當微弱結代。義如前百十條所述。不可與調胃承氣湯。宜以理中四逆輩溫之。若但欲嘔胸中痛。大便微瀉者。似柴胡證。而非柴胡證。以其大便瀉之故。知其極吐下。又知其非柴胡證也。按此章也。言簡而旨微。加以傳寫之謬。是以千古憤憤。終莫得其本旨者。劉棟解自極吐下。以爲病人自欲爲吐下。妄之尤甚者。極字。豈有欲義耶。

〔附考〕嘗考論中。本條既曰。心下溫溫欲吐而胸中痛。又少陰篇曰。心

中溫溫欲吐而不能吐溫溫二字古來註家並未之釋考諸爾雅釋訓則曰溫溫柔也疏曰寬緩和柔也以是釋之乎其奈枘鑿不相入何及於王肯堂解出始爲之說云溫溫當是嘔嘔乃吐飲之狀也醫宗金鑑亦從而由之蓋據玉函經也因考字書嘔乙骨切又烏沒切潘岳笙賦註訓嘔嘔以爲吐飲之兒此雖稍近有理猶未妥帖且也字形與音亦頗奇僻不合全論典雅之旨也浪華瀾穆又改作蘊蘊蘊蘊乃結聚之兒傅休奕鬱金賦雖有英蘊蘊而金黃之語亦未足以爲的確之解也余則以爲溫溫卽愠愠古字通用不必改作唯讀作去聲耳素問玉機真藏論曰秋脈大過則令人逆氣而背痛愠愠然千金方引傷寒論少陰篇文亦作愠愠又考韻會小補溫字注云又問韻紆問切釋文云又作蘊愠可見溫溫卽愠愠乃爲煩憤愠悶之兒蓋古昔聖人之制字唯有音之與義已未有平上去入其有之則自梁沈約始雖然業既有音之與義則非全無四聲但呼法不明四聲混淆殆如倭音之類耳故漢魏以上諸書遇其音同者則取次借用而不復顧字義之異如呦呦平聲通作兕兕並上聲呦呦並上聲味味去聲通作梅梅並平聲又通作每每並上聲于方以智通雅又如夫將讀舜孝經章句章毀讀毀孝經章句章標讀標毛詩標有梅篇駕讀加因聲及藩之轉發大學仁者以財發身之發日之轉爰向會供範安之轉闕韓非子立之轉

粒周禮思文立我爲民節  
於糧所養爲民乃粒也

古經傳中此例極多。故不通古音。則古書不可得而

解。噫。先輩諸子。何其不思諸。

(百二十一)太陽病六七日。表證仍在。脈微而沈。反不結胸。其人發狂者。以熱在下焦。少腹當鞭滿。小便自利者。下血乃愈。所以然者。以太陽隨經瘀熱在裏故也。抵當湯主之。

劉棟曰。所以然以下十五字。後人之註。誤入本文也。

正珍曰。此辨太陽病有畜血者。比桃核承氣證一等重者也。彼則小腹急結。此則小腹鞭滿。彼則如狂。此則發狂。彼則汗後。此則下後。自有差別也。桃核承氣證。其血自下。其爲瘀血之病。不俟辨明矣。此則血不下。故因小便利不利。以斷其爲瘀血也。桃核承氣。主治傷寒病中。熱邪結于下焦。而其血爲之不行。滯而爲瘀者也。抵當湯丸。主治其人素有瘀血。而熱邪乘之者。故陽明篇曰。其人喜忘者。本有久瘀血。宜抵當湯。其有別如之。此下焦本有積血之人。適病傷寒。而其熱乘瘀血。穢氣上而乘心。令人發狂者也。按劉向新序云。楚惠王食寒菹而得蛭。因遂吞之。腹有疾而不能食。令尹入問曰。王安得此疾也。王曰。我食寒菹而得蛭。念譴之而不行其罪乎。是法廢而威不立也。譴而行其誅乎。則庖宰食監。法皆當死。心又不忍也。故吾恐蛭之見也。因遂吞之。令尹避席再拜。



而賀曰。臣聞天道無親。惟德是輔。君有仁德。天之所奉也。病不爲傷。是夕也。惠王之後。蛭出。故其久病心腹之疾皆愈。王充論衡福虛篇云。蛭之性食血。惠王心腹之積。殆積血也。故食血之蟲死。而積血之病愈。由此觀之。雖丈夫亦有積血之疾。自古而然。第不及婦人最多已。言太陽病六七日。下之後。頭痛發熱惡寒等仍在。其脈微而沈者。當變爲結胸。大陷胸湯條云。脈沈而緊。可見結胸。其脈多沈。今反不結胸。其人發狂者。此爲熱乘其畜血。試看小腹雖鞭滿。小便則快利如常。可以決畜血無疑而下之。何以知其經攻下。以仍在二字。及反不結胸四字。知之也。下篇云。病發於陽而反下之。熱入因作結胸。可見結胸。必是下後之病矣。今此證下後。脈沈而不結胸。故曰反也。再按。傷寒下法。種種不同。咸待其表解而後下之。今此條表證仍在。而用下法者。何也。以其脈既變沈微也。若猶浮大者。未可下之也。下條云。太陽病身黃。脈沈結。亦以脈決其表之假在。而實則既解也。

〔附考〕抵當湯及丸。皆破積血之劑。其所以命抵當者。諸家紛然。未有定論也。成無已云。血畜於下。非大毒駛劑。則不能抵當其甚邪。故治畜血。曰抵當湯。方有執云。抵當之當。去聲。抵至也。至當不易之正治也。喻昌云。畜血而至於發狂。則熱勢攻心。桃仁承氣。不足以動其血。非用單

刀直入之將。必不能斬關取勝。故名其湯爲抵當。抵者。至也。乃至當不易之良法也。張志聰云。抵當者。抵當隨經之熱。而使之下洩也。醫宗金鑑云。非抵當湯。不足以逐血下瘀。乃至當不易之法也。賴穆云。抵敵也。當猶玉后無當之當。言底也。四味皆逐下瘀血之藥。令之適當其瘀血相釀之底而下之之名也。或曰。抵諸矢切。至也。使之至其底也。其他諸家所解。亦皆不出於右諸說之外。果爲至當不易之劑乎。則如桂枝於太陽。柴胡於少陽。承氣於陽明。無之而不至當不易。豈獨抵當爲然耶。訓抵爲擊乎。則巴豆甘遂大黃芒消諸劑。孰不抵當者。訓當爲底乎。則大小承氣於燥屎結鞭之底。十棗瓜蒂於留飲停畜之底。亦孰不抵當者。余嘗聞之愧一夫不得其所者。調鼎之任也。患一字不能解者。學者之業也。然則方名之末。雖匪治術大本。苟私淑仲景氏者。奈之何其可弗考究乎。按爾雅釋蟲曰。蛭。蛭。至掌。名醫別錄亦云。水蛭一名至掌。太平御覽亦引本草經曰。水蛭一名至掌。因檢韻鏡。至字去聲。四寘韻。抵字上聲。四紙韻。韻雖不同。均屬開轉齒音清行第三等照母。又考之字書。抵通作抵。紙郎二音。擊也。觸也。當也。至也。乃知其訓抵爲至。亦因同音而然。蓋古音四聲未判。往往同音通用。如亡名作亡命。智者作知者。不遑枚舉。此知至抵通用。所謂抵當。卽抵掌之訛。而實爲水蛭之異稱。

矣。是方以水蛭爲君。所以命曰抵掌湯已。若其不直曰水蛭湯者。蓋汚穢之物不欲斥言。殊取其異稱以爲方名。猶如不言人尿湯而言白通湯。不言大便而言不潔。不云死而云物故。可見其讀抵曰邸。亦是傳習之誤矣。但其號蛭曰抵掌。其義不可得而考。要之。方言聽語。不過虎謂於菟。腐鼠謂璞類也。嘗詳論中。聖誤若斯者。不壹而足。如彼痙作瘕。轉矢氣作轉失氣。挾熱利作協熱利。本方作本云。小腹作少腹。傳寫一誤。而千載襲其失。流傳既久。而耳目熟之。遂至復無一人容疑於其間者。可勝歎哉。因詳辨之。以詔後昆。惟達觀者。方可與語。若夫屑屑於宋元註家之陋者。豈足與謀乎。豈足與謀乎。辛丑中秋之日。杏花園主人識。

抵當湯方

水蛭

熱

亡蝨蟲

各三十箇  
去翅足熱

桃仁

二十箇  
去皮尖

大黃

酒洗  
三兩

右四味。以水五升。煮取三升。去滓。溫服一升。不下更服。

酒洗。成本。作酒浸。四味下。有爲末二字。

非也。千金外臺。亦無爲末二字。

柯琴曰。并取水陸之善取血者。以攻之。同氣相求。

淮南子。說山。謂。血。氣。相。求。

〔百三十二〕太陽病。身黃脈沈結。少腹鞭。小便不利者。爲無血也。小便自利。其人如狂者。血證諦也。抵當湯主之。

脈上。至面。有其字。爲上。外臺有此字。俱是。

成無已曰。身黃脈沈結。小便不利者。胃熱發黃也。可與茵陳湯。身黃脈

沈結。少腹鞭。小便自利。其人如狂者。非胃中瘀熱。爲熱結下焦而爲畜血也。與抵當湯。以下畜血。

方有執曰。諦審也。

錢潢曰。此以小便之利與不利。以別血證之是與非是也。身黃。遍身俱黃也。

〔百二十二〕傷寒有熱。少腹滿。應小便不利。今反利者。爲有血也。當下之。不可餘藥。宜抵當丸。有熱下。玉函外臺。俱有而字。是。

方有執曰。上條之方。變湯而爲丸。名雖丸也。而猶煮湯焉。正珍曰。此證也。輕於抵當湯一等。故無發狂如狂等證。唯滿而不鞭。方亦爲四分之一也。若傷寒有熱而小腹滿。小便不利者。五苓散證也。若身發黃者。茵陳蒿湯證也。今小便反利。故知其爲血證也。

### 抵當丸方

水蛭 二十箇 去足熬

蟅蟲 二十箇 去足熬

桃仁 二十五箇 去皮尖

大黃 三兩

右四味。搗分四丸。以水一升。煮一丸。取七合。服之。晡時當下血。若不下者。

更服。或本。作蟲蟲二十箇。桃仁二十箇。全蠍分下。有爲字。四味下。千金並翼。有發和二字。

證類本草曰。陶弘景云。晡時者。周時也。從今日至明日。方有執曰。晡。音醉。晡時。周時也。

正珍曰。四味分量。宜與抵當湯同。猶理中湯丸。半夏散湯例。唯分爲四丸。以用其一丸。此其別也已。

〔百三十四〕太陽病。小便利者。以飲水多。必心下悸。小便少者。必苦裏急也。

小便利。當作小便不利。病源傷寒悸候。引此文。小便利。作小便不利。宜從而改焉。小柴胡條云。心下悸。小便不利。真武條云。心下悸。頭眩。又云。有水氣。茯苓甘草湯條云。厥而心下悸。宜先治水。金匱云。食少飲多。水停心下。甚者則悸。合而考之。飲水多而悸者。以水停心下。小便不利也。小便少。乃不利之甚者。膀胱爲之填滿。故苦小腹裏急也。裏急。謂腹裏拘急。外臺虛勞裏急篇。可參看矣。按此條。承前章以辨小便不利之由也。蓋茯苓甘草湯證也。

# 傷寒論集成卷四

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

## 辨太陽病脈證并治下第三

〔百三十五〕問曰。病有結胸。有藏結。其狀何如。答曰。按之痛。寸脈浮。關脈沈。名曰結胸也。

〔百三十六〕何謂藏結。答曰。如結胸狀。飲食如故。時時下利。寸脈浮。關脈小細沈緊。名曰藏結。舌上白胎滑者。難治。

〔百三十七〕藏結無陽證。不往來寒熱。其人反靜。舌上胎滑者。不可攻也。右三條。係王叔和敷演之文。劉棟以爲後人之言。是也。

〔百二十八〕病發於陽而反下之。熱入因作結胸。病發於陰而反下之。因作痞也。所以成結胸者。以下之太早故也。成本全書。無痞也之也。字。痞。病源作否。

病源曰。結胸者。謂熱毒結聚於心胸也。此由病發於陽而早下之。熱氣乘虛而否結不散也。

錢潢曰。舊注咸謂風傷衛而陽邪陷入爲結胸。寒傷營而陰邪陷入爲痞。此誠千古之誤。詳究論中。中風亦有成心下痞者。傷寒亦有成結胸者。更有中風傷寒并見而祇作心下痞者。有但傷寒而心下滿硬痛者。但滿而不痛者爲痞。參互交錯。未便分屬兩篇。故別編一卷。位置於上中二卷之後。以見風寒均有此二證之意。

又曰。發於陽者。邪在陽經之謂也。發於陰者。邪在陰經之謂也。反下之者。不當下而下也。兩反下其義迥別。一則以表邪未解。而曰反下。一則以始終不可下。而曰反下也。因者。因誤下之虛也。

正珍曰。發陰發陽。詳見上篇。陽言結胸。陰言痞。互文言之。如論語死生有命。富貴在天。禮記夫

爲人子者。出必告。反必面。皆互文也。其實陰陽皆有痞。有結胸也。言熱入而不言寒入者。以

結胸得諸外來之邪。痞得諸心氣之結也。言所以成結胸。而不言所以成痞者。以結胸多得諸下早。而痞則不必然也。其所謂病發於陰而反下之。因作痞者。如太陰篇首條是也。成結胸之成字。亦與作字爲字同。但古文不多有。晉書韋謏曰。官家養蠶化成簇。蠶生不止自成繭。繭

雖疏曰。若遷都旋軫之日。中興五陵。即復繭成蠶繭。

痞。否也。氣結

而否塞之名。周易否卦云。天地不交而萬物不通。又云。天地不交否。痞名蓋取諸此矣。釋名云。痞。否也。氣否結也。病源云。否者。心下滿也。字彙云。痞。氣隔不通也。皆是也。故無脹無痛。但心下妨悶而不知饑。亦不欲

食也。非若結胸之有物。而且鞭且痛也。按痞與結胸。同是心下之病。惟由其氣結與水結。以別之名。已成無已方有執諸人。皆以胸中心下。爲之分別。非也。蓋結胸之爲結。正唯在心下。而非通全腹而然。故不得名曰結腹。而隸諸胸部。以命結胸已。亦猶以胃隸腸。稱云胃中有燥屎。假立之名。以別彼痞耳。如三陰三陽中風傷寒諸名。可以見矣。再按。凡傷寒不可下而反下之。熱入因作結胸者。是理之常。固不足怪也。其邪自解於外而內更生痞病者。何也。蓋以表邪有盛不盛。下劑有峻不峻。今邪自解於外。而內更生痞病者。以邪氣本微。而攻之太峻也。從來寒熱之證。一朝變爲虛寒者。皆由此而來。成無已諸人。不會此義。妄謂痞亦表邪入裏所結。殊不知仲景氏以熱入二字。冠之結胸而不冠痞者。自有深意存焉。果痞之從外邪而來乎。所謂傷寒汗出解之後。心下痞鞭者。其謂之何乎。

〔百二十九〕結胸者。項亦強。如柔痞狀。下之則和。宜大陷胸丸。

方有執曰。王氏曰。痞當作瘕。

正珍曰。結胸證。心下鞭滿而痛。甚則背反張。如瘕狀。項亦強。故曰亦也。金匱曰。剛瘕爲病。胸滿口噤。臥不著席。脚攣急必齧齒。可與大承氣湯。由此考之。本節柔瘕之柔。當作剛。凡結胸有熱者。宜用大陷胸湯下之。



其無熱者宜用大陷胸丸下之。論云：過經續語者，以有熱也。當以湯下之，而醫以丸藥下之，非其治也。中經續語，承氣傷陰。可見丸方本爲無熱者而設矣。

大陷胸丸方

大黃半斤

葶藶子半升

芒消半升

杏仁半升去皮尖熱黑

右四味，搗篩二味，內杏仁芒消，合研如脂和散。取如彈丸一枚，別搗甘遂末一錢匕，白蜜二合，水二升，煮取一升，溫頓服之。一宿乃下，如不下，更服，取下爲效。禁如藥法。

劉棟曰：丸方，疑後人所加也。大陷胸丸本以大陷胸湯爲丸者也。猶如理中湯四逆散之例也。

正珍曰：劉棟解爲是。按千金方四十八，三宿食不消，大便難，練中丸藥，味與此大陷胸丸同。疑後人摘以載于茲，亦未可知矣。又按杏仁皆以枚箇言，而今云半升，亦非仲景方法之徵。

〔百四十〕結胸證，其脈浮大者，不可下，下之則死。

金鑑曰：其脈浮大，是尙在表，知熱結未實，故不可下。若誤下之，未盡之表邪，復乘虛入裏，誤而又誤，結而又結，病熱彌深，正氣愈虛，則死矣。正珍曰：結胸之病，不可不下，但其脈浮大者，猶爲表未解，可與小陷胸湯以和解之。按錢潢以浮大爲裏虛之脈，甚非也。凡脈大者，皆邪熱熾。

盛之診。兼浮爲表實。兼沈爲裏實。如上篇白虎加人參湯其脈洪大可見矣。若夫證象陽旦條所謂浮則爲風。大則爲虛者。則叔和妄誕。豈足論乎。若但浮而無力者。卽是芤脈。爲虛寒之候。不可與大靛也。

〔百四十一〕結胸證悉具。煩躁者亦死。

喻昌曰。亦字。承上見結胸證全具。更加煩躁。卽不下亦主死也。

正珍曰。悉具者。表證皆去。而脈不浮大。心下鞭滿而痛。其脈沈緊者。是也。結胸原非輕證。加以煩躁。不死何俟。

〔百四十二〕太陽病。脈浮而動數。浮則爲風。數則爲熱。動則爲痛。數則爲虛。頭痛發熱微盜汗出。而反惡寒者。表未解也。醫反下之。動數變遲。膈內拒痛。胃中空虛。客氣動膈。短氣煩躁。心中懊憹。陽氣內陷。心下因鞭。則爲結胸。大陷胸湯主之。若不結胸。但頭汗出。餘處無汗。刺頸而還。小便不利。身必發黃也。也字。依成本補之。全書。無餘處之虛字。非。

浮則爲風云云。三十三字。王叔和注文。誤入者也。

按盜汗二字。恐六朝以盜之名。非漢時語。內經中亦未

有之。六元正紀大論。則謂之癰汗。

膈內拒痛云云。二十字。甘草瀉心湯及梔子豉湯條文。

錯亂入于此者也。今并刪之。朱震亨嘗評此章云。曰胃中空虛。曰短氣煩躁。曰脈浮。此湯不可輕用。可謂有所見矣。程應旂改心下作心中。爲胸字見惑也。刺頸而還者。其汗之出也。以頸爲分界。而頸以下。則無有。

汗之謂矣。劑乃質劑之劑。假以譬頭之與身。各分其證焉。猶觴字假爲飲酒于人之義。耳目二字。假爲聞見之義。及本論以清字爲更衣之義也。正字通劑字註云。又券書。周禮司市以質劑。結信止訟。註。兩書一札。同而別之。長曰質。短曰劑。若今俗合同。各分其半也。

周禮十五卷。司徒教官之職。凡賣買者。質劑焉。大市以質。小市以劑。

由此觀之。廣韻注。劑爲分劑。亦轉而用之也。格致鏡源身體篇。引釋名云。濟。濟也。腸端之所限劑也。是也。方有執程應旂二子。不會此義。妄改作躋頸而還。非矣。成無已據素靈經絡之理解之。亦非矣。陽氣者。謂在表之邪氣。陽表也。氣邪也。本篇文蛤散條云。病在陽。應以汗解之。上篇各半湯條云。陰陽俱虛。皆以表稱陽者也。非所謂亡陽之陽也。中篇小青龍湯條云。心下有水氣。本篇甘草瀉心湯條云。客氣上逆。皆於邪。稱氣者也。非所謂胃氣之氣也。言太陽病。脈浮而動數者。宜發其汗。而醫反下之。浮數變爲沈遲者。此爲表邪乘虛而內陷。必使人心下鞭滿而痛。名爲結胸。所以名之結胸者。以水氣爲邪所團結。而在於胸脇間也。宜以大陷胸湯。陷下以平之。若下後不結胸。但頭汗出。劑頸而還。小便不利者。此爲熱不得發。越壅悶在裏。身必發黃也。乃茵陳蒿湯證。其詳見陽明篇。

大陷胸湯方

大黃

六兩 去皮

芒消 一升

甘遂 一錢

右三味以水六升先煮大黃取二升去滓內芒消煮一兩沸內甘遂末溫服一升得快利止後服

成本全書并脫一錢比之七字當補之

〔百四十二〕傷寒六七日結胸熱實脈沉而緊心下痛按之石硬者大陷胸湯主之

玉函外臺石字上有如字

此承前條論其不因經誤下自作結胸者也蓋下之太早而作結胸者事之常其不因下早而結胸者事之變

張乘善既有此說

如十棗湯證亦復然

熱實者有熱而實之謂對寒實言之實乃胃家實之實大便不通是也〔百四十四〕傷寒十餘日熱結在裏復往來寒熱者與大柴胡湯但結胸

無大熱者此爲水結在胸脇也但頭微汗出者大陷胸湯主之

錢潢曰若但結胸而身無大熱其邪不在表可知尙論言後人誤謂結胸之外復有水結胸一證又謂下文支結乃支飲結聚亦別一症殊爲可哂愚謂若水飲必不與熱邪並結則大陷胸方中何必有逐水利飲之甘遂乎可謂一言破惑

希哲曰傷寒十餘日則知邪不在太陽熱結在裏則陽明證見可知復往來寒熱則少陽經邪未解可知此乃陽明少陽合病與大柴胡湯兼治二者也

正珍曰。復。反也。詳見前第九十一條及九十二條。但頭微汗出者。六字。發黃條內之文。誤入。當刪之。無大熱者。身無翕翕熱之謂。詳見前六十一條。此爲水結在胸膈也。八字。釋所以名結胸之義。以示其病因。胸膈二字。該膈上膈下而言也。注家成無已諸人。皆謂此是爲一種水結胸矣。果爾。其治亦應用別方。豈均以一大陷胸療之乎。惟喻昌錢潢獨得古意。熱結在裏者。謂表裏俱熱。煩渴引飲。宜與本篇白虎加人參湯條互參攷焉。凡熱結在裏者。宜不往來寒熱。而今反往來寒熱。故曰復也。〔百四十五〕太陽病。重發汗而復下之。不大便五六日。舌上燥而渴。日晡所小有潮熱。從心下至腹脹滿而痛。不可近者。大陷胸湯主之。

成無已曰。日晡潮熱者。屬胃。

方有執曰。晡。日加申時也。

錢潢曰。日晡。未申之時也。所者。即書云多歷年所之所也。

正珍曰。此承上條。見熱結在裏之外證也。復。又也。少當作小。此因發汗後又下之。表邪內陷。從實而化爲結胸。兼有陽明白虎承氣之二證者也。三者中。結胸尤急。故攻之以陷胸。則餘證從而解矣。辟諸漢王一封楚王。而海外諸蠻。皆望風傾服。不亦愉快哉。

〔百四十六〕小結胸病。正在心下。按之則痛。脈浮滑者。小陷胸湯主之。

病字。玉函千金翼俱作者。宜從而改之。按結胸證。雖有輕重之異。俱不可不下。但其脈浮滑。故與小陷胸。以和解之也。蓋結胸者。不啻心下。併及兩脇下。所謂水結在胸脇。及婦人中風。胸脇下滿。如結胸狀。可見矣。此則不然。正唯在心下。且不按則不痛。實結胸之小者已。故名曰小結胸也。小結胸與痞。其證極相似矣。按之則痛。不欲近手者。小結胸也。按之則痛。雖痛其人反覺小安。欲得按者。痞也。何者。結胸雖小。其因屬水也。痞雖大。其本屬氣。故也。賴穆惟忠。俱謂按之而痛。爲小結胸。雖按不痛。爲痞。可謂千古大謬矣。凡病人心下硬而滿者。豈有按之不痛者邪。其或有之。亦十之一二已。要之彼徒求諸文字上。而不驗之於病人之實。以故往往致此鹵莽。昔者王燕著外臺秘要。及其引傷寒論。廢六經而不取一逐日數多少。以爲之次第。舉小建中。以爲開卷第一方。發表攻裏。前後錯雜。陽病陰病。冠履倒置。要亦徒求諸文字上。而不驗之於病人之實。故而已矣。世之腐儒村學究。喜著醫書。每每有此弊。惟忠雖豪傑之士。不事治療。徒求文字上。故如其所著名數解辨正。謬妄不置而足也。夫醫雖小伎。人命所係。可不慎乎。再按王肯堂以前條兼胃實之證。爲大結胸。以唯在心下。爲小結胸。非矣。

### 小陷胸湯方

黃連 一兩

半夏 半升

栝樓實 大者一枚

右三味以水六升。先煮栝樓。取三升。去滓。內諸藥。煮取二升。去滓。分溫三服。玉函。作黃連二兩。栝樓實一枚。成本。作一箇。非。

王肯堂曰。栝樓實。連殼剉用。去殼無功。

〔百四十七〕太陽病二三日。不能臥。但欲起。心下必結。脈微弱者。此本有寒分也。反下之。若利止。必作結胸。未止者。四日復下之。此作協熱利也。

此條係王叔和敷演之文。劉棟以爲仲景氏之言。可謂暗乎文辭矣。

〔百四十八〕太陽病下之。其脈促。不結胸者。此爲欲解也。脈浮者。必結胸也。脈緊者。必咽痛。脈弦者。必兩脇拘急。脈細者。頭痛未止。脈沈緊者。必欲嘔。脈沈滑者。協熱利。脈浮滑者。必下血。

此條亦叔和所攙。凡由脈以推證。非仲景氏之法也。按外臺以太陽病至解也十七字。接後百五十八條。若心下滿而鞭痛上以爲一章。非也。〔百四十九〕病在陽。應以汗解之。反以冷水。發之。若灌之。其熱被劫不得去。彌更益煩。肉上粟起。意欲飲水。反不渴者。服文蛤散。若不差者。與五苓散。外臺。肉上。作皮上。飲水下。有而散字。玉函。彌更。作煩更。俱是也。

方有執曰。在陽。謂表未罷。熱未除也。灌。噴之也。灌。既之也。

金鑑曰。病在陽。謂病發於陽而身熱也。此應以汗解之。而反以冷水。灌

之權之。則身熱雖被劫而暫却。然終不得去。故熱煩益甚也。水寒外束。膚熱乍凝。故肉生膚粟。熱入不深。故意欲飲水。反不甚渴也。又曰。誤。心良切。

懶穆曰。嘔與誤同。說文。含水噴也。權既也。劫。即迫脅之意。以威力恐人。謂之迫脅。字與曰。劫。訖業切。說文。欲去以力脅止。曰劫。一曰。以力去曰劫。王肅。強取也。

正珍曰。此條亦外攻水逆之病。邪氣爲水寒所束。不能發外。鬱遏皮肉。消耗津液。故須與益煩。蓋非表邪熾盛之所致。是以不用驅散之劑。與文蛤潤其中也。非攻邪之主劑也。故云服云與。而不云主之。蓋權用之方已。陽謂表也。服文蛤散不差。與五苓散者。猶與小建中湯不差。與小柴胡湯。一百三條先與小柴胡湯不解。與大柴胡湯。一百八條例也。按文蛤證。似渴而不能飲。五苓證。渴而能飲。文蛤證。小便能利。五苓證。小便不利。其異可見矣。

### 文蛤散方

文蛤 玉面

右一味爲散。以沸湯和。一方寸匕服。湯用五合。一方寸匕。或本。作一錢匕。玉面金匱。千金翼外臺。并與宋版同。

方有執曰。文蛤。即海蛤之有文理者。



錢潢曰。文蛤。似蛤而背有紫斑。卽今吳中所食之花蛤。俗誤呼爲蒼蠶。或昌蛾者。是也。夢溪筆談云。卽今吳人所食花蛤也。

清王子接古方選注曰。文蛤取用紫斑紋者。得陰陽之氣。若黯色者。餌之。令人狂走赴水。

正珍曰。文蛤散方。本在寒實結胸條後。今移入于此。金鑑云。文蛤卽五倍子也。非也。按五倍子。又稱文蛤。殊是後世俗間之寓名已。論中諸藥。悉用正名。未有以寓名者。可見文蛤。便是有文之蛤。非五倍子之文蛤矣。若夫醋稱苦酒。人尿曰白通。乃是古之別名。猶曰稱太陽。月曰太陰。非俗間寓名也。

〔百五十一〕寒實結胸。無熱證者。與三物小陷胸湯白散亦可服。玉函。作與三。板注亦云。一云。與三物小白散。

金鑑曰。三物小陷胸湯。當是三物白散。溫而能攻。與寒實之理相屬。小陷胸湯。乃栝蒌黃連。皆性寒之品。豈可以治寒實結胸之證乎。亦可服三字。亦衍文也。

正珍曰。此條舊本。合前條爲一章。非也。今別爲二條。陷胸湯亦可服六字。衍文。宜從玉函及宋板注刪之。寒實對熱實而言。所謂無熱證。是也。非有寒證也。如本篇婦人中風。熱入血室條。熱除而身涼。亦唯謂無熱。

耳非有寒涼也。

左傳傳四年。楚子使與齊師言曰。君處北海。寡人處南海。杜注曰。楚界猶未至南海。因齊處北海。益稱所近。○正珍曰。僞泉寒火之寒。亦言不熱。

已。抱朴子。論仙卷曰。水性純冷。而有溫實。乃胃家實之實。大便不通是也。言結

谷之傷泉。火體宜燥。而有蕭丘之寒。始。實。乃胃家實之實。大便不通是也。言結

胸無熱證而不大便者。宜與白散攻下。若有熱者。不宜丸散。宜以湯下

之。按此證不同。大陷胸丸證者。唯大便不通為異。其無熱證則一也。方

有執云。寒以飲言。非也。劉棟云。寒實邪實也。亦非矣。

白散方

桔梗

三分

巴豆

一分

去皮心

貝母

三分

熟黑研如脂

右三味為散。內巴豆更於臼中杵之。以白飲和服。強人半錢。七歲者減之。

病在膈上必吐。在膈下必利。不利進熱粥一杯。利過不止。進冷粥一杯。身

熱皮粟不解。欲引衣自覆。若以水澀之。洗之。益令熱。却不得出。當汗而不

汗。則煩。假令汗出已。腹中痛。與芍藥三兩如上法。

成本。右字下。有伴字。非。為散。作為末。無半錢匕之匕。

字。並非。但醫統正脈所收之本。作為散。與宋板同。

方名當作三物小白散。身熱皮粟以下。後人攪入。宜刪。半錢七謂一錢

七之半也。千金方云。錢匕者。以大錢上。全抄之。若云半錢匕者。則是一錢抄取邊一邊。並用五錢錢也。宋洪遵泉志云。前漢武帝紀曰。元狩五年。罷牛兩錢。行五錢錢。

利過不止。進冷粥一杯者。冷物能解毒故也。帝紀載。帝少。而聰慧。嘗因朝會。目梁冀曰。此奴屬將軍也。冀深惡之。使左右置毒于煮餅。以進帝。帝少。甚。召李固。固入前問。帝曰。食煮餅腹悶。得水尚可活。冀曰。恐吐不可飲水。詔未絕而崩。

遺續優紀。亦載朱子中為毒。煩瀉身黑欲死。多飲新水。咽飯而解之事。是皆與進冷粥之義同矣。

按中西惟忠服法辨云。白散十棗四逆之三方。有強人羸者之辨。所謂強人羸者。當就病而辨。不宜以常論也。大凡人之於常。各有其稟。稟有厚薄強弱之差。不可得而一也。及其受病也。未必不失其常。既已失其常。則向之強人。今反爲羸者。而向之羸者。猶保其強。故曰。強人羸者。當就病而辨。不宜以常論也。病有輕重緩急。藥有大毒小毒。劑有大小多少。參伍之而察其機。商量之而適其宜。是醫之術也。惟忠此言甚非。不可從矣。何也。有強人得病而爲羸者。豈有羸者得病而反爲強人之理哉。矧強人羸者之稱。皆指其平常之辭。而絕非言病之輕重緩急乎。有人于茲。平素羸弱。當其得病也。反有強壯之勢者。謂之實則可也。稱爲強人。豈理也哉。

〔百五十一〕太陽與少陽併病。頭項強痛。或眩冒時。如結胸心下痞鞭者。當刺大椎第一間肺俞。慎不可發汗。發汗則譫語。脈弦五六日。譫語不止。當刺期門。

此條王叔和敷演之文。非仲景氏之言矣。

〔百五十二〕婦人中風。發熱惡寒。經水適來。得之七八日。熱除而脈遲身涼。胸脇下滿如結胸狀。譫語者。此爲熱入血室也。當刺期門。隨其實而取之。

或本。取作瀉。玉函。經。俱同來板。

本草綱目。時珍曰。女子陰類也。以血爲主。其血上應太陰。下應海潮。月有盈虧。潮有朝夕。月事一月一行。與之相符。故謂之月水。月信。月經。經者。常也。有常軌也。

甲乙經曰。期門。肝募也。在第二肋端。不容傍一寸五分。上直兩乳。

正珍曰。經水適來四字。當在得之七八日之下。血室謂胞。卽子宮也。

賓類經。二焦命門辨曰。子宮者。卽子宮也。各名子宮。蓋家以衝任之脈盛於此。則月事以時下。故名之曰血室。○明程式微曰。子宮。卽血室也。金匱云。婦人

少腹滿如敦狀。小便微難而不渴。生後者。此爲水與血俱結在血室也。

可見血室。果是子宮矣。不則何以有少腹滿。小便微難之理乎。成無已

方有執喻昌之徒。皆以爲衝脈之異名。錢潢以爲衝任二脈。希哲以爲

血分。皆非也。何者。經絡之說。仲景氏固所不據。且下條明言。此爲熱入

血室。其血必結。其指子宮而言者。益可以無疑焉。凡云某結者。皆就其

地位言之。而無一以經絡者。所謂熱結膀胱。並本邪結在胸中。或陰冷結在

膀胱。上同熱結在裏。水結在胸脇。並本之類。是也。劉棟云。熱入血室者。法言

也。是其意似不深拘者。不知所謂胃中有燥屎。而用大小承氣。亦概爲

法言歟。不思之甚矣。經水適來者。言經水不期而來也。字典。適字。注。引

正韻云。適然。猶偶然也。書康誥。乃惟眚災適爾。注。適。偶也。按此證熱雖

除。脈雖遲。然有譏語而不識湯藥者。以經水下則血室之熱。從而自解。

也。前第四十七條云。太陽病。脈浮緊。發熱身無汗。自衄者愈。又百十一條云。太陽病不解。熱結膀胱。其人如狂。血自下。下者愈。後百五十四條云。婦人傷寒。經水適來。晝日明了。暮則譫語。如見鬼狀者。此爲熱入血室。無犯胃氣及上二焦。必自愈。可見血下則熱隨血自解。不復假湯藥而愈矣。希哲劉棟。皆謂此證亦應用柴胡湯。非也。刺期門者。以洩胸脇下滿之邪也。猶刺風池。風府。及大椎。肺俞。以泄太陽病頭項強痛之邪。風池風府刺法。見上篇。大椎肺俞刺法。見本篇。實者。指邪實而言也。成無已及諸注家皆云。期門

者。肝之募。肝主血。故刺之以瀉血室之熱。果爾。以下二條。及桃核承氣。抵當諸條。何不及刺法乎。可謂臆造矣。再按。婦人中風病中。經水適來。熱除而脈遲身涼。胸脇下滿如結胸。其人譫語者。蓋邪氣陷入乎血室。而震蕩其血故也。成無已云。因經水適來。血室空虛。邪氣乘虛而入。非也。苟經水既盡。而血室空虛。則邪氣縱乘其虛而入。將何因。令人譫語。且胸脇下滿哉。莊周不言乎。方舟而濟于河。有虛船來觸舟。雖有褊心之人不怒。是言也。可以正無已之誤矣。又按陽明篇。亦有熱入血室條。宜參考焉。

（百五十二）婦人中風。七八日。續得寒熱。發作有時。經水適斷者。此爲熱入血室。其血必結。故使如瘧狀。發作有時。小柴胡湯主之。

張志聰曰。經水適斷四字。當在七八日之下。

方有執曰。寒熱。以往來寒熱言。

正珍曰。前條及後條。論太陽病中經水適來者。此條論月事中得病。經水未可斷而斷者也。其因雖不同。其熱入血室則一矣。惡寒發熱而如瘧狀者。桂枝麻黃各半湯。桂枝二麻黃一湯等之證也。寒熱往來而如瘧狀者。小柴胡湯之證也。如瘧狀者。謂發作有時也。此條及下條。并無胸脇下滿。故不刺期門也。

〔百五十四〕婦人傷寒發熱。經水適來。晝日明了。暮則譫語。如見鬼狀者。此爲熱入血室。無犯胃氣。以上二焦必自愈。

程林金匱直解曰。上章以「往來寒熱如瘧」故用小柴胡以解其邪。下章以胸脇下滿如結胸狀。故刺期門以瀉其實。此章則無上下二證。似待其經行血去。邪熱得以隨血出而解也。

方有執曰。無與毋通。毋者。禁止之詞。犯胃氣以禁下言。

發秘曰。晝日明了。暮則譫語者。以邪氣入于陰分。故同氣相得而發動也。

劉稼曰。有血之證。往來寒熱。經水適斷來。譫語如見鬼狀者。以外證爲主。而以血證爲客也。小腹硬滿。小便自利。如狂發狂者。以血證爲主。而

以餘證爲客也。故大小柴胡二湯者。以熱爲本根。桃核承氣湯抵當湯。以血爲本根。此血證諸語發狂。疑似之別也。

正珍曰。此條程林所解。千古確論。實先輩之所未嘗發也。蓋此條與刺期門條。俱是太陽病中。其邪陷血室而震蕩其血之所致。穢氣上而乘心。故令人讖語如見鬼狀也。雖然。以經水適來。則血室之熱。隨血出而解。故不及湯劑也。無犯胃氣者。以讖語見鬼之似承氣證辨之。期門屬上焦之穴。柴胡治上焦之方。故謂之上二焦也。柴胡證云。胸脇苦悶。心煩喜嘔。可見柴胡爲治上焦之方也。陽明篇云。食穀欲嘔者。屬陽明也。吳茱萸湯主之。得湯反劇者。屬上焦也。可見柴胡之嘔。乃爲屬上焦之嘔也。期門刺法與小柴胡湯。并非攻擊之術。而謂之犯者。以其攻無辜也。按金鑑以前之二章。爲自風得之。以此章。爲自寒得之。殊不知風寒本一氣。合而不離矣。成無已犯上焦爲發汗。犯中焦爲刺期門。方有執程應旂劉棟。上二焦爲禁汗吐。王肯堂爲發汗。諸說皆非。一掃除之可也。

〔百五十五〕傷寒六七日。發熱微惡寒。支節煩疼。微嘔。心下支結。外證未去者。柴胡桂枝湯主之。玉函。支節作肢節。成本柴胡桂枝湯。作柴胡加桂枝湯。非。

金鑑曰。是太陽之邪傳少陽也。故取桂枝之半。以散太陽未盡之邪。取

柴胡之半。以散少陽嘔結之病。而不名桂枝柴胡湯者。以太陽外證雖未去。而病機已見於少陽裏也。故以柴胡冠桂枝之上。意在解少陽爲主。而散太陽爲兼也。

柯琴曰。仲景書中。最重柴桂二方。故於六經病外。獨有桂枝證柴胡證之稱。見二方之任重。不拘於經也。正珍按。仲景氏。稱柴胡證桂枝證者。一寓重古方之意。一示六經之假設焉。方有執曰。支節。四肢百節也。

王肯堂曰。支節。猶云肢節。古字通也。支結。謂支撐而結。南陽云。外證未解。心下妨悶者。非痞也。謂之支結。

程應旂曰。結卽結胸之結。支者。偏也。撐也。若有物撐攔在胸脇間。較之痞滿。實爲有形。較之結胸。遜其沈鞭。卽下條之微結也。微言其勢。支言其狀。證非純裏可知。

錢潢曰。發熱微惡寒。支節煩疼。表證未解也。微嘔而心下支結。則邪犯胸膈矣。支結。成氏以散字訓之。固誤。而方氏以支飲搏聚爲解。亦未中窾。尙論謂邪結心下偏旁。而不中正。若果如其說。則仲景不謂之心下。諸說之中。當支撐之解爲近是。

正珍曰。味外證未去四字。是卽太陽少陽併病也。故不舉太陽少陽之名。冠以傷寒已。劉棟以爲合病。非也。煩疼。謂疼之甚。與煩渴煩驚之煩。



同。與微嘔之微。反對爲文也。支結。乃痞鞭之輕者。支撐之解得之。程應旂云。較之痞滿。實爲有形。非也。凡心下之病。其鞭滿而痛。不可近者。此爲結胸。其鞭滿而不痛。按之則痛。不欲按之者。此爲小結胸。其鞭滿而不痛。按之則痛。雖痛其人却欲得按者。此爲痞。其鞭滿甚微。按之不痛者。此爲支結。支結。乃妨悶之意耳。要之大小結胸與痞鞭支結。俱是一證輕重已。

柴胡桂枝湯方

桂枝 去皮

黃芩 一兩

人參 一兩

甘草 一兩

半夏 二合

芍藥 一兩

大棗 六枚

生薑 一兩

柴胡 四兩

右九味。以水七升。煮取三升。去滓。溫服一升。本云人參湯。作如桂枝法。加半夏柴胡黃芩。復如柴胡法。今用人參作半劑。依玉函成本者之。桂枝下。當有一兩半二字。

本云以下二十九字。玉函成本俱無之。全係後人攙入。宜刪。蓋此方合柴胡桂枝二湯。以爲一方者已。非人參湯變方也。

〔百五十六〕傷寒五六日。已發汗而復下之。胸脇滿微結。小便不利。渴而不嘔。但頭汗出。往來寒熱。心煩者。此爲未解也。柴胡桂枝乾薑湯主之。成無已曰。傷寒五六日。已經汗下之後。則邪當解。今胸脇滿微結。往來寒熱者。即邪猶在半表半裏之間。爲未解也。小便不利而渴者。汗下後

亡津液內燥也。若熱消津液。令小便不利而渴者。其人必嘔。今渴而不嘔。知非裏熱也。

正珍曰。胸脇滿微結。卽是胸脇苦滿。結謂鬱結之結。病人自覺者已。非醫之所按而得也。如梔子豉湯條。心中結痛之結亦然。

按此條所說全係小柴胡證。否者一頭汗已。然其他證候無復可疑者。則何更以餘藥處之。意者柴胡桂枝乾薑湯。蓋叔和因小柴胡加減之法而所制。決非仲景氏之方。何以言之。柴胡方後叔和加減法云。不嘔者去半夏。今此方因不嘔而不用半夏。又云。渴者加栝樓根。今此方因渴而用之。又云。脇下痞鞭加牡蠣。今此方因胸脇滿微結而用之。又云。外有微熱者。去人參加桂枝。今此方因頭汗出與爲未解二句。不用人參而用桂枝。由是考之。此方必叔和所制。况方名亦不合他方之例乎。一掃除之可也。

正珍曰。考金匱外臺。此方仲景治瘧病多寒者之方。而今用之傷寒渴而心煩小便不利者。決非仲景氏也。

柴胡桂枝乾薑湯方

柴胡 半斤

桂枝 二兩

乾薑 二兩

栝樓根 四兩

黃芩 二兩

牡蠣 二兩

甘草 二兩

右七味以水一斗二升煮取六升去滓再煎取三升溫服一升日三服初服微煩復服汗出便愈。

〔百五十七〕傷寒五六日頭汗出微惡寒手足冷心下滿口不欲食大便難脈細者此爲陽微結必有表復有裏也脈沈亦有裏也汗出爲陽微假令純陰結不得復有外證悉入在裏此爲半在裏半在外也脈雖沈緊不得爲少陰病所以然者陰不得有汗今頭汗出故知非少陰病也可與小柴胡湯設不了了者得屎而解。

此叔和數演上條者劉棟以爲上二條之注文是也按此條雖謂少陰不得有汗考之少陰篇有少陰病脈微細沈但欲臥汗出不煩自欲吐者有少陰病下利脈微細嘔而汗出者要皆叔和言其自言而自反如此可笑之甚。

〔百五十八〕傷寒五六日嘔而發熱者柴胡湯證具而以他藥下之柴胡證仍在者復與柴胡湯此雖已下之不爲逆必蒸蒸而振却發熱汗出而解若心下滿而鞭痛者此爲結胸也大陷胸湯主之但滿而不痛者此爲痞柴胡不中與之宜半夏瀉心湯。

成無已曰嘔而發熱邪在半表半裏之證是爲柴胡證具。

錢潢曰他藥者即承氣之類非有別藥也因此證唯柴胡爲對證之藥。

彼不當用者。卽指爲他藥也。蒸蒸身熱汗欲出之狀也。振者振振然動搖之兒。卽寒戰也。言膚體蒸蒸然却發熱汗出而邪氣解矣。其所以戰而後汗者。以下後正氣已虛難勝於邪。故必戰而後汗也。

魏荔彤曰。結胸不言柴胡湯不中與。痞證乃言柴胡不中與者。何也。結胸證顯而易認。痞證甚微難認。且大類於前條所言支結。故明示之。正珍曰。傷寒五六日。至汗出而解。既見前第一百六條。若心下滿以下。亦是少陽病。誤下後之變證。亦宜接以他藥下之句下而看。蓋結胸者。內有水氣爲邪熱所團結。故鞭滿而痛。是以用甘遂破飲之藥。痞者。心氣鬱結而不能交通也。故唯滿而不痛。無水氣故也。所以用芩連行氣之劑矣。按陷胸之名。取諸陷下胸邪。瀉心之號。取諸輪寫心氣。瀉與寫。借音通用。成無已方有執諸人。皆云。瀉心瀉去心下痞之謂。一說又云。瀉心火之義。皆非正義也。所謂瀉心。乃輪寫心氣之鬱結之義。以故瀉心諸方。皆以芩連苦味者爲主。周禮所謂以苦養氣是也。再按。他藥者。蓋指攻下之丸藥而言。凡傷寒發熱者。雖有下證。唯宜以湯下。而不可以丸下之。觀調胃承氣。柴胡加芒消諸論。可見矣。今乃以丸攻之。是以謂之他藥。他猶邪。不對證之謂也。揚子法言。問道篇曰。適堯舜文王者。爲正道。非堯舜文王者。爲他道。君子正而不他。其義可見矣。他藥字。又

見禹餘糧湯條。

半夏瀉心湯方

半夏半升

黃芩

乾薑

人參

甘草炙各二兩

黃連一斤

大棗十二枚

右七味以水一斗煮取六升去滓再煎取三升溫服一升日三服須大陷胸湯者方用前第二法再煎。成本。作再煮。非。

〔百五十九〕太陽少陽併病而反下之成結胸心下鞭下利不止水漿不下其人心煩人字下。玉函脈經。千金。俱有必字。是也。

此條言太陽少陽併病當先解其外而反下之則熱邪乘虛而入因成結胸也大抵結胸之證大便多鞭或者不通此之爲常所謂熱實寒實是也故用大黃芒硝以瀉滌之此則下利不止水漿不下而煩亦結胸中之變局也此爲下後腸胃受傷而其裏不得成實但水結在胸膈之所致乃十棗湯證也劉棟以成結胸爲一病以心下鞭下利不止別爲一病以水漿不下其人心煩又別爲一病可謂用意太過反失於鑿矣〔百六十〕脈浮而緊而復下之緊反入裏則作痞按之自濡但氣痞耳王

復作反。

方有執曰濡與軟古字通用復亦反也濡言不鞭不痛而柔緩也痞言

氣隔不通而否塞也。易曰：天地不交，而萬物不生也。

金鑑曰：按之自濡者，謂不鞭不痛，但氣痞不快耳。

正珍曰：此論下後諸證皆解，但覺氣痞不快者也。緊反入裏四字，蓋後人所攙，宜刪之矣。脈浮而緊，是邪在表之診，而反下之，其人有留飲，則成結胸。無飲則作痞。痞者，心氣鬱結之名，故下文承之云：但氣痞耳。若其濡云，但云俱是，示其非結胸，且無水結之辭。對以上論結胸諸章爲言，乃大黃黃連瀉心湯證也。程應旂云：按之自濡，指脈言，非指痞言。駭愚如此。庸詎足論。金鑑云：此甘草瀉心湯證也，亦非也。甘草瀉心條云：心下痞鞭而滿。此云按之自濡，其妄明白。

〔百六十一〕太陽中風，下利嘔逆，表解者，乃可攻之。其人漿漿汗出，發作有時，頭痛，心下痞鞭滿，引脇下痛，乾嘔短氣，汗出不惡寒者，此表解裏未和也。十棗湯主之。下汗出二字，玉函無之。此字下。有爲字。俱是也。

成無已曰：下利嘔逆，裏受邪也。邪在裏者可下，亦須待表解者，乃可攻之。其人漿漿汗出，發作有時，不惡寒者，表已解也。頭痛，心下痞鞭滿，引脇下痛，乾嘔短氣，汗出不惡寒者，邪熱內畜而有伏飲，是裏未和也。與十棗湯下熱逐飲。

喻昌曰：種種下法，多爲胃實而設。胃實者，邪熱燥乾津液，腸胃俱結，不

得不用苦寒以蕩滌之。今證在胸脇而不在胃。則胃中津液未經熱耗而蕩滌腸胃之藥無所取矣。故取蠲飲逐水於胸脇之間。以爲下法也。張志聰曰。頭痛。表證也。然亦有在裏者。如傷寒不大便五六日。頭痛有熱者。與承氣湯。與此節之汗出不惡寒而頭痛爲表解。則凡遇風寒頭痛之證。可審別矣。

正珍曰。下利嘔逆有可攻者。有不可攻者。若其表未解者。四肢厥冷者。脈沈遲微弱者。心下不鞭痛者。并不可攻之。急可溫之。如四逆湯。真武湯。吳茱萸湯。證是也。今此證熱熱然發熱汗出。而發作有時。頭痛心下痞鞭滿。引脇下痛。乾嘔短氣。不惡寒者。此爲其表已解。而裏有水結。亦結胸中之變局也。但以其腸胃不實。反下利嘔逆。故不用大陷胸。只劑逐水之品。以攻下之。此章亦以已經汗下者言之。以何知之。以表解裏未和之文知之也。若惟痞鞭而不痛。嘔逆而不下利。乃屬大柴胡證。見後百七十四條。又按小青龍湯五苓散。皆治表未解。不可攻裏之飲證。十棗湯。治表已解而有痞鞭滿痛之裏未和。桂枝去桂加白朮茯苓湯。治表未解而有心下痞微痛之裏未和也。其鞭滿痛與惟滿微痛亦自有別矣。金鑑辨之甚精。宜參考焉。又按金鑑下利改作不利。發作改作發熱。其說云。豈有上嘔下利。而用十棗湯峻劑攻之之理乎。惟其大便

不利。痞鞭滿痛。始屬裏病。小便不利。嘔逆短氣。始屬飲病。乃可峻攻。發作之作字。當是熱字。若無熱汗出。乃少陰陰邪寒飲。真武湯證也。殊不知此證下利嘔逆而不辟峻攻者。內有勸敵之甚於此者。治法稍緩。則大命先之絕矣。此乃子產以猛之術。素問有故無損之義。仲景氏之所以為仲景氏全在此也。且夫不利二字。只當稱之小便。全論中。未見稱之大便者也。發作有時。固以發熱言之。所謂續得寒熱。發作有時。及煩躁發作有時。皆是也。故冠以熱熱汗出四字。熱熱即熱汗克。桂枝湯條下所謂溫覆令一時許。遍身熱熱者。可見矣。豈得言無熱乎。

### 十棗湯方

芫花

甘遂

大戟

右三味等分。各別搗為散。以水一升半。先煮大棗肥者十枚。取八合。去滓。內藥末。強人服一錢匕。羸人服半錢。溫服之。平旦服。若下少。病不除者。明日更服。加半錢。得快下利。後糜粥自養。右三味。成本全書。作右三味。非。

方執有曰。羸瘦劣也。糜粥取糜爛過熟易化。而有能補之意。

金鑑曰。邪之所棲。其氣必虛。以毒藥攻邪。必傷及脾胃。使無沖和甘緩之品為主宰。則邪氣盡而大命亦隨之矣。故選十棗之大而肥者。以君之一。以顧其脾胃。一以緩其峻毒。得快利後糜粥自養。一以使穀氣內



充一以使邪不復作。

正珍曰。按發秘云。傷寒論有青龍白虎真武而無朱雀。殊爲可疑。不識朱雀卽十棗之異名。以其大棗之赤。立立之名號。外臺第八卷引探師載朱雀湯方。卽是十棗湯。可見朱雀之非逸也。猶理中湯一名人參湯。炙甘草湯一名復脈湯。桂枝湯又稱陽旦湯。小柴胡湯又有黃龍湯之名。按淮南子繆稱訓云。大戟去水。亭歷愈脹。用之不節。乃反爲病。是名人瀕人之所以各異節制也。

〔百六十二〕太陽病。醫發汗。遂發熱惡寒。因復下之。心下痞。表裏俱虛。陰陽氣並竭。無陽則陰獨。復加燒針。胸煩。面色青黃。膚暍者。難治。今色微黃。手足溫者。易愈。

此條王叔和所攙。今刪之。

〔百六十二〕心下痞。按之濡。其脈關上浮者。大黃黃連瀉心湯主之。

千金  
自字。

此與前百六十條。皆表病差後氣痞不快之輕證。病人言我心下痞。而按之則不鞭者也。故以大黃黃連二味。湯漬與之。取其氣薄而不事攻下。其但漬而不煮者。其用之妙。不可思議也。其脈關上浮五字。後人所攙。何者。脈分三部。仲景氏之所不言。况浮而用大黃乎。劉棟以爲衍。是

也。金鑑云。濡字上當有不字。若按之濡。乃虛痞也。補之不暇。豈有用六黃黃連之理乎。果爾。其但漬而弗煮。抑亦何說。

### 大黃黃連瀉心湯方

大黃二兩 黃連一兩

右二味。以麻沸湯二升漬之。須臾絞去滓。分溫再服。

成無已曰。但以麻沸湯漬服者。取其氣薄而泄虛熱。

金鑑曰。觀其以滾沸如麻之湯。漬大黃黃連。須臾絞去滓。僅得其無形之氣。不重其有形之味。是取其氣味俱薄。不大瀉下。

錢潢曰。麻沸湯者。言湯沸時。泛沫之多。其亂如麻也。全生集作麻黃沸湯。謬甚。東醫寶鑑。引入門曰。麻沸湯。即青麻煮汁也。

正珍曰。林億等云。看詳大黃黃連瀉心湯。諸本皆二味。又後附子瀉心湯。用大黃黃連黃芩附子。恐是前方中亦有黃芩。後但加附子也。故後云附子瀉心湯。本云加附子也。殊不知大黃黃連瀉心湯。附子瀉心湯。及半夏瀉心。甘草瀉心。生薑瀉心。金匱瀉心。凡六方。皆仲景以前古方已。林億所解非也。不可從矣。按麻沸字。始出於後漢書華佗傳。後漢書華佗傳云。若疾發於內。鍼藥所不能及者。乃令先以酒服麻沸散。既醉無所覺。因割破腹背。抽割積聚。既而縫合。傳以神膏。四五日創愈。麻沸湯者。謂沸時泛沫如麻子也。如星沸。張協七命。燁燁星沸。虞沸。漢書楊雄傳。雲沸。休奕七讚。金匱玉函。雲沸。雲沸。魚

目沸

唐陸羽。茶經云。其沸如魚目。微有聲。爲一沸。

蟹目沸

千金方。婦人下痢門。應續湯方後云。以水八升煮米。蟹目沸去米。

麻如麻疹

麻臉

堯山堂外記。一朝士麻臉。又見客塵新闢。

之麻。通雅云。麻沙。印本之初出未精者。老學庵

筆記曰。尹少稷。日能誦麻沙版本書一寸。正珍按。謂之麻沙者。彫刻麤

惡。似麻子與沙石相混雜也。可見麻沸之麻。亦指麻子言之。又按增續

韻府。沸字下云。麻沸盜賊。

王莽傳注。言如亂麻沸湯。

〔百六十四〕心下痞而復惡寒汗出者。附子瀉心湯主之。

此乃前條之證而兼陽虛者。非表有熱邪之惡寒汗出。故唯惡寒而不

發熱。瀉心以解痞。附子以復陽也。

附子瀉心湯方

大黃

二兩

黃連

一兩

黃芩

一兩

附子

二枚。炮去皮。破別煮取汁。

右四味。切。三味以麻沸湯二升。漬之。須臾絞去滓。內附子汁。分溫再服。

附子

二枚。玉函成本全書。俱作一枚。

是亦用麻沸湯。義同于前矣。賴穆謂此危急之證。若待其煎煮。則緩不

及事。果爾。四逆湯與某黃湯等證。皆非危急者歟。

〔百六十五〕本以下之。故心下痞。與瀉心湯痞不解。其人渴而口燥煩。小

便不利者。五苓散主之。

此下宋版玉函經千金翼。俱有一方云。忍之一日乃愈九字。全係後人之補入。今依成本刪之。

成無已曰。本因下後成痞。當與瀉心湯除之。若服之痞不解。其人渴而

口燥煩。小便不利者爲水飲內畜。津液不行。非熱痞也。與五苓散發汗散水則愈。

方有執曰。瀉心湯治痞。而痞不解。則非氣聚之痞。可知。

正珍曰。煩字當在渴字上。否則文不成語。前第七十二條云。脈浮數煩渴者。五苓散主之。是也。煩渴謂渴之甚。非謂且煩且渴也。瀉心湯蓋指大黃黃連瀉心湯言之矣。

〔百六十六〕傷寒汗出解之後。胃中不和。心下痞鞭。乾噦食臭。脇下有水氣。腹中雷鳴。下利者。生薑瀉心湯主之。

成無已曰。胃爲津液之主。陽氣之根。大汗出後。外亡津液。胃中空虛。客氣上逆。心下痞鞭。金匱要略曰。中焦氣未和。不能消穀。故令噦。

方有執曰。解。謂大邪退散也。噦。飽食息也。正珍按。此五字。乃說文噦字注也。食臭。賸氣也。正

按。殺音段。邪不成。鳥曰邪。見淮南注。

平人過飽。傷食則噦。食臭。病人初瘥。脾胃尙弱。化輸未強。雖無過飽。猶之過飽而然也。水氣。謂飲也。

錢潢曰。傷寒汗出解之後。言表邪俱從汗出而悉解也。胃中不和以下。皆言裏症未除也。

顏穆曰。乾者。濕之對。言食不出也。

正珍曰。此傷寒瘥後。臟腑尚弱。飲食難消化之所致。胃中不和。故心下痞。嘔乾噦食臭也。脇下有水氣。故腹中雷鳴下利也。胃中脇下互文言之。猶如陽言結胸。陰言痞。其實胃中亦有水。脇下亦不和也。此證有水氣。而不成結胸者。以外邪已解之後也。不用五苓者。以其人不渴小便能利也。故與生薑瀉心。以和其胃氣。則愈。按金鑑曰。其人平素胃虛。兼脇下有水。即不誤下。而餘熱亦乘虛入裏。以致之。殊不知痞嘔之證。惟得之心氣之鬱塞。而固非挾外入之邪者矣。況本文明稱汗出解之後。則知其已無邪矣。已無邪矣。豈得云餘熱乘虛入裏乎。

生薑瀉心湯方

生薑

四兩切

甘草

三兩炙

人參

三兩

乾薑

一兩

黃芩

三兩

半夏

半升洗

黃連

一兩

大棗

十二枚擘

右八味。以水一斗。煮取六升。去滓。再煎取三升。溫服一升。日三服。附子瀉心湯。本云加附子。半夏瀉心湯。甘草瀉心湯。同體別名耳。生薑瀉心湯。本云理中人參黃芩湯。去桂枝。朮加黃連。并瀉肝法。

按附子瀉心湯以下五十字。玉函成本并無之。蓋後人攙入已當刪之。〔百六十七〕傷寒中風。醫反下之。其人下利日數十行。穀不化。腹中雷鳴。心下痞。嘔而滿。乾噦。心煩不得安。醫見心下痞。謂病不盡。復下之。其痞益

甚。此非結熱。但以胃中虛。客氣上逆。故使嘔也。甘草瀉心湯主之。

蓋不和。外臺。作。

水穀不化。心煩。玉函經。俱作而嘔。後。玉函外臺。俱作使之嘔。

穀不化。外臺作水穀不化。其義益明白。言其所飲食之物。客滯於胃中。不能化輸也。差後病篇云。病人脈已解。而日暮微煩。以病新差。人強與穀。脾胃氣尚弱。不能消穀。故令微煩。損穀則愈。金匱云。脈緊頭痛風寒。腹中有宿食不化也。又云。朝食暮吐。暮食朝吐。宿穀不化。名曰胃反。又云。飢食之在心胸間不化。吐復不出。速除下之。合而考之。穀不化乃食物客滯而不消化之義。若其稍重者。必發乾噦食臭。生薑瀉心證是也。先輩諸家。皆以下利清穀爲解。可謂大杜撰矣。何者。清穀之證。裏寒大虛之所致。故急以四逆湯或通脈四逆湯救之。豈可與瀉心苦寒之劑者哉。再按素靈中往往稱清穀爲穀不化。其文雖同。症則不一。謹莫混同焉。此條言毋論中風傷寒。凡表未解者。俱不可下之。而醫反下之。續得下利。一日數十行。飲食客滯。而不化輸。腹中雷鳴。心下痞鞭而滿。乾嘔心煩而不得安。醫見其心下痞。謂病不盡。復下之。其痞益甚。此非下後熱入。因作結胸之痞鞭。但以外邪本微。而攻之太峻也。故雖邪自解。平外。而內使胃氣虛矣。胃氣不健。客氣上逆。心氣因鬱結。使之痞鞭也。客氣。乃上文穀不化之氣。所以謂之客氣者。以其客滯之氣也。與甘草

瀉心。以調胃虛散氣結則愈。按金鑑以傷寒中風至心煩不得安。以爲桂枝人參湯證。似則似矣。然彼則表未解而裏虛頗甚。故其所主在表與下利。而不在痞鞭。是以有桂朮而無芩連。此則表已解。而裏虛不甚。雖虛亦一時之虛。非彼數下之而大虛者之比。故其所主在痞鞭而不在下利。是以有芩連而無桂朮也。金鑑又註客氣上逆云。此乘誤下中虛。而邪氣上逆。陽陷陰凝之痞。蓋指客氣以爲外入之邪也。殊不知痞之爲證。唯得之心氣自結。而非外邪之所使矣。詳已見前百三十八條甘草瀉心湯方。

甘草四兩

黃芩二兩

乾薑三兩

半夏半升

大棗十二枚

黃連一兩

右六味。以水一斗。煮取六升。去滓。再煎取三升。溫服一升。日三服。

按此方無人參。蓋脫落之也。林億既辨之。當補人參三兩四字。金匱千金外臺俱有人參三兩。是也。右六味當作右七味。再按。大黃瀉心。治心氣痞結而不鞭者。附子瀉心。治大黃瀉心證而挾陽虛者。半夏瀉心。治大黃瀉心證而一等重。按之鞭滿者。生薑瀉心。治半夏瀉心證而挾飲食者。甘草瀉心。治生薑瀉心證而挾胃虛者。證方雖各有異。至其外邪已解而中氣自結者則一也。

# 傷寒論集成卷五

日本 京都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

〔百六十八〕傷寒服湯藥下利不止心下痞鞭服瀉心湯已復以他藥下之利不止醫以理中與之利益甚理中者理中焦此利在下焦赤石脂禹餘糧湯主之復不止者當利其小便

已字千金作竟。復不止。玉函作若不止。成本作復利不止。宜從玉函。

已畢也如發汗已脈浮數服柴胡湯已渴者是也成無已云與瀉心湯攻之則痞已此訓已爲愈惟忠亦從之可謂強解也一說又云已止也復反也言服瀉心湯則下利止反以他藥下之故其利不止也然本節利不止之三語皆用止字爲文不啻本節全論悉然豈特就此一句改止爲已耶或曰理中者理中焦此利在下焦十一字係後人攙入當刪之斯言甚是也夫利雖多端均關一胃腑之事豈有此利在下焦而不在中焦之理乎此條言傷寒醫以承氣等湯下之下利不止心下痞鞭頗似大黃黃連瀉心證是以先與瀉心湯服湯已不解故復以他藥下



之。其服瀉心已不解者。彼痞而不鞭滿。此則痞鞭而下利。可見彼以痞而不鞭滿爲主。此以痞鞭而下利爲主。如此者。法當與理中湯也。而反以他藥復下之。其裏愈虛而下利愈不止。於是醫始以理中與之。而其利益甚者。何也。蓋一誤下而利者。雖利未至滑脫。以中虛未甚也。理中湯可得而療也。再三誤下。則虛而又虛。終至滑脫無度。非復理中之所能及。故得之其利益甚也。非有所妨害而然。惟緩不及事也。故用赤石脂禹餘糧。澀滑固脫。庶可以止之也。若服之仍利不止。小便利者。當先利小便。得小便利而下利自止矣。此證始不用附子者。以其得之誤下。而不清穀。且無厥逆脈微之候。與彼真寒自利者。自不同也。再按。既云湯藥。又云他藥。則知他藥者。指巴豆甘遂等丸散之詞。而非復指上文湯藥也。

赤石脂禹餘糧湯方

赤石脂一斤

太乙禹餘糧一斤

右二味。以水六升。煮取二升。去滓。分溫三服。

太乙二字。玉函成本俱無之。衍文。右字。成本作已上。非。又脫分溫二字。

補之。

〔百六十九〕傷寒吐下後發汗。虛煩脈甚微。八九日心下痞鞭。脇下痛。氣上衝咽喉。眩冒。經脈動惕者。久而成瘕。

傷寒或問曰。後當復字。是傳寫之誤。

金鑑曰。八九日心下痞鞭。脇下痛。氣上衝咽喉三句。與上下文義不屬。必是錯簡。注家因此三句。皆蔓衍支離。牽強注釋。不知此證總因汗出過多。大傷津液而成。當用補氣補血益筋壯骨之藥。經年始可愈也。

張志聰曰。痿者。如委棄而不爲我用之意。

正珍曰。八九日以下十五字。蓋十棗湯及瓜蒂散條文。錯亂入此也。當刪之。此證其未成痿者。真武湯主之。至其久而成痿。則爲難治矣。

〔百七十〕傷寒發汗。若吐。若下。解後。心下痞鞭。噫氣不除者。旋復代赭湯主之。玉函。作。作覆。成本玉函。俱下。有石字。

方有執曰。解。謂大邪已散也。心下痞鞭。噫氣不除者。正氣未復。胃氣尚弱。而伏飲爲逆也。

劉棟曰。傷寒發汗。若吐。若下。其證解後。心下痞鞭而噫氣者。生薑瀉心湯之主也。雖服湯。噫氣仍不除者。旋復代赭石湯主之。

正珍曰。不除二字。示其已用生薑瀉心之意也。如九十四條。一百三條。不差之語。可見矣。

旋復代赭湯方

旋復花

二兩

人參

二兩

生薑

五兩

代赭

一兩

甘草

三兩

半夏

半升

大棗

十二枚

右七味以水一斗煮取六升去滓再煎取三升溫服一升日三服

生薑下成  
本全書俱

有切字代糖作代糖石皆是  
右字下成成本全書有伴字非

〔百七十一〕下後不可更行桂枝湯若汗出而喘無大熱者可與麻黃杏  
子甘草石膏湯

張志聰曰此條重出下字疑本汗字

正珍曰此與前六十三條全同惟下後作發汗後爲異已張志聰以爲  
重出衍文其說極是今從之何者本篇自前百三十八條至後百七十  
六條率以屬痞之證駢列立論而此條獨不及此茲知重出無疑當刪  
之

〔百七十二〕太陽病外證未除而數下之遂協熱而利利下不止心下痞  
鞭表裏不解者桂枝人參湯主之

張璠曰以表未解故用桂枝以解之以裏適虛故以理中和之

錢潢曰外證未解一誤下已足致變况數下之乎表不解者以外證未  
除而言也裏不解者以協熱下利心下痞鞭而言也

喻昌曰此方卽理中加桂枝而易其名亦治虛痞下利之聖法也

發秘曰此方也卽人參湯增甘草一兩加桂枝四兩者故名曰桂枝人

參湯。其不云人參加桂枝者。以其所加不翅桂枝也。猶四逆加茯苓人參。名曰茯苓四逆也。一說云。桂枝人參湯。茯苓四逆湯類。亦是古方。非仲景氏所新加者。故不稱桂枝加人參湯。四逆加茯苓湯。以示其爲古方也。亦頗有理。

正珍曰。協。成本作協。玉函脈經俱作挾。皆借音通用。挾爲正字。正字通云。協。協古通。通雅云。後漢方術傳。懷協道藝。卽懷挾。又與夾挾通。可見挾之爲協。協之爲挾。皆借音而通矣。挾熱者。乃內寒挾外熱之謂。其謂之挾者。示寒之爲急也。先輩不知。皆以協字本義解之。協乃互相和同之謂。寒熱冰炭。豈有互相和同之理乎。可謂妄矣。按此條也。卽禹餘糧湯證而一等輕。且挾外證者。與甘草瀉心之以痞爲主。生薑瀉心之以噫爲主者。自有差別。臨病之工。不可不深察詳考也。又按。惟忠每見有表裏二字者。概爲柴胡證。非也。詳見前七十四條。

### 桂枝人參湯方

桂枝四兩 別切

甘草四兩 炙

白朮三兩

人參三兩

乾薑三兩

右五味。以水九升。先煮四味。取五升。內桂。更煮取三升。去滓。溫服一升。日再夜一服。桂枝下。別切二字。全替作去皮。是。取五升下。玉函有去滓二字。當補之。成本全替脫三升下之去滓二字。亦當補之。

〔百七十二〕傷寒。大下後。復發汗。心下痞。惡寒者。表未解也。不可攻痞。當

先解表。表解乃可攻痞。解表宜桂枝湯。攻痞宜大黃黃連瀉心湯。

方有執曰：解猶救也。解表與發表不同。傷寒病初之表當發。故用麻黃湯。此以汗後之表當解。故曰宜桂枝湯。

活人書曰：大抵結胸與痞皆應下。然表未解者不可攻也。

惟忠曰：附子瀉心證云：心下痞而復惡寒汗出。此證祇同。唯無汗出字已。按例云：發熱惡寒者。外未解也。此證疑脫發熱二字也。不然則附子瀉心證何別。正珍曰：桂枝之證是也。當補之。

〔百七十四〕傷寒發熱汗出不解。心下痞鞭嘔吐而下利者。大柴胡湯主之。心下之下。宋版全書俱作中。非也。今從成本玉函改之。

錢潢曰：此條亦不由誤下。乃自表傳裏之痞也。

金鑑曰：下利之下字當是不字。若是下字。豈有上吐下利而猶以大柴胡湯下之者乎。當改之。

正珍曰：金鑑改下利作不利。其意雖好。文例不合。何者。凡論中云不利者。皆以小便言之。且必以小便二字冠之。未見其單云不利者也。按前第三十三條云：太陽與陽明合病。不下利但嘔者。葛根加半夏湯主之。由是考之。此章下利之上似脫不字當補之。此章特稱不下利者。蓋對前條桂枝人參湯。甘草瀉心湯。生薑瀉心湯。赤石脂禹餘糧湯。諸證皆

有痞鞭且下利言之。言傷寒發汗後。唯惡寒罷。而發熱不爲汗解。心下痞鞭。嘔吐而不下利者。此爲熱邪內攻爲實。蓋少陽陽明併病也。故與大柴胡湯下之則愈。宜與前一百八條互相參看。大抵痞證。率屬心氣自結。而不關外來之邪。但此一條。是爲外邪入裏。心氣爲之鬱結。故不用瀉心。而取大柴胡。其因不同也。又按此證既有痞鞭。而不作結胸者。以其人原無停飲故也。又按金鑑指傷寒發熱。汗出不解入字。以爲表仍未已。非也。汗出者。謂發之得汗。非自汗之謂。生薑瀉心條。傷寒汗出解之語。可見矣。不解者。謂病之不解。非表不解之謂。芍藥甘草附子湯。及茯苓四逆湯條。病不解之語。可見矣。

或問十棗證。已稱下利嘔逆。心下痞鞭。則此條下利似未必爲不下利之誤。曰否。不然也。何則。十棗證。心下痞硬滿。引脇下痛。卽結胸也。此則但痞鞭而不滿。不痛。其不結胸也明矣。已非結胸。唯心下痞硬。嘔吐下利。豈可妄下之乎。況前一百八條證。可以相參驗乎。

按一百八條曰。太陽病。過經十餘日。反二三下之。後四五日。柴胡證仍在者。先與小柴胡湯。嘔不止。心下急。鬱鬱微煩者。爲未解也。與大柴胡湯下之則愈。所謂嘔不止。心下急。乃此條心下痞硬而嘔吐者。而無一字及下利。反謂與大柴胡下之則愈。可見此條下利二字。果是不下利。

之誤特對前文痞鞭下利諸條而發之矣。

〔百七十五〕病如桂枝證。頭不痛。項不強。寸脈微浮。胸中痞鞭。氣上衝咽喉。不得息者。此爲胸有寒也。當吐之。宜瓜蒂散。

寸脈微浮四字。病源作其脈微三字。咽喉。宋本作喉咽。非。

成無已曰。病如桂枝證。爲發熱汗出惡風。

方有執曰。氣上衝咽喉者。痰湧上逆。俗謂喉中聲如曳鋸。是也。寒以痰言。

錢潢曰。邪在上焦。因勢利導。應從上越。當用內經高者。因而越之之法。故以瓜蒂散吐之。使邪從上越。則胸中氣自和平矣。

正珍曰。寸當作其。中當作下。皆傳寫之譌也。此條論痰病之有熱。頗似太陽中風之證者也。謂之如者。明其似外感。而實不外感也。若是外感。必使人脈浮。頭項強痛。今頭不痛。項不強。其脈亦不顯然浮而微浮。其非外感可知也。胸下痞鞭。乃心氣鬱結之外候。氣上衝咽喉。不得息者。後世所謂痰喘壅盛。是也。夫鬱結久。則血脈稠粘。不能健運。令人痰喘壅盛矣。痰卽血之糟粕。成於肺中。出於喉門者。是也。非留飲也。

留飲者。謂停留之

涎水。乃飲物之入胃。而不化。轉。精氣頗去。唯存原水。停蓄作病者也。故亦謂之寒也。

其謂之寒者。以業既離血不復溫

養之具也。其因而越之者。以肺惟開門於喉嚨。而無別有去路之在也。雖然。豈惟吐胸中寒痰哉。亦以達其鬱結也。按古昔未有痰字。故或稱

之寒。或謂唾濁。

金匱見英丸條下。

或謂出獨唾。

金匱桔梗湯條下。

或謂吐涎沫。

金匱桂枝去芍藥加梔英湯條下。

皆今之所謂痰也。若夫金匱所謂痰飲。乃是痰飲。謂痰薄之飲。痰乃形容之辭。猶支飲之支。留飲之留。非痰喘之痰也。後人以痰痰音同。誤作痰飲已。考之脈經千金翼。俱作痰飲。亦足可徵也。宋元諸醫不知痰爲痰誤。皆以飲爲痰。謬誤之大者也。詳見金匱集成中。茲不復贅焉。又按此條成無已及金鑑諸注。皆以外感言之。非也。果是外感。則如桂枝證者未罷。豈妄議之吐乎。凡用瓜蒂吐者。大便亦必瀉。間有止瀉而不吐者。故其表未解者。吐亦在所禁也。

又按素問靈樞。爾雅說文。并無痰字。未詳其制於何代。顧在魏晉之際。葛洪抱朴子至理卷云。甘遂葶藶之逐痰癖。名醫別錄云。檳榔除痰。王羲之初月帖云。胸中痰悶。干嘔轉劇。食不可強。是字雖作痰。已指爲病名者也。字典云。痰古痰字。合而攷之。變痰作痰。以爲一種病名。其在魏晉之際乎。痰字始見神農本草經常山巴豆二條。至于名醫別錄。則見二十餘條。肘後方。亦有痰癰字。正字通云。古有痰陰之疾。俗作痰飲。痰證在素靈則唯以沫唾涎液涕稱之。詳見厥論。癰狂篇。評熱病論。至真要大論。五癰津液別論。欬論。寒熱病篇。腹中論等。抱朴子極言卷曰。食過則結積聚。飲過則成痰癖。



瓜蒂散方

瓜蒂一分  
熬黃 赤小豆一分

右二味各別搗篩爲散已合治之取一錢匕以香鼓一合用熱湯七合煮作稀糜去滓取汁和散溫頓服之不吐者少少加得快吐乃止諸亡血虛家不可與瓜蒂散。

〔百七十六〕病脇下素有痞連在臍傍痛引少腹入陰筋者此名藏結死玉函經經。俱病字之下。有者字。當補之。

獨嘯庵漫游雜記曰一男子病腹痛苦楚不可堪四肢厥冷額上生汗脈沈遲食飲則吐按其腹痛連胸脇繞臍入陰筋鞭滿難近手諸醫畏縮而歸余曰是寒疝應不死作附子瀉心與之夜死余不知其故沈思數日偶讀傷寒論其所謂藏結也余當時泮然不精思誤鑒如此噫呼讀傷寒論十五年甚哉事實難周。

正珍曰脇下有痞連在臍傍是其平素所有俗謂疝積者是也痛引小腹入陰筋是其觸事發動來者所以名之藏結者其以藏氣爲之結塞不通也此與厥陰篇所載冷結在膀胱小腹滿痛者頗相類宜急灸關元飲以附子湯輩也。按此證亦不必以傷寒而言亦唯觸類長之耳。又按厥陰篇有藏厥證藏厥疑卽藏結已俟後考。

「百七十七」傷寒。若吐若下後。七八日不解。熱結在裏。表裏俱熱。時時惡風。大渴。舌上乾燥而煩。欲飲水數升者。白虎加人參湯主之。成本全書。傷寒下。有病字。非也。宋版玉函外臺俱無之。白虎加人參湯。千金及翼經。俱作白虎湯。亦非。

成無已曰。邪熱結而爲實者。則無大渴。邪熱散漫則渴。今雖熱結在裏。表裏俱熱。未爲結實。邪氣散漫。重蒸焦膈。故大渴。舌上乾燥而煩。欲飲水數升。與白虎加人參湯。散熱生津。

金鑑曰。傷寒二字之下。當有若汗二字。蓋發汗較吐下。更傷津液爲多也。

正珍曰。金鑑之說得之矣。宜補若發汗三字。前第十六條云。已發汗。若吐若下。第二十三條云。更發汗。更下。更吐。第五十八條云。若發汗。若吐若下。皆有發字。按此條陽明病淺證。未至胃實者。所謂陽明病。汗出多而渴。是也。本當在陽明篇中。以下二章及百八十五條。皆然矣。熱結在裏。表裏俱熱。入字。是因。時時惡風以下。是證也。此傷寒表邪熾盛。不爲發汗。若吐若下解。入裏而結者也。雖然。未至成胃實。故其熱熏蒸于表裏。使人且熱且渴也。其致時時惡風者。亦復以未成結實故也。蓋此條時時惡風。與次條背微惡寒。皆因內熱熏蒸。汗出肌疎所致。是以不常而時時。不顯然於全身而微於背。其非表不解之惡風寒。可知也。亦猶

陽明之腹滿常痛。與太陰之腹滿時痛之異也。成無已方有執諸人。皆指時時惡風。以爲表未除。非也。後百七十九條云。其表不解者。不可與白虎湯。渴欲飲水。無表證者。白虎加人參湯主之。可見其非表不解之惡風寒矣。金鑑云。時時惡風。當是時汗惡風。若非汗字。則時時惡風是表不解。白虎湯在所禁也。是蓋不然。時汗之語。論中無例。不可從也。又按白虎加人參湯方。已見前第二十六條。宋板重載本條之後。方後有此方立夏後。立秋前乃可服。立秋後不可服。正月二月三月尚凜冷。亦不可與服之。與之則嘔利而腹痛。諸亡血虛家。亦不可與。得之則腹痛利者。但可溫之當愈。六十二字。考之玉函。則判爲三章。以列後第百七十九條後。蓋叔和所攙。大非仲景氏之旨。今刪之。

〔百七十八〕傷寒無大熱。口燥渴。心煩。背微惡寒者。白虎加人參湯主之。

白虎加人參湯。千金及翼外臺。俱作白虎湯。非也。

金鑑曰。傷寒身無大熱。不煩不渴。口中和。背惡寒。附子湯主之。屬少陰病也。今傷寒身無大熱。知熱漸去。表入裏也。口燥渴。心煩。知熱已入陽明也。雖有背微惡寒一證。似乎少陰。但少陰證。口中和。今口燥渴。是口中不和也。背惡寒。非陽虛惡寒。乃陽明內熱。熏蒸於背。汗出肌疎。故微惡之也。主白虎湯。以直走陽明。大清其熱。加人參者。蓋有意以顧肌疎。

也。

傷寒瑣言曰。仲景既云。表不解者。不可與之。白虎加人參湯證。一曰惡風。一曰惡寒。豈非表不解而復用白虎。何耶。蓋惡寒曰微。則但見於背。而不至甚。於惡風曰時時。則時或乍寒而不常。是表證已輕。非前脈浮緊發熱無汗。全不解者。此則加大熱大渴。所以用白虎而無疑也。

〔百七十九〕傷寒脈浮。發熱無汗。其表不解者。不可與白虎湯。渴欲飲水。

無表證者。白虎加人參湯主之。

不解者之者字。依成本補之。白虎加人參湯。玉函千金及翼外書。并作白虎湯。非也。

成無已曰。傷寒脈浮。發熱無汗。其表不解。不渴者。宜麻黃湯。渴者宜五苓散。非白虎所宜。大渴欲水。無表證者。乃可與白虎加人參湯。以散裏熱。臨病之工。大宜精別。

方有執曰。無表證。謂惡寒頭身疼痛皆除。

金鑑曰。其表不解者。雖有燥渴。乃大青龍湯證。不可與白虎湯。又曰。加人參者。於大解熱中。速生其津液也。

正珍曰。白虎湯與白虎加人參湯。均之陽明解熱之劑。唯於渴不渴上而判矣。凡陽明病。大渴引飲者。多汗亡津液故也。是以必加之人參。以復其津液也。若其不煩渴者。津液不虧。故無取乎人參也。世醫不察。雖遇渴者。概去人參不用。終歸罪其方。可勝歎哉。楊起有言。近因病者各

財薄醫。醫復算本惜費。不肯用參療病。以致輕者致重。重者至危。斯言也。深中世人之膏肓矣。

〔百八十一〕太陽少陽併病。心下鞕。頸項強而眩者。當刺大椎肺俞肝俞。慎勿下之。玉函太陽下。有與字。心下下。有痞字。或本脫肝俞二字。當補之。又按。正脈本。有肝俞二字。蓋據注補之也。

甲乙經曰。大椎在第一椎陷者中。刺入五分。肺俞在第三椎下。兩傍各一寸五分。刺入三分。留七呼。肝俞在第九椎下。兩傍各一寸五分。針入三分。留六呼。

正珍曰。太陽與少陽併病。屬柴胡桂枝湯證。若其心下痞鞕。頸項強而眩者。所兼客證也。大椎肺俞。以泄頸項之鬱。肝俞。以泄心下之鬱也。前第百五十九條云。太陽少陽併病。而反下之。成結胸。此其所以禁下也。成無已云。心下鞕而眩者。少陽也。頸項強者。太陽也。可謂強辨矣。又按結胸證。有心下鞕而項亦強者。大陷胸丸下之則愈。此條見證略同。而不痛不滿。其非結胸可知矣。故曰慎勿下之。又按前一百二條曰。傷寒四五日。身熱惡風。頸項強脇下滿。手足溫而渴者。小柴胡湯主之。乃知此條亦小柴胡證矣。若夫刺法者。兼施之術耳。然慎一字不似仲景氏辭氣。則恐亦王叔和撰次之文矣。

〔百八十一〕太陽與少陽台病。自下利者。與黃芩湯。若嘔者。黃芩加半夏

生薑湯主之。

成無已曰。太陽陽明合病。自下利。爲在表。當與葛根湯發汗。陽明少陽合病。自下利。爲在裏。可與承氣湯下之。此太陽少陽合病。自下利。爲在半表半裏。非汗下所宜。故與黃芩湯。以和解半表半裏之邪。嘔者。胃氣逆也。故加半夏生薑以散逆氣。

惟忠曰。此以其邪之客於中位。不宜發汗。亦不宜下。故惟於中間而制之者也。

發秘曰。已稱太陽少陽合病。而方中絕無解表之品者。何也。所主在少陽也。猶三陽合病。所主在陽明。而處以白虎而已。

正珍曰。自下利。當作而下利。說見葛根湯下。葛根湯治太陽陽明合病之方。黃芩湯治太陽少陽合病之方。而下利與嘔。皆所兼客證已。猶小柴胡小青龍等方。有或以下諸兼證焉。按併病則兼解二經。合病則獨解其一經。大柴胡湯之於少陽陽明併病。柴胡桂枝湯之於太陽少陽併病。桂枝加芍藥湯之於太陽太陰併病。皆爾。若夫葛根湯及麻黃湯之於太陽陽明合病。黃芩湯之於太陽少陽合病。白虎湯之於三陽合病。皆獨解其一經者也。蓋以併病者。邪勢緩。而合病則邪勢急也耳。按厥陰篇云。傷寒脈遲六七日。而反與黃芩湯。微其熱。脈遲爲寒。由茲觀

之黃芩湯證其不惡寒而惡熱脈數者可知矣。小柴胡、大柴胡、甘草瀉心、黃連阿膠四方皆有心煩而用黃芩。乃知黃芩湯證亦有心煩矣。況心煩少陽一證而此條爲太陽少陽合病乎。大氏合病熱勢猛烈故表急裏緩者麻黃葛根發之裏急表緩者白虎清之病在中位而不表不裏者黃芩解之。若夫不用柴胡湯而用黃芩湯者其病在一二日之間而未至往來寒熱胸脇苦滿等證故也。蓋受病之始已有心煩惡熱脈數等候而兼帶太陽頭痛項強脈浮等證者黃芩湯主之如其下利與嘔不必問有無猶葛根湯例此條嘔者亦不下利但嘔也非嘔利俱有也。徵之葛根湯條自瞭然矣。

黃芩湯方

黃芩 二兩

芍藥 二兩

甘草 二兩

大棗 十二枚

右四味以水一斗煮取三升去滓溫服一升日再夜一服。

成本。一服下。有若嘔者。加半夏半升。

生薑三兩十二字。而無黃芩加半夏生薑湯方。

黃芩加半夏生薑湯方

黃芩 二兩

芍藥 二兩

甘草 二兩

大棗 十二枚

半夏 半升

生薑 一斤半

方三兩切

右六味以水一斗煮取三升去滓溫服一升日再夜一服。

大棗十二枚。玉函全書。俱作十二枚。是。

生薑，玉函  
作一兩半。

〔百八十二〕傷寒胸中有熱，胃中有邪氣，腹中痛，欲嘔吐者，黃連湯主之。  
成無已曰：濕家下後，舌上如胎者，以丹田有熱，胸中有寒，是邪氣入裏，而爲下熱上寒也。此傷寒邪氣傳裏，而爲下寒上熱也。

程應旂曰：此等證皆本氣所生之寒熱，無關於表，故着二有字。

金鑑曰：傷寒未解，欲嘔吐者，胸中有熱邪上逆也。腹中痛者，胃中有寒邪內攻也。此熱邪在胸，寒邪在胃，陰陽之氣不和，失其升降之常，故用黃連湯寒溫互用，甘苦並施，以調理陰陽而和解之也。又曰：傷寒邪氣入裏，因人藏氣素有之寒熱而化，此則隨胃中有寒，胸中有熱而化，腹中痛欲嘔吐，故以是方主之。

正珍曰：上舉因下說證，形影聲響，但欲嘔吐，是外入邪熱，而其腹中痛，係固有之宿寒，非一因也。故桂枝乾薑以逐胃寒，黃連半夏以除心熱，人參以扶元氣，甘草大棗以調和諸藥也。

### 黃連湯方

黃連 三兩

甘草 三兩

乾薑 三兩

桂枝 三兩

人參 二兩

半夏 半升

大棗 十二枚

右七味，以水一斗，煮取六升，去滓，溫服，晝三夜二，疑非仲景方。  
成本溫服下，有一升二字。



遺三夜二。作日三服夜二一服。無疑非仲景方五字。

〔百八十三〕傷寒八九日。風濕相搏。身體疼煩。不能自轉側。不嘔不渴。脈浮虛而澀者。桂枝附子湯主之。若其人大便鞭。小便自利者。去桂加白朮湯主之。金匱。疼煩。作疼痛。金匱經玉函千金翼。俱以去桂加白朮湯六字。作木附子湯四字。字。疼煩。外臺作疼痛而煩。去桂加白朮湯。作附子白朮湯。成本全書去桂作去桂枝。

成無已曰。不嘔不渴。裏無邪也。脈得浮虛而澀。身有疼煩。知風濕在經也。與桂枝附子湯。以散表中風濕。

發秘曰。若其人以下。疑有錯誤也。身體疼煩。不嘔不渴。脈浮虛而澀。是濕邪在表之候。桂枝決不可闕。大便鞭。小便自利。豈有加朮之理耶。若非有錯誤。則後人攙入之言已。不可強解。一掃除之可也。

正珍曰。此與次條。俱係中濕之病。非傷寒也。攷之金匱。果在痙濕喝篇內。由此觀之。傷寒八九日五字。殊無着落。當刪之。疼煩二字顛倒。當作煩疼。次條骨節煩疼之語。及柴胡桂枝湯證。支節煩疼之文。皆可徵也。煩疼。謂疼之甚。猶煩渴煩驚之煩。惟忠以身體疼爲句。又以煩爲句。可謂贅文法焉。濕乃山嵐瘴氣。雨濕氣。霧露氣。卑濕氣。皆是也。但濕不能獨傷人。必也隨風寒之氣。然後敢中之。大仲曰。古人多言。風濕寒濕。凡濕證無不兼風寒者。風寒證多有兼濕者。濕因寒氣。何得不兼風寒乎。故有寒濕風濕之解。其謂之風濕者。以汗出惡風故也。猶中

風傷寒之義。搏與薄。借音通用。逼迫也。周易說卦傳。有陰陽相薄。雷風

相薄之文。靈樞決氣篇。有兩神相搏。合而成形之言。又迫晚曰薄暮。皆逼迫之義也。凡濕之傷人。必與風寒之氣。相逼迫而後中之。是以謂之風濕相搏。方有執改搏作搏。搏。定文切。提聚也。言風與濕相搏。合國聚。共爲一病也。瀨穆訓搏爲擊。搏。手擊也。史。兩虎相擊。借以爲風濕相共病之形狀字。皆非也。若其人以下十九字。文義不明暢。今姑從發秘之說。

### 桂枝附子湯方

桂枝四兩 去皮

附子三枚 炮 去皮破

生薑三兩 切

大棗十二枚 擘

甘草二兩 炙

右五味以水六升。煮取二升。去滓。分溫三服。附子下。全書有八片二字。是也。去桂加白朮湯方

附子三枚 炮 去皮破

白朮四兩

生薑三兩

甘草二兩 炙

大棗十二枚 擘

右五味以水六升。煮取二升。去滓。分溫三服。初服其人身如痺。半日許復服之。三服都盡。其人如冒狀。勿怪。此以附子朮併走皮內逐水氣。未得除故使之耳。法當加桂四兩。此本一方二法。以大便鞭。小便自利。去桂也。以大便不鞭。小便不利。當加桂。附子三枚恐多也。虛弱家及產婦。宜減服之。

是卽朮附湯。成本附桂枝加附子湯後者。非也。按此方金匱名白朮附子湯。分量半減。外臺名附子白朮湯。生薑二兩。甘草一兩。

〔百八十四〕風濕相搏。骨節疼痛。不得屈伸。近之則痛劇。汗出短氣。小便不利。惡風不欲去衣。或身微腫者。甘草附子湯主之。痿痺。成本全書。作煩。宜從而改。

正珍曰。此比前條一等重。而兼水氣者。故小便不利。或身微腫。方中有朮。爲是故也。按此證與桂枝加附子湯證頗相似。但彼因亡津液致小便難。此因水氣致小便不利。或身微腫也。難者。求而不得之辭。不利者。出而不多之義。通而言之。均是一不利已。字典。掣字注云。玉篇。同牽。牽也。說文。引縱曰牽。從手。瘰省聲。尺制切。六書故。瘰癧謂小兒風驚。乍掣乍縱。掣。搖也。縱。則掣而乍舒也。瘰癧因掣縱立文。今乃作牽。更从瘰。失之甚矣。

甘草附子湯方

甘草 二兩

附子 二枚炮

白朮 二兩

桂枝 四兩

右四味。以水六升。煮取三升。去滓。溫服一升。日三服。初服得微汗則解。能食。汗止復煩者。將服五合。恐一升多者。宜服六七合爲始。甘草二兩。玉函。外。作三兩。白朮二兩。玉函是。

按能食汗止復煩者。將服五合。十一字。古註文攙入。當削之。爲始二字。成本作爲妙。是也。妙者。得宜之辭。猶言恰好。晉書阮咸傳云。咸妙解音律。廣韻。妙字註云。好也。

「百八十五」傷寒脈浮滑。此以表有熱裏有寒。白虎湯主之。此字。玉函作而。是。成本全書。無以字。是。○正珍按。有寒下。當有者字。

林億曰。按前篇云。熱結在裏。表裏俱熱者。白虎湯主之。又云。其表不解。不可與白虎湯。此云脈浮滑。表有熱裏有寒者。必表裏字差矣。又陽明一證云。脈浮遲。表熱裏寒。四逆湯主之。又少陰一證云。裏寒外熱。通脈四逆湯主之。以此表裏自差明矣。千金翼云。白通湯非也。正珍按。玉函亦作傷寒脈浮滑。而表熱裏寒者。白通湯主之。

程應旂曰。讀厥陰篇中。脈滑而厥者。裏有熱也。白虎湯主之。則知此據表裏二字爲錯簡。

正珍曰。林億程應旂二說。考徵明備。引援詳確。宜拳拳服膺。張璐續論。遵而奉之。可謂見善能徙矣。表有寒。以時時惡風。背微寒。及厥冷等證。言裏有熱。以脈滑大。譏語腹滿。發熱汗出。身重而喘。咽燥口苦等證。言益舉因略證者也。後進諸家不察。強爲之分疏。不思之甚。茲辨其一二。以廣異聞焉。

成無已曰。浮爲在表。滑爲在裏。表有熱。外有熱也。裏有寒。有邪氣傳裏也。以邪未入府。故止言寒。如瓜蒂散證云。胸上有寒者。是矣。與白虎湯以解內外之邪。

〔辨曰〕果以邪之未入府。謂之寒。則黃連湯條。胸中有熱之熱。亦以爲入府之邪乎。可謂從家忘妻矣。况瓜蒂散條中之寒字。唯是指痰之辭。而非指外來之邪者乎。

方有執曰。裏有寒者。裏字。非對表而稱。以熱之裏言。蓋傷寒之熱。本寒因也。故謂熱裏有寒。

〔辨曰〕凡表裏之字。必對待爲言。如表熱裏寒。裏寒外熱。表裏不解。表解裏未和。皆爾。豈有表爲肌表之表。而裏爲熱裏之裏乎。仲景氏之著論。本欲以解人之惑。果如其說。豈非惑人之甚者邪。

喻昌曰。裏有寒者。傷寒傳入於裏。更增裏熱。但因起於寒。故推本而曰裏有寒。實則表裏俱爲熱極也。

王三陽曰。經文寒字。當邪字解。亦熱也。若是寒字。非白虎湯證矣。錢潢曰。先受之寒邪。已經入裏。鬱而爲熱。本屬寒因。故曰裏有寒。

〔辨曰〕若果推本而言。凡布帛之黃者。赤者。黑者。青者。皆謂之白可乎。熱湯謂之寒水可乎。可謂無目矣。

張志聰曰。此表有太陽之熱。裏有癸水之寒。夫癸水雖寒。而與陽明相搏。則戊己化火。爲陽熱有餘。故以白虎湯。清兩陽之熱。

〔辨曰〕是假五行。強爲之說。均之推本之陋已。

熱念庭曰。此裏尙爲經絡之裏。非藏府之裏。亦如衛爲表營爲裏。非指藏府而言也。

傷寒論闕疑曰。裏有寒字。對表說。只是裏無熱之意。

〔辨曰〕二說雖不同。其爲裏無熱。則一而已矣。夫白虎大寒解熱之劑。若投諸無裏熱者。其不害人者幾希。可不懼哉。

劉棟曰。寒者。邪之總稱也。

〔辨曰〕邪者。對正之名。所該甚廣。豈惟風寒暑濕之爲邪乎。凡害人之物。皆謂之邪也。若夫寒者。反熱之一氣已安。可以爲邪之總稱乎。果以爲邪之總稱。則彼宛喝之人。亦謂之中寒乎。

### 白虎湯方

知母 六兩

石膏 一斤

甘草 二兩

粳米 六合

右四味以水一斗。煮米熟湯成。去滓。溫服一升。日三服。

外臺白虎湯煎法曰。右四味切。以水一斗二升。煮取米熟。去米內藥。煮取六升。去滓。分六服。日三服。

〔百八十六〕傷寒脈結代。心動悸。炙甘草湯主之。心動悸三字。玉函。作心中驚悸四字。

成無已曰。結代之脈。動而中止。能自還者。名曰結。不能自還者。名曰代。由血氣虛衰。不能相續也。心中悸動。知真氣內虛也。與炙甘草湯益虛。

補氣血而復脈

金鑑曰。心動悸者。謂心下築築惕惕然動而不自安也。若因汗下者。多虛。不因汗下者。多熱。欲飲水小便不利者。屬飲。厥而下利者。屬寒。今病傷寒。不因吐下。而心動悸。又無飲熱寒虛之證。但據結代不足之陰脈。即主以炙甘草湯者。以其人平日血氣衰微。不任寒邪。故脈不能續行也。此時雖有傷寒之表未罷。亦在所不顧。總以補中生血復脈爲急。通行營衛爲主也。

正珍曰。悸字下。當有者字。蓋脫之也。又曰。此乃一百八條。小建中湯證。而脈結代者。

炙甘草湯方

甘草 四兩 炙

生薑 三兩 切

人參 二兩

生地黃 一斤

桂枝 三兩 去皮

阿膠 二兩

麥門冬 半升 去心

大棗 三十枚 擘

右九味。以清酒七升。水八升。先煮八味。取三升。去滓。內膠烱消盡。溫服一升。日三服。一名復脈湯。大棗三十枚。或本全書。作大棗十二枚。玉函金匱。與宋板同。

唐慎微證類本草卷六曰。傷寒類要。治傷寒脈結代者。心悸方。甘草二

兩。水三升。煮取一升。服七合。日三。正珍按。傷寒類要四卷。宋高若訥所著。見乎宋史藝文志。

〔百八十七〕脈按之來緩。而時一止。復來者。名曰結。又脈來動而中止。更

來小數中有還者反動。名曰結陰也。脈來動而中止不能自還因而復動。名曰代陰也。得此脈者必難治。

劉棟曰。後人之注文。誤混本文也。





# 傷寒論集成卷六

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

## 辨陽明病脈證并治第四

〔百八十八〕問曰。病有太陽陽明。有正陽陽明。有少陽陽明。何謂也。答曰。太陽陽明者。脾約是也。正陽陽明者。胃家實是也。少陽陽明者。發汗利小便已。胃中燥煩實。大便難是也。

劉棟曰。此條後人之所記也。舉陽明之三證。非古義也。若有此說。則合病及轉屬之目。皆爲無謂也。故不採用矣。

〔百八十九〕陽明之爲病。胃家實是也。

方有執曰。實者。大便結爲硬滿。而不得出也。雖則遲早不同。而非日數所可拘也。

正珍曰。陽明指裏而言。蓋邪之中。人始于太陽。中于少陽。終于陽明。自表而裏。自輕而重。勢之必然也。此陽明宜在少陽後。今置之少陽前者。

何也。嘗攷素問熱論。其所謂陽明者。亦以表病言之。乃仲景氏大青龍湯證也。故繼太陽以陽明。乃是素問之說。非仲景氏之說也。雖然。太陽陽明少陽之次序。古來醫家相傳之定說。不可遽易者也。故姑從其舊說。以次第之。備論其傳變于內。俾人思而得焉而已。實謂邪實。乃腹滿便結之病。故曰胃家實。凡平人腸胃素虛。有邪陷之。則成三陰下利嘔吐諸虛寒證。腸胃素實。有邪陷之。則成陽明腹滿便結。謔言妄語。身熱自汗。諸實熱證。是非邪之有寒熱。皆從其人固有之虛實而化也。辟諸練絲之可以黃。可以黑。其本雖同。末則大異也。再按素問三陰。即本論陽明病。蓋素問單以實熱病。分屬於六經。仲景則並舉虛寒實熱。以配三陰三陽也。

〔百九十一〕問曰。何緣得陽明病。答曰。太陽病若發汗若下若利小便。此亡津液。胃中乾燥。因轉屬陽明。不更衣內實大便難者。此名陽明也。

〔百九十二〕問曰。陽明病外證云何。答曰。身熱汗自出不惡寒反惡熱也。〔百九十三〕問曰。病有得之一日不發熱。而惡寒者何也。答曰。雖得之一日惡寒。將自罷。即自汗出。而惡熱也。

〔百九十四〕問曰。惡寒何故自罷。答曰。陽明居中主土也。萬物所歸。無所復傳。始雖惡寒二日。自止。此爲陽明病也。

劉棟曰。右四條。後人之所記也。

〔百九十四〕本太陽。初得病時。發其汗。汗先出不徹。因轉屬陽明也。

成無已曰。太陽病未解。傳併入陽明。而太陽證未罷者。名曰併病。太陽中篇二陽

併病條注

方有執曰。徹。除也。言汗發不對。病不除也。

正珍曰。太陽中篇。亦有此文。本一字。作二陽併病四字。按徹。除也。厥陰

篇曰。傷寒脈遲。六七日而反與黃芩湯。徹其熱。義與此同。程應旂訓爲

盡也。透也。非也。凡傷寒中風。既離於太陽。而純于陽明或少陽。此之爲

轉入也。既轉而未純。此之爲轉屬轉係也。轉屬轉係。皆併病也。左傳元

命西鄰北鄰。其於己。杜預注曰。貳。兩屬。

〔百九十五〕傷寒發熱無汗。嘔不能食。而反汗出。漉漉然者。是轉屬陽明也。

方有執曰。漉漉。熱而汗出貌。

正珍曰。傷寒無汗。嘔不能食者。此爲少陽病小柴胡湯證也。若其人反

汗出。漉漉然者。此爲轉屬陽明。乃少陽陽明併病也。當與大柴胡。柴胡

加芒消等湯。以潤下也。

〔百九十六〕傷寒三日。陽明脈大。

〔百九十七〕傷寒脈浮而緩手足自溫者是爲繫在太陰太陰者身當發黃若小便自利者不能發黃至七八日大便鞭者爲陽明病也

〔百九十八〕傷寒轉繫陽明者其人譫然微汗出也

〔百九十九〕陽明中風口苦咽乾腹滿微喘發熱惡寒脈浮而緊若下之則腹滿小便難也

〔二百〕陽明病若能食名中風不能食名中寒

〔二百一〕陽明病若中寒者不能食小便不利手足譫然汗出此欲作固瘕必大便初鞭後溏所以然者以胃中冷水穀不別故也

〔二百二〕陽明病初欲食小便反不利大便自調其人骨節疼痛翕翕如有熱狀奄然發狂譫然汗出而解者此水不勝穀氣與汗共并脈緊則愈

〔二百三〕陽明病欲解時從申至戌上

〔二百四〕陽明病不能食攻其熱必噦所以然者胃中虛冷故也以其人本虛攻其熱必噦

〔二百五〕陽明病脈遲食難用飽飽則微煩頭眩必小便難此欲作穀瘕雖下之腹滿如故所以然者脈遲故也

〔二百六〕陽明病法多汗反無汗其身如蟲行皮中狀者此以久虛故也  
〔二百七〕陽明病反無汗而小便利二三日嘔而欬手足厥者必苦頭痛

若不欬不嘔。手足不厥者。頭不痛。

〔二百八〕陽明病。但頭眩。不惡寒。故能食而欬。其人咽必痛。若不咳者。咽不痛。

〔二百九〕陽明病。無汗。小便不利。心中懊憹者。身必發黃。

〔二百十〕陽明病。被火額上微汗出。而小便不利者。必發黃。

〔二百十一〕陽明病。脈浮而緊者。必潮熱發作。有時但浮者。必盜汗出。

〔二百十二〕陽明病。口燥。但欲漱水。不欲嚥者。此必衄。

〔二百十三〕陽明病。本自汗出。醫更重發汗。病已差。尙微煩。不了了者。此必大便輟故也。以亡津液。胃中乾燥。故令大便輟。當問其小便日幾行。若本小便日三四行。今日再行。故知大便不久出。今爲小便數少。以津液當還入胃中。故知不久必大便也。

右十八條。并叔和所攙入。劉棟以爲後人之言。是也。

〔二百十四〕傷寒嘔多。雖有陽明證。不可攻之。

成無已曰。嘔者熱在上焦。未全入府。故不可下。

張志聰曰。嘔多。胃氣虛也。雖有陽明實熱之證。不可攻之。

正珍曰。此條接前百九十五條發之。可見前十八箇條。果是撰次之文矣。嘔多。爲少陽未解。少陽者。汗吐下皆所禁。故不可攻之。後二百三十

七條云。陽明病。脇下鞭滿。不大便而嘔。舌上白胎者。可與小柴胡湯是也。方有執喻昌錢潢。皆以嘔屬太陽。非也。

〔二百十五〕陽明病。心下鞭滿者。不可攻之。攻之利遂不止者死。利止者愈。

〔二百十六〕陽明病。面合色赤。不可攻之。必發熱。色黃者。小便不利也。

劉棟曰。右二條。亦後人之所記也。本論中。其義已盡矣。

〔二百十七〕陽明病。不吐不下。心煩者。可與調胃承氣湯。

金鑑曰。不吐不下。心煩者。謂未經吐下而心煩也。其爲熱盛實煩可知。故與調胃承氣湯。瀉熱而煩自除也。

正珍曰。病人嘔吐而心煩者。少陽柴胡證也。下利而心煩者。少陰猪膚湯證也。今不吐不下而心煩。乃陽明熱煩。但未至潮熱譫語。便秘腹滿。大渴引飲諸候。故先與調胃承氣湯。以解內熱也。蓋一時權用之方耳。又按。成無已諸人。皆謂未經吐下而心煩也。其說頗鑿。不可從矣。

〔二百十八〕陽明病。脈遲雖汗出。不惡寒者。其身必重。短氣。腹滿而喘。有潮熱者。此外欲解。可攻裏也。手足微然汗出者。此大便已鞭也。大承氣湯主之。若汗多微發熱惡寒者。外未解也。其熱不潮。未可與承氣湯。若腹大滿不通者。可與小承氣湯。微和胃氣。勿令至大泄下。

微熱而之而。依成本論之。汗多二字。王函作

汗出多二字。是。至大之至。成本無之。

成無已曰。陽明病脈遲。若汗出多。微發熱惡寒者。表未解也。若脈遲雖汗出而不惡寒者。表證罷也。身重短氣。腹滿而喘。有潮熱者。熱入府也。四肢諸陽之本。津液足爲熱蒸之。則周身汗出。津液不足爲熱蒸之。其手足皴然而汗出。知大便已硬也。與大承氣湯。以下胃熱。經曰。潮熱者實也。其熱不潮。是熱未成實。故不可便與大承氣湯。雖有腹大滿不通之急。亦不可與大承氣湯。與小承氣湯微和胃氣。

張璐曰。仲景既言脈遲尙未可攻。而此證首言脈遲。復言可攻者。何也。夫所謂脈遲尙未可攻者。以腹中熱尙未甚。燥結未定。故尙未宜攻下。攻之必脹滿不食。而變結胸痞滿等證。須俟脈實結定。後方可攻之。此條雖云脈遲。而按之必實。且其證一一盡顯胃實。故當攻下無疑。若以脈遲妨礙一切下證。則大陷胸之下證。亦將因循縮手待斃乎。

正珍曰。本節雖字。當在陽明病下。否則文法不穩。前第八十七條曰。瘡家雖身疼痛。不可發汗。同一文法。言此條雖脈遲汗出而不惡寒。是以知爲陽明病也。且其身必重。短氣腹滿而喘。則其非太陽表邪可知矣。若雖脈遲汗出。而惡寒發熱者。表未解也。二百四十一條云。陽明病。脈遲汗出多。微惡寒者。表未解也。可發汗。宜桂枝。不可攻之。脈遲。乃是脈緩。以可數而不數言之。脈遲汗出而惡寒。



乃桂枝證。今乃雖脈遲汗出。然不惡寒。故識其爲陽明病也。按手足微然而汗出者。言自腹背至手足之末。微微然而汗出也。蓋承上文汗出二字言之。若是身無汗而手足有汗。則手足上當有但字。所謂但頭汗出身無汗者可見矣。成無已以爲但手足汗出。誤矣。

大承氣湯方

大黃

四兩酒洗

厚朴

半斤炙去皮

枳實

五枚炙

芒消

三合

右四味以水一斗。先煮二物。取五升。去滓。內大黃。更煮取二升。去滓。內芒消。更上微火一兩沸。分溫再服。得下餘勿服。芒消之消。成本全書作硝。更煮取。成本本作煮取二字。微火。成本作火。微非。

小承氣湯方

大黃

四兩

厚朴

二兩炙去皮

枳實

三枚炙

右三味以水四升。煮取一升二合。去滓。分溫二服。初服湯。當更衣。不爾者。盡飲之。若更衣者。勿服之。右字。成本作已上非。

方有執曰。古人大便秘。更衣。不更衣。言不大便也。

張璐曰。更衣。言更衣而如廁也。

錢潢曰。更衣者。凡貴人大便後。必更換所服之衣。故稱大便曰更衣。

正珍曰。按指大便曰更衣。蓋醜穢之物。不欲斥言也。史記外戚世家。衛

皇后子夫傳云。是日武帝起更衣。子夫侍尚衣。軒中得幸。

正義云。尚。主也。於王衣車中。

得幸也。漢書灌夫傳云。坐乃起更衣稍稍去。王充論衡。四諱篇曰。更衣之室。可謂臭矣。鮑魚之肉。可謂腐矣。皆指如廁而言也。而顏師古註灌夫傳云。更改也。凡久坐者。皆起更衣。以其寒暖或變也。此止殊不知更衣指登廁而言。論衡有明文。可徵矣。師古此註。宜其排叱也。又考晉書王敦傳。云有如廁者。皆易新衣而出。客多羞脫衣。而敦脫故著新。意色無怍。  
此止此亦更衣之事。可以見師古之謬也。承氣。猶云順氣。詳見太陽上篇。方有執謂承氣者。承上以逮下。推陳以致新之謂也。張志聰謂大承氣者。乃大無不該。主承通體之火熱。能下承在上之熱氣。內經所謂熱氣在上。水氣承之。此命名之大義也。錢潢謂。謂之承氣者。蓋承其邪盛氣實。而以鹹寒苦泄。蕩滌攻下之也。但熱實氣盛者可用。無實熱而正氣虛餒者。不可攻也。此無氣可承之故也。即內經亢則害。承迺制之義。謂熱邪亢害。而以鹹寒苦泄承制之。三子者所辨。皆失於鑿。不可從矣。  
〔二百十九〕陽明病。潮熱大便微硬者。可與大承氣湯。不硬者。不可與之。若不大便六七日。恐有燥屎。欲知之法。少與小承氣湯。湯入腹中。轉失氣者。此有燥屎也。乃可攻之。若不轉失氣者。此但初頭硬後必溏。不可攻之。攻之必脹滿不能食也。欲飲水者。與水則嘔。其後發熱者。必大便復硬而少也。以小承氣湯和之。不轉失氣者。慎不可攻也。  
不可與之之可字。此有燥屎也之也字。成本全書。於脫之。

當補之。轉失氣。玉函。  
作轉矢氣是。當改之。

成無已曰。潮熱者實。得大便微鞭者。便可攻之。若便不鞭者。則熱未成實。微有潮熱。亦未可攻。若不大便六七日。恐有燥屎。當先與小承氣湯瀉之。如有燥屎。小承氣湯藥勢緩。不能宣泄。必轉氣下失。若不轉矢氣。是胃中無燥屎。但腸間少鞭爾。止初頭鞭後必漉。攻之則虛其胃氣。致腹脹滿不能食也。

方有執曰。黃氏曰。矢漢書作屎。

正珍按。當作屎。漢書昌邑王賀傳云。王夢青繩之矢。又馬宮傳云。本姓馬矢。宮仕學稱

馬氏是也。

古屎矢通。失傳寫誤。轉矢氣。放屁出也。脹滿藥寒之過也。

愈并續醫說。引醫學全書曰。轉失氣。是下焦泄氣。俗云去屁也。考之篇韻。屎矢通用。竊恐傳寫之誤。矢爲失耳。宜從轉矢氣爲是。且文理頗順。若以失字。則於義爲難訓矣。

島壽曰。李挺云。轉氣者。腹中響而放屁。壽亦按。放屁者。糟粕新故相搏之氣也。平人欲園或有宿食者。喜放屁。可見放屁腸胃有物矣。陽明病服小承氣湯。不轉矢氣。又不大便。是裏無物及未熱實也。

正珍曰。轉矢氣。乃推轉燥屎之氣。失當作矢爲是也。左傳文公十八年云。以君命召。惠伯殺而埋之。馬矢之中。史記廉頗傳云。頃之三遺矢矣。莊子云。夫愛馬者。以筐盛矢。以蜚盛溺。皆與屎通用也。一說謂轉失氣。

動轉失泄之氣也。

以上十字。係  
論寒直格文。

註家改作矢。非也。論中云燥屎者。若干而

不見一作燥矢者。豈獨於放屁避之乎。殊不知不書轉屎氣。而書轉矢氣。蓋是不期然而暗然者。猶孟子書中。引詩書。書必用曰字。而一無用云字者。詩必用云字。而其用曰字者。十中僅有一。又猶如亡命之未嘗作亡名。赤子之未嘗作尺子。要領之未嘗作腰領焉。且也一書中。本字假字并用者。亦不一而足。如莊子或云以筐盛矢。或云道在屎溺。又大學聖經一章。云而后者。凡十有二。皆用后字。惟物有本末一節。獨用後字。不遑枚舉。豈以無燥屎之一作燥矢者。疑之哉。欲飲水以下三十八字。係王叔和之攙。當削之。錢潢不知爲叔和之言。苦其難通。終以其後發熱以下之文。移在不轉矢氣句下。雖然業既曰慎不可下。則豈更曰不可攻之乎。攻之之後。脹滿不能食者。腸胃虛寒之所致。急可溫之。所謂下利腹脹滿。宜四逆湯者是也。

〔二百二十一〕夫實則譏語。虛則鄭聲。鄭聲者。重語也。直視譏語喘滿者死。

下利者亦死。

王函也上。有是字。下利上。有若字。成本。脫鄭聲者之者當補之。外臺。以鄭聲重語也五字。爲細註。

成無已曰。內經

通評虛實論

曰。邪氣盛則實。精氣奪則虛。譏語由邪氣盛。而神

識昏也。鄭聲由精氣奪。而聲不全也。

王肯堂曰。譏語者。謂亂言無次。數數更端也。鄭聲者。謂鄭重頻煩也。只

將一句舊言重疊頻言之終日殷勤不換他聲也蓋神有餘則能機變而亂語數數更端神不足則無機變而只守一聲也成臣

非是

王珍按。漢書王莽傳曰。非皇天所以鄭重降符命之意。漢書云。鄭重。殷勤之意。

請鄭衛之聲。

張路曰。重語者。字語重疊。不能轉出下語。真氣奪之徵也。喻昌曰。此條當會意讀。謂讖語之人。直視者死。喘滿者死。義始明。

利者死。其

程應龍曰。直視讖語。向非死證。即帶微喘。亦有脈弦者。一條唯兼喘。金鑑曰。直視者。精不注乎目也。

一條唯兼喘

正珍曰。諸註本截直視以下。別爲一章。非也。今從宋板。蓋此條主屬死證。然間亦有得而治者。厥陰篇所載下利讖語者。有承氣湯是也。故曰下利者亦死。亦字有味。喘滿。即喘滿也。宜小慈通用。詳見太陽上篇。按後二百二十七條云。若下之目。謂鄭聲也。再按此條。恐是叔和攙入之言。

二百二十一。發汗多。若重發汗者。亡其陽。譫語脈短者死。

玉函。發汗以下八字。作發汗多。重發其汗。若已下。復發其汗十四字。

脈自和者不

亡陽。謂損失元氣。詳見太陽上篇。凡病人讞語。其脈洪大滑數者。是脈與證不相齟齬。是以謂之和也。非無病之平脈也。如前一百十條調和。亦復爲爾。短乃微弱。爲亡陽之診。故爲死證。若其自和者。邪熱熾乎內之候。其陽不亡。故爲不死。宜與承氣湯矣。

二百二十一 傷寒若吐若下後不解。不大便五六日。上至十餘日。日晡所發潮熱。不惡寒。獨語如見鬼狀。若劇者發則不識人。循衣摸牀。惕而不安。微喘直視。脈弦者生。澀者死。微者但發熱讞語者。大承氣湯主之。若一服利。則止後服。玉函。摸牀。作擗空。惕而。作戰。或本脫利則之則。當補之。

成無已曰。其邪熱微而未至於劇者。但發熱讞語。可與大承氣湯以下胃中熱。

趙嗣真曰。弦字當是滑字。弦爲陰負之脈。豈有必生之理。惟滑脈爲陽。始有生理。玩上條。正珍按後二脈滑而疾者。小承氣湯主之。脈微澀者。裏

虛爲難治。益見其誤。

金鑑曰。若病勢微者。但見潮熱讞語不大便之證。而無前神昏等。劇者宜以大承氣湯下之。

錢潢曰。獨語。讞語妄語也。劇者。病之甚也。發。發作之時也。直視。目光直而睛不轉動也。

發秘曰。傷寒下。疑脫若發汗三字。

劉棟曰。讞語者之者。當作也。

正珍曰。此證也。胃中邪實有燥屎者。劇者宜大承氣。微者宜小承氣。劉棟以微者爲脈狀。非是。

〔二百一十二〕陽明病。其人多汗。以津液外出。胃中燥。大便必鞭。鞭則讞語。小承氣湯主之。若一服讞語止者。更莫復服。成本。脫止者之者字。當補之。

張璐曰。多汗讞語。下證急矣。以其人汗出既多。津液外耗。故不宜大下。但當略與小承氣湯和其胃氣。讞語自止。若過服反傷津液也。

正珍曰。此卽前條所謂微者。

〔二百一十四〕陽明病。讞語發潮熱。脈滑而疾者。小承氣湯主之。因與承氣湯一升。腹中轉失氣者。更服一升。若不轉失氣者。勿更與之。明日又不大便。脈反微細者。裏虛也。爲難治。不可更與承氣湯也。脈經千金翼。俱無小字。二失字。世成本補之。王

面。作轉矢氣是也。成本脫不轉矢氣者之者字。及明日又之又字。當補之。

小字衍文。當從脈經千金翼刪之。腹中上脫腸入二字。當從前二百十九條文補之。明日以下十七字。別是一章。承前文發之。明日又三字。當作陽明病。蓋以陽字省文作陽。一訛爲日明病。再訛爲明日病。又已猶荀子鼯鼠五技而窮之鼯字。本誤爲鼯。傳寫誤爲梧耳。論學不可更與

承氣湯也八字。古註文攙入。亦當刪之。承氣湯不言大小者。要在隨證辨用也。言陽明病。讞語發潮熱。不大便。脈滑而疾者。此爲裏實。承氣湯主之。本文雖不及不大便。脈症既已若斯。則其不大便者。可從而知也。因與承氣湯一升。湯入腹中。轉矢氣者。是有燥屎。可更與一升以下之。若其不轉矢氣者。是無燥屎。不可更與之。如是者。宜與柴胡加芒消湯。輩以和之也。陽明病不大便者。其脈當滑疾。今反微澀者。此爲裏虛。故爲難治也。前舉讞語潮熱。而略不大便。後舉不大便。而略讞語潮熱。本論錯綜之妙若斯。嘗考古今諸註傳。並皆隨文作解。而不知其有錯誤。是其所以愈辨而愈不明也。

〔二百二十五〕陽明病。讞語有潮熱。反不能食者。胃中必有燥屎五六枚也。若能食者。但鞭爾。宜大承氣湯下之。玉函反上有而字無宜字。下之。作主之是也。

反當作煩。因聲近而誤。所謂心中懊憹而煩。胃中有燥屎者可攻。及煩躁發作有時者。此有燥屎。及煩不解。腹滿痛者。此有燥屎。皆見本篇皆可以徵矣。凡傷寒讞語。有潮熱者。固應不能食。豈得謂反乎。金匱產後病篇曰。病解能食。七八日更發熱者。此爲胃實。大承氣湯主之。可見病之未解。乃不能食。此爲其法也。成無已謂。胃熱當消穀引食。殊不知胃熱消穀。則便熱。豐福師傳曰。中熱消導則便寒。寒中之屬。胃中熱則消穀。令人惡心善飢。本以內因之病言之。而與傷寒外



邪入胃者。毫不關涉。可謂牽強矣。燥屎五六枚者。以腹診言之。此證診其腹。則必有糞塊五六枚。應於手也。後藤省所著傷風約言中所謂若夫裏結必有裏熱。硬糞多少。阻住去路。臍下底如著餅。或如杏核雞卵者是也。如是者。宜以大承氣湯下之。若其不煩且能食者。但輒而已。與小承氣湯可也。大承氣湯一句。當在也字下。而在於此者。乃本論屬辭之法也耳。金鑑以爲錯置。非也。或問曰。嘗詳和蘭解體之實說。所謂胃府。唯是容受水穀之所。而非燥屎所留也。水穀之作穢物。必在入腸之後也。今謂胃中有燥屎者何也。予曰。凡陽明病。大便不通者。皆由邪之聚胃中也。屎雖則在腸中。使之輒且燥者。實由邪之入胃。且也。腸胃原是一府。胃爲本。腸爲末。固非他物。故舉胃隸腸。概言胃中有燥屎已。譬諸趙穿弑靈公。而書曰趙盾弑其君。蓋盾之出奔也。穿承其風旨而弑之也。事出左傳宣公二年。

〔二百二十六〕陽明病。下血譫語者。此爲熱入血室。但頭汗出者。刺期門。隨其實而寫之。譫譫然汗出則愈。玉函經。刺字上。有當字。爲是。成本。寫作譫。古字通用也。

此論婦人陽明病。熱入血室者也。病狀如是。當必自愈。以熱隨血而下也。詳見太陽下篇。若其但頭汗出者。瘀熱在裏。而不得越故也。當刺期門以瀉其鬱熱。則熱得發越。遍身譫然汗出而愈。其不用茵陳蒿湯者。

以未及腹滿煩渴小便不利等。自無發黃之勢也。按太陽下篇。婦人中風刺期門者。以胃脅下滿也。此條刺期門者。以瘀熱在裏也。註家皆謂期門肝之募。肝主血。故刺之以瀉血室之熱。果如此說乎。凡熱入血室諸條。何不及刺法乎。成無已謂奪血者無汗。故但頭汗出也。不知傷寒發黃證。其先致頭汗者。亦以爲奪血之由乎。王三陽云。此男子亦有之。夫下血譫語者。男子固當有之。雖然所謂血室。卽是子宮。男子豈有之乎。方有執金鑑。亦皆以爲丈夫之病。不可從矣。再按金匱以此章入婦人雜病篇。脈經亦然。

二百二十七。汗出譫語者。以有燥屎在胃中。此爲風也。須下之。過經乃可下之。下之若早。語言必亂。以表虛裏實故也。下之則愈。宜大承氣湯。須下

之之字。宋本作者。今依成本改之。則字依成本及玉函補之。

風當作實。傳寫之誤也。本篇有之大便秘。身微熱者。此爲實也。急下之。宜大承氣湯。辨可下篇亦言。病腹中滿痛者。此爲實也。當下之。宜大承氣湯是也。魏荔彤以內經腸風胃風。牽強立論。可謂妄也。下之若早。語言必亂八字。錯簡也。當在宜大承氣湯句下始合。言汗出譫語者。此燥屎在胃中爲實也。須下之。雖然表證未盡解者。不可下之。過經。謂表解也。邪氣去表入裏。是以表虛裏實也。惟其表虛裏實。故下之則愈。宜大

承氣湯。下之若早。語言必亂。以表未虛裏未實故也。虛實二字。當作邪氣之去來看焉。再按。魏荔彤過經解曰。過經者。去經入府也。不知柴胡條。亦有稱過經者矣。

〔二百一十八〕傷寒四五日。脈沈而喘滿。沈爲在裏。而反發其汗。津液越出。大便爲難。表虛裏實。久則譫語。

滿同懣悶也。越猶言發。字典越字註云。又散也。左傳昭四年。風不越而殺。註。越。散也。又爾雅釋言。越。揚也。註。謂發揚。周語。伯越九原。註。越。揚也。晉語。使越于諸侯。註。發聲聞也。言傷寒四五日。脈沈而喘悶。此爲邪氣在裏。以脈沈故也。合次條及後二百三十一條考之。此證宜以白虎湯以解其裏熱。而反發汗。津液發出。則胃中乾燥。大便因爲難。難者求而不得之辭。以尿既爲鞭故也。此爲表虛裏實。至其久則發譫語。以穢氣犯神明也。宜用大小承氣下之。

〔二百二十九〕三陽合病。腹滿身重。難以轉側。口不仁而面垢。譫語遺尿。發汗則譫語。下之則額上生汗。手足逆冷。若自汗出者。白虎湯主之。

玉函補之。玉函。原作瀕。並作厥。脈經口字下。有字字。無若字。

而字。依成本。

金鑑曰。三陽合病者。太陽之頭痛發熱。陽明之惡熱不眠。少陽之耳聾寒熱等皆具也。

劉棟曰。口不仁者。謂口爽不知五味也。

發秘曰。白虎湯主之五字。當移遺尿句下讀焉。以古人爲文法所拘。故

綴於條末。

正珍按。宮義方解亦同焉。

惟忠曰。此以其邪之熾于一陽。事同陰陽別論云二陽陽明也。不宜發汗。不宜下。故挫其勢

於裏者也。

正珍曰。此證雖以三陽命焉。腹滿身重讞語。皆屬陽明內熱之病。故不

發汗。不和解。唯用大寒以挫其壯熱也。發汗則讞語下似脫一甚字。當

補之。瘧濕喝篇云。太陽中喝云云。發汗則惡寒甚。加溫針則發熱甚。數

下之則淋甚。以此文勢考之。脫簡明甚。若其發汗則讞語甚者。由津液

越出。大便燥結也。如斯者。當議大小承氣湯也。若其下之則額上生汗。

瘧濕喝篇曰。濕家下之。額上汗出微喘。小便不利者死。可見下後額上汗出者。果爲虛寒危急之證矣。手足逆冷。或自汗出者。大便未

輒其裏未實。而下之頗早故也。如是者。急可救之。宜通脈四逆湯。厥陰篇曰。大

汗若大下利。而脈冷者。四逆湯主之。下利清穀。裏寒外熱。汗出而厥者。通脈四逆湯主之。按病證曰不仁。寒熱痛痺并不知覺

之名。病源云。溫之如覆衣。不覺知。是名爲不仁也。辟諸不仁人。路視人之患難。忽然無介于心。是

以謂之不仁。素問痺論云。皮膚不營。故爲不仁。程氏遺書云。醫家以不

認痛癢謂之不仁。人以不知覺不認義理爲不仁。譬最近是也。正字通

以痿痺爲不仁。後漢書班超傳註。以不遂爲不仁。皆非也。馬時素問註

以痿痺爲不仁。後漢書班超傳註。以不遂爲不仁。皆非也。馬時素問註

云。果核中有仁。惟肉無所知。則若有不能如仁有生意矣。其說迂遠。不可取也。香川太冲行餘醫言云。一身皮膚上摸摩之。而自以爲非吾身也。猶隔靴搔痒之意。便是人而非人。故曰不仁也。然而考之素問。白論不仁且不用。名曰肉苛。苛乃苛政之苛。亦有不仁之意存焉。可見太冲非人之訓。大非古人命名之義也。若其所謂口中不仁者。或口不能言語。或口不覺寒熱痛痒。或口不能辨五味。皆謂之口中不仁。豈唯不知味一事爲然乎。

〔二百二十一〕二陽併病。太陽證罷。但發潮熱。手足漿漿汗出。大便難而譫語者。下之則愈。宜大承氣湯。

成無已曰。本太陽病併於陽明。名曰併病。太陽證罷。是無表證。但發潮熱。是熱併陽明。一身汗出爲熱越。今手足漿漿汗出。是熱聚於胃也。必大便難而譫語。經曰手足漿漿而汗出者。必大便已鞭也。與大承氣湯。以下胃中實熱。正珍按。手足漿漿汗出者。言至手足之末。漿漿然汗出也。詳見二百十八條。成註誤矣。

程知曰。併病者。一經證多。一經證少。有歸併之勢也。惟忠曰。此俟其表之已除。而後攻其裏者也。

〔二百二十二〕陽明病。脈浮而緊。咽燥口苦。腹滿而喘。發熱汗出。不惡寒反惡熱身重。若發汗則躁。心愢愢反譫語。若加溫針。必怵惕煩躁。不得眠。

若下之則胃中空虛。客氣動膈。心中懊懣。舌上胎者。梔子豉湯主之。若渴欲飲水。口乾舌燥者。白虎加人參湯主之。若脈浮發熱。渴欲飲水。小便不利者。猪苓湯主之。則燥之證。成本作燥。非。當改之。千金翼。心字下。有中字。懣懣下。有底字。胎字上。有白字。皆當從而補之。玉函千金翼。并無加人參三字。非也。不可從矣。溫針。成本作燒針。

成無已曰。懣懣者。心亂。

方有執曰。怵惕恐懼貌。

正珍曰。陽明病。至身重二十七字。乃熱結在裏。而無燥屎之證。與前三陽合病條同焉。宜與白虎湯。以挫其熱。若認其脈之浮。以爲表未解而發其汗。則津液越出。大便爲鞭。令人煩躁。心亂而反譫語。乃承氣證也。謂之反者。以其發汗不徒無益。反使之增劇也。若加溫針。則致火逆。怵惕煩躁不得眠。所謂太陽傷寒者。加溫針必驚。是也。乃桂枝去芍藥加蜀漆牡蠣龍骨湯。桂枝甘草龍骨牡蠣湯等證也。若認其腹滿汗出惡熱。以爲有燥屎。而下之。則胃中空虛。客氣動膈。令人心下痞鞭。所以然者。以本無燥屎也。乃甘草瀉心湯證也。心中懊懣以下。不與上文相屬。當別爲一條也。心中懊懣上。當補入陽明病三字。蓋脫簡也。若其旨義。則太陽篇中已具。茲不復解云。胎字說。見後二百三十八條註中。又按。梔子猪苓二證。並非陽明病。而冒以陽明病者。以舌胎口渴。皆爲陽明部位證也。

或疑此章心中懊憹以下別爲一章似未必是何也。心中懊憹舌上胎者必是下後一證與上文相接且下二證亦必下後變證耳。余曰否不然也。何則此章始不云主方其誤發汗亦不云主方其誤加溫針亦復不云主方豈獨於下後突然列數證揭數方乎。若夫無有一陽明證而冒云陽明其例不一而足如陽明病脈浮無汗而喘者發汗則愈宜麻黃湯太陰病脈浮者可發汗宜桂枝湯及少陰病急下大承氣三條皆爾。

猪苓湯方

猪苓

去皮

茯苓

澤瀉

阿膠

滑石

碎各一兩

右五味以水四升先煮四味取二升去滓內阿膠烱消溫服七合三服全

阿膠作甘膠非也成本內字下有下字衍也

二百三十二陽明病汗出多而渴者不可與猪苓湯以汗多胃中燥猪苓湯復利其小便故也

成無已曰針經曰

五臟津液別屬

水穀入於口輸於腸胃其液別爲五矣天寒衣

薄則爲溺天熱衣厚則爲汗是汗溺一液也汗多爲津液外泄胃中乾燥故不可與猪苓湯利小便也

正珍曰此承前條陽明病用猪苓湯證發之言陽明病汗出多而渴者

雖小便不利，不與猪苓湯。蓋汗與小便同是一液，故汗多者，小便必不利。津液內竭也。非蓄而不利也。此證宜與白虎加入參湯。

〔二百三十三〕脈浮而遲，表熱裏寒，下利清穀者，四逆湯主之。

成無已曰：浮爲表熱，遲爲裏寒，下利清穀者，裏寒甚也。與四逆湯溫裏散寒。

正珍曰：是三陰篇中錯亂之文。表熱裏寒者，明其因之辭。謂外有太陽表熱，內有太陰裏寒。如下利腹脹滿，身體疼痛亦然。大抵表裏俱病者，先治表而後治裏。今以下利清穀之急，故先救其裏也。

〔二百三十四〕若胃中虛冷，不能食者，飲水則噦。

噦者，後世所謂呃逆也。靈樞雜病篇云：噦以草刺鼻，便噦，噦而已。無息而疾迎引之立已。大驚之亦可已。是也。先輩諸家或以爲咳逆，或以爲乾嘔，皆非也。

〔二百三十五〕脈浮發熱，口乾鼻燥，能食者則嘔。千金翼：鼻作舌。是也。

能食當作不能食。右二條通計二十七字。舊二十六字。今補不能食二字。合二十七字。當在下條梔

子豉湯主之句下。合爲一章。蓋承上文不能食，觸類長之者已。

〔二百三十六〕陽明病，下之其外有熱，手足溫，不結胸，心中懊憹，飢不能食，但頭汗出者，梔子豉湯主之。



惟忠曰。誤下多爲結胸。如此證則否。乃變爲心中懊憹。故云不結胸。  
正珍曰。此陽明病下後。大邪已去。而餘熱少伏於內。而不得越者。與梔  
子豉湯。以解餘熱則愈。若因胃中虛冷不能食者。飲水則呃逆。宜附子  
理中湯溫之。非梔子豉湯證也。若脈浮發熱。口乾舌燥。不能食者。則嘔  
宜麻黃大青龍輩。亦非梔子豉湯證也。此示與上文不能食者。大有徑  
庭也。再按手足溫。乃手足熱。已見前一百二條。

〔二百二十七〕陽明病。發潮熱。大便秘。小便自可。胸脇滿不去者。與小柴

胡湯。可字下。玉函。有而字。與小柴胡湯五字。玉函成本全書。作小柴胡湯主之。非。

王肯堂曰。陽明爲病胃家實也。今便秘而言陽明病者。謂有陽明外證。  
身熱汗出不惡寒。反惡熱也。

金鑑曰。陽明病。發潮熱。當大便秘。小便數也。今大便秘。小便如常。非陽  
明入府之潮熱可知矣。况有胸脇滿不去之少陽證乎。故不從陽明治。  
而從少陽。與小柴胡湯主之也。

錢潢曰。此陽明兼少陽之證也。邪在陽明。而發潮熱。爲胃實可下之候  
矣。而大便反澀。則知邪雖入而胃未實也。小便自可。尤知熱邪未深。胸  
脇滿者。邪在少陽之經也。

正珍曰。陽明病有潮熱者。大便秘。小便當數。今反大便秘。小便可。

者。知其入臟腑有虛寒。而邪未實矣。此與柴胡加芒消條。證全同。而因稍有異。故先與小柴胡。以解少陽餘邪。凡云與者。皆權用之義。與主字不同也。滿。懣也。胸脇滿不去者。是邪猶在少陽。而未全歸于裏也。故仍以柴胡解之于中位也。若與柴胡而不解。當與柴胡加芒消湯。又曰。此條宜與柴胡加芒消湯條參考。



# 傷寒論集成卷七

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

〔二百二十八〕陽明病。脇下鞭滿。不大便而嘔。舌上白胎者。可與小柴胡湯。上焦得通。津液得下。胃氣因和。身微然汗出而解也。

成無已曰。陽明病。腹滿。不大便。舌上胎黃者。爲邪熱入府可下。若脇下鞭滿。雖不大便。而嘔舌上白胎者。爲邪未入府。在表裏之間。與小柴胡湯。以和解之。

程應虎曰。脇下鞭滿。不大便而嘔。自是大柴胡湯證也。其用小柴胡湯者。以舌上白胎。猶帶表寒故也。若胎不滑而瀉。則所謂舌上乾燥而煩。欲飲水數升。謂裏熱已耗及津液。此湯不可主矣。

錢潢曰。此亦陽明兼少陽之證也。上文雖潮熱。而大便反溏。小便自可也。此雖不大便而未見潮熱。皆爲陽明熱邪未實于胃之證。劉棟曰。上焦得通以下。後人之註。誤混本文也。

正珍曰。脇下鞭滿。乃小柴胡本條所謂脇下痞鞭者也。胎與胎古字通用。胎。煤也。字本作良。小補韻會良字註云。說文灰。良煤也。徐曰。火煙所生也。字典云。良。集韻。或書作胎。湯來切音胎。玉篇。良煤。煙塵也。合而考之。胎之爲胎明甚。瘕濕喝篇云。舌上如胎者。以丹田有熱。胸中有寒。如字可味矣。一說云。胎。苔也。非也。蓋胎者火煙所生。而傷寒舌胎。亦是熱氣所生。於義尤爲深切著明。若夫苔者水氣所生。與傷寒舌胎之義。冰炭相反。下筆詳慎。智慮周密者。當不應若是。

〔二百二十九〕陽明中風。脈弦浮大。而短氣。腹都滿。脇下及心痛。久按之氣不通。鼻乾。不得汗。嗜臥。一身及目悉黃。小便難。有潮熱。時時噦。耳前後腫。刺之小差。外不解。病過十日。脈續浮者。與小柴胡湯。脈但浮無餘證者。與麻黃湯。若下利腹滿加噦者。不治。

劉棟曰。此條後人之所記也。因太陽中篇。太陽病十日。以去脈浮細之條。又論柴胡湯麻黃湯之別也。

〔二百四十〕陽明病。自汗出。若發汗。小便自利者。此爲津液內竭。雖鞭不可攻之。當須自欲大便。宜蜜煎導而通之。若土瓜根。及大豬膽汁。皆可爲導。玉函。殺字下。有其字。無及字。成本及字下。有與字。

成無已曰。津液內竭。腸胃乾燥。大便因鞭。此非結熱。故不可攻。宜以藥

外治而導引之。

方有執曰。竭亦亡也。

金鑑曰。雖大便秘。而無滿痛之苦。不可攻之。

正珍曰。小便自利。當作小便不利。傳寫之誤也。故下文承之云。此爲津液內竭。乃前第五十九條所謂大下之後。復發汗。小便不利者。亡津液是也。蓋小便以自利爲常。以不利爲病。惟其常則津液內竭四字。無所照應也。且也論中云。小便自利者。每於其當不利。而反快利如常者而言。太陽中篇。抵當湯諸條可見矣。今此條突然言之。益知其誤寫無疑焉。先輩諸家。未有一言及此者。嗚呼。讀書若斯疎漏。豈足窺古人精微之訓哉。又按士瓜樓方見肘後方

蜜煎方

食蜜七合

右一味。於銅器內。微火煎之。稍凝如飴狀。攪之勿令焦著。欲可丸。併手捻作挺。令頭銳。大如指。長二寸許。當熱時急作。冷則輒以內穀道中。以手急抱。欲大便時。乃去之。疑非仲景意。已試甚良。蜜煎方。成本。作蜜煎導方非。玉函成本全書。無食字。成本全書。無右字。非。於銅器內。玉函成本全書。作內銅器中。攪成本作攪。非。欲可丸。玉函作俛可丸。是。之。後二字。宋板作當須。非。今依成本改之。玉函成本全書。無疑非仲景意。已試甚良。九字是也。

併手捻作挺者。謂兩手合併而捻之。欲剛柔得所也。挺與挺。挺古字通用。正字通。挺字註云。他頂切。木枝條挺出也。孟子註。趙岐曰。挺。杖也。字

典錠字註曰。音挺。金錠也。說文銅鉄模也。是也。若夫挺者。勁直貌。又拔也。寬也。與本文不合。按外臺二十五卷。駐車丸方後云。消膠令鎔。併手丸如大豆。併手二字。義與本論同。一說併字屬上句。手捻作挺四字爲句。非矣。以手急抱以下二十字。語意不通。蓋不知醫事者所攙當刪之。  
萬氏家抄卷三。靈樞法。凡諸秘結不通。或兼他症。又老弱虛極。不可用藥者。用蜜入皂角末少許。同熬至蜜老。乘熱捻如棗核大。納入穀道中。良久即通。

猪膽汁方

大猪膽一枚。瀉汁和少許法醋。以灌穀說內。如一食頃。當大便出。宿食惡物甚効。  
和少許法醋五字。成本。玉函。并作和醋少許四字。玉函成本全書。穀道內。作穀道中。又無宿食惡物甚効六字。

土瓜根方

外臺引古今錄驗。療大小便不通方。

取生土瓜根。搗取汁。以水解之。於筒中吹內下部即通。  
證類本草引肘後方。治小便不通。及關格方。

生土瓜根。搗取汁。以少水解之。筒中吹下部取通。

（二百四十一）陽明病。脈遲汗出多。微惡寒者。表未解也。可發汗。宜桂枝湯。  
玉函多字下。有而字。

金鑑曰。汗出多之下。當有發熱二字。若無此二字。乃是表陽虛。桂枝附子湯證也。豈有桂枝湯發汗之理乎。陽明病。脈當數大。今脈遲。汗出多。

設不發熱惡寒。是太陽表邪已解矣。今發熱微惡寒。是表猶未盡解也。故宜桂枝湯。解肌以發其汗。使初入陽明之表邪。仍還表而出也。

正珍曰。陽明病三字。承上條大便鞭言之。金鑑補發熱二字。極是。前第一百五十四條云。發熱微惡寒。外證未去者。柴胡桂枝湯主之。二百十七條云。微發熱惡寒者。表未解也。是也。錢潢解所謂遲者。非寒脈之遲。乃緩脈之變稱也。又非中寒之陽明脈遲也。錢潢此說頗失於鑿。遲唯是遲。以其當數。而不數言之而已。

二百四十二陽明病。脈浮無汗而喘者。發汗則愈。宜麻黃湯。

金鑑曰。是太陽之邪。未悉入陽明。猶在表也。當仍從太陽傷寒治之。發汗則愈。宜麻黃湯。

錢潢曰。此條脈證治法。皆寒傷營也。而仲景何故以陽明病冠之邪。蓋以太陽中篇之第一條曰。惡寒體痛。脈陰陽俱緊者。名曰傷寒。其次條又曰。惡風無汗而喘者。麻黃湯主之。此條雖亦無汗而喘。然無惡風惡寒之證。即陽明所謂不惡寒反惡熱之意。是以謂之陽明病也。

正珍曰。不惡寒惡熱大便鞭。皆陽明證也。故有此等證者。每以陽明稱之。汪琥云。無汗而喘。但浮不緊。何以定其爲陽明病。必其人目痛鼻乾身熱不得眠。故云陽明病也。雖然。此是素問陽明病之證。即仲景氏大



青龍湯所主安在其爲陽明乎。

二百四十三陽明病發熱汗出者此爲熱越不能發黃也但頭汗出身無汗劑頸而還小便不利渴引水漿者此爲瘀熱在裏身必發黃茵陳蒿湯主之。成本說汗出者之者及黃字當補之。引字一本作飲非。

成無已曰但頭汗出身無汗劑頸而還者熱不得越也小便不利渴飲水漿者熱甚於胃津液內竭也。

正珍曰陽明病發熱汗出而渴者白虎加人參湯證也若發熱汗多而不渴者此爲有燥屎大承氣湯證也二證俱不能發黃以其熱發揚也越猶言發劑猶言限詳見于前瘀蓋與甚通用衣虛切音於說文云甚鬱也瘀熱即鬱熱也已先輩諸家不達此義或謂熱之不得越譬猶瘀血之不行是以謂之瘀熱吁迂亦甚矣若其但頭汗出者鬱熱不越上蒸攻頭也其身發黃者其熱外薄肌膚而鬱蒸也茵陳蒿湯以通大便則鬱從而解矣金鑑云小便不利濕蓄膀胱也非也何者濕是外邪之名猶風之與暑也故曰中濕中風中暑則可若謂濕蓄某處風蓄某處暑蓄某處則不可況非此證本從中濕而來者乎。

茵陳蒿湯方

茵陳蒿

六兩

梔子

十四枚

大黃

二兩去皮

右三味。以水一斗二升。先煮茵陳。減六升。去滓。內二味。煮取三升。去滓。分溫三服。小便當利。尿如皂莢汁狀。色正赤。一宿腹減。黃從小便去也。漢全書作取非

玉函成本全書。俱脫二升二字。當補之。六升下。肘後。千金外臺並有去滓二字。分三服。玉函。成本。俱作分溫三服是。今從之。

小便當利以下二十三字。後人所攙。當刪之。何則。此證小便不利者。因瘀熱熬津液。而不因停飲。故方中無一品之主利水者。則小便當利之語。頗失主當。微一也。夫服大黃者。雖無病之人。其尿皆赤。豈惟黃病而然耶。又其黃從小便去一語。尤爲無謂。蓋黃之解於此湯。病根已去也。豈在從小便去乎。果是則表病面赤。發汗而去。亦謂赤從其汗去乎。微二也。一宿腹減之語。依後之茵陳蒿湯腹微滿文而言。然諸治腹滿方。俱未見方後有腹減之文者。豈獨於其微滿者而言乎。微三也。三微既得。攙其可掩邪。一說云。黃從小便去之黃。指大黃而言。鑿矣。

〔二百四十四〕陽明證。其人喜忘者。必有畜血。所以然者。本有久瘀血。故令喜忘。尿雖鞭。大便反易。其色必黑者。宜抵當湯下之。玉函。無宜字。下字作主字。

成無已曰。內經素問調經篇曰。血并於下。亂而喜忘。此下本有久瘀血。所以喜

忘也。

正珍曰。喜忘謂數忘。畜蓄同。韵會小補蓄字註云。勅大切。說文。積也。通作畜。是也。所以然以下二十五字。王叔和釋文。當刪之。此論陽明證下

焦有蓄血之證。凡論中稱少陰證。陽明證者。

少陰證。見三十九條。陽明證。見二百十四條。

皆於

章中言之。其以爲冒首。特斯一條已。陽明二字。以其久不大便而言。言病人久不大便。喜忘前言往事者。以下焦有久瘀血也。抵當湯下之則愈也。程應旂謂血與糞併。故易而黑。張璐謂大便色黑。雖曰瘀血而燥結亦黑。但瘀血則黏如漆。燥結則晦如煤。此爲明辨也。吁。二子者。何其爲叔和所欺之甚。

〔二百四十五〕陽明病。下之心中懊懣而煩。胃中有燥屎者可攻。腹微滿。初頭輒後必漉。不可攻之。若有燥屎者。宜大承氣湯。

玉函。腹微滿上。有其人二字。是。必漉。作漉者非。

成無已曰。下後心中懊懣而煩者。虛煩者。當與梔子豉湯。若胃中有燥屎者。非虛煩也。可與大承氣湯下之。其腹微滿。初輒後漉。此無燥屎。此熱不在胃而在上也。故不可攻。

金鑑曰。陽明病。下之後。心中懊懣而煩者。若腹大滿。不大便。小便數。知胃中未盡之燥屎復輒也。乃可攻之。

〔二百四十六〕病人不大便五六日。繞臍痛。煩躁。發作有時者。此有燥屎。故使不大便也。

錢潢曰。不大便五六日。而繞臍痛者。燥屎在腸胃也。煩躁。實熱鬱悶之所致也。發作有時者。日晡潮熱之類也。

張志聰曰。不言大承氣湯者。省文也。此接上文而言。亦宜大承氣湯明矣。

正珍曰。發作有時。以發熱言。如前百五十三條。百六十一條可見矣。

〔二百四十七〕病人煩熱。汗出則解。又如瘧狀。日晡所發熱者。屬陽明也。脈實者。宜下之。脈浮虛者。宜發汗。下之與大承氣湯。發汗宜桂枝湯。玉函又作後。

宜下宜發之宜。並作當。與作宜。皆宜從而改之。

差後病篇曰。傷寒差已後。更發熱者。小柴胡湯主之。脈浮者。以汗解之。脈沈實者。以下解之。

金鑑曰。病人謂病太陽經中風傷寒之人也。

方有執曰。煩熱太陽也。故脈浮虛。而宜汗散。如瘧狀。謂熱之往來。猶瘧之作。輟有時而不爽也。

張璐曰。日晡所發熱。則邪入陽明審矣。發熱。即潮熱。乃陽明之本候也。錢潢曰。脈浮虛者。即浮緩之義。爲風邪猶在太陽之表。

希哲曰。脈實乃沈實。對下文浮虛。

正珍曰。又字玉函作復是也。復與覆通。反也。論中復字訓反者。不一而足。如九十一條。九十二條。百六十條。皆爾。如瘧狀。即是潮熱。但以其斯時而發言之。非寒熱交作也。七十九條曰。發汗若下之。而煩熱胸中窒。

者。梔子豉湯主之。論中煩熱僅二條。猶煩疼煩渴煩驚煩滿煩亂之煩。惟忠分爲胸煩身熱二證。非也。煩帶說之辭也已。言太陽病煩熱者。發汗汗出則解。百六十六條云。傷寒汗出解之後。亦以發汗言也。汗後不啻不解。反如瘧狀潮熱者。轉屬陽明也。其脈沈實者。轉而純也。故承氣下之。若脈浮緩者。轉而未純也。當先與桂枝以發太陽未盡之表也。一說以汗出爲自汗。大非也。真武湯證云。太陽病。發汗汗出不解。其人仍發熱。大柴胡湯證云。傷寒發熱汗出不解。皆就發汗上言之。可見本條汗出。亦因發汗而汗出之謂矣。又按本文汗出則解一句。與前八十七條瘡家雖身疼痛不可發汗。汗出則瘳之條。同一句法。蓋足以相證也。果是自汗。當云汗出解。安用則字爲語辭乎。

〔二百四十八〕大下後六七日不大便。煩不解。腹滿痛者。此有燥屎也。所以然者。本有宿食故也。宜大承氣湯。

方有執曰。煩不解。則熱未退可知。腹滿痛。則胃實可診。故曰有燥屎。金鑑曰。下之未盡。仍當下之。

正珍曰。所以然十字。叔和釋文當刪之。

〔二百四十九〕病人小便不利。大便乍難乍易。時有微熱。喘冒不能臥者。有燥屎也。宜大承氣湯。

燥屎乃日外所食之糟粕，牢結而乾著腸內者，大便乃現今所食之糟粕，潤輒而順下肛門者，今病人小便不利，大便乍難乍易者，燥屎橫道爲之障礙也。况微熱喘冒不能臥，是煩躁譫狂之漸乎。雖無滿痛，亦必有燥屎，故宜大承氣湯下之。金鑑云：大便乍難乍易者，蓋熱將欲作結而液未竭也。吁！果如是則穀已，豈謂之燥屎哉。錢潢云：乍難大便燥結也，乍易旁流時出也。雖然本文難易二字，唯於一大便上而言，豈分配燥與潤而言乎。

〔二百五十一〕食穀欲嘔者，屬陽明也。吳茱萸湯主之。得湯反劇者，屬上焦也。

成無已曰：得湯反劇者，上焦不內也，以治上焦法治之。

趙開美曰：婁氏云：得湯反劇者，火也。當用生薑黃連治之。方有執曰：食穀欲嘔，胃寒也。

正珍曰：陽明二字，本當作中焦，乃對下文上焦之句。王叔和不知文法若斯，妄謂中焦，即陽明胃腑所位，遂改作陽明者已。食穀欲嘔者，胃中虛寒，而飲水泄瀉故也。吳茱萸之溫中，生薑之逐飲，爲是之故也。按太陽下篇云：傷寒胸中有熱，胃中有邪氣，腹中痛，欲嘔吐者，黃連湯主之。由是觀之，屬上焦者，乃胸中有熱之謂。當與小柴胡湯者也。前百五十

四條指小柴胡湯以爲治上焦之方。亦可以徵矣。按金鑑以屬上焦爲太陽表熱。處以葛根加半夏湯。希哲劉棟處以瓜蒂散。皆屬臆造。宜排此焉。

吳茱萸湯方。

吳茱萸一升 人參三兩

生薑六兩

大棗十二枚

右四味。以水七升。煮取二升。去滓。溫服七合。日三服。二升。全書集註並作三升。非。

二百五十一。太陽病。寸緩關浮尺弱其人發熱汗出。復惡寒。不嘔。但心下痞者。此以醫下之也。如其不下者。病人不惡寒而渴者。此轉屬陽明也。小便數者。大便必艱。不更衣十日無所苦也。渴欲飲水。少少與之。但以法救之。渴者宜五苓散。如其以下十三字。玉函作若不下其人復不惡寒而渴者十二字。

寸緩關浮尺弱。其人八字。叔和所攙。當刪之。發熱汗出復惡寒者。太陽中風也。不嘔爲其裏未受邪也。但心下痞者。此以醫下之也。如是者。當先與桂枝以解表。表解已而後。與大黃黃連瀉心湯。以治其痞。例見前百七十三條。如不下之。其人不惡寒而渴者。此爲轉屬陽明也。當俟其表悉解。而與白虎加人參湯也。小便數以下似有關文。不可強解。姑存疑云。

二百五十二。脈陽微而汗出少者。爲自和也。汗出多者。爲太過。

〔二百五十二〕陽脈實。因發其汗出多者。亦爲太過。太過者。爲陽絕於裏。亡津液。大便因鞭也。

〔二百五十四〕脈浮而芤。浮爲陽。芤爲陰。浮芤相搏。胃氣生熱。其陽則絕。〔二百五十五〕跌陽脈浮而澀。浮則胃氣強。澀則小便數。浮澀相搏。大便則鞭。其脾爲約。麻子仁丸主之。

右四條叔和所攙。當刪之。

麻仁丸方

麻仁 二升

芍藥 半斤

枳實 半斤

大黃 一升

厚朴 一尺

杏仁 一升

右大味。蜜和丸。如梧桐子大。飲服十丸。日三服。漸加以知爲度。

麻仁丸。疑非仲景之方。厚朴一尺。枳實半斤。杏仁一升。煉蜜和丸。皆非

本論文法也。外臺引古今錄驗。而不引仲景傷寒論。亦可以證矣。

〔二百五十六〕太陽病。三日發汗不解。蒸蒸發熱者。屬胃也。調胃承氣湯

主之。主字。全書作汗非。外臺發汗不解四字。作發其汗病不解六字。

錢潢曰。蒸蒸發熱。猶釜飪之蒸物。熱氣蒸騰。從內達外。氣蒸濕潤之狀。

非若翕翕發熱之在皮膚也。

程應旂曰。此卽大便已鞭之徵。故曰屬胃也。熱雖聚於胃。而未見潮熱。



識語等證。主以調胃承氣者。於下法內從乎中治。以其日未深故也。

正珍曰。三日發汗不解。謂發汗及乎三日。仍未解也。不解者。邪氣之不解也。非表之不解也。按調胃承氣湯五字。脈經作承氣湯三字。宜從之。凡單稱承氣者。統大小承氣而言之。若夫調胃承氣。乃吐下後主藥。自有差別。不可混用也。

〔二百五十七〕傷寒吐後。腹脹滿者。與調胃承氣湯。

傷寒行吐方之後。諸證皆去。唯胃中不和。其腹脹滿者。藥毒遺害也。調

胃承氣可以解毒和胃。若夫發汗後之脹滿則否。故治法不同也。前第六十六條

發汗後腹脹滿者。厚朴生薑牛夏甘草人參湯主之。按成無已以吐爲嘔吐。以脹滿爲邪熱入胃。皆非

矣。凡論中云後者。皆以施治之後言之。如發汗後下後皆爾。若夫邪熱入胃而脹滿者。內必有燥屎。攻之不暇。豈取乎調胃緩弱之將耶。

〔二百五十八〕太陽病若吐若下若發汗後。微煩小便數。大便因鞭者。與

小承氣湯和之愈。成本全書并脫後字。當補之。玉函有之。

喻昌曰。微煩小便數。大便因鞭。皆是邪漸入裏之機。故用小承氣湯和之。

〔二百五十九〕得病二三日。脈弱無太陽柴胡證。煩躁心下鞭。至四五日雖能食。以小承氣湯。少少與微和之。令小安。至六日。與承氣湯一升。若不

大便六七日。小便少者。雖不能食。但初頭鞭後必澹。未定成鞭。攻之必澹。  
須小便利尿定鞭。乃可攻之。宜大承氣湯。煩躁。成本全書作煩燥。非。不能食。宋板。作不受食非。今依成本全書改之。

方有執曰。太陽不言藥。以有桂枝麻黃之不同也。少陽言藥。以專主柴胡也。凡以此爲文者。皆互發也。

錢潢曰。須待也。

劉棟曰。六日。當作五六日。

正珍曰。承氣湯上脫小字。當補之。四五日五六日。皆不大便之日數也。故下文承之云。不大便六七日。古文錯綜之妙。乃爾。否則至字。無所承當。前二百二十二條云。不大便五六日。上至十餘日。可見至字。暗寓不大便之義焉。不大便而能食。其屎雖鞭而未燥之候。若不大便而不能食。乃定鞭爲燥之診。宜與前二百二十五條互相參考矣。得病二三日。脈弱者。其熱不熾盛可知也。無太陽柴胡證。煩躁心下鞭者。其邪已入裏可知也。不大便至四五日者。其人雖能食。當以小承氣湯。少少與微和之。令小安也。少少者。不過三四合之謂。對一升而言也。若少少與之而不得尿。延至五六日者。乃與小承氣湯一升。雖然。若其小便少者。則雖不大便至六七日。且不能食哉。攻之則令人瘡。必待其小便數。屎爲定鞭。始可攻之。宜大承氣湯。

〔二百六十一〕傷寒六七日。目中不了了。睛不和。無表裏證。大便難。身微熱者。此爲實也。急下之。宜大承氣湯。

成無已曰。目中不了了。睛不和者。邪熱內甚。上熏於目也。方有執曰。了了。猶瞭瞭也。

金鑑曰。目中不了了。而睛和者。陰證也。睛不和者。陽證也。雖外無陽證。惟身微熱。內無滿痛。祇大便難。亦爲熱實。故曰此爲實也。睛不和者。謂睛不活動也。

正珍曰。無表裏證者。謂表無惡寒發熱頭項強等證。裏無腹滿便秘。熱譫語等證也。劉棟惟忠以表裏證爲柴胡證。非也。

〔二百六十一〕陽明病。發熱汗多者。急下之。宜大承氣湯。成本脫病字。當補之。張璠本。汗字下。補

出字。汗多二字。宜與前二百六十二條參考。

成無已曰。汗多者。熱迫津液將竭。急與大承氣湯。以下其府熱。

金鑑曰。陽明病不大便。發熱汗多不止者。雖無內實。亦當急下之。以全津液爲務也。宜大承氣湯下之。

〔二百六十二〕發汗不解。腹滿痛者。急下之。宜大承氣湯。

成無已曰。發汗不解。邪熱傳入府。而成腹滿痛者。傳之迅也。是須急下之。

正珍曰。病人雖表不解。腹滿痛者。不得不下之。九十三條曰。本先下之。而反汗之爲逆。若先下之。治不爲逆。是也。

〔二百六十二〕腹滿不減。減不足言。當下之。宜大承氣湯。

成無已曰。若腹滿時減。非內實也。則不可下。金匱要略曰。腹滿時減。復如故。此爲寒。當與溫藥。

正珍曰。若滿不痛者。虛也。宜厚朴生薑半夏甘草人參湯。

〔新增〕傷寒腹滿。按之不痛者。爲虛。痛者。爲實。當下之。舌黃未下者。下之。黃自去。宜大承氣湯。

金匱曰。按之心下滿痛者。此爲實也。當下之。宜大柴胡湯。

程林金匱直解曰。腹滿之證。虛者可按。實者不可按。故實者當下之。若舌有黃胎。而未經下者。則實熱結於中焦。下之則實熱除。而黃胎自去。正珍曰。此承上二條以辨腹滿之虛實也。舊本脫落。錯入金匱要略中。今依玉函補焉。

〔二百六十四〕陽明少陽合病。必下利其脈不負者。爲順也。負者。失也。互相剋賊。名爲負也。脈滑而數者。有宿食也。當下之。宜大承氣湯。

〔二百六十五〕病人無表裏證。發熱七八日。雖脈浮數者。可下之。假令已下。脈數不解。合熱。則消穀喜飢。至六七日不大便者。有瘀血。宜抵當湯。

〔二百六十六〕若脈不解而下不止必協熱便膿血也。

〔二百六十七〕傷寒發汗已身目爲黃所以然者以寒濕在裏不解故也。以爲不可下也。於寒濕中求之。

右四條叔和所攙當刪之。

〔二百六十八〕傷寒七八日身黃如橘子色小便不利腹微滿者茵陳蒿湯主之。

此乃前二百四十三條證而加腹微滿一證者蓋瘀熱在裏而大便鞭故已。

〔二百六十九〕傷寒身黃發熱者梔子蘗皮湯主之。者字。依原本全書。補之。

茵陳蒿湯證。瘀熱在裏而外無發熱且小便不利腹有微滿此則不然。外有發熱而無小便利腹滿。至於身黃則一而已矣。又云茵陳蒿湯主裏鬱。蘗皮湯主表鬱。

梔子蘗皮湯方

肥梔子十五箇 甘草一兩 黃蘗二兩

右三味以水四升煮取一升半去滓分溫再服。成本全書無肥字。玉函。作梔子十四枚。一升半。千金翼作二

升。並是。

〔二百七十〕傷寒瘀熱在裏身必發黃麻黃連軀赤小豆湯主之。續字。依成本及玉

至全書  
補之。

此乃茵陳蒿湯證輕者。無腹滿小便不利證。故治方亦輕。比之梔子蘗皮湯證。無發熱爲異矣。瘧鬱也。詳見前二百四十三條。瘧熱在裏是因身必發黃是證。

### 麻黃連軀赤小豆湯方

麻黃 二兩 去節

連軀 二兩 連根是

杏仁 四十箇 去皮尖

赤小豆 一升

大棗 十二枚 擘

生梓白皮 切 一升

生薑 二兩 切

甘草 二兩 炙

右八味。以潦水一斗。先煮麻黃。再沸。去上沫。內諸藥。煮取三升。去滓。分溫

三服。今日服盡。甘薑二兩。或本作一兩。千金。潦水。作勞水。非也。再沸。玉函作一二沸。右八味。成本。全書。作已上八味。非。又脫去傳二字。

錢潢曰。潦水。乃雨水所積。韓退之詩云。潢潦無根源。朝灌夕已除。

正珍曰。連軀。千金方及翼弁作連翹。嘗考郭璞爾雅連異翹。疏云。一名連苕。又名連草。本草云。由此觀之。連軀卽連翹明甚。註云。連翹根是。疑根字卽字訛已。一說云。潦水。千金作勞水。卽是甘爛水矣。若夫潦者。非有雨。則不可得而用。若取而貯之。則若其腐敗何。殊不知雨水之爲物。獨經旬日而不腐敗矣。五雜俎第三卷載。閩地近海。井泉多鹹。人家惟用雨水烹茶。蓋取其易致。而不臭腐。由是觀之。蓄而待用。亦何不可之有。金鑑云。無梓皮以茵陳代之。不知果可否。

辨少陽病脈證并治第九

〔二百七十一〕少陽之爲病。口苦咽乾目眩也。成本。全書。并脫爲字。當補之。

按少陽篇綱領。本亡而不傳矣。王叔和患其闕典。補以口苦咽乾目眩也。七字者已。固非仲景氏之舊也。按陽明篇云。陽明病。脈浮而緊。咽燥口苦。腹滿而喘。可見口苦咽乾。則是陽明屬證。而非少陽之正證矣。若夫目眩多逆治所致。如桂苓朮甘湯真武湯證是也。亦非少陽之正證也。況目眩之文。六經篇中無再見乎。又况柴胡諸條。一不及此等證候乎。蓋少陽者。指半表半裏之號。如其病證。則所謂往來寒熱。胸脇苦滿。默默不欲飲食。心煩喜嘔。是也。凡傷寒陽證其淺者爲太陽。其深者爲陽明。其在淺深間者。此爲少陽。是少陽篇當在太陽之後者也。今本論次之陽明後者。蓋依素問之次序也。其詳已見傷寒考中。再按少陽篇諸條。今本混入太陽篇中者過半。蓋古經篇簡錯雜。叔和從而爲之撰次也。

〔二百七十一〕少陽中風。兩耳無所聞。目赤。胸中滿而煩者。不可吐下。吐下則悸而驚。

中風二字。係外邪總稱。非傷寒中風之中風也。耳聾目赤。熱攻上焦也。乃少陽兼證。猶小柴胡條或以下諸證也。滿熱同。此證宜以小柴胡湯

以和解之不可吐下。若誤吐下，則有變證。若斯者，若吐下後，悸而驚者，乃責脈之漸，宜與茯苓桂枝甘草大棗湯輩以輯穆焉。

〔二百七十三〕傷寒脈弦細，頭痛發熱者，屬少陽。少陽不可發汗，發汗則譫語。此屬胃，胃和則愈。胃不和則煩而悸。宋板註云：悸，一云躁。則煩之則字，依成本補之。

王肯堂曰：凡頭痛發熱，俱爲在表，惟此頭痛發熱爲少陽者何也？以其脈弦細，故知邪入少陽之界也。

正珍曰：悸，作躁爲是。若煩而悸，乃小建中湯證，非胃實之候也。屬者，太陽轉屬少陽，而未純之辭，故仍有頭痛發熱之表也。如是者，宜與柴胡桂枝湯，蓋以其爲併病也。若以麻黃湯以發其汗，則津液內竭，大便燥結，令入譫語。此爲屬胃，宜與小承氣以和胃氣，胃和則愈。若其胃不和，則不但譫語，又令人煩而躁也。如此則當與大承氣湯也。

〔二百七十四〕本太陽病不解，轉入少陽者，脇下鞅滿，乾嘔，不能食，往來寒熱，尚未吐下，脈沈緊者，與小柴胡湯。王函：無本字，不能食，作不欲食飲，是矣。

金鑑曰：脈沈緊，當是脈沈弦。若是沈緊，是寒實在胸，當吐之診也。惟脈沈弦，方與上文之義相屬，始可與小柴胡湯當攻之。

〔二百七十五〕若已吐下發汗，溫針譫語，柴胡證罷，此爲壞病，知犯何逆，以法治之。



劉棟曰。右二條一章也。不可圈別。

正珍曰。讞語二字衍文。當刪之。病源候論引此條文。無讞語二字。爲是矣。壞病謂正證自敗。不可以少陽陽明等目名焉。以法治之。乃隨證治之之謂。

〔二百七十六〕三陽合病。脈浮大。上關上。但欲眠睡。目合則汗。

劉棟曰。此條後人之所攙也。

〔二百七十七〕傷寒六七日。無大熱。其人躁煩者。此爲陽去入陰故也。無故字。

無大熱。無翕翕發熱也。躁煩。當作煩躁。字之顛倒也。陰陽乃表裏之別稱。陽去入陰者。謂其邪去表入裏。陽去二字。似倒而非倒。蓋亦古文一法已。按論語云。迅雷風烈必變。楚辭九歌云。吉日兮辰良。後漢書云。候氣之法。爲室三重。戶閉塗墁。必周密。文法並與此同焉。

〔二百七十八〕傷寒三日。三陽爲盡。三陰當受邪。其人反能食而不嘔。此爲三陰不受邪也。

〔二百七十九〕傷寒三日。少陽脈小者。欲已也。

〔二百八十〕少陽病欲解時。從寅至辰上。

劉棟曰。右三條。後人之所攙也。

# 傷寒論集成卷八

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

## 辨太陰病脈證并治第六

按凡風寒之中人。其人素實強者。則成三陽之病。其人素虛弱者。則成三陰之病。非邪之有寒熱。蓋從其虛實而化也。故三陽自三陽。三陰自三陰。各各爲之病也。先輩諸人不達此義。皆謂陽病傳入而成陰病。蓋取諸素問者已。殊不知素問所謂三陰病。即是本論陽明之證。而與本論所謂三陰病者。實冰炭不相容矣。若其陽病而兼陰病。陰病而兼陽病。乃是表實裏虛之病。否則誤治所致。決非陽邪傳入而然也。又有陽病誤治。變爲陰病者。此非陽邪之因誤治。變爲陰寒也。但以其病本微而攻之太峻。故邪自解於外。而內更生病也。此雖其因或不同哉。均是虛寒所生。是以前治無異也。又嘗詳三陰諸論。所謂少陰乃邪之中表。從寒而化者。所謂太陰乃少陰之傳入而頗重者。所謂厥陰乃太陰之

傳入而至重至急者。猶太陽一轉。爲少陽。少陽一轉。爲陽明。此三陰宜以少陰爲始。太陰爲中。厥陰爲終也。今本論以太陰爲始者。蓋依素問之舊。竟非其本旨也。學者察焉。

二百八十一 太陰之爲病。腹滿而吐。食不下。自利益甚。時腹自痛。若下之必胸下結鞭。結。玉函作痞。是。

金鑑曰。此太陰裏虛。邪從寒化之證也。當以理中四逆輩溫之。

吳人駒曰。自利有時而腹自痛者。非若積蓄而常痛者。

正珍曰。三陰諸證。多是平素虛弱人之所病。故傳變早而兼併速也。故少陰篇云。少陰病得之二三日。麻黃附子甘草湯微發汗。以二三日無裏證。故微發汗也。可見三四日。便輒兼生裏證矣。裏證。卽自利腹痛類如真武證是也。則知少陰雖曰表病。其稍重則兼下利腹痛等證也。太陰者。謂少陰之邪之轉入于裏者也。寒邪在裏。臟腑失職。是以腹滿而吐。食不下。自利益甚。時腹自痛也。吐者。有物自胃中反出也。食不下者。胃脘不肯容也。史記倉公傳云。氣鬲病。使人煩懣。食不下。時嘔沫。義與本文同焉。自利益甚。承少陰之自利不甚言之。若以太陰病爲承之陽明病。或以爲陰病之始。則自利益甚一語。遂不可讀矣。時腹自痛。謂有時自痛。時也者。何以得寒則痛。得暖則止也。自也者。何以內無燥屎也。

蓋陽明之腹滿痛。由內有燥屎。故不得寒而發。不得暖而止。所以不同也。可見時自二字不苟下焉。故後亦論之曰。腹滿時痛者。屬太陰也。其義益明矣。若下之者。謂粗工見其腹滿痛。以爲陽明滿痛。妄攻下之也。殊不知此滿痛。固屬虛寒。而與陽明實熱證。大有攻救之別焉。其教之必。胸下結鞭者。裏虛益甚。而心氣爲之鬱結故也。前百三十八條曰。病發於陰而反下之。因作痞。卽是也。成無已解此條云。太陰爲病。陽邪傳裏也。陰寒在內。而爲腹痛者。則爲常痛。此陽邪于裏雖痛而亦不常痛。但時時腹自痛也。王三陽云。此風寒中於太陰經。非陽邪傳裏也。二說皆非矣。吳人駒云。自利益甚四字。當在必胸下結鞭句之下。亦非矣。按本篇散逸不少。才存什一已。又云。太陽病誤下。胸下痞鞭者。宜用附子粳米湯。

〔二百八十二〕太陰中風。四肢煩疼。陽微陰濇而長者。爲欲愈。

〔二百八十三〕太陰病欲解時。從亥至丑上。

劉棟曰。右二條。後人之所攙。故不採用。

〔二百八十四〕太陰病。脈浮者可發汗。宜桂枝湯。

此太陽太陰合病。以內寒不甚。故先治其表。若至於下利清穀。宜先救其裏。而後解其表也。

〔二百八十五〕自利不渴者屬太陰以其藏有寒故也。當溫之宜服四逆

輩。王臣無服字。服經。作宜四逆湯。

張兼善曰。經言輩字。謂藥性同類。惟輕重優劣不同耳。

金鑑曰。凡自利而渴者。裏有熱屬陽也。若自利不渴。則爲裏有寒屬陰也。今自利不渴。知爲太陰本藏有寒也。故當溫之。四逆輩者。指四逆理中附子等湯而言也。

魏荔彤曰。自利二字。乃未經誤下誤汗誤吐而成者。故知其藏本有寒也。

正珍曰。藏字泛指臟腑爲言。註家以爲脾之一臟非矣。厥陰篇云。下利欲飲水者。以有熱故也。白頭翁湯主之。今自利不渴。知其裏有寒也。屬太陰者。謂少陰轉屬太陰。乃少陰太陰併病也。按自利而渴一證。間有津液內亡而然者。惟其人小便不利。亦屬虛寒也。余嘗療下利煩渴小便不利者。每用四逆輩屢收全功。若徒以渴爲熱。以不渴爲寒。則未爲盡善矣。所謂自利不渴。爲有寒者。殊語其常已。若至其變證。則未必盡然也。成無已謂自利而渴者屬少陰。自利不渴者屬太陰。蓋爲少陰篇內叔和言所誤已。豈有渴爲少陰。不渴爲太陰之理乎。

〔二百八十六〕傷寒脈浮而緩。手足自溫者。繫在太陰。太陰當發身黃。若

小便自利者。不能發黃。至七八日。雖暴煩下利日十餘行。必自止。以脾家實腐穢當去故也。

劉棟曰。此條後人之所加也。故不採用。

二百八十七。本太陽病。醫反下之。因爾腹滿時痛者。屬太陰也。桂枝加芍藥湯主之。大實痛者。桂枝加大黃湯主之。

玉函無本字。全書集註。并爾作而。

大實痛以下。成本別爲一章。非矣。今依宋板玉函合之。桂枝加大黃湯六字。當作桂枝加芍藥大黃湯八字。太陽病本當發汗。而反下之以虛其裏。因而腹滿時痛者。此爲轉屬太陰也。是其太陽猶未解。而內更生太陰虛滿證。是以謂之屬。乃太陽太陰併病也。與桂枝加芍藥湯以解表和裏。若其大滿大實痛者。是表邪熾盛。併其裏以作陽明胃實。乃太陽陽明併病也。故與桂枝加芍藥大黃湯以解表攻裏。按前證腹滿時痛。表證誤下所生之病。而非表邪入裏而然。故惟滿而不實。時痛而不常痛。後證則表邪傳入之所致。非太陰之證。故屬太陰三字。在前證下。不在後證下。雖然。二證俱有表之未解。故皆以桂枝爲主。惟後證雖實。非太陰證。然以其同得之下後。而同有表之未解。同有腹滿痛。不得不附以辨其異。諸家不察。總一二證以爲太陰。合前後以爲傳入之邪。不思之甚。

桂枝加芍藥湯方

桂枝三兩 去皮

芍藥六兩

甘草二兩 炙

大棗十二枚 擘

生薑三兩 切

右五味以水七升煮取三升去滓溫分三服本云桂枝湯今加芍藥桂枝加大黃湯方

桂枝三兩 去皮

大黃二兩

芍藥六兩

生薑三兩 切

甘草二兩 炙

大棗十二枚 擘

右六味以水七升煮取三升去滓溫服一升日三服大黃二兩玉函作三兩成本作一兩非矣  
按方有執云桂枝加則以本方加也而用芍藥六兩水七升不合數殊不知方名本脫芍藥二字

〔二百八十八〕太陰爲病脈弱其人續自便利設當行大黃芍藥者宜減之以其人胃氣弱易動故也

劉棟曰上條之註文後人之所加也故藥不採用

辨少陰病脈證并治第七

〔二百八十九〕少陰之爲病脈微細但欲寐也

但字下脫惡寒二字當補之何則但者示無他事之辭但頭汗出餘處無汗不惡寒但熱及溫瘧身無寒但熱金匱篇等語可見矣少陰病豈但欲寐一證得以羣之乎若以其但欲寐謂之少陰病則所謂太陽病十

日以去。脈浮細而嗜臥者。亦名爲少陰病乎。闕文明矣。但惡寒者。所謂無熱惡寒卽是也。故麻黃附子細辛湯條云。少陰病始得之。反發熱。通脈四逆湯條云。少陰病反不惡寒。可見無熱惡寒。乃爲少陰本證矣。凡外邪之中人。其人素屬實熱者。則發爲太陽。其人素屬虛寒者。則發爲少陰。寒熱雖不同。均是外感初證也。已。故太陽篇辨之云。發熱惡寒者。發於陽也。無熱惡寒者。發於陰也。二發字。示其爲初證也。今邪從其虛寒而化。故其脈微細。但惡寒而欲寐也。宜與麻黃附子甘草湯。微發其汗也。成無已謂脈微細爲邪氣傳裏深也。非矣。按大經綱領諸條。脈證兼說者。惟太陽少陰。而其他四經。唯言證而不及脈。可見太陽乃三陽之始。而少陰果爲三陰之首矣。古人未有此說。因贅于茲。

〔二百九十一〕少陰病欲吐不吐。心煩但欲寐。五六日自利而渴者。屬少陰也。虛故引水自救。若小便色白者。少陰病形悉具。小便白者。以下焦虛。有寒不能制水。故令色白也。

〔二百九十二〕病人脈陰陽俱緊。反汗出者。亡陽也。此屬少陰。法當咽痛而復吐利。

〔二百九十三〕少陰病欬而下利。譫語者。被火氣劫故也。小便必難。以強責少陰汗也。



〔二百九十三〕少陰病脈細沈數。病爲在裏。不可發汗。

〔二百九十四〕少陰病脈微。不可發汗。亡陽故也。陽已虛。尺脈弱瀉者。復不可下之。

〔二百九十五〕少陰病脈緊。至七八日自下利。脈暴微。手足反溫。脈緊反去者。爲欲解也。雖煩下利必自愈。

〔二百九十六〕少陰病下利。若利自止。惡寒而蜷臥。手足溫者。可治。

〔二百九十七〕少陰病惡寒而蜷。時自煩。欲去衣被者。可治。

〔二百九十八〕少陰中風。脈陽微陰浮者。爲欲愈。

〔二百九十九〕少陰病欲解時。從子至寅上。

〔三百〕少陰病吐利。手足不逆冷。反發熱者。不死。脈不至者。灸少陰七壯。

〔三百一〕少陰病八九日。一身手足盡熱者。以熱在膀胱。必便血也。

〔三百二〕少陰病但厥無汗。而強發之。必動其血。未知從何道出。或從口鼻。或從目出者。是名下厥上竭。爲難治。

〔三百三〕少陰病惡寒身蜷而利。手足逆冷者。不治。

〔三百四〕少陰病吐利躁煩四逆者。死。

〔三百五〕少陰病下利止而頭眩時時自冒者。死。

〔三百六〕少陰病四逆惡寒而身蜷。脈不至。不煩而躁者。死。

〔三百七〕少陰病六七日息高者死。

〔三百八〕少陰病脈微細沈但欲臥汗出不煩自欲吐至五六日自利復煩躁不得臥寐者死。

右十九條王叔和所攙當刪之。

〔三百九〕少陰病始得之反發熱脈沈者麻黃附子細辛湯主之。

宋版。作麻黃細辛。

附子湯。今依玉函成本全書。改之。

錢潢曰始得之而即稱少陰病則知非陽經傳邪亦非直入中藏乃本經之自感也。

正珍曰少陰病謂脈微細但惡寒欲寐也凡三陰諸病皆邪從其虛化者而少陰實爲之始故云始得之也其反發熱者以其人裏虛而外實也謂之反者對無熱惡寒發於陰爲言麻黃附子細辛湯溫而散之則廖蓋太陽少陰合病也。

麻黃附子細辛湯方

麻黃

二兩去節

細辛

二兩

附子

一枚炮去皮破八片

右三味以水一斗先煮麻黃減二升去上沫內諸藥煮取三升去滓溫服一升日三服。

成本全書。脫諸字。當補之。

〔三百十〕少陰病得之二三日麻黃附子甘草湯微發汗以二三日無裏

證。故微發汗也。

裏字。依玉函成本全書。補之。

上條兼太陽之發熱。故用細辛以代桂枝。此條無發熱。故不用細辛。而用甘草。意在預扶其裏也。無裏證者。以其未見自利嘔吐等證言之。又曰。少陰病得之二三日。寒邪在肌表。而未入于裏。故微發汗。若其二三日。與此湯不愈。延至四五日。則必帶裏證。真武湯條曰。少陰病二三日。不已。至四五日。腹痛。小便不利。四肢沉重疼痛。自下利者。此爲有水氣。其人或咳。或便利。或下利。或嘔者。真武湯主之。是也。

麻黃附子甘草湯方

麻黃二兩去節

甘草二兩炙

附子一枚炮去皮破八片

右三味。以水七升。先煮麻黃一兩沸。去上沫。內諸藥。煮取三升。去滓。溫服一升。日三服。

趙嗣真曰。四逆生附。配乾薑。補中有發。二湯熟附。配麻黃。發中有補。正珍曰。仲景氏之用附子。其與乾薑配者皆生。四逆通脈四逆。白通加豬膽汁。茯苓四逆。乾薑附子諸劑是也。其與他藥配者皆炮。附子湯。真武湯。麻黃附子細辛湯。麻黃附子甘草湯。甘草附子湯。桂枝附子湯。桂枝加附子湯。桂枝去芍藥加附子湯。芍藥甘草附子湯。附子瀉心湯。是也。生用者。其證皆急。炮用者。其證皆緩。可見生則峻烈。炮則和緩。療體

本自有別矣。趙說不可從也。

〔三百十一〕少陰病得之二三日以上心中煩不得臥黃連阿膠湯主之。少陰病得之二三日以上十字宜從肘後方改作大病差後四字。臥字下當補者字。蓋梔子豉湯證之輕者大病差後胸中有餘熱而煩也。惟病後血液未充不可徒解其熱故以芍藥雞子黃阿膠三物復其血液。芍藥以治胸中熱煩也。肘後方時氣病起勞復篇曰大病差後虛煩不得眠眼中痛疼懊懣黃連四兩芍藥二兩黃芩一兩阿膠三小挺水六升煮取三升分三服亦可內雞子黃二枚。

黃連阿膠湯方

黃連

四兩

黃芩

二兩

芍藥

二兩

雞子黃

二枚

阿膠

三兩

一

右五味以水六升先煮三物取二升去滓內膠烱盡小冷內雞子黃攪令相得溫服七合日三服。

黃芩二兩成本作一兩。水六升成本作水五升。

〔三百十二〕少陰病得之一二日口中和其背惡寒者當灸之附子湯主之。

金鑑曰背惡寒爲陰陽俱有之證如陽明病無大熱口燥渴心煩背微惡寒者乃白虎加人參證也。今少陰病但欲寐得之二三日口中不燥而和其背惡寒者乃少陰陽虛之背惡寒非陽明熱蒸之背惡寒也故

當灸之。更主以附子湯。

魏荔彤曰。少陰病三字中。該脈沈細而微之診。見但欲寐之證。却不發熱而單背惡寒。此少陰裏證之確據也。全篇亦視此句。爲標的。

正珍曰。脈經無附子湯主之五字。此蓋前條麻黃附子甘草湯證所謂無裏證者也。故以艾火扶其陽氣。而逐外寒耳。口中和三字。承無裏證文發之。附子湯主之五字。宜從脈經刪去。

〔三百十二〕少陰病。身體痛。手足寒。骨節痛。脈沈者。附子湯主之。

金鑑曰。身體痛。表裏俱有之證也。如太陽病。脈浮發熱惡寒。身痛手足熱。骨節痛。是爲表寒。當主麻黃湯發表以散其寒。今少陰病。脈沈。無熱惡寒。身痛手足寒。骨節痛。乃是裏寒。故主附子湯。溫裏以散寒。

正珍曰。身體骨節疼痛者。寒邪盛也。手足寒。乃厥冷。兼見厥陰證也。蓋少陰厥陰合病矣。

附子湯方

附子

二枚炮去  
皮破八片

茯苓

三兩

人參

二兩

白朮

四兩

芍藥

三兩

右五味。以水八升。煮取三升。去滓。溫服一升。日三服。此方本在前條後。今移入于此。

〔三百十四〕少陰病。下利便膿血者。桃花湯主之。

按便膿血三條並係今之痢病。決非傷寒也。金匱要略下利篇有此證。此方而無少陰之目。且外臺桃花湯下。引崔氏方書。療傷寒後赤白帶下無數。可徵矣。意是雜病論中文錯亂入此者已。虛痢下膿血者。當與此湯。若其熱邪熾盛。裏急後重者。非此湯所宜也。

### 桃花湯方

赤石脂

一斤一半全用一半節末

乾薑

一兩

粳米

一升

右三味以水七升煮米令熟去滓溫服七合內赤石脂末方寸匕日三服若一服愈餘勿服

張志聰曰赤石脂色如桃花故名桃花湯或曰赤石脂即桃花石也

劉棟曰溫服七合之服字要略無之爲是不然則文意不通

正珍曰赤石脂一半全用者與乾薑粳米同煎之也一半節末者和湯服之也清王子接古方選注云桃花湯非名其色腎藏陽虛用之一若寒谷有陽和之致故名此可謂過鑿矣

〔三百十五〕少陰病二三日至四五日腹痛小便不利下利不止便膿血

者桃花湯主之

全書。痛作備非。

自少陰病至下利不止二十字蓋剽竊後真武湯條加以便膿血三字者益明膿血三條本非少陰病而叔和氏強屬之少陰矣

〔三百十六〕少陰病。下利便膿血者。可刺。

發秘曰。痢病每多腹裏拘急而痛。故刺以救其急。

〔三百十七〕少陰病。吐利手足逆冷。煩躁欲死者。吳茱萸湯主之。

成本。一作厥。

張璐曰。少陰病兼厥陰之候也。

劉棟曰。下利清穀而手足厥冷。煩躁欲死者。四逆之主也。嘔吐而下利。手足厥冷。煩躁欲死者。吳茱萸湯之主也。故吳茱萸湯以吐爲主也。四逆湯以利爲主也。是下利二證之別。不可不識也。

正珍曰。少陰病。以無熱惡寒脈微細言之。吐利逆冷。煩躁欲死。已見裏證也。蓋少陰兼厥陰者。如不合病。則是併病已。陽明篇云。食穀欲嘔者。吳茱萸湯主之。厥陰篇云。乾嘔吐涎沫頭痛者。吳茱萸湯主之。此條以嘔爲主者諦矣。若原其因。則胃中虛寒。而飲水然蓄。陽氣爲是被閉。因乃厥逆者也。

〔三百十八〕少陰病。下利咽痛。胸滿心煩者。猪膚湯主之。

者字。依成本全書。補之。禮內則。鄭玄。

注曰。膚切肉也。

滿。懣也。胸滿心煩。謂胸中擾擾而困。心中鬱鬱而熱也。皆上焦有熱之候。權與猪膚湯。以治其標也。此是少陰異證。而胸中有假熱者。雖似黃連湯。胸中有熱。胃中有寒證。然外證大異。內寒甚於彼。而下利。故雖有

胸悶心煩。非實熱而然。卽與白通加豬膽汁湯之心煩同因者也。故雖有心煩。非芩連苦寒所宜。况調胃承氣類乎。是以用豬膚白蜜白粉等。其性平而能解熱者。以調中解熱也。豬膚卽豬肉。本草明稱。性平解熱毒。考證見下。又曰。下利咽痛。通脈四逆湯。亦有之證。宜參考。

### 豬膚湯方

豬膚 一斤

右一味。以水一斗。煮取五升。去滓。加白蜜一升。白粉五合。熬香和令相得。溫分六服。

喻昌曰。豬膚者。豬厚皮去肥白油者也。白粉。白米粉也。

錢潢曰。豬膚一味。方中向未注明以何者爲膚。致使前後註家。議論紛然各異。如吳緩謂燂豬時。刮下黑膚也。方有執謂本草不載。義不可考。說者不一。用者不同。然既曰膚。當以燂豬時所起之皮外。毛根之薄膚。爲是。王好古以爲豬皮。尙論云。若以燂豬皮外毛根薄膚。則蒼劣無力。且與熬香之說不符。但用外皮。去其內層之肥白爲是。其說頗通。若果以燂豬時毛根薄膚。則薄過于紙。且與垢膩同下。熬之有何香味。以意度之。必是毛根深入之皮。尙可稱膚。試觀刮去毛根薄膚。毛斷處。毛根尙存皮內。所謂皮之去內層。極爲允當。



正珍曰。按儀禮燕禮有內羞註云。羞饌之實。糗餌粉羞。疏云。此二物皆粉。稻米黍米所爲也。釋名云。粉。分也。研米令分散也。合而考之。白粉卽米粉。喻昌說是也。熬香二字。特於白粉言之。喻昌兼猪膚說之非矣。錢潢以白粉爲粟粉。亦非矣。

〔三百十九〕少陰病。二三日咽痛者。可與甘草湯。不差者。與桔梗湯。

甘草湯方

甘草 二兩

右一味。以水三升。煮取一升半。去滓。溫服七合。日二服。二服。外臺作三服。非。

桔梗湯方

桔梗 一兩 甘草 二兩

右二味。以水三升。煮取一升。去滓。溫分再服。甘草二兩。外臺作三兩。溫分。玉函成本全書。并作分溫。是。

劉棟曰。二湯皆少陰部位。權用之方也。

正珍曰。二方甘草皆生用。而不多。宜熟察焉。外臺甘草湯方。亦無炙字。按甘草湯以下。治咽喉五方。蓋雜病論中之方。不可獨屬少陰病也。想因前條有咽痛一證。叔和氏遂以咽痛爲少陰一候。妄冠少陰病三字。以附載於此已。非謂不爲仲景氏方也。

〔三百二十〕少陰病。咽中傷生瘡。不能語言。聲不出者。苦酒湯主之。

金鑑曰：咽痛不愈，甚劇者，咽中爲痛，所傷漸乃生瘡，不能言語，聲音不出，所必然也。

錢廣曰：今之優人，每遇聲啞，即以生雞子白啖之，聲音即出，亦此方之遺意也。

張志聰曰：苦酒，鹽也。

劉棟曰：此亦權用之方也。

正珍曰：按王肯堂以苦酒爲酒之苦者，非矣。本草綱目醋條，陶弘景曰：以有苦味，俗呼苦酒。張華博物志云：龍肉以鹽漬之，則文章生。晉書張華傳云：陸機嘗餉張華鮓，于時賓客滿座，華發器便曰：此龍肉也。衆未之信，試以苦酒濯之，必有異。既而五色光起，機還問鮓主，果云：園中茅積下得一白魚，質狀殊常，作鮓過羹，故相獻，合而攷之，苦酒之爲鮓，其尙何疑，肯堂妄人哉。

### 苦酒湯方

半夏

洗破如棗核十四枚

雞子

一枚去黃內上苦酒著雞子殼中

右二味，內半夏著苦酒中，以雞子殼置刀環中，安火上，令三沸，去滓少少含嚥之，不差更作三劑。玉函成本全書：核字下，有大字：玉函無三劑二字，并當從之。全書三劑下，有服之二字，非也。

按玉函經云：雞子一枚去黃，內苦酒於殼中，由是考之，本論二著字俱

是於字之誤。當改之。上苦酒。謂上好苦酒。外臺喉痺篇。引古今錄驗。載此方。作淳苦酒。可徵矣。言雞子一枚。去黃留白。納上好苦酒於其卵殼中也。聖濟總錄。苦酒湯。治少陰病。咽中生瘡。腫聲不出。牛夏十四枚。雞子一枚。去黃留白。入苦酒于蛋中。又以牛夏。入苦酒內。以雞殼放剪刀環中。安火上。煮三沸。少少含咽。

〔三百二十一〕少陰病。咽中痛。半夏散及湯主之。外臺。作咽喉。劉棟曰。是亦權用之方也。

正珍曰。此亦治咽痛之一方。意者病因有異已。金鑑云。咽痛者。謂或左或右一處痛也。咽中痛者。謂咽中皆痛也。劉棟亦依中字。以辨其輕重。用意太過。反失於鑿。又按。痛字下似脫者字。當補之。

半夏散及湯方

半夏

桂枝去皮

甘草

右三味等分。各別搗篩已。合治之。白飲和服。方寸匕。日三服。若不能散服者。以水一升。煎七沸。內散兩方寸匕。更煮三沸。下火令小冷。少少嚥之。半夏有毒。不當散服。兩字。玉函作一二二字。全書作一兩二字。右字。成本全書。作已上。非。玉函成本全書。并無半夏有毒不當散服八字是也。

〔三百二十二〕少陰病下利。白通湯主之。

由下條考之。此條下利。脫脈微者三字。其方亦脫人尿五合四字。俱當補之。按三陰病下利。有大同小異數證。不可不詳也。凡三陰病。寒邪

縱肆陽氣爲是所鬱閉。下利脈微者。乃白通湯所主也。其劇者。白通加猪膽湯所主也。寒邪太盛。陽氣虛脫。下利清穀者。四逆湯所主也。其劇者。通脈四逆湯所主也。若夫眞武湯。則有水氣而下利者。乃用之。白通之用蔥白加猪膽。而不取甘草。豈非爲閉之故乎。四逆之一主扶陽。豈非爲脫之故乎。眞武之用苓朮。豈非爲水之故乎。

### 白通湯方

蔥白 四莖

乾薑 一兩

附子 一枚生去皮破八片

右三味。以水三升。煮取一升。去滓。分溫再服。附子一枚生下。玉函成本。俱有用字。當補之內人尿三字。當作右四味。去滓下。

當補之內人尿三字。

發秘曰。人溺穢物。不可以薦大人君子。今以竹瀝代用。蓋取諸性之相近也。

正珍曰。按白通。卽人尿之別稱。此方以人尿爲主。故云白通湯也。後漢書載就傳云。臥就覆船下。以馬通熏之。註云。馬通。馬矢也。韻會小補云。馬矢曰通。本草綱目。驚條云。白鴨通。卽鴨屎也。與馬通同義。附方引聖惠方云。乳石發動。用白鴨通一合。由此考之。通乃大便之別稱。今加以一白字。示其爲小便也。若其敘藥名。則直書人尿。命其方則稱白通者。何也。醜穢之物。不欲斥言。猶穢器之名。清器。方有執程應旂諸人皆云。

用葱白而曰白通者。通其陽則陰自消也。果如其言。則橋皮直書皮可乎。杏仁單曰仁可乎。大可笑矣。

二百二十三少陰病。下利脈微者。與白通湯。利不止。厥逆無脈。乾嘔煩者。白通加豬膽汁。湯主之。服湯脈暴出者死。微續者生。

書宗祥言曰。脈促厥冷。爲虛脫。景岳四味回陽。

飲治元陽虛脫。危在頃刻者。

此乃白通湯證。而寒邪更甚。氣閉極劇者。故令人下利不止。厥逆無脈。乾嘔而煩。此非用白通湯之誤也。惟以其力不足也。是以前方加豬膽。以開其氣閉。蓋以豬膽能喚起元氣。開通閉塞也。今人治卒患急病。氣閉脈伏。不省人事者。每用熊膽屢奏奇效。與仲景氏加豬膽之旨。暗合冥契矣。服湯後其脈暴出者。猶油盡將滅之燈。一被挑剔。忽明而終滅。故爲死徵。若其微續漸出者。猶爲霜雪所抑屈之草。得春陽之氣。徐徐甲拆。故爲生也。此證蓋少陰兼厥陰者也。古來註家皆云。此證陰寒太盛。若與熱藥。則拒格而不入。故以人尿豬膽之寒。從其陰寒。以導姜附之熱。果爾。則如通脈四逆證。會無一寒藥之在其中乎。可謂強矣。或問。閉之與脫。其證何緣辨之。曰。閉者其脈伏。脫者其脈欲絕。所謂無脈。乃是伏而非絕也。白通湯之脈微。亦是欲伏之微。非欲絕之微也。通脈四逆證云。下利清穀。手足厥逆。脈微欲絕。其脫可知也。又云。裏寒外熱。

身反不惡寒。其人面色赤。其不閉可知也。白通及白通加豬膽證則否。此可以辨其閉之與脫矣。若夫通脈四逆加豬膽湯。主虛寒至極且閉且脫者云。

三百七十條曰。下利手足厥冷。無脈者灸之不溫。若脈不還。反微喘者死。由此考之。本條白通加豬膽證宜兼用灸矣。

白通加豬膽汁湯方

什字。依成本補之。

蔥白

四莖

乾薑

一兩

附子

一枚生去皮破八片

人尿

五合

豬膽汁

一合

右五味。以水三升。煮取一升。去滓。內膽汁人尿。和令相得。分溫再服。若無膽亦可用。附子生下。當有用字。右字。成本全書。作已。上二字。非。五味。成本全書。作三味。非。

若無膽亦可用六字。叔和所據。當刪之。按霍亂篇通脈四逆加豬膽湯條云。無豬膽。以羊膽代之。蓋以諸獸膽。性用不甚相遠也。今則可以熊膽代焉。

〔三百二十四〕少陰病。二三日不已。至四五日。腹痛。小便不利。四肢沉重疼痛。自下利者。此爲有水氣。其人或欬。或小便利。或下利。或嘔者。真武湯主之。自下利三字。玉函作而利二字。小便利。作小便。便自利四字。千金翼。與武湯。作玄武湯。

或下利二字。當作或不下利四字。對上文自下利言之。否則上既云自下利。豈更云或下利乎。脫簡明矣。不已者。謂其病不瘥。枚乘七發云。聽

聖人辯士之言。忽然汗出。霍然病已。又漢書宣帝紀。孝武皇帝會孫病已。師古註云。蓋以夙遭屯難而多病苦。故名病已。欲其速差也。又按內經中亦往往以已字爲瘥。惟康熙字典。正字通。韻會小補諸書。俱未載此說。因茲委焉。不已者。示前藥無効之辭。腹痛以下。皆屬有停水之證。或以下。皆是兼證。言或如是者與否者。皆在一真武湯所得而療也。按太陽病。有水氣者。桂枝加白朮茯苓湯。五苓散。小青龍湯所主也。今此證少陰病而有水氣。故附子爲主。以療少陰證。芍藥以止腹痛。白朮茯苓生薑三味。以利停水也。此方亦治太陽病。發汗後。仍發熱。心下悸。頭眩身瞤動。振振欲蹶地者。亦以汗後中虛而飲水停畜故也。此方名真武者。以附子色黑也。金鑑云。真武者。北方司水之神也。以之名湯者。賴以鎮水之義也。果爾。五苓散。猪苓湯之專主利水者。無真武之號何也。又按方名本曰玄武湯。宋板改作真武。避宣祖諱也。說見王世貞四部稿宛委餘編。是在當時。固當避之。元金以降。踏襲不復者何也。蓋以沿習日久。耳目所慣。遽難改復也。猶莊助莊光。避明帝諱。改爲嚴助嚴光。後世從而不改已矣。

真武湯方

茯苓 三兩

芍藥 三兩

白朮 二兩

生薑 三兩

附子 一枚 炮去  
皮破八片

右五味以水八升煮取三升去滓溫服七合日三服若效者加五味子半升細辛一兩乾姜一兩若小便利者去茯苓若下利者去芍藥加乾薑二兩若嘔者去附子加生薑足前爲半斤白木二兩。外臺作三兩。

錢潢曰後加減法爲後世俗醫所增察其文理紕謬惡其紫之亂朱故重附于此併逐一指摘其誤使學者有所別識云略下

程知曰白通通脈真武皆爲少陰下利而設白通四證附子皆生用惟真武一證熟用者蓋附子生用則溫經散寒炮熟則溫中去飲白通諸湯以通陽爲主真武湯以益陰爲先故用藥有輕重之殊

〔三百二十五〕少陰病下利清穀裏寒外熱手足厥逆脈微欲絕身反不惡寒其人面色赤或腹痛或乾嘔或咽痛或利止脈不出者通脈四逆湯主之面色赤一作面赤。成本全書作面赤色。非。

此亦少陰厥陰兼病者寒邪太盛陽氣虛脫也蓋四逆湯證一等深劇者也反不惡寒四字對少陰病言之此證雖外有發熱非表有實邪乃後世方書所謂無根虛火泛上者也此湯以救其虛脫則瘥或以下則所兼客證已裏寒外熱四字說其因也非說其證也

### 通脈四逆湯方

甘草二兩

炙

附子

大者一枚生用去皮破八片

乾薑

三兩強人可四兩



右三味。以水三升。煮取一升二合。去滓。分溫再服。其脈即出者愈。面色赤者。加蔥九莖。腹中痛者。去蔥加芍藥二兩。嘔者。加生薑二兩。咽痛者。去芍藥加桔梗一兩。利止脈不出者。去桔梗加人參二兩。病皆與方相應者。乃服之。全書。作甘草三兩。錢潢從之。然考玉函及成本。皆與宋板同。

錢潢曰。後加減法。揣其詞義。淺陋。料非仲景本意。何也。原文中。已先具諸或有之證。然後方立治。則一通脈四逆。傷其證皆可該矣。豈庸續用加減邪。況其立意。庸惡陋劣。要皆出于鄙俗之輩。未敢竟削。姑存之以備識者之鑑云。

正珍曰。此方治陽氣虛脫。而脈氣不能通達于四末。四肢厥逆。脈微欲絕者。故名曰通脈四逆湯也。脈即出者。微而欲絕之脈。即以漸而出也。不與暴出之自無而忽有同。故爲生也。

〔三百二十六〕少陰病。四逆。其人或欬。或悸。或小便不利。或腹中痛。或泄利下重者。四逆散主之。

正珍曰。此條論之與方。皆出于王叔和。非仲景氏筆也。當削之。錢潢四逆說。可謂卓論矣。王履齋綱集。四逆厥癰。大非古義。排叱而可也。張兼善云。太陰則手足溫。少陰則手足清。厥陰則手足厥逆。亦非也。

四逆散方

甘草

枳實

破水瀉  
後乾

柴胡

芍藥

右四味各十分。搗篩。白飲和服。方寸匕。日三服。欬者。加五味子。乾薑各五分。并主下利。悸者。加桂枝五分。小便不利者。加茯苓五分。腹中痛者。加附子一枚。炮令坼。泄利下重者。先以水五升。煮薤白三升。煮取三升。去滓。以散三方寸匕內湯中。煮取一升半。分溫再服。

錢潢曰。詳推後加減法。凡原文中每具諸或有之證者皆有之。如小柴胡湯。小青龍湯。真武湯。通脈四逆湯。四逆散皆是也。愚竊揆之以理。恐未必皆出于仲景。

〔三百二十七〕少陰病。下利六七日。欬而嘔渴。心煩不得眠者。猪苓湯主之。

按前三百十八條云。少陰病。下利咽痛。胸滿心煩者。猪苓湯主之。由是觀之。此條猪苓湯。當作猪膚湯。蓋傳寫之誤也。若夫猪苓湯。主小便不利而渴者。若其小便自利而渴者。猪苓湯在所禁也。故陽明篇云。陽明病汗出多而渴者。不可與猪苓湯。以汗多胃中燥。猪苓湯復利其小便故也。是也。況下利。欬嘔。心煩不得眠。皆不爲猪苓湯證乎。此亦少陰病權用之方也。再按。曰少陰病。曰下利。曰心煩。皆同猪膚湯症也。若夫少陰而欬而嘔。係真武湯所兼之證。故雖渴非白虎五苓之渴。雖煩不得

眠非梔子豉湯證也。

〔三百二十八〕少陰病得之二三日。口燥咽乾者。急下之。宜大承氣湯。  
此以下三條。并是陽明病有燥屎者。而實非少陰證。今冒以少陰病三字者。以其有無熱欲寐等證也。與太陰篇桂枝加大黃湯例同。按承氣證。以脈滑數爲法。二百六十四條曰。脈滑而數者。有宿食也。當下之。宜大承氣湯。二百二十四條曰。陽明病。譫語發潮熱。脈滑而疾者。小承氣湯主之。辨可下篇曰。下利脈遲而滑者。內實也。宜大承氣湯。下利脈反滑。當有所去下之。乃愈。宜大承氣湯。合而考之。以下三證。其脈滑數者。可知也。

〔三百二十九〕少陰病。自利清水。色純青。心下必痛。口乾燥者。急下之。宜

大承氣湯。

玉函脈經。自利作下利是。急下之宋版作可下之非。今依成本全書。改之。

金鑑曰。自利清水。謂下利無糟粕也。色純青。謂所下者皆污水也。

正珍曰。清。圈也。清水猶言下水。與清穀清便清血清膿血之清同。非清濁之清也。若是清濁之清。則其色當清白。而不當純青也。註家皆爲清濁之清非矣。心下痛似結胸。非結胸。蓋彼有鞭滿。而此無鞭滿。其別可知也。

〔三百三十〕少陰病。六七日。腹脹不大便者。急下之。宜大承氣湯。

脈字玉函經千金

及翼。俱作渴是。

胃中有燥屎也。

〔三百三十一〕少陰病。脈沈者。急溫之。宜四逆湯。

按本節不說病證。而獨說脈者。蓋承上三條而發之也。言少陰病雖有如上三條所述者。若其脈沈者。不可下之。急溫之可也。乃知上三條。雖名曰少陰。其脈不沈可知矣。再按少陰病脈沈。乃脈微細而沈也。微細二字含畜。在少陰病三字中也。又按四逆證。以脈沈微及遲爲法。九十五條曰。病發熱惡寒。脈反沈云云。宜四逆湯。三百九十七條曰。脈微欲絕者。四逆湯主之。二百三十二條曰。脈浮而遲。表熱裏寒。下利清穀者。四逆湯主之。三百二十四條曰。少陰病云云。脈微欲絕。通脈四逆湯主之。

〔三百三十二〕少陰病。飲食入口則吐。心中溫溫欲吐復不能吐。始得之。手足寒。脈弦遲者。此胸中實。不可下也。當吐之。若膈上有寒飲乾嘔者。不可吐也。當溫之。宜四逆湯。心中玉函作心下是。溫溫又作嘔。千金作愠愠。當成本作愈。非。

溫溫卽愠愠。古字通用也。當以愠愠爲正字。膈上當作膈下。脈經第七卷。不可吐篇。引此條云。若膈下有寒飲乾嘔者。不可吐。當溫之。本論勞復篇云。胃上有寒。當以丸藥溫之。宜理中丸。太陽中篇。小青龍湯條云。

心下有水氣乾嘔。合而考之。上字當作下字。復反也。少陰病三字。以始得之。無熱惡寒言之。言少陰病。飲食入口。則心下愠愠欲吐。反不能吐。自始得之。手足寒。而其脈弦遲者。此爲邪氣實於胸中。蓋邪實於胸中。則陽氣爲是所閉。而不能通達四末。是以令人手足厥寒。其脈弦遲如是者。當以瓜蒂散吐之。素問所謂其高者。因而越之是也。若下之。則於治爲逆。故曰不可下也。厥陰篇三百六十三條云。病人手足厥冷。脈乍緊者。邪結在胸中。心下滿而煩。飢不能食者。病在胸中。當須吐之。宜瓜蒂散。蓋與本節同因而殊證者耳。按小柴胡湯之心煩喜嘔。黃連湯之欲嘔吐。乾薑黃連黃芩人參湯之食入口即吐。皆胸中有熱也。吳茱萸湯之食穀欲嘔。中焦有寒也。金匱大黃甘草湯之食已即吐。亦由胸中有熱也。此條飲食入口則吐。心中愠愠欲吐。反不能吐。自始得之。手足寒。脈弦遲者。此爲邪氣實於胸中。而陽氣爲是所閉。故不論其寒熱。吐以達其鬱閉也。若其人手足厥冷。飲食不吐。而惟乾嘔者。此爲膈下有寒飲。蓋脾胃虛冷。不能轉化水漿之所致。故不可吐。宜以四逆湯急溫之中焦。得溫而寒飲自散也。註家云。寒飲乃痰。大非也。詳見前瓜蒂散條。再按手足寒。即厥冷。四逆湯。通脈四逆湯。白通加豬膽湯。共有之證也。惟彼則下利清穀。脈微欲絕。而此則無下利。脈微等候。故雖有厥冷。

不用薑附也。

〔三百二十三〕少陰病。下利脈微。漚漚而汗出。必數更衣。反少者。當溫其上。灸之。

劉棟曰。凡少陰病。下利脈微。漚漚而汗出者。必當數更衣。而反少者。此寒邪在上焦也。當須灸之以溫其上焦也。

正珍曰。此條非仲景氏辭氣。當刪。



# 傷寒論集成卷九

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恆雲仙

## 辨厥陰病脈證并治第十二

〔三百三十四〕厥陰之爲病。消渴。氣上撞心。心中疼熱。飢而不欲食。食則吐衄。下之利不止。

〔三百三十五〕厥陰中風。脈微浮。爲欲愈。不浮。爲未愈。

〔三百三十六〕厥陰病欲解時。從丑至卯上。

〔三百三十七〕厥陰病渴欲飲水者。少少與之愈。

按厥陰篇亡而不傳矣。王叔和惠其闕文。補以四章。所謂厥陰之爲病。消渴云云。厥陰中風云云。厥陰病欲解云云。厥陰病渴欲飲水云云。是也。後人復患其若斯淺略。拾取其散落者。附以雜病之文。何以知其然也。蓋厥陰者。陰證之極。至深而至急者也。其文雖缺。以意推之。四肢厥逆。煩躁吐利。脈微欲絕者。固不啻言。如少陰篇所收。吳茱萸湯。通脈四



逆陽證是也。而今厥陰云云四章無一及此者。其非仲景之舊可知也。玉函經續舉此四章以充厥陰一篇而不及下利嘔噦諸條。豈非叔和真面目乎。其下利有微熱以下至嘔噦等條皆金匱之所載非傷寒之文也。豈非後人拾取其散落者附以雜病之文乎。

〔三百三十八〕諸四逆厥者不可下之虛家亦然。

〔三百三十九〕傷寒先厥後發熱而利者必自止見厥復利。

〔三百四十〕傷寒始發熱六日既反九日而利。凡厥利者當不能食。今反能食者恐爲除中。食以索餅不發熱者知胃氣尚在。必愈。恐暴熱來出而復去也。後日服之其熱續在者期之旦日夜半愈。所以然者本發熱六日既反九日復發熱三日并前六日亦爲九日。與厥相應。故期之旦日夜半愈。後三日服之而脈數其熱不罷者此爲熱氣有餘必發瘧也。

右三條係後人之言當刪之。

〔三百四十一〕傷寒脈遲六七日而反與黃芩湯微其熱脈遲爲寒。今與黃芩湯復除其熱腹中應冷當不能食。今反能食此名除中必死。

今與玉函作而與

此名作此病。

傷寒脈遲句下當有發熱二字。應下文反與黃芩湯微其熱之語。蓋黃芩湯本治太陽少陽合病之方。豈用之於無發熱者乎。微與撤通。撤命

小補。撤字註云。直列切。除去也。經典通作徹。論語以雍徹。左傳襄公二十三年。平公不徹樂。杜注云。徹。去也。是也。除中者。謂中氣被翦除。魏書任城王澄傳云。尋得翦除亦大損財力。是也。除中反能食者。胃氣將絕。引食以自救故也。辟諸富家暴貧。強作驕奢。以取一時之快。不祥莫大焉。不死何埃。易曰。枯楊生華。何可久也。

〔三百四十一〕傷寒先厥後發熱。下利必自止。而反汗出。咽中痛者。其喉爲痺。發熱無汗。而利必自止。若不止。必便膿血者。其喉不痺。

〔三百四十二〕傷寒一二日至四五日厥者。必發熱。前熱者。後必厥。厥深者。熱亦深。厥微者。熱亦微。厥應下之。而反發汗者。必口傷爛赤。

〔三百四十四〕傷寒病厥五日。熱亦五日。設六日當復厥。不厥者。自愈。厥終不過五日。以熱五日。故知自愈。

以上三條。亦係後人之言。當削之。

〔三百四十五〕凡厥者。陰陽氣不相順接。便爲厥。厥者。手足逆冷者是也。成本無逆冷者之者字。是。

陰陽氣不相順接者。謂血氣否塞。不能升降。所謂天地不交。否。是也。嘗考和蘭解體之書。人身血行之道二矣。其一起于心臟。以順行周身。是之謂動脈。其一起于動脈所盡之處。受動脈之血逆行。而還入于心。是

之謂血脈更出更入如環無端然若有一所否塞則出者不入入者不出厥逆於是乎發脈動於是乎絕遂乃至乎死所謂陰陽二字蓋動脈血脈是也再按此條疑是後人註文已

〔三百四十六〕傷寒脈微而厥至七八日膚冷其人躁無暫安時者此爲藏厥非爲蜺厥也蜺厥者其人當吐蜺令病者靜而復時煩者此爲藏寒蜺上入其膈故煩須臾復止得食而嘔又煩者蜺聞食臭出其人當自吐蜺蜺厥者烏梅丸主之又主久利方非爲蜺厥也五字千金翼作死一字非爲之爲字依成本全書補之。又按今病玉函作今病是并當補之玉函經又主久利方五字是當削之。

成無已曰藏厥者死陽氣絕也蜺厥雖厥而煩吐蜺已則靜不若藏厥而躁無暫安時也病人藏寒胃虛蜺動上膈聞食臭出因而吐蜺與烏梅丸溫藏安蟲

張璐曰藏厥用附子理中湯及灸法其厥不回者死

希哲曰此爲藏寒蜺上入其膈故煩十一字爲一句爲字去聲又曰藏寒者胃寒也古書有指府爲藏者不可拘泥也

烏梅丸方

烏梅三百枚

細辛六兩

乾薑十兩

黃連十六兩

當歸四兩

附子六兩炮去皮

蜀椒四兩出汗

桂枝六兩去皮

人參六兩

黃蘗六兩

右十味。異擣篩。合治之。以苦酒漬烏梅一宿。去核蒸之。五斗米下。飯熟。搗成泥。和藥令相得。內臼中與蜜杵二千下。丸如梧桐子大。先食飲服十丸。日三服。稍加至二十丸。禁生冷滑物臭食等。

劉棟曰。按千金方。治久痢方亦同于此。疑是唐以降之方。至作其劑者。當有取捨耳。

正珍曰。此條論與方。皆非仲景氏也。附子六兩。亦非仲景之方法。

〔三百四十七〕傷寒熱少微厥。指頭寒。嘔嘔不欲食。煩躁數日。小便利。色白者。此熱除也。欲得食。其病爲愈。若厥而嘔。胸脅煩滿者。其後必便血。劉棟曰。此條亦後人之言也。

〔三百四十八〕病者手足厥冷。言我不結胸。小腹滿。按之痛者。此冷結在膀胱關元也。

結胸當作厥冷。蓋結厥同音。因誤爲結冷。再誤爲結胸耳。猶荀子鼯鼠五技。一誤爲鼯鼠。再誤爲梧鼠。本草馬矢蒿。一訛爲馬先蒿。再誤爲馬新蒿。否則言吾不結胸一句。甚似無謂矣。金匱瘀血病篇曰。病人腹不滿。其人言我滿。爲有瘀血。造語之法。全與本節同。益可以知結胸爲厥冷之誤矣。關元上當有當灸二字。後三百五十七條云。傷寒脈促。手足厥逆者。可灸之。三百七十條亦云。下利手足厥冷無脈者灸之。甲乙經

云關元在臍下三寸。刺入二寸。留七呼。灸七壯。又云胞轉小腹滿。關元主之。又云奔豚寒氣入小腹。時欲嘔。關元主之。合而考之。脫簡無疑。又按金匱云。婦人懷娠六七月。小腹如扇。子藏開故也。當以附子湯溫其藏。此證亦當用附子四逆輩。

〔三百四十九〕傷寒發熱。四日厥。反三日復熱。四日厥少熱多者。其病當愈。四日至七日熱不除者。必便膿血。

〔三百五十〕傷寒厥。四日熱。反三日復厥。五日其病爲進。寒多熱少。陽氣退。故爲進也。

〔三百五十一〕傷寒六七日脈微。手足厥冷煩躁。灸厥陰。厥不還者死。右三條。係後人之言。當刪之。

〔三百五十二〕傷寒發熱下利。厥逆。躁不得臥者死。

此卽陰證之極。裏寒外熱之證。

〔三百五十三〕傷寒發熱下利至甚。厥不止者死。

不止者。以服藥無効言。

〔三百五十四〕傷寒六七日。不利便。發熱而利。其人汗出不止者死。有陰無陽故也。

不利便。當作小便不利。有陰無陽故也。六字。係後人之言。

〔三百五十五〕傷寒五六日。不結胸。腹濡脈虛。復厥者。不可下。此爲亡血下之死。爲字。依玉函成。本全書。補之。

濡字。程應旂改作滿。是也。若腹濡脈虛而厥。皆無可下之理。而曰不可下。則爲無謂。按金鑑改結胸作大便。方有執訓亡爲無。皆非矣。

〔三百五十六〕發熱而厥。七下利者爲難治。

此亦係後人之言。當刪之。

〔三百五十七〕傷寒脈促。手足厥逆者。可灸之。者字。依玉函成。本全書。補之。

灸可以挽回陽氣。繼以四逆輩可也。

〔三百五十八〕傷寒脈滑而厥者。裏有熱也。白虎湯主之。也字。依玉函成。本全書。補之。

程應旂曰。脈滑而厥。此乃陽實拒陰之厥也。可舍證而治脈也。

金鑑曰。滑爲陽脈。裏熱可知。是熱厥也。然內無腹滿痛不大便之證。是

雖有熱而裏未實。不可下而可清。故以白虎湯主之。

發秘曰。厥逆脈沈微者爲寒。用四逆。脈滑大者爲熱。用白虎。

〔三百五十九〕手足厥寒。脈細欲絕者。當歸四逆湯主之。

當歸四逆湯方

當歸 二兩 桂枝 二兩 芍藥 二兩 細辛 二兩

甘草 二兩 通草 二兩 大棗 二十五枚 一法十二枚

右七味。以水八升。煮取三升。去滓。溫服一升。日三服。

〔三百六十一〕若其人內有久寒者。宜當歸四逆加吳茱萸生薑湯。

當歸四逆加吳茱萸生薑湯方

當歸 三兩

桂枝 三兩  
去皮

芍藥 三兩

細辛 三兩

甘草 二兩  
炙

通草 二兩

生薑 半斤  
切

吳茱萸 二升

大棗 二十五  
枚

右九味。以水六升。清酒六升。和。煮取五升。去滓。溫分五服。各四升。

錢潢曰。手足厥寒。即四逆也。故當用四逆湯。而方名雖曰四逆。而方中

并無薑附。不知何以挽回陽氣。仲景製方。治極陰最寒之證。獨遺此二

物邪。是以不能無疑也。恐是歷年久遠。散失遺亡。訛舛于後人之手。未

可知也。不然。何湯名四逆。而藥物與四逆迥異邪。

正珍曰。右二條論之與方。俱非乎仲景之言。錢潢所論。極是也。此乃後

人之所攙。不可從矣。劉棟曰。通脈四逆湯方中。加當歸。以復其脈也。大

非。

〔三百六十一〕大汗出。熱不去。內拘急。四肢疼。又下利厥逆而惡寒者。四

逆湯主之。張經無又字。是。

金鑑曰。是陽亡表寒盛於裏也。故主四逆湯。溫經以勝寒。回陽以斂汗

也。

正珍曰。內者。腹內也。此證而脈微欲絕者。通脈四逆湯所主。

〔三百六十二〕大汗。若大下利而脈冷者。四逆湯主之。

成無已曰。大汗大下利。內外雖殊。其亡津液損陽氣則一也。陽虛陰勝。故生厥逆。與四逆湯。固陽退陰。

〔三百六十三〕病人手足厥冷。脈乍緊者。邪結在胸中。心下滿而煩。饑不能食者。病在胸中。當須吐之。宜瓜蒂散。乍緊。辨可吐。當作乍結。是千金真同。

此與前三百三十二條。併係邪氣實于上焦。陽氣爲是所閉塞。而不能通達四末之證。非清穀下利。脈微欲絕之寒厥也。故吐以瓜蒂散。以達其鬱閉也。按乍緊。作乍結爲是。結卽代。惟病者其脈素不結。今發手足厥冷而乍結者。非多甘草湯證。血液不充之結。卽有物塞於胸中之所致。故與瓜蒂散。以吐之則愈。若其心下滿以下。別是一證。不可與上文混視。唯以其均可吐之證合而論之。蓋證異而因同者。故亦吐之以瓜蒂散也。仲景氏家法乃爾。

〔三百六十四〕傷寒厥而心下悸者。宜先治水。當服茯苓甘草湯。却治其厥。不爾。水漬入胃。必作利也。者字。依成本全書補之。服字。玉函作與字。却成本作卻。

方有執曰。金匱曰。水停心下甚者則悸。然則悸爲水甚。

金鑑曰。厥而心下悸者之下。當有以飲水多四字。若無此四字。乃陰盛



之厥悸。非停水之厥悸矣。何以即知是水。而曰宜先治水耶。蓋停水者。必小便不利。若不如是治之。則所停之水。漬入胃中。必作利也。此證雖不曰小便不利。而不利之意。自寓其中。

正珍曰。此條蓋承上條。重論邪實在胸中之厥。兼挾停水而心下悸者。以示治有緩急也。非裏虛陰盛。危在旦夕之厥冷也。故厥一字與心下二字。亦皆自上條中。細繹出來。可見脈之乍結。心下之滿而煩。飢不能食。皆在一厥字中。而含蓄焉。猶大青龍湯之後條。五苓散之後條。皆承上條而省略其脈證也。夫邪結在胸中之厥。非危急之證也。其所兼挾之悸。却急於厥何也。悸乃停水所致。其人小便必不利。觀小柴胡條。可以見矣。是以不先與茯苓甘草湯以治其水。則停水漬入大腸中。必作下利。故先治其水。而后更與瓜蒂散以治其厥也。又按水漬入胃之胃字。當爲腸字解之。如胃中有燥屎亦然。其實腸胃一府。唯就其廣狹大細。以殊其名已。素問標本病傳論云。大小不利治其標。今此條先行其水。而後治厥。蓋取諸標者也。孰謂仲景氏不撰用素問乎。

〔三百六十五〕傷寒六七日。大下後。寸脈沉而遲。手足厥逆。下部脈不至。喉咽不利。唾膿血。泄利不止者。爲難治。麻黃升麻湯主之。

麻黃升麻湯方

麻黃

二兩半  
去節

升麻

一分

當歸

一分

知母

十八  
錢

黃芩

十八  
錢

萎蕤

十八錢  
一作藟藟

芍藥

六錢

天門冬

六錢  
去心

桂枝

六錢  
去皮

茯苓

六錢

甘草

六錢  
炙

石膏

六錢  
煨

白朮

六錢

乾薑

六錢

右十四味以水一斗先煮麻黃一兩沸去上沫內諸藥煮取三升去滓分溫三服相去如炊三斗米頃令盡汗出愈

此條論與方俱後人之所僞非乎仲景氏之言故今刪之

〔三百六十六〕傷寒四五日腹中痛若轉氣下趣少腹者此欲自利也

本作  
通。

此乃心下有水漬入腸中以作利之兆蓋承厥而心下悸條發也但語有之腹鳴者必下蓋喻之於事之必有前兆而言乃此條之意百六十六條生薑瀉心證曰脇下有水氣腹中雷鳴下利同是有水而雷鳴也金匱曰腹中寒氣雷鳴切痛附子粳米湯主之此條證亦宜用粳米湯不可用生薑瀉心湯何也水則一也證則有痛不痛之別也

〔三百六十七〕傷寒本自寒下醫復吐下之寒格更逆吐下若食入口即吐乾薑黃芩黃連人參湯主之

玉函成本全書。俱無復吐下之下字。玉函即吐下有者字。是當補之。

傷寒至逆吐下十七字闕誤錯亂不可強解王肯堂以寒下爲吐下之誤寫矣按金匱云食已即吐者用大黃甘草湯由此考之飲食有間而

吐者多因虛寒其入口卽時吐出者多因上焦有熱故用芩連解熱之品主之也。

乾薑黃芩黃連人參湯方

乾薑

黃芩

黃連

人參各三兩

右四味以水六升煮取二升去滓分溫再服。

〔三百六十八〕下利有微熱而渴脈弱者令自愈。

〔三百六十九〕下利脈數有微熱汗出令自愈設復緊爲未解。

右二條係後人之言當刪之。

〔三百七十〕下利手足厥冷無脈者灸之不溫若脈不還反微喘者死。

此乃白通加豬膽汁湯證。

〔三百七十一〕少陰負趺陽者爲順也。

〔三百七十二〕下利寸脈反浮數尺中自瀉者必清膿血。

右二條亦係後人之言當刪之。

〔三百七十三〕下利清穀不可攻表汗出必脹滿。

下利清穀裏寒爲甚可與四逆湯溫之雖有表證不可發汗汗出則表裏俱虛而中氣不能宣通故令人脹滿亦四逆湯證也宜與後三百八

十一條參考。

〔三百七十四〕下利脈沈弦者下重也。脈大者爲未止。脈微弱數者爲欲自止。雖發熱不死。

〔三百七十五〕下利脈沈而遲。其人面少赤。身有微熱。下利清穀者。必鬱冒。汗出而解。病人必微厥。所以然者。其面戴陽。下虛故也。

〔三百七十六〕下利脈數而渴者。令自愈。設不差。必清膿血。以有熱故也。

右二條亦係後人之言。當刪之。

〔三百七十七〕下利後。脈絕手足厥冷。晬時脈還。手足溫者生。脈不還者死。不還下。玉由千金。有不還二字。是當補之。

成無已曰。晬時。周時也。

正珍曰。此條蓋以通脈四逆湯服後言之。晬時。詳見抵當丸條下。

〔三百七十八〕傷寒下利日十餘行。脈反實者死。

金鑑曰。傷寒下利日十餘行。正氣虛也。其脈當虛。今反實者。邪氣盛也。

正虛邪盛。故主死也。

正珍曰。素問玉機真藏論曰。泄而脈大。脫血而脈實。皆難治。

〔三百七十九〕下利清穀。裏寒外熱。汗出而厥者。通脈四逆湯主之。

此證其脈微欲絕。蓋寒邪太盛。陽氣虛脫者也。宜與前三百二十五條參考。

〔三百八十一〕熱利下重者。白頭翁湯主之。

烏壽曰。熱利下重者。有熱致利。下焦重滯也。

正珍曰。此亦係今之痢病。下重謂下部沈重。又謂之後重。身熱下利。腹裏拘急。下部沈重。後世所謂熱毒痢也。白頭翁湯可以解其熱毒。按痢字蓋後世俗字。素靈謂之腸僻。病源千金外臺諸書。又謂之滯下。盧和丹溪纂要云。仲景以瀉利滯下。混同論治。殊不知腸僻滯下及痢。皆屬病名。而仲景氏所論。惟以病證而言矣。再按白頭翁湯主熱痢。桃花湯主冷痢。俱是治痢之方。本在雜病論中者。而非傷寒之方也。視金匱二方接在一處。可以見矣。

白頭翁湯方

白頭翁

二兩

黃蘗

三兩

黃連

三兩

秦皮

三兩

右四味。以水七升。煮取二升。去滓。溫服一升。不愈。更服一升。

白頭翁二兩。黃蘗三兩。黃連三兩。秦皮三兩。金匱全書。俱

作二兩。

〔三百八十一〕下利腹脹滿。身體疼痛者。先溫其裏。乃攻其表。溫裏宜四

逆湯。攻表宜桂枝湯。

成本全書。俱脫二宜字。當補之。

成無已曰。下利腹滿者。裏有虛寒。先與四逆湯溫裏。身疼痛爲表未解。利止裏和。與桂枝湯攻表。

張志聰曰。攻專治也。

正珍曰。下利腹脹滿者。以裏虛而氣不能宣通也。前第九十三條曰。傷寒醫下之。續得下利清穀不止。身疼痛者。急當救裏。後身疼痛。清便自調者。急當救表。救裏宜四逆湯。救表宜桂枝湯。

〔三百八十二〕下利欲飲水者。以有熱故也。白頭翁湯主之。成無已曰。自利不渴。爲藏寒。與四逆湯以溫藏。下利飲水爲有熱。與白頭翁湯以涼中。

劉棟曰。此條當在上白頭翁條之下也。

正珍曰。飲水二字指渴而言。水字泛言飲物。訓爲冷水非也。說詳于前第七十一條。按下利飲水多。是內有熱邪所致。間亦有津液內竭而然者。或大汗後。或大下若大吐後。或痘瘡灌膿後。往往有之。概爲熱邪所致。非也。又因所飲之冷熱。以辨其虛實。亦非也。

〔三百八十三〕下利膿語者。有燥屎也。宜小承氣湯。

金鑑曰。其下利之物。必稠粘臭穢。知熱與宿食合而爲之也。此可決其有燥屎也。於此推之。可知燥屎不在大便。鞭與不鞭。而在裏之急與不急。便之臭與不臭也。

正珍曰。少陰篇曰。少陰病自利清水。色純青。心下必痛。口乾燥者。急下

之宜大承氣湯。辨可下篇曰。下利心下鞭者。急下之。宜大承氣湯。下利脈遲而滑者。內實也。宜大承氣湯。下利不欲食者。有宿食故也。當下之。宜大承氣湯是也。雖然。讖語間有屬虛寒者。不可概以爲胃實燥屎也。二百二十一條曰。讖語脈短者死。二百二十四條曰。陽明病讖語。脈反微。遲者裏虛也。是也。

〔三百八十四〕下利後更煩。按之心下濡者。爲虛煩也。宜梔子豉湯。方有執曰。更煩。本有煩。不爲利除而轉甚也。

正珍曰。凡傷寒發汗吐下者。諸證皆去。但心煩者。是大邪已去。正氣暴虛而餘熱內伏故也。心下濡者。下後無物也。是雖言虛煩。其實非真虛。亦惟一時假虛已。梔子豉湯以解餘熱則愈。按金鑑以此條爲虛煩。以大黃黃連瀉心湯條爲實煩。彼豈爲實煩乎。不可從矣。

〔三百八十五〕嘔家有膿。不可治。嘔膿盡自愈。

金鑑曰。心煩而嘔者。內熱之嘔也。渴而欲水嘔者。停水之嘔也。今嘔而有膿者。此必內有癰膿。故曰不可治。但俟嘔膿盡自愈也。

正珍曰。不可治嘔句。膿盡自愈句。金鑑以嘔屬下句非也。此蓋以肺癰證言之。劉棟云。此當在太陽篇服桂枝湯條之下。誤混于此。是未必然。又曰。明萬表萬氏家抄云。試肺癰法。凡人胸中隱隱疼。咳嗽有臭痰。吐

在水內沈者是癰證。浮者是痰。入門曰。肺癰咳唾膿血腥臭。置之水中則沈。此試肺癰之法。亦不可不知矣。

〔三百八十六〕嘔而脈弱。小便復利。身有微熱。見厥者。難治。四逆湯主之。既云難治。又處以四逆湯。論中斷無此例。疑非仲景之言。

〔三百八十七〕乾嘔吐涎沫。頭痛者。吳茱萸湯主之。

沫字下。玉函有而復二字。

成無已曰。乾嘔吐涎沫者。裏寒也。頭痛者。寒氣上攻也。與吳茱萸湯溫裏散寒。

正珍曰。此胃虛寒。而飲水然蓄者。與少陰篇膈下有寒。飲乾嘔。與四逆湯。差後病篇。大病差後喜唾。久不了了。胃上有寒。宜理中丸者。同胃寒有飲之證。故與吳茱萸湯。以溫胃逐水也。又按吐涎沫。乃是吐痰。古無痰字。詳見瓜蒂散下。再按此證也。今世所謂痰厥頭痛者。外臺第八卷載痰厥頭痛方八首。至於後世則有元人李杲。半夏白朮天麻湯方。載在蘭室秘藏。蓋皆吳茱萸湯之支流餘裔耳。

〔三百八十八〕嘔而發熱者。小柴胡湯主之。

成無已曰。嘔而發熱者。柴胡證具。

〔三百八十九〕傷寒大吐大下之極。虛復極。汗出者。以其人外氣怫鬱。復與之水。以發其汗。因得嘔。所以然者。胃中寒冷故也。



此條係後人之言當刪之。

〔三百九十〕傷寒嘔而腹滿。視其前後。知何部不利。利之即愈。視玉函作問是。

成無已曰。前部小便也。後部大便也。

趙開美曰。活人云。前部宜豬苓湯。後部宜調胃承氣湯。

張璐曰。一爲胃氣虛寒。一爲胃中實熱。不可不辨。虛寒者溫之。四逆理中是也。實熱者利之。承氣五苓是也。

金鑑曰。傷寒嘔而不腹滿者。爲正氣虛。吳茱萸湯證也。嘔而腹滿者。爲邪氣實。視其二便何部不利。利之則愈也。

正珍曰。素問標本病傳論曰。先病而後生中滿者。治其標。又曰。小大不利。治其標。此條不拘嘔而專主腹滿者。蓋先療其急者也。

# 傷寒論集成卷十

日本 東都 山田正珍宗俊父 著

男 正德宗見

常陸 中林清熙俊庵 同校

門人

土佐 笠原方恒雲仙

## 辨霍亂病脈證并治第十三

〔三百九十一〕問曰。病有霍亂者。何。答曰。嘔吐而利。此名霍亂。成本全書。作名曰霍亂。

按此一篇。本是金匱雜病篇之文。然金匱之所逸。故今詳釋其義矣。霍亂者。上吐下瀉之病名。篇首嘔吐而利。此名霍亂一條。蓋係王叔和之解。雖非仲景氏言乎。實是古訓也。原夫霍亂之爲病。夏月暑時。食飲過度之所致。胃中擾亂。上吐下瀉者是也。漢書嚴助傳云。夏月暑時。歐泄霍亂之疾。相隨屬也。孫思邈千金方云。霍亂之病。皆因飲食。非關鬼神。夫飽食臍膈復食乳酪海陸百品無所不噉。眠臥冷席。多飲寒漿。胃中諸食。結而不消。陰陽二氣。擁而反戾。陽氣欲升。陰氣欲降。陰陽乖隔。變成吐利。又曰。大凡霍亂。皆中食臍膈及飽食雜物。過度不能自裁。夜臥失履。不善將息所致。隕命者衆。諺曰。百病從口生。蓋不虛也。成無已明

理論云。傷寒吐利者。邪氣所致。霍亂吐利者。飲食所傷也。唐僧義淨。南海寄歸傳云。凡四大之有病者。咸從多食而起。或由勞力而發。夜餐未飽。平日便餐。或日食不消。午時還食。因茲發動。遂成霍亂。可見霍亂。乃是暑時傷食之所致也。雖然。冬月間亦有之。惟不若夏秋間最多耳。唯霍亂之爲傷食。前人未明言及之。至香川太仲行餘醫言。斷然定爲一病。考徵明白。真可謂千古一人矣。雖然。其名曰霍亂。猶不得不依揮霍撩亂之說。是以世人動致疑于其間。惜哉。然則其所以名曰霍亂者。何也。霍與臞古字通用。漢書鮑宣傳云。漿酒霍肉。可徵矣。說文云。臞。肉羸也。大氏人之爲食所傷。肉食居多。故特舉臞以統一應食物也。凡人溺其所嗜欲。皆謂之亂。孔子曰。惟酒無量。不及亂也。左傳昭元年。醫和診晉侯之疾曰。是爲近女室。淫瀾惑亂之所生也。亂字義可以知矣。前輩諸解紛紜不歸一。皆坐不知其爲傷食故爾。今集諸家異同。附于左方。以待有識者之訂。

病源候論云。霍亂言其病揮霍之間。便致撩亂也。

成無已曰。傷寒霍亂何以明之。上吐而下利。揮霍而撩亂也。又曰。輕者止曰吐利。重者揮霍撩亂。名曰霍亂。方有執曰。霍。吐也。亂。雜亂也。

錢潢曰：霍字未詳其義。大約是倏忽間吐瀉擾亂之意耳。成氏以揮霍撩亂解之，恐未必然。

傷寒發秘曰：霍亂之名，千古以來，未有一人之得其旨者。按左傳閔公元年，晉獻公作二軍，公將上軍，太子申生將下軍，以滅耿滅霍。國語亦載：獻公十六年，公作二軍，公將上軍，太子將下軍，以伐霍。註云：霍，周文王之子，霍叔武之國也。由是考之，霍亂之霍，乃國名，所以謂之霍亂病者，蓋以霍國之亂，軍士多病此證。故時人遂呼爲霍亂病。已昔者東晉建武中，南陽擊虜，得天行斑瘡，仍呼爲虜瘡。外臺天行發斑病瘡。引肘後云：世以建武中，於南陽擊虜所得仍呼爲虜瘡。吳人不識，呼爲廣瘡。又以其形似，謂之楊梅瘡。後世又有廣東瘡之名。俞弁續醫說云：弘治末年，民間患惡瘡，自廣東人始，我東方俗間亦有肥前瘡、大坂腫、江戶疱瘡等稱。可見霍亂之稱，果起

于獻公伐霍之役也。

〔三百九十二〕問曰：病發熱頭痛，身疼惡寒吐利者，此屬何病？答曰：此名霍亂。霍亂自吐下，又利止復更發熱也。

〔三百九十三〕傷寒其脈微澀者，本是霍亂。今是傷寒，却四五日至陰經上，轉入陰必利。本嘔下利者，不可治也。欲似大便而反失氣，仍不利者，此屬陽明也。便必鞭，十三日愈，所以然者，經盡故也。

劉棟曰：後人之所記也，故不採用。

〔三百九十四〕下利後當便鞭。鞭則能食者愈。今反不能食。到後經中頗能食。復過一經能食。過之一日當愈。不愈者。不屬陽明也。

此亦係後人之言。當刪之。

〔三百九十五〕惡寒脈微而復利。利止亡血也。四逆加入參湯主之。

金鑑云。利止當是利不止。亡血當是亡陽。利止亡血如何用大熱補藥。正珍曰。復利者。其利暫止而復利也。

四逆加入參湯方

甘草二兩

附子

一枚生去皮破八片

乾薑

半兩

人參

一兩

右四味。以水三升。煮取一升二合。去滓。分溫再服。

人參一兩。千金外。并作三兩。

霍亂頭痛發熱。身疼痛。熱多欲飲水者。五苓散主之。

〔三百九十六〕寒多不用水者。理中丸主之。

九字。玉函。千金。并作傷。

按頭痛發熱。惡寒身痛等證。傷寒霍亂俱有之候。一則風寒之邪。從外中表而致之。一則飲食之邪。從內及表而致之。內外之因雖殊。其爲表症則同矣。惟一乎表。與兼而及表。非無其分也。雖則非無其分也。其爲表症則同矣。惟夫同矣。是以前治雖殊。至乎其用桂枝以解肌表。則同矣。故不問瘡腫初起。或竹木刺傷。或爲砒礬硫鑿諸惡毒氣所侵。凡有頭痛發熱惡寒身痛等證者。皆宜以表論焉。若其兼裏證者。乃宜以表

裏論焉。世人不察。獨於風寒外來邪氣。以分之表裏。不亦淺乎。成無已註于本節云。頭痛發熱。則邪自風寒而來。錢潢亦云。霍亂者。嘔吐而利也。頭痛發熱。身疼痛者。霍亂而兼傷寒也。吁。果如是。則瘡腫初起。或竹木刺傷。或爲砒礬硫礬諸惡毒氣所侵。而頭痛發熱。身疼痛者。亦復爲兼傷寒乎。弗思之甚也。若其一霍亂。而此則見頭痛發熱。身疼痛之表證。彼則絕不見此等證者何也。以人有強弱。邪有微甚。正勝邪則爭而致之。正不勝邪則不能爭而致之耳。余嘗著虛實論三篇。備述其義。實醫治之大關係。不可不詳也。所謂熱多寒多。乃是明其虛實之因之辭。非指病證而言也。白虎湯條所謂裏熱表寒。四逆湯條所謂內寒外熱。通脈四逆湯條所謂裏寒外熱。皆然也。若以熱多爲發熱多。以寒多爲惡寒多。則上文發熱二字。竟屬蛇足。可見熱多寒多。并是明其因之辭矣。霍亂一也。彼據其有頭痛發熱身痛欲飲水證。以知其外熱多而裏寒少。處之以五苓雙解表裏。此據其無頭痛發熱身痛欲飲水證。以知其裏寒多而外熱少。處之以理中。專理其裏。二方雖異其所之。俱以吐利爲主。則一而已。若其欲吐而不吐。欲利而不利。胸腹攪痛。脹急悶亂者。名曰乾霍亂。此非五苓理中之所能治。若不速治。多致暴死。宜急用吐下劑。又有宿食者。蓋食物停滯胃中。經宿不消是也。其證固不與霍

亂同不可混而爲一也。故於辨可吐篇曰：宿食在上脘者，當吐之。於辨可下篇曰：下利不欲食者，以有宿食故也。當宜下之，與大承氣湯。仲景氏豈有遺策乎？所憾者，古經殘缺，不復見其完璧矣。

理中丸方

人參

乾薑

甘草

白朮

各三兩

右四味，搗篩蜜和爲丸。如雞子黃許大，以沸湯數合，和一丸，研碎溫服之。日三四夜二服。腹中未熱，益至三四丸。然不及湯。湯法以四物依兩數切，用水八升，煮取三升，去滓，溫服一升。日三服。若臍上築者，腎氣動也。去朮加桂四兩。吐多者，去朮加生薑三兩。下多者，還用朮。悸者，加茯苓二兩。渴欲得水者，加朮足前成四兩。半腹中痛者，加人參足前成四兩。半寒者，加乾薑足前成四兩。半腹滿者，去朮加附子一枚。服湯後如食頃，飲熱粥一升許，微自溫，勿發揭衣被。日三四。益後病瘳。玉函成本全書。并作日三服。是當改之。論下。玉函成本全書。有爲末二字。

錢潢曰：後加減法，文理背謬，量非仲景之法。

劉棟曰：加減法，後人之所加也，故不採用焉。

正珍曰：腹中未熱以下，至湯法及加減方，皆王叔和所攙，可刪矣。理中者，丸劑之名也。非湯劑之名。故藥味分量雖同，於其作湯者，名曰人參湯。見于金匱要略。至其加桂枝者，則謂之桂枝人參湯。况標理中丸方。

而不標理中丸及湯法乎。又况言湯法以四物依兩數切。而不言湯法以四物依兩數切咀乎。後人不察。妄指人參湯以爲理中湯。雖無害於大義。終非立方之本旨也。又至如其處理中丸證以人參湯。則以牛易馬之類。馱重致遠。雖同也。遲疾利鈍。則殊異。不可不擇矣。又按晉書齊獻王傳云。齊獻王攸。居喪哀毀過禮。杖而後起。左右以稻米乾飯雜理中丸進之。不知指此理中丸否。

〔三百九十七〕吐利止而身痛不休者。當消息和解其外。宜桂枝湯小和之。

成無已曰。吐利止裏和也。身痛不休。表未解也。與桂枝湯小和之。方有執曰。消息猶言斟酌也。

〔三百九十八〕吐利汗出。發熱寒寒。四肢拘急。手足厥冷者。四逆湯主之。此亦霍亂而裏寒甚者。故先救其裏。

〔三百九十九〕既吐且利。小便復利。而大汗出。下利清穀。內寒外熱。脈微欲絕者。四逆湯主之。內字。玉函作裏。

劉棟曰。此條亦承上條以示其一等深證之治例也。既已吐利者。當小便不利也。而今小便復利。而大汗出。下利清穀者。厥陰病而爲內寒外熱也。其人脈微而欲絕者。通脈四逆湯之主也。今作四逆湯非也。



正珍曰。此是虛寒盛于內。而陽氣脫去也。四逆上脫通脈二字也。一說云。復利當作不利。是也。

〔四百〕吐已下斷。汗出而厥。四肢拘急不解。脈微欲絕者。通脈四逆加豬膽汁湯主之。吐已下斷。千金作吐下已斷是。千金外臺。並用通脈四逆湯。無豬膽汁。非。汁字。依成本補之。

汗出而厥。四肢拘急。脈微欲絕者。寒邪內盛而陽氣虛脫也。固無吐已下斷之理。今無其理而止。乃陽氣被閉而然也。故本方以固其脫。豬膽以開其閉也。四肢拘急不解。蓋轉筋之輕者。今人治傷食用熊膽。本于茲。

通脈四逆加豬膽汁湯方

甘草二兩

乾薑三兩。人可四兩。

附子大者一枚。生去皮破八片。

豬膽汁半合。

右四味。以水三升。煮取一升二合。去滓。內豬膽汁。分溫再服。其脈即來。無豬膽。以羊膽代之。豬膽半合。玉函作四合。附後。作一合。皆非。

〔四百一〕吐利發汗後。脈平小煩者。以新虛不勝穀氣故也。後字依發汗吐下後病篇。補之。

千金曰。霍亂務在溫。和將息。若冷即遍體轉筋。凡此病定一日不食爲佳。

金鑑曰。節其飲食。自可愈矣。

辨陰陽易差後勞復病脈證并治第十四

〔四百一〕傷寒陰陽易之爲病。其人身體重少氣。少腹裏急。或引陰中拘攣。熱上衝胸。頭重不欲舉。眼中生花。膝脛拘急者。燒禪散主之。

按陰陽易一條。論之與方。其非仲景氏固矣。雖然。驗之今日。往往有焉。因茲錄愚見。以備後賢采擇。蓋陰陽易病。便是傷寒變證。故冠以傷寒二字也。陰陽二字。付房事言之。易者。變易也。此平素好淫人。傷寒病中。更犯房事。奪精血。以致此變易者。是以謂之陰陽易。其證身體重少氣。小腹裏急。或引陰中拘急。熱上衝胸。頭重不欲舉。眼中生花。膝脛拘急。一一與暑中注夏之病不殊。蓋彼則精血素虛。不能耐暑熱而病。此則體先有邪熱。更奪精血而病。雖有前後之異也。其因乃一而已矣。治法宜以小建中湯爲主焉。古人用燒禪散治之者何也。禪之所隱處。乃男女精血所流。薰染取以用之。直是以精補精已。按巢元方病源論則曰。陰陽易者。男子病新瘥。未平復。而婦人與之交。接得病者。名曰陽易。婦人得病新瘥。未平復。而男子與之交。接得病者。名曰陰易。後世注家皆遵守此說。無有異論。雖然。平素壯實無病之人。一夕與病後之人交接。安得有病證如此者乎。又按方後男婦二字。以夫婦言之。易所謂男女構精。萬物化生。可以見也。亦各取不病人之禪已。如病源所言。則取先病傷寒人之禪。以與新傳染之人。豈不戾乎。

燒禪散方

婦人中禪近隱處取燒作灰。

右一味水服方寸匕日三服小便即利陰頭微腫此爲愈矣婦人病取男子禪燒服。

〔四百三〕大病差後勞復者枳實梔子湯主之。

病源曰大病者中風傷寒熱勞溫瘧之類是也。又曰傷寒病後多因勞動不節飲食過度更發於病名之爲復復者謂復病如初也。正珍曰。愈者常也。與愈不同。

劉棟曰右二條後人之所記也故不採用。

正珍曰陰陽易差後勞復其論之與方但亡而不傳王叔和乃以意補之已。

枳實梔子湯方

枳實三枚

梔子十四

豉一升

右三味以清漿水七升空煮取四升內枳實梔子煮取二升下豉更煮五六沸去滓溫分再服覆令微似汗若有宿食者內大黃如博碁子五六枚服之愈。

〔四百四〕傷寒差以後更發熱者小柴胡湯主之。脈浮者以汗解之。脈沈

實者。以下解之。發熱者之者字。依成本。補之。

成無已曰。差後餘熱未盡。更發熱者。與小柴胡湯以和解之。脈浮者。熱在表也。故以汗解。脈沈者。熱在裏也。故以下解之。

方有執曰。此示病後不謹調理小復之大法。脈浮有所重感也。脈沈飲食失節也。

正珍曰。此條與陽明篇二百四十六條。同一義例。下以承氣言之。汗以桂枝言之。此條差後因勞動失節而復者。脈不浮不沈者。因動作餘燼復然者也。浮者。因勞動再感者也。沈實者。飲食失節者也。發熱二字。兼浮沈二病言之。

〔四百五〕大病差後。從腰以下有水氣者。牡蠣澤瀉散主之。

喻昌曰。腰以下有水氣者。水漬爲腫也。金匱曰。腰以下腫。當利小便。此定法矣。

### 牡蠣澤瀉散方

牡蠣熬

澤瀉

蜀漆炙水洗去腥

葶藶子熬

商陸根熬

海藻洗去鹹

栝樓根各等分

右七味。異擣下篩爲散。更於臼中治之。白飲和服。方寸匕。日三服。小便利止後服。於曰。成本全書。作人曰。

〔四百六〕大病差後。喜唾久不了了者。胃上有寒。當以丸藥溫之。宜理中丸。玉函差後下。有其人二字。是也。無以丸藥三字。胃上。宋板作胸上。今依玉函成本全書。改之。

方有執曰。唾。口液也。寒以飲言。不了了。謂無已時也。

金鑑曰。大病差後。喜唾久不了了者。胃中虛寒。不能運化。津液聚而成唾。故唾日久無已時也。宜理中丸以溫補其胃。

正珍曰。按論中寒字。有對熱而言者。有指留飲而言者。有指痰而言者。此條與小青龍湯條。四逆湯條。皆以留飲言者也。

〔四百七〕傷寒解後。虛羸少氣。氣逆欲吐者。竹葉石膏湯主之。者字。依成本全書。補之。

方有執曰。羸。病而瘦也。少氣。謂短氣不足以息。

金鑑曰。是治病後虛熱也。

竹葉石膏湯

竹葉二把 石膏一斤 半夏半升 麥門冬一升

人參二兩 甘草一兩 粳米半升

右七味。以水一斗。煮取六升。去滓。內粳米煮。米熟湯成。去米溫服一升。日

三服。人參二兩。玉函成本全書。作三兩。

發秘曰。竹葉。宜用生者。若夫炭苦不必拘焉。

正珍曰。外臺引集驗。有生薑四兩是當從矣。又曰。證類本草。引梁陶弘

景名醫別錄云。凡云一把者。二兩爲正。

〔四百八〕病人脈已解。而日暮微煩。以病新差。人強與穀。脾胃氣尙弱。不能消穀。故令微煩。損穀則愈。

方有執曰。脈已解。邪悉去。而無遺餘也。強與穀。謂壓其進食也。損言當節減之也。此調理病餘之要法也。

正珍曰。此卽食復之輕證。

〔新增〕病後勞復發熱者。麥門冬湯主之。

此條舊本脫落。今依玉函經補之。大病差後。妄爲勞事。因而發熱者。以血氣未復。更有所損傷也。非滋潤之劑。則不可也。故與麥門冬湯。以復其精液也。可見枳實梔子湯。果非仲景氏方也。再按勞字。據華佗傳。似專指房勞。蓋女勞復之病已。三國志華佗傳曰。故督郵頓子獻。得病已差。詣佗視脈。曰。尙虛未得復。勿爲勞事。御內卽死。臨死當吐舌數寸。其妻聞其病除。從百餘里來省之。止宿交接。中間三日發病。一如佗言。

麥門冬湯方

麥門冬七升

半夏一升

人參二兩

甘草二兩

粳米三合

大棗十二枚

右六味。以水一斗六升。煮取六升。溫服一升。日三夜一服。

## 傷寒論集成跋

傷寒論之爲書也。實是周漢古醫方。而長桑君之禁方。公乘陽慶之所傳於倉公者。亦恐不出於此矣。不然則周漢醫人。將以何等方爲治病邪。漢志所謂經才之類無疑也。仲景宿尚方術。勤求古訓。博采衆方。爲傷寒雜病論。定立萬世不易之法。究極寒熱虛實之原。於此乎。治術之規矩始備矣。王氏謂仲景垂妙於定方。豈是之謂乎。是以古今醫人。不法仲景而爲治病。則譬猶不以規矩而爲方員。不以準繩而爲平直。其不橢且曲者。未之有也。然則仲景氏醫家之繩墨也。程氏曰。千手千眼大慈大悲張仲景夫子。豈不其然乎。雖然。其書殘缺。簡錯不鈔。太醫令王叔和。得以撰次。雜以自己謬說。遂失仲景氏之真面目。悲乎哉。成無已以下註家。各各爲說。愈益失仲景氏之本旨。乖錯極多。紕繆殊甚矣。吾先師圖南山田先生。深憂其如此。朝研夕究。積思數年。終闡發仲景立法之微意。因以刪定本論。解釋經旨。並載諸家之說。著集成十有一卷。以匡時俗謬誤。補前人不足。而後寒熱虛實之原。補瀉清涼之法。彰然復明於世矣。至如其註中曰。少陽篇綱領。後人僞託。曰厥陰篇亡而不傳。則古今註家。皆所未論及。而論之精覈。實可謂不誣矣。其他至方名之末。皆徵之古書。質之事實。雖書不

考究焉。其書藏之篋笥。以此教諭弟子。弟子日進。杏花之教。將風靡天下矣。不幸天奪之壽。天明丁未春。疾肺而逝。嗚呼傷哉。乃開廚中閱其書。亦唯草創未訂之書。又何上之。梨棗。因請其尊大人宗圓先生。與中林俊庵等三四校正。始能成編。可以傳後世矣。宗圓先生曰。命諸剞劂。以繼家俊之志。俊庵應曰。唯唯。因記其言於卷尾。并述傷寒論之爲古醫方以爲跋云。寬政壬子秋九月十五日。土佐醫官笠原方恆雲仙謹識。